



kat. komp.

38797

Man. St. Br.

P




1. flor.

1879. I. 103.


poln. Teol. 6023.















Ad Usam Lud. Melini Cant. Lovicini  
Brunsberg 1769.









*Parvulus Bant.*

# OCTAVARIUM ROMANUM, SIVE OCTAVÆ FESTORUM;

Lectiones secundi scilicet, & tertii Nocturni singulis  
diebus recitandæ infra Octavas Sanctorum Titu-  
larium, vel Tutelarium Ecclesiarum, aut  
Patronorum locorum,

A SACRA RITUUM CONGREGATIONE  
ad usum totius Orbis Ecclesiarum approbatæ.

*Omnia suis locis in hac editione extensa, à mendis pluri-  
mis expurgata, & candori originali restituta;*

*Ac ne error in Officio recitando obrepat, notavimus in  
singulis Rubricis Octavarum propria Festa Sancto-  
rum novissimè occurrentia.*

*Ad Usum Ludov. Meline San. Srov.*



BRUNSBURGÆ, MDCCXLV.  
Ex Typographia Collegii Societatis JESU.



LIBRARY  
OF THE  
MUSEUM

Sectiones secundae, libere, & tunc Nocturni singulis  
diebus recitanda in his Orationibus, & in  
hymnis, vel in psalmis, & in  
Lamentationibus, &c.

Omnia sunt loca in hac ecclesia  
ubi expungatur, & cunctis  
sunt expungatur, & cunctis  
sunt expungatur, & cunctis



38797  
II.

In Typographia Collegii Sacerdotum Jesu



# LECTORI ECCLESIASTICO ET BENEVOLO.

## *De Origine Octavarum, causis & ritu.*

**O**ctavas, hoc est, per octo consequentes dies Festa quædam celebrandi, mos fuit antiquissimus, Origo. Hebræis primum, mox Christianæ Ecclesiæ divino consilio traditus, atque ritu perpetuo receptus. Primus Moyses, quamvis alias Festivitates non ultra septimum terminaret diem, Festum (a) tamen tabernaculorum mense septimo ita instituit, ut ejus octavus dies, æquè ac primus, haberetur celeberrimus atque sanctissimus. Deinde Salomon (b) post delatam Arcam testamenti in templum à se summo Deo dedicatum, detinuit populos diebus octo, in hostiis pacificis, & holocaustis, quos dimisit in die Octava, benedicentes Regi, lætantes, & alacri corde. Cum autem illud idem templum aliquantò post fuisset profanatum, expiavit illud Ezechias (c) Rex diebus item octo, & sanctificavit. Haud secus præstitere (d) Machabæi, qui diebus octo altare dedicarunt, offerentes holocausta magna cum lætitia, & sacrificium salutaris & laudis. Quorum omnium uti laudabiles consuetudines non modò Dei Filius in humanis degens non abolevit, sed exemplo suo confirmavit & probavit, tum ad (e) Encæniam, tum ad Scenopegiam (f) ascendens, & immorans usque ad octavum diem: in novissimo quippe die magno Festivatis stabat Jesus, & clamabat, dicens: *Si quis sitit, veniat ad me & bibat*; Spiritum sanctum octavo quia fortè die sub aquæ typo largiturus. Itaque par est credere, à Spiritu sancto doctos Apostolos & Apostolicos viros, Octavarum sacramenta ad nos usque transmississe; & pro diversorum ratione Festorum, minùs magisve celebres indixisse Octavas. Certè ab Apostolorum (g) tempore, post Dominicam diem, quæ frequentissima est Resurrectionis Domini Octava; & ut habet sanctus (h) Ignatius, Regina est & dierum Princeps, cœptæ sunt coli Paschatis Octavæ & Pentecostes; ita ut, retentis nominibus, quæ apud Hebræos erant in usu,

Levit. 23.

3. Reg. 8.

1. Paral. 19.

1. Machab. 4.

Joann. 10.

Joann. 7.

Apoc. 1.

Epist. ad

Magnet.

Baron. anno

Domini 58.



augustiora tamen mysteria, quæ nova erant in illis, celebrarentur; nimirum Crucis & Resurrectionis Dominicæ in Paschate, & adventûs Spiritus sancti Paracliti in Pentecoste. Atque eadem ratione, qua Apostoli prædicta Festa servanda decreverunt, qui iisdem successerunt Apostolici viri reliquos dies Festos cum Octavis introduxerunt, ut celebriores solemnitates etiam Octavarum additione illustrarent: sanctè & piè mutuato ritu ab antiquis Judæorum ritibus, ut in aliis multis testatur sanctus (a) Leo Papa. Ejusmodi fuere Festa Nativitatis & Epiphaniæ Domini, de quorum Octavis meminit Ordo Romanus, editus in lucem, Stephano Summo Pontifice, Pipino, seu Carolo Magno procurante. Octavarum Ascensionis Domini, quod est Festum antiquissimum, non puto recens institutum; de quibus (b) Radulphus Tungrensis mentionem facit, (c) Urbanus IV. instituisse videtur, vel certè firmasse Octavas Corporis Christi. Porro dividit (d) Radulphus alias Octavas in majores & minores; majores vocat, Assumptionis & Nativitatis beatæ Mariæ virginis, nec non Apostolorum Petri & Pauli; minores verò, Andreæ, Laurentii, Martini, & penes Carthusienses, Joannis Baptistæ. (e) Amalarius antiquior Radulpho novit Octavas SS. Stephani, Joannis Evangelistæ, & Innocentium. Indicat etiam, inter majores haberi Sanctorum omnium Octavam, manuscriptus Codex antiquus citatus à (f) Baronio. Sancivit (g) Papa Felix hoc nomine quartus, ut per octo dies Dedicatio colatur Ecclesiarum; quam à Constantino edictam, & à sancto Silvestro indictam per octo dies, scribunt (h) sanctus Athanasius & Sozomenus. Denique Patronos locorum, & Titulares Ecclesiarum, in sua quaque Ecclesia locové solemnī pompa concelebratos, docet (i) Auctor Micrologi, qui Gregorio VII. synchronus, & Anselmi Lucensis familiaris fuit. Imò verò insigni miraculo, quadringentis & amplius annis, præbuisse Deum populo terræ siccum iter in mari per tria millia septem diebus, ad Festa nimirum S. Clementis Papæ cum Octavis peragenda, (k) S. Ephræm Episcopus & martyr, & S. Gregorius Turonensis constanter tradunt. Et hæc de origine.

Causa.

Cæterum quis neget, haud temerè, sed divino prorsus con-

a Serm. 7. de  
jejunio se-  
ptimi men-  
sis.

b Hittorp. de  
Divin. Offic.  
in Præfat.

c Propos. 19.  
ante annum  
1400.

d Anno Do-  
mini 1262.

e Ubi supra.

f Circa an-  
num Domi-  
ni 830. l. 4.  
c. 37.

g In Not. ad  
Martyrolog.

h 2. Novemb.

i De con-  
secr. dist. 1.

j c. 17.

k Apol. 2.  
lib. 2 c. 16.

l Circa an-  
num Domi-  
ni 1080.

m Anno 102.  
ac 516.



confilio Octavas esse adinventas? Neque solum ob eam  
 causam, quam attigimus, ut celebritas esset illustrior; sed  
 quia mystica sunt ea, quæ octonario notantur numero in  
 sacris Litteris, eaque multa mysteriis scatent & quamplu-  
 rimis; nempe, quod in Arca Noe octo tantum animæ sal-  
 væ factæ sunt per aquam, ut beati (a) Petri verbis utar: a 1. Petri 3.  
 quod item, qui primus (b) erat Noe, octavum tamen ju- b 2. Petri 2.  
 stitiæ præconem idem appellat Petrus. Quid, quod in tem-  
 plo (c) Ezechieli demonstrato, octo cubitorum erat vesti- c Ezech. 40.  
 bulum Orientalis portæ? Quid, quod octo gradibus ad e-  
 amdem & Australem portam ascendebatur? Quid, quod  
 ibidem super octo mensas immolabatur? Quid, quod à  
 Moyse (d) Tabernaculi foederis ea pars, quæ Occidenta- d Exod. 26.  
 lem respiciebat plagam (Roma Occidentalis est) octo con- 36.  
 stabat tabulis? Taceo prædefinitum Octavum (e) diem cir- e Gen. 7.  
 cumcisioni, oblationi pecorum, altaris expiationi, Sacerdo- Exod. 22.  
 tum consecrationi, emundationi leproforum & semini fluo- Ezech. 43.  
 rum. Cur quibusdam Psalmis Octavæ titulus datus? Cur Levit. 9. 14.  
 pro octava in citharis octo chordarum, si (f) Ruperto cre- 15.  
 dimus, modulatio præcepta ab eo qui inter filios Isai octa- Psalm. 68 & 11.  
 vus fuit, ab Isai neglectus, à Deo, quia octavus, electus? 1. Paralip. 15.  
 Pro pace Christi tempore danda, habes in (g) Michæa octo f Serm. de  
 primates homines? vel, ut legit (h) Ambrosius octo mor- Div. Off. 5.  
 sus hominum: & à (i) Salomone mandatum accipis dare 1. Reg. 16.  
 partem septem, nec non & octo. Quibusdam? Difficilis g Mich. 5.  
 planè locus. Ambrosius (k) dixit, fortasse benedictionibus, h Epist. 39.  
 seu, quod idem est, octo beatitudinibus. Et quidem Pytha- i Eccl. 11.  
 gorici justiciam (l) hoc numero significabant; quia primus k Serm. in  
 omnium ita solvitur in numeros pariter pares, hoc est, in Lucæ 6.  
 bis quaterna, ut nihilominus in numeros æquè pariter pa- l Varro 1.  
 res divisio quoque ipsa solvatur, hoc est, in bis bina. Et de Somno  
 quia (m) ex his apparet, quanta & partium suarum, & se- m Silva Al-  
 orsum sua plenitudine nitatur, plenum hunc vocavere num- legor.  
 merum, quippe qui efficit cubum, corporeæ soliditatis in-  
 dicium. Adde, ad ipsam cœli harmoniam hunc unum nu-  
 merum aptissimum esse, quod & in musicis verum est:  
 octo enim sphaeræ sunt quæ moventur, reliquæ sunt im-  
 mobiles. Sed absit (cum (n) Ambrosio loquar dispu- n Epist. 39.  
 tante de septenario) absit, inquam, ut Pythagorico & Phi-  
 losopho-



## VI

losophorum more ista tractemus, & non secundum formam & divisionem gratiæ spiritualis: tamen si hactenus plenitudinem concentumque justitiæ in octava significavimus.

a in Psalm.  
118.

Itaque sanctus (a) Hilarius hæc tradit: *Consummatio doctrinae & eruditionis nostra sub perfecti hujus numeri absolute ne concluditur; ante quem neque munda Deo hostia fuit, neque in generis familia quis, cessante circumcissione, susceptus est, & ex quo rursus iteranda generationis cepit exordium.* Clemens

b Lib. 6.  
Strom.

autem (b) Alexandrinus, Octo, ait; *qui est primus cubus, est equalitas in omnibus dimensionibus, longitudinis, latitudinis, &*

c Ephes. 3.

*altitudinis.* An earum quoque, de quibus sanctus (c) Paulus ad Ephesios? sed fusiùs enarrantem audiamus sanctum

d Enarr. 2.  
ad Oron-  
tianum.

(d) Ambrosium: *Qui octava die regenerationis sortitur mysteria, consecratur per gratiam, & ad hereditatem regni cælestis vocatur. Magna in virtutibus Spiritus sancti hebdomadis gratia: eadem tamen hebdomadem sonat, octoadem consecrat: in illa sonus, in ista fructus est; ideoque octavo die soluta paradiso reddidit Spiritus gratia, quos extorres sua fecerat culpa. Hebdomas veteris Testamenti est octava novi quando Christus resurrexit, & dies omnibus novæ salutis illuxit. Propterea & vetus Testamentum dedit partem octavæ in circumcissionis solemnitate: sed illa adhuc in umbra latebat. Venit sol justitiæ, & consummationis passionis propriæ revelavit sui luminis radios, quos retexit omnibus, & vitæ claritatem aperuit æternæ. Præclariùs infra, prænaratis septem ætatibus humanæ vitæ, Octava, inquit, unam & perpetuam ætatem invehit; qua excrevimus in virum perfectum, in agnitione Dei, fidei plenitudine, in qua legitime ætatis mensura impletur. Septima mundi ætas conclusa est, octava illuxit gratia, quæ fecit hominem jam non hujus mundi esse, sed supra mundum.* Sanctus (e) Augustinus

e Lib. 1. de  
Serm. Do-  
mini in  
monte c. 3.

extremam his apponat manum: *Octava, inquit, tamquam ad caput redit, quia consummatum perfectumque ostendit ac probat. Septem sunt quæ perficiunt (erat sermo de octo beatitudinibus) octava clarificat, & quod perfectum est, demonstrat.* An igitur Octavæ nomine Patres intelligunt consummationem doctrinæ; an solidam virtutis formam? an æternam animarum beatitudinem? an corporum gloriosam resurrectionem? an gratiæ totius & gloriæ plenitudinem omnem cum claritate conjunctam? Hæc omnes omnia: qui-



quibuscum concordat Evangelium, quod octavo die du-  
 bitantem (a) Thomam fide instruit & roborat, quod per <sup>a Joan. 20.</sup>  
 octo (b) Beatitudines virtutis quasi viam sternit, quod a- <sup>b Matth. 5.</sup>  
 nimarum & corporum splendorem, immortalitatem, &  
 gloriam, in octavo quodam à Christi (c) promissione die, <sup>c Lucæ 9.</sup>  
 repræsentat in monte, quod denique non nisi (d) Jesum <sup>d Joan. 1.</sup>  
 sonat, plenum gratiæ & veritatis; nomine quoque præse-  
 ferentem multiplicem octavam, bonorum omnium ple-  
 nissimam; siquidem sex litteræ nominis ejus Græcanici  
 tantum valent, supputante Beda, quantum numerus octin-  
 gentorum octoginta octo. Dicam & ego; ut quemadmo-  
 dum à senario numero, qui laboris est, Antichristi derivat  
 nomen, cujus numerus est in (e) Apocalypsi 666. ita ab <sup>Lib. 1. Luc.</sup>  
 octonario, qui æternæ quietis est, Christi nomen, cujus <sup>cap. 8.</sup>  
 numerus 888. perpetuæ salutis nostræ mysteria portet. Ce- <sup>e Apoc. 13.</sup>  
 lebramus igitur, Octavarum titulo, Christum Jesum in  
 primis; tum doctrinam, virtutes, Beatorum gaudia, futu-  
 ram eorundem regenerationem, gloriosam immortalita-  
 tem, & cumulum bonorum omnium. *Celebretur per sep-*  
*tem dies* (audi (f) Fortunatum nomine & re) *opus septifor-* <sup>f Lib. 4. c.</sup>  
*mis Spiritus, & in octava die consummatio, & declaratio at-* <sup>29.</sup>  
*que glorificatio ejusdem operis:* & infra, in natalitiis (g) San- <sup>g Cap. 36.</sup>  
 ctorum monet debere nos gratulari receptationi anima-  
 rum in beatam requiem; in octavis deinde, resurrectioni  
 corporum.

Ideo & dies octava eodem ritu, quo prima, colitur; <sup>Ritus.</sup>  
 Moyse quoque (b) hoc ipsum præcipiente. Quòd si diver- <sup>h Levit. 23.</sup>  
 so ritu interjacentes percurras dies, non tamen minore  
 cultu, quàm extremos. Qua de re duo prorsus observan-  
 da: alterum notavit (i) Hesychius, tam extremis, quàm <sup>i Lib. 6. in</sup>  
 mediis, voluisse Moysen in prima illa octava offerri ho- <sup>Levit.</sup>  
 locausta; ut nimirum doceamur, debere nos exempla  
 Sanctorum sequi, & toto tempore vitæ, quod septenario  
 significatur, Deo placere; quousque Deo octava demum die  
 fruamur. Alterum à Radulpho (k) indicatur; dies pri- <sup>k Propof.</sup>  
 vatos infra majores Octavas reputari, quasi forent tempo- <sup>19.</sup>  
 ris Paschalis, lætitiæ quàm maximè spiritualis. Quæ cum  
 ita sint, quis dignè satis umquam colat celebretque institu-  
 tas pro meritis meritò Sanctorum Octavas? Si non vale-



mus eorum natalitia dignè venerari, quantò minùs Octavas? *Magnitudo Festi*, Radulphus (a) ait, à nobis exigit, ut & priùs illud incipiamus, & tardiùs terminemus. Priùs autem dicimur incipere, quando Vigiliæ officio Festum prævenimus; tardiùsque terminamus, cùm ad Octavam diem Festum protendimus. Præveniamus ergo, & prorogemus, ut ardentius, quos debemus, recolamus; quæve uno die minùs possumus, seu quæ ipso Festo die, heu! negligimus, reliquis diebus compensemus. Quoniã verò pro naturæ nostræ imbecillitate facilè lassescimus, & consuetudine aurium, in iisdem divinis Officiis repetendis, assuescunt & languescunt animi; ut contrà potiùs exardescant ii, Majores nostri, Spiritu sancto ducti (immutatis reliquis, ut una eademque sit solemnitas) Lectiones varias è SS. Patribus deprompsêre, tum secundi tum tertii Nocturni, quæ juvant mirificè & contra tædium, & ad excitandam pietatem. Quod utinam in omnibus Octavis contigisset fieri! desideratæ sunt enim hæctenus Sanctorum Patronorum & Titularium particularium Ecclesiarum Octavæ, infra quas eadem relegere, quæ in die Festo sunt lecta, videbatur satis grave.

Sed ecce tandem (procul esto torpor & animorum languor) ecce quas concupisti Octavas, à Sac. Rit. Congregatione atque à sanctissima Apostolica Sede approbatas, à qua haud scio, an in sacris ritibus quidquam desiderare queas, post edita jam & benè recognita Pontificale, Cærimoniale, Missale, Breviarium, & Rituale.

Exiguum est opusculum, non fuit exiguus tamen labor, ac diligentia in expiscando quandoque ex oceano sanctorum Patrum magis recondita. Audeo dicere: melius nequaquam in hoc genere Sancti Patres scripsêre. Habes indices Octavarum, & Patrum in proximis primis pagellis, quibus adjecimus Rubricas omnes quæ ad Octavas pertinent, è Breviario huc translatas, & nonnullas diverso charactere magis explicatas. Plura, fateor, potuissent dari, puta quorundam propriissima Festorum; & dedissem, nisi majorum nostrorum judicio & auctoritati, uti par est, acquievissem. Quidquid autem boni in hoc qualicumque Opere repereris, in Deum optimum maximum statim refer. Deinde habeto magnam gratiam piissimo viro & erudi-



IX

eruditissimo, bonæ memoriæ Silvio Cardinali Antoniano, qui mihi, ut facerem, demandavit sæpius; cum ille me, minus peritum, in eorum numerum cooptasset, qui Clementis VIII. auctoritate recognoscendis Romano Missali & Breviario præfecti erant: satis illi facere numquam potui, concionibus assiduus, aliisve disciplinæ Regularis negotiis semper implicitus. Curis aliquando vacuus, obtemperavi tandem. Parem etiam, imò majorem habeto gratiam oprimo & in omni doctrinæ genere præstantissimo Roberto Cardinali Bellarmino, de sacris ritibus, atque adeò de universa Ecclesia optimè merito, qui vel postremò currenti calcaria addidit, ad honorem Dei & Sanctorum, ad Ecclesiæ totius spiritale solatium, & non modicam utilitatem. Sed ô utinam edidisset tantus vir, quæ ipse jam, si non omnia, paraverat multa ad has ipsas Octavas celebrandas: quæ nescio quo fato deperdita, in nostra hæc, perdenda potius, sunt commutata. Hoc unum à te, benigne Lector, enixè peto, & quanta possum animi humilitate rogo, ut quotiescumque pro celebranda Octava pius ad hæc legenda veneris, mei quoque, miserrimi peccatoris, apud Deum reminiscaris.

*Don Bartholomæus Gavanus*  
*Clericus Reg. S. Pauli.*

Octava-



**O**ctavarium hoc à R. P. Bartholomæo Gavanto Clerico Regulari S. Pauli, celebrandis cum Octava Festivitatibus jam pridem elaboratum, ac referente bon. mem. Illustr. Card. Bellarmino, à Sacr. Rit. Congregatione non semel laudatum, probatumque, ut recitari possit, ne diutius religiosi viri desiderarent, eadem Congregatio, posse imprimi seorsum à Breviario, unanimi Illustrissimorum Patrum consensu decrevit, die 19. Februarii 1622.

Franc. Maria Card. à Monte.

Locus † Sigilli.

Jo. Bapt. Rinucinus Secret.

---

**DON JULIUS CAVALCANUS CONGREGATIONIS**  
Clericorum Regularium S. Pauli Præpositus Generalis.

**O**ctavarium Romanum, pro celebrandis cum Octava Festivitatibus, perutile opus, & Ecclesie Catholicae propè necessarium, Auctore R. P. D. Bartholomæo Gavanto, Præposito Collegii S. Pauli Bononiae, Congregationis nostrae, peritorum virorum è nostris iudicio, qui illud examinarunt, & Sacr. Rit. Congregationis Decreto laudatum & approbatum, pro eo munere quod ad nos spectat, imprimendi facultatem concedimus. In quorum fidem has manu nostra subscriptas, sigilloque nostro munitas dedimus Mediolani in Collegio nostro SS. Apostolorum Pauli & Barnabæ, die 6. Decembris 1623.

Don Julius Cavalcanus Præp. General.

Reimprimatur:

Adam Stanislaus Episcopus Varmiensis.

Heilsberge 6. Aprilis 1745.



# INDEX OCTAVARUM,

xi

Quæ habentur in hoc Octavario

PROPRIÆ.

S. sanctissimæ Trinitatis, Lectiones ii. & iii. Nocturni, pag. 1. & seqq.

Transfigurationis Domini, seu Festi Salvatoris, Lect. ii. & iii. Nocturni. 8.

Festorum S. Crucis, Lectiones ii. Nocturni. 15.

Et Lectiones iii. Noct. in Euangelia

Festorum.

Inventionis. 16.

Exaltationis. 17.

Festorum B. Mariæ, Lectiones ii. Nocturni. 18.

Et Lectiones iii. Nocturni in Euangelia

Festorum.

Purificationis. 23.

Visitationis. 26.

S. Mariæ ad Nives. 30.

Præsentationis. 35.

Dedicat. S. Michælis Archang. Lect. ii. & iii. Nocturni. 34. Et Apparit. ejusdem  
Lectiones ii. & iii. Nocturni. 40.

Andræ, Lectiones ii. & iii. Noct. 42.

Convers. S. Pauli, Lectiones ii. Noct. 47.

Matthæ. 50.

Philippi & Jacobi, Lectiones iii. Noct. 50.

Joann. ante portam Lat. Lect. iii. Noct. 51.

Barnabæ, Lect. iii. Noct. 53.

Jacobi, Lect. iii. Noct. 56.

Petri ad Vincula, Lect. iii. Noct. 58.

Barthol. ext. Rom. Lect. iii. Noct. 61. Romæ 63.

Matthæi, Lect. iii. Noct. 64.

Simonis & Judæ, Lect. iii. Noct. 68.

Festorum SS.  
Apostolorum

S. Mariæ Magdal. Lect. iii. Noct. 72.

S. Marthæ, Lect. iii. Noct. 74.

S. Francisci Xaverii Confess. 76.

S. Joannis Chrysost. Episc. & Conf. 76.

S. Isidori Episc. & Confessor. 76.

S. Leonis Papæ. 76.

S. Aniceti Papæ & mart. 78.

S. Anselmi Episc. & Confessor. 78.

S. Athanasii Episc. & Confessor. 78.

S. Monicæ viduæ. 78.

SS. Nerei &c. mart. 78.

SS. Viti &c. mart. 78.

SS. Marci & Marcelliani mart. 78.

SS. Septem Fratrum mart. 78.

S. Joannis Gualberti Abbat. 78.

S. Apollinaris Episc. & mart. 78.

S. Cajetani Thienæi Confessor. 78.

S. Donati Episc. & mart. 78.

SS. Cyriaci &c. martyrum. 78.

Decollationis S. Joannis Baptistæ. 78.

SS. Felicis & Adaucti martyrum. 79.

SS. Chrysanthi & Dariæ mart. 79.

S. Gregorii Thaumaturgi. 79.

S. Petri Coelestini Papæ & Conf. 79.

S. Basilii Episcopi & Confessoris. 79.

S. Ignatii Loyolæ Confessoris. 79.

S. Francisci Confessoris. 79.

S. Francisci Borgia Confess. 79.

S. Cællæ virginis, & martyris, 79.

S. Clementis Papæ & mart. 79.

COM-



## C O M M U N E S.

**Apostolorum, Lect. ii. Noctur. 80.**

**Euangelistarum, Lect. ii. Noctur. 87. Et Lectiones iii. Noct. 93.**

**Martyris Pontificis, Lectiones ii. Noctur. 99.**

**Et Lectiones iii. Noct. in Euangelia**

**Si quis venit ad me. 105.**

**Si quis vult post me venire. 111.**

**Martyris non Pontificis, Lect. ii. Nocturni. 117.**

**Et Lectiones iii. Noct. in Euangelia**

**Nolite arbitrari. 122.**

**Nihil est opertum. 128.**

**Nisi granum frumenti. 135.**

**Martyrum tempore Paschali, Lectiones ii. Noctur. 142.**

**Et Lectiones iii. Noct. in Euangelia**

**Ego sum vitis vera. 143.**

**Ego sum vitis, vos palmites. 148.**

**Amen dico vobis, quia. 154.**

**Plurimorum Martyrum extra tempus Pasch. Lect. ii. Noctur. 154.**

**Cum audieritis praelia. 160.**

**Descendens Jesus. 166.**

**Sedente Jesu super montem. 171.**

**Videns Jesus turbas. 177.**

**Confiteor tibi, Pater. 184.**

**Væ vobis, qui edificatis. 190.**

**Qui vos audit, me audit. 191.**

**Attendite à fermento. 192.**

**Confessoris Pontificis, Lectiones ii. Nocturni. 199.**

**Et iii. Noctur. in Euang:**

**Homo peregrin. 204.**

**Vigilate, quia nescitis. 209.**

**Nemo lucernam accendit. 214.**

**Videte, vigilate. 221.**

**Doctorum, Lectiones ii. & iii. Nocturni. 221.**

**Confessoris non Pontificis, Lect. ii. Noctur. 232.**

**Et iii. Noctur. in Euang:**

**Sint lumbi vestri. 237.**

**Nolite timere pusillus grex. 243.**

**Homo quidam nobilis. 248.**

**Abbatum, Lectiones iii. Noctur. 254.**

**Virginum & Martyrum, Lectiones ii. Noctur. 261.**

**Et iii. Noctur. in Euang:**

**Decem virginibus. 266.**

**Accesserunt ad Jesum. 272.**

**Martyrum non Virg. Lectiones ii. Noctur. 278.**

**Et iii. Noctur. in Euang. Simile est regnum cœlorum thesauro. 284.**

**Nec Virginum nec Martyrum, Lect. ii. Noctur. 291.**

**Et iii. Noctur. in Euang. Ibat Jesus in civitatem. 298.**



# KALENDARIVM FESTORVM,

Quæ in hoc Octavario habent proprias  
Octavas.

Sanctissima Trinitatis.

pag. 1.

## JANUARIUS.

- 25 Conversionis S. Pauli Apostoli. 47  
27 S. Joannis Chrysostomi Episcopi  
& Confess. 76

## FEBRUARIUS.

- 2 Purificatio B. M. virginis. 23  
24 Mathiæ Apostoli. 50

## APRILIS.

- 4 S. Isidori Episcopi & Confess. 76  
11 Leonis Papæ & Confess. 76  
17 Aniceti Papæ & mart. 78  
21 S. Anselmi Episcopi & Confess. 78

## M A J U S.

- 1 Philippi & Jacobi Apostol. 50  
2 Athanasii Episcopi & Confess. 78  
3 Inventionis S. Crucis. 16  
4 S. Monicæ Viduæ. 78  
6 Joannis ante portam Latinam. 51  
8 Apparitio S. Michælis Archangeli. 40  
12 Nerei, Achillei, Domitillæ &  
Pancratii mart. 78  
19 Petri Coelestini Papæ & Conf. 79

## J U N I U S.

- 11 Barnabæ Apostoli. 53  
14 Basilii Episcopi & Confess. 79  
15 Viti, Modesti & Crescentiæ Mar-  
tyrum. 78  
18 Marci & Marcelliani martyrum. 78

## J U L I U S.

- 2 Visitatio B. Mariæ virg. 26  
10 Septem Fratrum mart. 78  
12 Joannis Gualberti Abbatis. 78  
22 Mariæ Magdalena. 72

- 23 Apollinaris Episcopi & mart. 78  
25 Jacobi Apostoli. 56  
29 Marthæ virginis. 74  
31 Ignatii Loyolæ Confessoris. 79

## AUGUSTUS.

- 1 Petri ad Vincula. 58  
5 Dedic. S. Mariæ ad Nives. 30  
6 Transfiguratio Domini. 8.  
7 Cajetani Thienæ Confess. 78  
7 Donati Episcopi & mart. 78  
8 Cyriaci, Largi & Smaragdi mar-  
tyrum. 78  
24 Bartholomæi Apostoli extra Rom. 61  
25 Ejusdem Bartholomæi Romæ. 63  
29 Decollatio S. Joannis Baptistæ. 78  
30 Felicis & Adaucti mart. 79

## SEPTEMBER.

- 14 Exaltatio S. Crucis. 17  
21 Matthæi Apostoli & Evangelistæ. 64  
29 Dedicatio S. Michælis Archangeli. 34

## OCTOBER.

- 4 Francisci Confessoris. 79  
10 Francisci Borgia Confessoris. 79  
25 Chrysanthi & Daria mart. 79  
28 Simonis & Judæ Apost. 68

## NOVEMBER.

- 17 Gregorii Thaumaturgi Episcopi &  
Confessoris. 79  
21 Presentatio B. Mariæ virg. 33  
22 Cæcilie virg. & mart. 79  
23 Clementis Papæ & mart. 79  
30 Andreæ Apostoli. 42

## DECEMBER.

- 3 Francisci Xaverii Confess. 76.

\*\*

EX



## EX RUBRICIS

Generalibus Breviarii Romani.

## CLEMENTIS OCTAVI

Auctoritate recogniti;

Cum aliquibus Adnotationibus ad Octavas spectantibus.

## De Octavis.

**D**E Octava fit Officium, vel saltem commem. (quando aliquo Festo vel Dominica impeditur) per octo dies continuos fit de Oct. in Paschate Resurrectionis, in Ascensione Domini, in Pentecoste, in Festo Corporis Christi, in Festis, quibus in Kalend. apponitur Oct. item in Festo Dedicationis propriæ Ecclesiæ, & in Festo principalis Patroni, & Titularis loci, vel Ecclesiæ, & in Festis aliorum Sanctorum, quæ apud quasdam Ecclesias Congregat. & relig. consueverunt solemniter cum octavis celebrari: nisi illa Festa venerint in Quadrag. quo tempore omittitur Offic. cujuscunque Oct. Quod si aliquod Festum, quod celebrari solet cum Oct. paulò ante Quadrag. venerit, & jam per aliquot dies factum sit Offic. de ejus Octava, adveniente Quadragel. nihil ampliùs fiat de ea, nec commemoratio, & idem servetur de Octavis nondum absolutis, quando supervenit Festum Pentec. & dies 16. Decembris.

In Pascha Resurrect. & Pentec. Offic. Oct. terminatur in Sabb. sequenti ad Nonam. *Videsne, quòd solemnitas incipit à Sabbato sancto, & à Vigil. Penec.?*

Infra Oct. fit de Festis Duplicibus, & Semiduplicibus occurrentibus, ac etiam translatis, ut dicetur de Transl. Festorum, num. 5. cum commem. Oct. nisi illa Festa sint de solemnioribus enumeratis in Rubr. de commemorationibus, in quibus nulla fit commem. de Oct. exceptis Octavis Nativitatis, Epiphaniæ, & Corporis Christi; de quibus fit semper commem. quocunque Festo in illis occurr. Infra Oct. autem Paschæ & Pentec. non fit de Festo aliquo, etiam principali Patrono, vel Titulari Ecclesiæ,  
vel



vel Dedicat. ejusdem; sed transferrur post Oct. Infra Oct. Epiphan. fit tantum de Patrono, vel Titulari Ecclesiæ, & Dedicati-  
one ejusdem (non tamen die Octava) cum commem. Oct. Infra  
Oct. Corporis Christi fit tantum de Duplicibus, non tamen de  
translatis, cum commemor. Octavæ: de Semiduplicibus verò in-  
fra eam non fit, sed transferuntur post Oct. ut dicitur in Rubr.  
de Translatione Festorum. De Simplicibus infra quascumque O-  
ctavas occurrentibus fit tantum commem. præterquam in duo-  
bus diebus post Pascha, & Pentec. ut dicitur in Rubrica de com-  
mem. De Dominicis infra Octavas occurrentibus fit Officium, ut  
in Rubrica de Dominicis.

Si duæ Octavæ simul occurrant (ut Octava S. Joannis Baptistæ  
& Octava Corporis Christi, vel Octava Patroni Ecclesiæ cum al-  
lia Octava,) quando non erunt celebranda Festa novem Lectio-  
num, vel dies Dominicus, fiet Officium de digniori, cum com-  
mem. alterius.

1. Cave, ne pro digniori accipias eum, qui potiore habere videatur  
locum in Ecclesia, ubi octava celebratur, sed attende classes Festorum, &  
octavarum concurrentium, & in pari classe attende ordinem persona-  
rum, & earum dignitatem; puta Octava S. Laurentii cedit Octavæ S.  
Clare in Ecclesia S. Clara, non autem cedit Octavæ Assumptionis B. V.  
seu Omnium Sanctorum, Octava alicujus S. Patroni loci, seu Tituli Ec-  
clesiæ; attende quoque dignitatem ex eo titulo, ceteris paribus, quod ab  
Ecclesia universali celebratur.

De die autem Octava cujuscumque Festi fit totum Officium  
Duplex cum commem. diei infra aliam Octavam. De Festis oc-  
currentibus in die Octav. serverur, quod dicitur in Rubrica de  
Translatione Festorum.

2. Hoc est: Si in die Octava alicujus Festi habentis Octavam occurrat  
aliquod Festum Duplex ex majoribus in Rubrica de commemor. enume-  
ratis, fiat de Festo cum commem. diei Octavæ: excepta die Octava Na-  
tivitatis Domini, & Epiphania, in quibus non fit de aliquo Festo, sed  
transfertur in primam diem similiter non impeditam. Si autem non fu-  
erit ex prædictis festis, fiat de Octava, & Festum transferatur.

Officium de Oct. fit cum tribus Noct. novem scilicet Psal. &  
novem Lect. (exceptis Oct. Paschæ & Pentec. in quibus fit cum  
uno Noct. ut suis locis ponitur) & omnia dicuntur, sicut in die  
Festi, præter Lect. quarum primæ tres semper sunt de Script.  
occurr. in Officio de Temp. præterquam infra Oct. Assumpt. B.



Mariæ, in qua singulis diebus positæ sunt Lect. propriæ de Canticis canticorum: aliæ Lect. II. & III. Noctur. dicuntur quæ infra Octavam positæ sunt.

Infra Oct. verò Patroni, vel Titularis Eccl. vel alterius Festi, quod in aliquibus Ecclesiis consuevit cum Oct. celebrari, si apud illas Ecclesias non habentur propriæ, & approbatæ Lect. pro II. & III. Noct. infra Oct. repetantur Lectiones positæ in Communi Sanctorum, si de Sanctis fiat Octava, alioquin Lect. diei Festi.

### Nota pro usu hujus Octavarum.

3. Hic habentur approbatæ Lectiones pro Oct. propriis, & communibus Sanctorum: quod si in tertio Nocturno communes non deseruiant aliquibus Festis, quæ videlicet proprium habent Evangelium, eo casu, post diem Festum (in quo legi debet proprium Evangelium cum sua Homilia) in sequentibus diebus infra Octavam lege Evangelium in Missa, & Officio vel primum, vel aliud congruentius de Communi, cum suis Homiliis, ut sit infra Oct. SS. Petri & Pauli. In die verò Oct. legatur in III. Noct. ut in die festo, si propriis caret, seu communibus Lectionibus in Evangelium diei festi, nisi aliud notetur.

Infra Oct. Officium fit semiduplex, in die Oct. duplex. In Vesp. infra Octavam, omnia dicuntur, sicut in II. Vesp. Festi, & in primis Vesp. diei Octavæ omnia sicut in primis Vesp. Festi, nisi aliter in propriis locis notetur.

Infra Octavam non fiunt suffragia consueva de Sanctis, nec dicuntur Preces ad Primam, & Completorium, etiam si fiat Officium de Dominica, vel Festo Semiduplici.

### Ex Rubrica de Dominicis. IV.

De Dominicis infra Octavas Nativitatis, Epiphaniæ, Ascensionis, & Corporis Christi, fit sicut infra Octavam. In Dominicis infra alias Octavas fit de Dominica, ut in Psalterio, & in proprio de Tempore cum commem. Octavæ. De Dominica occurrente in die Octava fit tantum commemor. nisi aliud notetur.

### De Commemorationibus. IX.

De Octava, quando Festo novem Lectionum, vel Dominica impeditur, fit commemoratio, nisi illud Festum novem Lectionum fuerit solemne principale alicujus loci: & nisi fuerit dies Octava.

Idem

Idem servatur in Festis primæ classis, quod in festo solempni principali loci; ne scilicet fiat commemoratio de Octava, nec in utrisque Vesperis Festi, nec in Laudibus.

In Festis autem secundæ classis idem servatur; nisi quod in **II.** Vesperis hujusmodi Festi fit commemoratio de die infra Octavam, si de ea sequenti die faciendum sit Officium: sed de Octava Nativitatis Domini, Epiphaniæ & Corporis Christi, semper fit commemoratio in utrisque Vesperis & Laudibus quocumque Duplici infra eas adveniente.

### De Translatione Festorum, X.

Quando Festum habens Octavam transfertur, non ideò dies Octav. transferatur, sed ipsa die de ea fiat commemoratio quæ aliàs erat Octava, si Festum non fuisset translatum: quod si Festum post totam suam Octavam transferri contigerit, illo anno celebretur sine Octava, nisi Titularis Ecclesiæ privilegio aliter fieri oporteat.

Si aliquod Festum Duplex infra Octavam occurrens alio majori Festo Duplici impediatur, transferatur in primam diem similiter non impeditam, & in eo fiat commemoratio de Octava.

Festum Semiduplex occurrens in Dominicis infra illas Octavas, in quibus fit de Festis currentibus, transfertur in sequentem diem cum commemorat. Octavæ; quæ si fuerit alio Festo duplici, vel semiduplici impedita, prædictum Festum semiduplex veniens in Dominica transfertur post Octavam, ita ut Festum semiduplex infra Octavam non transferatur, nisi in proximè sequentem diem.

### De Concurrentia Officii. XI.

Duplici concurrente cum die Oct. si ejusdem sint solemnitas, regulariter à Capitulo fit de die Oct. si non sint ejusdem solemnitas: Festum majus habeat primas, & secundas Vesperas cum comm. minoris in suis Vesperis.

Duplici concurrente cum die infra Octavam omnia de duplici cum commemoratione Octavæ, nisi Duplex tuerit primæ classis.

Semiduplici concurrente cum die infra Octavam, à Capitulo fit de sequenti, & commem. præcedentis, nisi aliter signetur.

Dominica concurrente cum die inf. Oct. omnia de Dominica cum comm. seq.



Die infra Octavam concurrente cum sequente Dominica, vel Semidupl. à Capitulo fit de seq. cum commemoratione Octavæ. Cum simplici non concurrir propriè dies infra Octavam, sed fit commem. de Simplici.

Die Oct. concurrente cum alia die Octava, à Capitulo fit de sequenti, cum commemoratione præcedentis, excepta Octava Corporis Christi concurrente cum Octava S. Joannis, & quando aliter in locis propriis notatur.

Die Oct. concurrente cum seq. Duplici minori, etiam translato, à Capit. fit de sequenti cum commem. Oct. concurrente verò cum sequenti duplici majori, etiam translato, totum Officium fit de sequenti cum commemor. Octavæ, excepta die Octava Epiphaniæ, Paschæ, Ascensionis, & Corporis Christi, in quibus de sequentibus fit tantum commemoratio. Si autem sequens festum etiam translatum, fuerit ex solemnioribus enumeratis in Rubrica de Commemorationibus, num. 6. id est, secundæ classis, totum Officium fit de sequenti cum commemoratione Octavæ diei.

4. *Quid si dies Octava occurrat in Dominicis primæ, vel secundæ classis, in quibus de Octava facienda est tantum commemoratio? Utrum Vesperæ præcedentis dicenda sint de die Octava, an verò de die sequenti? Dicenda sunt Vesperæ (nisi concurrant cum alio festo præcedenti) de officio sequenti, cum commemoratione diei Octavæ, ut in primis Vesperis festi, quia cum dies Octava non habeat Officium in die sequenti, nec etiam convenit habere primas Vesperas in præcedenti, ut in simili casu dicitur de Concurrentia officii, num. 10. Et hoc rursus decrevit Sacra Congregatio Rituum, die 9. Novembris 1622.*

### De Psalmis. XXII.

In Vesperis infra Octavam dicuntur Psalmi ut in secundis Vesperis Festi: sed in primis Vesperis diei Octavæ dicuntur, ut in primis Vesperis Festi, nisi aliter notetur.

### De Lectionibus. XXVI.

Si in aliquibus Feriis Quatuor Temporum, FERIA II. Rogationum, Vigilia Ascensionis, occurrat dies Octava alicujus Festi habentis Octavam, in I. Nocturno diei Octavæ repetantur Lectiones, quæ in I. Nocturno Festi lectæ fuerunt. Si verò occurrat dies infra Octavam, tunc sumantur de Communi.

Nota

## Nota pro usu hujus Octavarum.

*r. Accidere potest in legendis Lectionibus secundi & tertii Nocturni Octavarum Communium, quæ in hoc Volumine continentur; quod ratione Festorum infra octavas occurrentium omitti debeant initia vel Sermonum, vel Homiliarum; de quibus tamen post Festum occurrens est rursus legendum: & tunc post tale Festum, non legatur titulus, De Sermone, vel De Homilia, cum nondum de iisdem lectum sit; sed dicatur simpliciter; Sermo, seu Homilia S. N. ac si esset initium Sermonis, seu Homilia; vel legatur initium ipsum in precedentibus diebus positum, prout videbitur magis congruere. Idem servetur, quando in die Octava præscribitur sumi aliquas infra octavam omissas, ob diem Dominicam, seu Festum occurrens.*

### De Responsoris brevibus Horarum. XXVIII.

Responsoria brevia, quæ ponuntur in die Festo habente Octavam, dicuntur per totam Octavam, quando fit de Octava.

### De Oratione. XXX.

Infra Octavas dicitur Oratio, ut in die Festi, similiter & in die Octava, nisi alia propria assignetur.

### De Hymno. Te Deum. XXXI.

Hymnus, Te Deum, dicitur in omnibus Festis, & per eorum Octavas, excepto Festo SS. Innocentium, nisi venerit in Dominica; dicitur tamen in ejus die Octava.

### De Symbolo S. Athanasii. XXXIII.

Non dicitur in Dominicis infra Octavas Nativitatis Domini, Epiphaniæ, Ascensionis, & Corporis Christi; in Dominicis infra alias Octavas dicitur.

### De Precibus. XXXIV.

Preces Dominicales ad Primam, & Completorium non dicuntur infra Octavas, etiam si non fiat Officium de Octava.

### De Commemorationibus Communibus. XXXV.

Suffragia de Sanctis non dicuntur infra Octavas, etiam si non fiat de Oct.



**Index Sanctorum Patrum, è quibus desumptæ sunt  
Octavarum Lectiones.**

**A**mbrosius.  
**A**thanasius.  
 Augustinus.  
**B**asilii.  
 Beda.  
 Bernardus.  
**C**yprianus.  
 Cyrillus Alexandrinus.  
**E**piphanius.  
**F**ulgentius.

**G**regorius Magnus.  
 Gregorius Nazianzenus.  
 Gregorius Nyssenus.  
**H**ieronimus.  
 Hilarius.  
**I**oannes Chrysostomus.  
 Irenæus.  
**L**eo Papa.  
**M**aximus.  
**P**etrus Chrysologus.

**ABSOLUTIONES, ET BENEDICTIONES.**

Dicendæ ante Lectiones ii. & iii. Noct. in Officio de Octava.

*In secundo Nocturno, Absolutio.*

**I**psius pietas, & misericordia nos  
 adjuvet, qui cum Patre, & Spi-  
 ritu sancto vivit & regnat in sæ-  
 cula sæculorum. **R.** Amen.

*Benedictiones.*

4 Deus Pater omnipotens sit no-  
 bis propitius & clemens.

**R.** Amen.

5 Christus perpetuæ det nobis  
 gaudia vitæ.

6 Ignem sui amoris accendat  
 Deus in cordibus nostris.

*In tertio Nocturno, Absolutio.*

**A** Vinculis peccatorum nostro-  
 rum absolvat nos omnipo-  
 tens & misericors Dominus.

**R.** Amen.

*Benedictiones.*

7 Evangelica lectio sit nobis sa-  
 lus & protectio.

8 Divinum auxilium maneat  
 semper nobiscum.

9 Ad societatem civium super-  
 norum perducatur nos Rex An-  
 gelorum.

*Si Officium sit de Octava ali-  
 cuius Sancti, octava Benedictio  
 erit,*

Cujus festum colimus, ipse,  
 vel ipsa intercedat pro nobis ad  
 Dominum.

*Quando sunt plures, dicitur,  
 Quorum, vel Quarum festum co-  
 limus, ipsi, vel ipsæ intercedant  
 pro nobis ad Dominum.*

*Si Officium sit de Octava S.  
 Mariæ, octava Benedictio erit,*

Cujus festum colimus, ipsa  
 Virgo virginum intercedat pro  
 nobis ad Dominum.

*Si in ultima lectione legendum  
 sit aliud Evangelium cum Ho-  
 milia, nona Benedictio erit.*

Per Evangelica dicta deleantur  
 nostra delicta.

**OCTA-**

# OCTAVÆ PROPRIÆ; HOC EST.

Lectiōnes propriæ pro secundo, seu tertio, seu pro utroque Nocturno, infra Octavas eorum Festorum recitandæ, quæ in Breviario Romano proprio ritu celebrantur.

## INFRA OCTAVAM SANCTISS. TRINITATIS.

*Feria secunda. Secunda die.*

*In secundo Nocturno*

Sermo sancti Athanasii Episcopi.

*In id, Omnia mihi tradita, fine.*

*Lectio iv.*

**M**irum est, impios ista nefaria audere garrire, cum & homines sint, & quæ in terra sunt, nequeant explicare. Sed quid dico, quæ in terra sunt? imò vel sua ipsorum nobis exponant, videantque num satis exploratè investigare queant, quæ ipsorum naturæ sunt. Homines profectò audaces & protervi, qui non tremant eam gloriam, in quam cupiunt Angeli proni inclinatique aspicere; cum præ illis longè sint naturâ & ordine sublimiores. Quid enim propinquius Cherubinīs & Seraphinis? Illi non obtuentur hanc Majestatem, aut in pedibus erectos se tenent, imò ne faciem quidem nudam relinquunt; sed eâ obvelatâ, gloriam Majestatemque Dei labiis numquam cessantibus extollunt, nihil aliud, quàm divinam & ineffabilem naturam triplici titulo

Octav. Rom.

Sanctitatis glorificantes.

**R.** Quis Deus magnus sicut Deus noster? \* Tu es Deus, qui facis mirabilia.

**V.** Notam fecisti in populis virtutem tuam, redemisti in brachio tuo populum tuum. Tu es.

*Lectio v.*

**N**equè est quisquam sanctorum Prophetarum inter eos, qui maximè digni habiti sunt, ut istiusmodi spectaculis interessent, qui nobis id se audisse renuntiavit, Angelos illos in primis vicibus exclamandi, Sanctus, maxima voce usos esse; in secundis autem non æquè magna; in tertiis adhuc submissiori: & primam sanctificationem propriam legitimamque esse, secundam inferioris notæ, tertiam adhuc gradatim deterioris conditionis esse. Apagesis, valeat dementia execrabilium hominum. Trinitas enim undecumque laudabilis, & venerabilis, & adoranda una est, & indivisibilis, & quæ figurâ exprimi nequeat.

**R.** Tibi laus, tibi gloria, tibi gratiarum actio in sæcula sempiterna, \* O beata Trinitas.

**V.** Et benedictum nomen gloriæ

A

tuæ



tuz sanctum, & laudabile, & superexaltatum in sæcula. O beata.

**Lectio vi.**

**C**onjunguntur autem unà hæ Sanctificationes pro insecabili illa unitate. In eo enim ipso, quo amplissima illa animantia tertio proferunt glorificationem, dum ajunt, Sanctus, Sanctus, Sanctus, triplici numero tres perfectas, absolutas, integras personas ostendunt: quemadmodum sub unica voce, Dominus, unam substantiam declarant. Hæc est enim vera doctrina, hoc est verum signum argumentumque, quod ita ista inter se consentiunt, neque dissident, vel inter Patres. Nam etsi temporibus distent, in id tamen omnes contendunt, neque immerito: unius enim Dei Prophetæ sunt, unumque & idem Verbum concorditer prædicant.

✠. Magnus Dominus, & laudabilis nimis: ✠. Et sapientiæ ejus non est numerus. ✠. Magnus Dominus, & magna virtus ejus & sapientiæ ejus non est finis. Et. Gloria Patri. Et.

**In tertio Nocturno.**

Lectio sancti Evangelii secundum Matthæum. **Lectio vii. Cap. 28.**

**I**n illo tempore: Dixit Jesus discipulis suis: Data est mihi omnis potestas in cælo & in terra. Euntes ergo docete omnes Gentes, baptizantes eos in nomine Patris, & Filii, & Spiritus sancti. Et reliqua.

Homilia sancti Hilarii Episcopi.

**Lib. 2. de Trinitate, initio.**

**S**ufficiebat quidem credentibus Dei sermo, qui in aures nostras Euangelistæ testimonio cum ipsa veritatis suæ virtute transfusus est, cum dicit Dominus: Euntes nunc docete omnes gentes, baptizantes eos in nomine Patris, & Filii, & Spiritus sancti. Quid enim in eodem Sacramento salutis humanæ non continetur? aut quid est quod reliquum sit, aut obscurum? Plena sunt omnia & perfecta, ut à pleno & perfecto. Nam & verborum significationem, & efficientiam rerum, & negotiorum ordinem, & naturæ intelligentiam comprehendunt.

✠. Benedicamus Patrem, & Filium, cum sancto Spiritu: ✠. Laudemus, & superexaltemus eum in sæcula.

✠. Benedictus es Domine in firmamento cæli, & laudabilis, & gloriosus in sæcula. Laudemus.

**Lectio viii.**

**B**aptizare jussit in nomine Patris, & Filii, & Spiritus sancti: id est, in confessione & Auctoris, & Unigeniti, & Doni. Auctor est unus omnium: unus est enim ingenuitus Deus Pater, ex quo omnia: & unus Unigenitus Dominus noster Jesus Christus, per quem omnia: & unus Spiritus sanctus, donum in omnibus. Omnia ergo sunt suis virtutibus ac meritis ordinata: una potestas innascibilis, ex qua omnia; una progenies,

genies, per quam omnia; perfectæ spei munus unum. Nec deesse quidquam consummationi tantæ reperietur, intra quam sit in Patre, & Filio, & Spiritu sancto, infinitas in æterno, species in imagine, usus in munere.

**R.** Duo Seraphim clamabant alter ad alterum: \* Sanctus, Sanctus, Sanctus Dominus Deus Sabaoth: \* Plena est omnis terra gloriâ ejus. **V.** Tres sunt, qui testimonium dant in cœlo, Pater, Verbum, & Spiritus sanctus: & hi tres unum sunt. Sanctus.

Gloria Patri. Plena. **Lectio ix.**

**S**ed compellimur hæreticorum & blasphemantium vitiis illicita agere, ardua scandere; ineffabilia loqui, inconcessa præsumere: & cum sola fide expleri, quæ præcepta sunt, oporteret, adorare scilicet Patrem, & venerari cum eo Filium, sancto Spiritu abundare; cogimur sermonis nostri humilitatem ad ea, quæ inenarrabilia sunt, extendere, & in vitium vitio coarctamur alieno: ut quæ contineri religione mentium oportuisset, nunc in periculum humani eloquii proferantur. De intelligentia enim hæresis, non de Scriptura est: & sensus, non sermo fit crimen. **Te Deû.**

Diebus infra Octavam SS. Trinitatis, ubi est Titulus Ecclesiæ, ad Primam, non dicitur Symbolum Quicumque. sed solummodo in ipso Festo, & in die Octava. S. R. C. 5. Maij. 1736.

*Feria iii. Tertia die.*

*In secundo Nocturno.*

Sermo sancti Ambrosii Episcopi.

*De dign. cond. hum. c. i.*

*Lectio iv.*

**A**nima quamdam sanctæ Trinitatis habet imaginem. Primò in eo, quia sicut Deus est, vivit, & sapit; ita anima secundum suum modum est, vivit, & sapit. Est quoque & alia Trinitas in ea, qua ad imaginem sui conditoris perfectæ quidem & summæ Trinitatis, quæ ex Patre & Filio & Spiritu sancto, condita est. Et licet unius illa naturæ, tres tamen in se dignitates habet, id est, intellectum, voluntatem & memoriam.

**R.** Quis Deus. *l. i. Lectio v.*

**N**am sicut ex Patre generatur Filius, & ex Patre Filioque procedit Spiritus sanctus: ita ex intellectu generatur voluntas, & ex his item ambobus procedit memoria, sicut facile à sapiente quolibet intelligi potest. Nec enim anima perfecta potest esse sine his tribus; nec horum trium unum aliquod, quantum ad suam pertinet beatitudinem, sine aliis duobus integrum constat. Et sicut Deus Pater, Deus Filius. Deus Spiritus sanctus est, non tamen tres Dii sunt, sed unus Deus, tres habens personas: ita & anima intellectus, anima voluntas, anima memoria; non tamen tres animæ in uno corpore, sed una anima, tres habens dignitates.



R. Tibi laus. 1.

Lectio vi.

**A**Tque in his tribus ejus imaginem mirabiliter gerit in sua natura noster interior homo, ex quibus quasi excellentioribus animæ dignitatibus jubemur diligere conditorem, ut in quantum intelligitur, diligatur; & quantum diligitur, semper in memoria habeatur. Nec solus sufficit de eo intellectus, nisi fiat in amore ejus voluntas: imò nec hæc duo sufficiunt, nisi memoria addatur, qua semper in mente intelligentis & diligentis maneat Deus: ut sicut non potest esse momentum, quo homo non utatur, vel fruatur Dei bonitate & misericordiâ, ita nullum debeat esse momentum, quo præsentem eum non habeat memoria.

R. Magnus. 2.

In tertio Nocturno.

Lectio S. Evangelii secundum Matthæum. Lectio vii. Cap. 28.

**I**N illo tempore: Dixit Jesus discipulis suis: Data est mihi omnis potestas in cælo & in terra. Euntes ergo docete omnes gentes, baptizantes eos in nomine Patris, & Filii, & Spiritus sancti. Et reliqua

Homilia S. Joannis Chrysostomi.

Ex Serm. de Trinitate, initio.

**V**ide, oro, testimonia sanctæ & consubstantialis Trinitatis, & venerare illam rectè, ne pereas. & dixit, inquit, Deus: Faciamus hominem secundum imaginem nostram. Cum quo

consilium init Deus? Cum Angelis, inquis. At non habent Angeli imaginem Dei. Loquitur autem ad coopificem Filium, & sanctum Spiritum. Audi Psalterem dicentem: Verbo Domini cæli firmati sunt, & spiritu oris ejus omnis virtus eorum. Non ignoras autem, Verbum esse Filium. Iterum & alio loco dicit Scriptura: Venite, & descendamus, & confundamus illorum lingvas. Dicendo, Venite, pares honore exhortando vocat: unius est vox ad duos honore æquales. R. Benedicamus. 2.

Lectio viii.

**A**udi quoque & beatum Job, qui manifestè declarat inseparabilem Trinitatem. Dicit enim: Vivit Dominus, qui sic me judicavit; & Omnipotens, qui amaram fecit animam meam; & Spiritus divinus, qui tenetur in naribus meis. Dicendo, Dominum, & Omnipotentem, & Spiritum Divinum, consubstantialem Trinitatem prædicat. Disce & hymnum Seraphim clamantium tertio, Sanctus, Sanctus, Sanctus: non enim dicunt semel, neque bis, neque quater; ut ne multis nominibus multos deos nobis inducerent, sed unum solum. Ter autem dicendo, Sanctus, manifestant unam & æqualem gloriam Patris, & Filii, & Spiritus sancti. Audi item & Prophetam dicentem: Spiritus Domini locutus est in me, & sermo illius in ore meo pronunciatus est: quia Deus

Deus erat sermo. Ecce, dicendo, Spiritum Domini, & Sermonem, & Dominum prædicat inseparabilem Trinitatem.

*R. Duo Seraphim. 3.*

*Paulò post. Lectio ix.*

**P**er hæc omnia unum regnum indivisibilis Trinitatis intelligere possumus. Ipse autem Deus Sermo, qui propter nos verè incarnatus, rediturus unde separatus non fuerat, dicit sanctis Apostolis suis: Ite, & docete omnes gentes, baptizantes illos in nomine Patris, & Filii, & Spiritus sancti. Obsignati sumus, sed unum signaculum est sanctæ Trinitatis, unum Baptisma. Quomodo igitur audes à Paterna substantia alienare Filium, vel Spiritum sanctum? Neque enim si alieni sunt, cum Patre debebant connumerari. Quanam ratione in Baptismo debuerunt annumerari? Enimverò, si nomen Patris solum eum, qui baptizatur, potest salvare; quare coassumuntur & creaturæ, quasi Pater non possit solus salvare? Absit. Te Deum.

*Feria 4. Quarta die.*

*In secundo Nocturno.*

Ex libro S. Cyrilli Episcopi Alexandrini contra Julianum.

*Lib. 3. paulò post initium.*

*Lectio iv.*

**U**Num & solum Deum dicebat, confitebaturque manifestè illum esse divinus Abraham, quem nominabat excelsum, & universorum nativitatis aucto-

rem, quæ in cælo & in terra. Procedente verò tempore mentem acuit, ut plus cognosceret, & tunc firmiores de Deitate sermones didicit. Non enim solum, quòd unus sit Deus, & alius præter illum nullus, didicit: sed & quod in sancta ac consubstantiali Trinitate intelligatur unius & immaculatæ naturæ plenitudo, quasi in figuris adhuc & sensibilibus docebatur.

*R. Quis Deus. 1. Lectio v.*

**S**criptum enim sic est de Abraham: Apparuit autem Deus ad quercum Mambre, sedente ipso in ostio tabernaculi sui in meridie. Cum autem suspexisset, oculis suis vidit: & ecce tres viri steterunt super eum: & videns occurrit in occursum eis, & adoravit super terram, & dixit: Domine, si inveni gratiam coram te, ne prætereas puerum tuum. Ecce manifestè inquit, apparuisse quidem illi Deum; fuisse autem tres viros qui videbantur, accurrentemque divinum Abraham non tamquam tribus dixisse: Domini, si inveni gratiam coram vobis: ne prætereatis puerum vestrum: Dominum autem singulariter nominasse tres.

*R. Tibi laus. 1. Lectio vi.*

**V**ide, obsecro, vide tres quidem fuisse qui apparuerunt, substituisse autem in propriis subsistentiis singulos, sermone consubstantialitatis in unum comprehensos, & ita dedita operâ colloquia



loquia inter se miscuisse. Verumtamen ejusmodi imagines obscuræ quidem sunt, & veritatem non satis exprimentes; quamvis miram utilitatem habeant, ut manuducant ad ea quæ mentem & sermonem nostrum excedunt. Nam unica quidem ex confesso est Deitatis natura, quæ super omnes, & per omnia, & in omnibus; dilatur autem mentaliter in sanctam Trinitatem, venerandamque ac consubstantialem, in Patrem, inquam, & Filium, & Spiritum sanctum. *R.* Magnus Dominus. 2.

*In tertio Nocturno.*

Lectio sancti Evangelii secundum Matthæum. *Lectio vii. Cap. 28.*

**I**n illo tempore: Dixit Jesus discipulis suis: Data est mihi omnis potestas in cœlo & in terra. Euntes ergo docete omnes gentes, baptizantes eos in nomine Patris, & Filii, & Spiritus sancti. Et reliqua.

Homilia S. Hieronymi Presbyt.

*Lib. 5. Coment. in Matth. in fin.*

**D**ata est mihi potestas in cœlo & in terra: Illi potestas data est, qui paulò antè crucifixus, qui sepultus in tumulo, qui mortuus jacuerat, qui postea resurrexit. In cœlo autem & in terra potestas data est, ut qui antè regnabat in cœlo, per fidem credentium regnet & in terris. Euntes autem docete omnes Gentes, baptizantes eos in nomine Patris, & Filii, & Spiritus sancti. Primum docent omnes Gentes, de-

inde doctas intingunt aquâ.

*R.* Benedicamus. 2. *Lectio viii.*

**N**on enim potest fieri, ut corpus Baptismi recipiat Sacramentum, nisi antè anima fidei susceperit veritatem. Baptizantur autem in nomine Patris, & Filii, & Spiritus sancti: ut quorum una est divinitas, una sit largitio; nomenque Trinitatis, unus Deus est. Docentes eos servare omnia, quæcumque mandavi vobis. Ordo præcipuus: jussit Apostolis, ut primum docerent universas Gentes, deinde fidei intingerent Sacramento: & post fidem ac Baptisma, quæ essent observanda, præciperent.

*R.* Duo Seraphim. 3. *Lectio ix.*

**A**c ne putemus levia esse quæ iussa sunt, & pauca, addidit: Omnia quæcumq; mandavi vobis: ut quicumque crediderint, qui in Trinitate fuerint baptizati, omnia faciant quæ præcepta sunt. Et ecce ego vobiscum sum usque ad consummationem sæculi. Qui usque ad consummationem sæculi cum discipulis se futurum esse promittit, & illos ostendit semper esse victuros, & se numquam à credentibus recessurum. *Te* Deum laudamus.

*Feria 5. Quinta die.*

*Fit de festo Sanctissimi Corp. Christi.*

*Feria 6. Sexta die.*

Si Festum SS. Trinitatis titulus est Ecclesiæ, fit ut Feriâ sexta infra Octavam Corporis Christi

iti

sti (nisi eadem die occurrat Officium duplex de præcepto) cum commemoratione Octavæ SS. Trinitatis. Ita S. Rit. Congr. 8. Junii 1709.

*Sabbato. Septima die.*

Fit de Octava Corporis Christi, cum commem. Octavæ SS. Trinitatis.

*Dominica.*

## IN DIE OCTAVA.

SS. Trinitatis.

In secundo Nocturno.

Sermo sancti Augustini Episcopi. Lib. 15. de Trinit. initio. Lectio iv.

**D**eus ipse, quem quærimus, adjuvabit, ut spero, ne sit infructuosus labor noster: & intelligamus, quemadmodum dictum sit in Psalmo sacro: Lætetur cor quærentium Dominum. Quærite Dominum, & confirmamini: quærite faciem ejus semper. Videtur enim, quod semper quæritur, numquam inveniri. Et quomodo jam lætabitur, & non potius contristabitur cor quærentium, si non potuerint invenire, quod quærunt? Non enim ait, Lætetur cor inventientium, sed quærentium Dominum. Et tamen Dominum Deum inveniri posse dum quæritur, testatur Isaias, dum dicit: Quærite Dominum. Et mox: ut inveneritis, invoke eum.

*R. Quis. 1.*

*Lectio v.*

**S**i ergo quæsitus inveniri potest, cur dictum est: Quærite faciem ejus semper? An & inventus fortè quærendus est? Sic enim

sunt incomprehensibilia requirenda, ne se existimet nihil invenisse, qui, quàm sit incomprehensibile quod quærebat, potuerit invenire. Cur ergo sic quærit, si incomprehensibile comprehendit esse quod quærit, nisi quia cessandum non est, quamdiu in ipsa incomprehensibilium rerum inquisitione proficitur: & melior meliorque fit quærens tam magnum bonum quod & invenientium quæritur, & quærendum invenitur? Nam & quæritur, ut inveniatur dulcius; & invenitur, ut quæratur avidius.

*R. Tibi laus. 1. Lectio vi.*

**S**ecundùm hoc accipi potest, quod dictum est in libro Ecclesiastico dicere Sapientiam: Qui me manducant, adhuc esurient; & qui bibunt me, adhuc sitient. Manducant enim, & bibunt, quia inveniunt: & quia esuriunt ac sitiunt, adhuc quærunt. Fides quærit, intellectus invenit: propter quod ait Propheta: Nisi credideritis, non intelligetis. Et rursus intellectus eum, quem invenit, adhuc quærit. Deus enim respexit super filios hominum, sicut in Psalmo sacro canitur: Ut videat, si est intelligens, aut requirens Deum. Ad hoc ergo debet homo esse intelligens, ut requirat Deum. *R. Magnus. 2.*

*In tertio Nocturno.*

Lectio sancti Evangelii secundùm Matthæum. *Lectio vii. Cap. 28.*

**I**n illo tempore: Dixit Jesus discipulis.



scipulis suis: Data est mihi omnis potestas in cœlo & in terra. Euntes ergo docete omnes gentes, baptizantes eos in nomine Patris, & Filii, & Spiritus sancti. Et reliqua.

Homilia sancti Basilii Episcopi.

*De vera fide. in fine.*

**T**Ria nomina seorsum singula suam peculiarem quamdam proprietatem apertè significant, quæ piè considerari in ipsis potest. Atque in Patre quidem proprietas Patris, in Filio verò proprietas Filii, in Spiritu sancto postremò sua quædam à duobus diversa proprietas: cum neque Spiritus sanctus à seipso loquatur, neque Filius à semetipso faciat quidquam: ac Pater quidem Filium mittat, Filius vero Spiritum sanctum. Sic sentimus, & sic baptizamus in Trinitatem consubstantialem, idque ex præcepto ipsius Domini nostri Jesu Christi, qui dixit: Euntes docete omnes Gentes, baptizantes eos in nomine Patris, & Filii, & Spiritus sancti: docentes eos servare omnia, quæcumque mandavi vobis.

*R. Benedicamus. 2. Lectio viii.*

**Q**uæ servantes, & charitatem erga illum habere nos demonstramus, & digni efficimur, qui in ea maneamus. Quod cum ita sit, magnoperè hortor, & oratos velim vos, fratres charissimi, ut missa istiusmodi curiosa investigatione, flagitiosaque verborum contentione, his contenti simus, quæ à sanctis viris, atque

ab ipso adeò Domino nostro Jesu Christo dicta sunt. Eaque sentiamus, quæ respondeant cœlesti vocationi: & vitam agamus Christi Evangelio convenientem, sempiternam vitam, & cœleste regnum sperantes, paratum omnibus servantibus mandata Dei & Patris, quæ sunt secundum Evangelium beati Dei Jesu Christi Domini nostri, in Spiritu sancto, & veritate. *R. Duo Seraphim. 3.*

Nona Lect. de Homilia Dominicæ infra Octavam Corporis Christi.

*Die 6. Augusti.*

## INFRA OCTAVAM TRANSFIGURATIONIS

Domini, seu Salvatoris.

In die Festo, si primæ Classis est, addatur Lectio ix. quæ sequitur, omissa illa, quæ est de Sanctis.

*S. Ioan. Chrysost. ex Homil. 57.*

**T**U verò Matthæi philosophiam, considera, qui non celavit nomina eorum qui præpositi fuerant. Quod & Joannes sapius facit, cum eximias Petri laudes verissimè ac diligentissimè describat. Nullum enim in hoc Apostolorum consortio livor, aut inanis gloria locum habebat. Primos igitur Apostolorum seorsum assumpsit. Quam ob rem eos solos accepit? quia excellentiores cæteris videlicet erant. Cur autem non illico, sed post sex dies hoc fecit? ne cæteri, scilicet discipuli, seu homines moverentur: qua de re nec eos nominavit, quos

quos accepturus erat. *Te Deum.*

*Die 7. Augusti. Secunda die.*

*Fit de S. Cajetano Confel. Duplex.*

*Die 8. Augusti. Tertia die.*

*Fit de SS. Cyriaco. &c. martyr. cum commem. Octavæ.*

*Die 9. Augusti. Quarta die.*

*In secundo Nocturno*

*Sermo sancti Hilarii Episcopi.*

*Can. 17. in Matth. Lectio iv.*

**I**N hoc facti genere fervatur & ratio, & numerus, & exemplum. Nam post dies sex gloriæ Dominicæ habitus ostenditur: sed milium scilicet annorum temporibus evolutis, regni cœlestis honor præfiguratur: tribusque assumptis, de trium origine, Sem, Cham, Japeth, futura electio populi ostenditur. Quod autem Moyses & Elias ex omni Sanctorum numero assistunt: medius inter legem, & Prophetas Christus in regno est. Cum his enim Israël, quibus testibus prædicatus est, judicabit. Simulque ut & humanis corporibus decreta esse resurrectionis gloria doceretur, cum Moyses conspicabilis adstitisset.

**R.** Inebriati sunt ab ubertate domus tuæ: **\* Et torrente voluptatis tuæ potâsti eos. V.** Quoniam apud te est fons vitæ, & in lumine tuo videbimus lumen, Et.

*Lectio v.*

**I**psæ autem Dominus fit nive ac sole candidior, supra opinionem scilicet nostram cœlestis luminis splendore conspicuus. Petro autem, ut tria illic tabernacula

fierent offerenti, nihil responderetur: nondum enim, ut in hac gloria confisteretur, erat tempus. Hunc esse Filium, hunc dilectum, hunc complacitum, hunc audiendum vox de nube significat: ut idoneus ipse præceptorum talium auctor esset, qui post sæculi damnum, post crucis voluntatem, post obitum corporeum, regni cœlestis gloriam ex mortuorum resurrectione facti confirmasset exemplo.

**R.** Præceptor, bonum est nos hic esse: **\* Faciamus hic tria tabernacula; tibi unum, Moyse unum, & Eliæ unum. V.** Non enim sciebat quid diceret. Faciamus.

*Lectio vi.*

**T**erritos deinde, & consternatos elevavit: ut solum contuerentur, quem medium constitisse inter Moysen & Eliam viderant. Ad futuri enim formam, atque ad facti fidem Moyses & Elias in monte constiterant. Silentium enim rerum gestarum, quia viderant, imperat, donec à mortuis resurgeret. Hoc enim fidei præmium reservabatur: ut honor redderetur his, apud quos non levis sola præceptorum auctoritas reperiretur. Infirmos enim sanaverat ad vocis auditum; ut cum essent Spiritu sancto repleti, tunc gestorum spiritualium testes essent.

**R.** Si ministratio mortis, litteris deformata in lapidibus, fuit in gloria, ita ut non possent intendere filii Israel in faciem Moyse pro-



propter gloriam vultus ejus, quæ evacuatur: \* Multò magis ministratio spiritus, quæ manet, erit in gloria. *V.* Amplioris enim gloriæ Christus præ Moyse dignus est habitus, quanto ampliorē honorem habet domo, qui fabricavit eam. Multò. Gloria Patri. Multò.

*In tertio Nocturno.*

Lectio sancti Evangelii secundum Matthæum. *Lectio vii. Cap. 17.*

**I**N illo tempore: Assumpsit Jesus Petrum, & Jacobum, & Joannem fratrem ejus, & duxit illos in montem excelsum seorsum: & transfiguratus est ante eos. Et reliq.

Homilia sancti Leonis Papæ.

*Ex Homilia de Transfig: Domini.*

**A**ssumpsit Jesus Petrum, Jacobum, & fratrem ejus Joannem, & conscenso cum eis seorsum monte præcelso, claritatem suæ gloriæ demonstravit: quia licet intellexissent in eo majestatem Dei, ipsius tamen corporis, quo divinitas tegebatur, potentiam nesciebant. Et ideo propriè signanterque promiserat, quosdam de astantibus discipulis non prius gustare mortem, quàm viderent Filium hominis venientem in regno suo, id est, in regia claritate, quam spiritualiter ad naturam suscepti hominis pertinentem, his tribus viris voluit esse conspicuam. Nam illam ipsius Deitatis ineffabilem & inaccessibilem visionem, quæ in æternam vitam mundis corde servatur, nullo modo mortali adhuc carne

circumdati intruere poterant & videre. *R.* Vocavit nos Deus vocatione sua sancta secundum gratiam suam, quæ manifestata est nunc, \* Per illuminationem Salvatoris nostri Jesu Christi. *V.* Qui destruxit mortem, illuminavit autem vitam in incorruptionem. Per.

*Lectio viii.*

**D**icente Patre: Hic est Filius meus dilectus, in quo mihi benè complacui, ipsum audite, nonne evidenter auditum est. Hic est Filius meus, cui ex me & mecum esse sine tempore est? quia nec genitor genito prior, nec genitus est genitore posterior. Hic est Filius meus dilectus, quem à me non separat Deitas, non dividit potestas, non discernit æternitas. Hic est Filius meus, non adoptivus, sed proprius: non aliunde creatus, sed ex me genitus: nec de alia natura mihi factus comparabilis, sed de mea essentia mihi natus æqualis.

*R.* Deus, qui fecit de tenebris lumen replendescere, illuxit in cordibus nostris, \* Ad illuminationem scientiæ claritatis Dei in facie Jesu Christi. *V.* Exortum est in tenebris lumen rectis corde, misericors, & miserator, & justus. Ad illuminationem. Gloria Patri. Ad.

*Nona Lectio Vigilia Laurentii.*

*Die 10. Augusti. Quinta die.*

*Fit de S. Laurentio martyre.*

*Die 11. Augusti. Sexta die,*

*In*

In secundo Nocturno.

Sermo S. Augustini Episcopi.

Serm. 69. de divers. Lectio iv.

**I**nspectiunda nobis, & tractanda est, charissimi, visio, quam Dominus demonstravit in monte. Ipsa est enim, de qua dixerat: Amen dico vobis, quia sunt hic quidam de circumstantibus, qui non gustabunt mortem, donec videant Filium hominis in regno suo. Non parva quaestio est. Neque enim ille mons, regnum erat comprehensum. Quid est mons ei, qui possidet caelum? Quod non solum legimus, sed etiam oculis cordis quodammodo videmus. Regnum suum dicit, quod multis locis appellat regnum caelorum: regnum autem caelorum, est regnum Sanctorum. **R.** Inebriati sunt ab ubertate domus tuae: \* Et torrente voluptatis tuae potasti eos. \* Quoniam apud te est fons vitae, & in lumine tuo videbimus lumen. Et.

Lectio v.

**H**oc ut ostenderetur, videte, quid factum est. Dominus ipse Jesus resplenduit sicut sol, vestimenta autem ejus facta sunt candida sicut nix. Ipse Jesus quidem, ipse splenduit sicut sol, se lumen esse significans, quod illuminat omnem hominem venientem in hunc mundum. Quod est iste sol oculis carnis, hoc ille oculis cordis: & quod iste carnis, hoc ille cordibus. Vestimenta autem ejus, Ecclesia ejus. Ve-

stimenta enim, nisi ab induto contineantur, cadunt. Horum vestimentorum quaedam quasi novissima fimbria Paulus fuit. Ipse enim dicit: Ego enim sum minimus Apostolorum. **R.** Praeceptor, bonum est nos hic esse. \* Faciamus hic tria tabernacula; tibi unum, Moyse unum, & Eliae unum. \* Non enim sciebat quid diceret. Faciamus.

Lectio vi.

**M**oyse & Eliae, id est, lex & Prophetæ, quid valent, nisi cum Domino colloquantur? Nisi Domino perhibeant testimonium, quis leget legem? quis Prophetas? Videte quam breviter hoc Apostolus ait: Per legem enim cognitio peccati. Nunc autem sine lege, justitia Dei manifestata est; ecce sol: testificata a lege & Prophetis; ecce splendor. Videt hoc Petrus, & humana sapiens tamquam homo: Domine, bonum est, inquit, nos hic esse. Ut quid inde discederet ad labores, & dolores? Habens in Deum sanctos amores, & ideo bonos mores, bene sibi volebat esse. Ad hæc nihil Dominus respondit. **R.** Si ministratio mortis, litteris deformata in lapidibus, fuit in gloria, ita ut non possent intendere filii Israel in faciem Moyse, propter gloriam vultus ejus, quæ evacuatur: \* Multo magis ministratio spiritus, quæ manet, erit in gloria. \* Amplioris enim gloriæ Christus præ Moyse



II *Infra Octavam Transfigurationis Domini.*

Moyle dignus est habitus, quanto ampliore honorem habet domo, qui fabricavit eam. Multo. Gloria. Multo.

*In tertio Nocturno.*

Lectio S. Evangelii secundum Matthæum. *Lectio vii. Cap. 17.*

**I**N illo tempore: Assumpsit Jesus Petrum, & Jacobum, & Joannem fratrem ejus, & duxit illos in montem excelsum seorsum: & transfiguratus est ante eos. Et reliqua.

Homilia S. Hieronymi Presbyt.

*Lib. I Comment. in Matth. c. 17.*

**Q**Uæritur, quomodo post dies sex assumpserit eos, & duxerit in montem excelsum seorsum, cum Lucas Evangelista octonarium numerum ponat. Sed facilis responsio est: quia hic medii ponuntur dies, ibi primus additur & extremus. Non enim dicitur: Post dies octo: sed die octavo. Duxit illos in montem. Ducere ad montana discipulos pars regni est. Ducuntur seorsum, quia multi vocati, pauci verò electi. Et transfiguratus est ante eos. Qualis futurus est tempore judicandi, talis apparuit Apostolis.

**R.** Vocavit nos Deus vocatione sua sancta secundum gratiam suam, quæ manifestata est nunc,\* Per illuminationem Salvatoris nostri Jesu Christi. *℣.* Qui destruxit mortem, illuminavit autem vitam in incorruptionem. Per.

*Lectio viii.*

**Q**Uod autem dicit, Transfiguratus est ante eos, nemo putet, pristinam eum formam & faciem perdidisse, vel amisisse corporis veritatem, & assumpsisse corpus vel spiritale, vel æereum: sed quomodo transformatus sit, Evangelista demonstrat, dicens: Et resplenduit facies ejus sicut sol, vestimenta autem ejus facta sunt alba sicut nix. Ubi splendor faciei ostenditur, & candor describitur vestium, non substantia tollitur, sed gloria commutatur. Transformatio splendorem addidit, faciem non subtraxit. **R.** Deus, qui fecit de tenebris lumen splendescere, illuxit in cordibus nostris,\* Ad illuminationem scientiæ claritatis Dei in facie Jesu Christi. *℣.* Exortum est in tenebris lumen rectis corde, misericors, & miserator, & justus. Ad illuminationem. Gloria Patri. Ad.

*Pro SS. Martyribus Tiburtio & Susanna. Lectio ix.*

**T**IBURTIVS Chromatii Præfati Urbis filius, sancti Sebastiani operâ Christianus, cum ob eam causam ad Fabianum judicem adductus esset, multaque apud illum de Christi fide prædicaret; excandescens judex, pavimentum candentibus carbonibus sterni jubet. Mox, Tiburti, inquit, vel diis nostris sacrifices, oportet, vel per istos carbones nudis pedibus tibi incedendum est. At ille Crucis signo se mun-

niens,

niens, fidenterque ambulans in pruna: Disce, inquit, ex hoc solum esse Deum, quem Christiani colunt: prunæ enim mihi flores videntur. Quod cum magis artibus tribueretur: extra Urbem ductus Tiburtius, ac via Lavicana tertio ab Urbe lapide gladio percussus, ibi à Christianis sepelitur. Quo die Susanna virgo nobilissima, quod Galerii Maximiani, filii Diocletiani Imperatoris conjugium recusaret, ut quæ virginitatem Deo voverat, post multa tormentorum genera, quibus variè tentatum est sanctum virginis propositum, domi suæ jussu Imperatoris gladio percussa, ad duplex virginitatis & martyrii præmium migravit in cælum, Te Deum laudamus.

Die 12. Augusti. Septima die.

Fit de sancta Clara virgine. Dupl.

Die 13. Augusti.

In die Octava Transfigurationis Domini.

In secundo Nocturno.

Sermo sancti Cyrilli Episcopi Alexandrini.

Apud Metaph. post med.

Lectio iv.

**A**rbitratus fortasse beatus Petrus advenisse tempus regni Dei in monte quidem versari deligit; dieit autem tria esse facienda tabernacula, nesciens quid diceret. Non erat enim tempus consummationis sæculi, neque in præsentī tempore sunt Sancti futuri participes spei eis promissæ. Cum ergo dispensatio adhuc esset in principio, & nondum esset finita; quomodo erat consentaneum, Christum, qui venerat propter charitatem in mundum, definire.

Octav. Rom.

re pro eo velle pati? Nesciebat ergo Petrus quid diceret.

**R.** Inebriati sunt ab ubertate domus tuæ: \* Et torrente voluptatis tuæ potasti eos. **V.** Quoniam apud te est fons vitæ, & in lumine tuo videbimus lumen. Et.

Lectio v.

**C**æterum præter admirabile & carcanum Christi gloriæ spectaculum, aliquid quoque aliud factum est utile, & necessarium ad confirmandam in se fidem, non solis discipulis, sed etiam nobis ipsis. Desuper enim ex alto extitit vox Dei, & Patris, dicentis: Hic est Filius meus dilectus, in quo mihi benè complacui; ipsum audite. Et dum facta est, inquit, vox, inventus est solus Jesus. Ecce præsentē Moyse Pater jubet sanctis Apostolis, ut eum audiant, Quod si eos voluisset sequi præcepta Moysis, dixisset: Servate legem. Nunc autem ne hoc quidem dicit Deus, & Pater. Ab erat quidem Moyses, Elias autem non aderat, solus verò erat Christus. Jussit ergo ipsum audire: ipse est enim finis legis & Prophetarū. **R.** Præceptor, bonum est nos hic esse: \* Faciamus hic tria tabernacula; tibi unum, Moyse unum, & Eliæ unum. **V.** Non enim sciebat quid diceret. Faciamus. **Lectio vi.**

**P**ropterea Judæorum populum allocutus est, dicens; Si crederetis Moyse, crederetis utiq; mihi: ille enim de me scripsit. Quoniam autem & per sapien-

B

tissi-



tissimum Moysen datum præceptum contemnere, & quæ per sanctos Prophetas dicta sunt, nihil ducere perpetuò perseverarunt, jure sunt abalienati & exturbati à bonis, quæ promissa sunt ipsis patribus. Obedientia enim melior est, quàm sacrificium; & auscultatio, quàm adeps agnorum, sicut scriptum est. Et ita quidem se habent res Judæorum. Nobis autem, qui ejus adventum agnovimus, omnia omnino bona aderunt per ipsum & in ipso Christo. Per quem, & cum quo, Deo & Patri gloria & potentia, cum sancto Spiritu in sæcula sæculorum. Amen.

**R.** Si ministratio mortis, litteris deformata in lapidibus, fuit in gloria, ita ut non possent intendere filii Israel in faciem Moysi, propter gloriam vultus ejus, quæ evacuatur: \* Multò magis ministratio spiritûs, quæ manet, erit in gloria. \* Amplioris enim gloriæ Christus præ Moyse dignus est habitus, quantò ampliorem honorem habet domo, qui fabricavit eam. Multò. Gloria Patri. Multò.

*In tertio Nocturno.*

Lectio sancti Evangelii secundum Matthæum

Lectio vii. Cap. 17.

**I**N illo tempore: Assumpsit Jesus Petrum, & Jacobum, & Joannem fratrem ejus, & duxit illos in montem excelsum seorsum, & transfiguratus est ante eos. Et reliqua.

Homilia sancti Ambrosii Episcopi.

Lib. 7. in Lucam, cap. 9.

**H**ic est Filius meus dilectus. Hoc est, non Elias filius, non Moyses filius; sed hic est Filius, quem solum videtis: recesserunt enim illi, ubi cœpit Dominus designari. Vides hanc non solum insipientium, sed etiam perfectorum, imò etiam cœlestium fidem esse perfectam, Filium Dei scire. Sed quoniam hæc jam suprà diximus, cognosce nubem istam non fumigantium esse montium nebuloso humore concretam, & coacti aëris caligine piceam, quæ cœlum tenebrarum horrore subtexat: sed lucidam nubem, quæ nos non pluvialibus aquis & humentis alluvione imbrarum immadidet, sed de qua mentes hominum, voce Dei omnipotentis emissæ, ros fidei rigavit.

**R.** Vocavit nos Deus vocatione sua sancta, secundum gratiam suam, quæ manifestata est nunc, \* Per illuminationem Salvatoris nostri Jesu Christi. \* Qui destruxit mortem, illuminavit autem vitam in incorruptionem. Per. **Lectio viii.**

**I**Taque cum tres essent, unus est factus. Tres in principio videntur, unus in fine. Perfecta enim fidei unum sunt. Denique hoc etiam Dominus Patrem orat, ut omnes unum simus. Nec solum Moyses & Elias in Christo unum sunt, sed etiam nos unum corpus sumus Christi. Ergo & illi tamquam in uno corpore recipiuntur in Christi corpus: quia & nos unum

unum erimus in Christo Jesu. Aut fortassis, quia lex & Prophetæ ex verbo: quæ autem ex verbo cœperunt, in verbo desinunt. Finis enim legis est Christus, ad justitiam omni credenti.

**R.** Deus, qui fecit de tenebris lumen splendescere, illuxit in cordibus nostris, \* Ad illuminationem scientiæ claritatis Dei in facie Jesu Christi. ✠. Exortum est in tenebris lumen rectis corde, misericors, & miserator, & justus. Ad illuminationem. Gloria Patri. Ad illuminationem.

Nona Lectio de SS. Hippolyto & Cassiano martyribus.

Die 3. Maji.

**INFRA OCTAVAM INVENTIONIS S. CRUCIS.**

In die festo, si sit primæ classis, Lectio viii. terminetur ad illa verba, non se credit eis. Nona verò Lectio incitari debet ibi, Intendat, usque in finem.

Die 4. Maji. Secunda die.

Fit de S. Monica Vidua, Dupl. cum commemoratione Octavæ.

Die 5. Maji. Tertia die.

Fit de S. Pio V. Papa & Confess. Semid. cum commem. Octavæ.

Die 6. Maji. Quarta die.

Fit de S. Joanne ante portam Latinam, dupl. cum commem. Octavæ.

Die 7. Maji. Quinta die.

De S. Stanislao Episcopo & martyre, semid. cum commem. Octavæ.

Die 8. Maji. Sexta die.

De Apparitione S. Michælis Archangeli, duplex, cum commem. Octavæ.

Die 9. Maji. Septima die.

De S. Gregorio Nazianzeno Episcopo & Confess. duplex, cum commem. Octavæ.

Die 10. Maji. In die Octava,

In secundo Nocturno.

Sermo sancti Joannis Chrysostomi.

Ex Homil. 55. in Matth. post medium.

Lectio iv.

**N**eminem gloriosorum salutis nostræ signorum pudeat,

summæque bonorum, qua & vivimus, & sumus; sed ut coronam, sic Christi Crucem feramus: etenim nostra omnia per illam perficiuntur. Sive regeneratione & renovatione opus est, Crux præstò est: sive mysticus ille cibus sumendus, sive in ordinem ecclesiasticum aliqui cooptandi, sive quidvis aliud faciendum est, ubique victoriæ nostræ signum adest. Ob eamque causam illam & in ædibus, & in muris, & in foribus, & in fronte, & in mente cum magno studio depingimus, & insculpimus. Nostræ enim salutis, communisque libertatis & bonitatis Domini nostri hoc signum est. Cum ergo insigniris, tibi in mentem veniat vis omnis, quam in se Crux continet: ac tum denique iram omnesque à ratione aversos animi impetus extinxeris. **R.** Nos autem gloriari oportet in Cruce Domini nostri Jesu Christi, in quo est salus, vita, & resurrectio nostra: \* Per quem salvati & liberati sumus, alleluja. ✠. Tuam Crucem adoramus Domine, & recolimus tuam gloriosam Passionem. Per quem.

Lectio v.

**N**on enim omninò digito imprimenda, & consignanda est, sed prius voluntate, ac judicio, cum magna fide: quia sic in oculis vultuque impressa impurorū scelestorumque dæmonum nullus ad te accedere, aut in propinquo stare umquam poterit, cer-



nens gladium, quo vulnus plagamque accepit, vidensque ensem, quo mortem accepit. Si enim nos, cum loca, in quibus damnati secantur, videmus, exhorrescimus: cogita, quid eventurum sit diabolo, cum arma videbit, quibus vim potestatemque ejus omnem Christus dissolvit, serpentinaque caput amputavit. Hoc etiam signum januas clausas majorum nostrorum nostraque ætate aperuit: hoc noxia mortiferaque venena profligavit, hoc cicuta vim diluit, hoc denique venenatarum bestiarum morsus curavit. **R.** Dum sacrum pignus cœlitus revelatur, Christi fides roboratur: **\*** Ad sunt prodigia divina in virga Moyse primicus figurata, alleluja, alleluja. **✠.** Ad Crucis contactum resurgunt mortui, & Dei magnalia referantur. Ad sunt.

## Lectio vi.

**S**I enim inferorum portas aperuit, & cœlorum orbes laxavit, paradisi que aditum introitumque restituit, & diaboli nervos fregit; quid mirum videri debet, si mortifera venena, & alia ejusdem generis vincit & superat? Hoc igitur in mente tua insculpe, animorumque nostrorum salutem amplector. Crux enim hæc orbem terrarum convertit, errorem expulit, veritatem revocavit, terram cœlum fecit, homines Angelos reddidit. Hinc dæmones non jam horribiles sunt, aut metuendi, sed contemnendi:

neq; mors est mors, sed somnus. Hac abjecta sunt humi, conculcataque omnia, quæ nobis adversantur. **R.** Hoc signum Crucis erit in cœlo, cum Dominus ad judicandum venerit: **\*** Tunc manifesta erunt abscondita cordis nostri, alleluja, alleluja. **✠.** Cum sederit filius hominis in sede majestatis suæ, & cœperit judicare sæculum per ignem. Tunc. Gloria Patri. Tunc.

In tertio Nocturno.

Lectio sancti Evangelii secundum Joannem.

Lectio vii. Cap. 3.

**I**N illo tempore: Erat homo ex Phariseis, Nicodemus nomine, princeps Judæorum. Hic venit ad Jesum nocte, & dixit ei: Rabbi, scimus quia à Deo venisti magister. Et reliqua.

Homilia S. Ambrosii Episcopi. Ex Serm. 55.

**S**icut Moyses exaltavit serpentem in deserto, ita exaltari oportet Filium hominis. Unde si affixus serpens ligno filiis Israel contulit sanitatem, quanto magis salutem præstat populis Dominus in patibulo crucifixus? & si figura tantum profuit, quantum prodesse credimus veritate? Serpens igitur primus crucifigitur. Rectè planè ut quia primus apud Deum peccaverat diabolus, primus Crucis sententiâ feriretur. In ligno enim crucifigitur: rationabiliter factum; ut, quia homo in paradiso per arborem concupiscentiæ deceptus fuerat, nunc idem per ligni arborem salvaretur: atq; eadem materia, quæ causa mortis fuerat, esset remedium sanitatis.

**R.** Dulce lignum, dulces clavos, dulce pondus sustinuit: \* Quæ sola digna fuit portare pretium hujus sæculi, alleluja. **V.** Hoc signum Crucis erit in cœlo, cum Dominus ad judicandum venerit. Quæ sola. **Lectio viii.**

**D**einde post serpentem in Salvatore homo ipse crucifigitur, scilicet ut post auctorem puniatur & facinus. Per primam Crucem vindicatum est in serpentem, per secundam in venena serpentis: hoc est, primum auctor ipse punitur, deinde ejus malignitas condemnatur. Virus enim, quod persuasionem suam in hominem transfuderat, nunc rejicitur, nunc curatur. Nam cum homo passioni addicitur, non morti traditur, sed mortis in eo facinus emendatur. Hoc enim egit Dominus per hominem, quæ suscepit; ut, dum innocens patitur, prævaricationis illius diabolicæ in eo inobedientia corrigatur, & deinceps liber à culpa fieret, ac liber esset à morte. Habentes igitur Dominum Jesum, qui nos passione sua liberavit, in ipsum aspiciamus semper, & de ipsius signo speremus nostris vulneribus medicinam.

**R.** Sicut Moyses exaltavit serpentem in deserto, ita exaltari oportet Filium hominis: \* Ut omnis, qui credit in ipsum, non pereat, sed habeat vitam æternam, alleluja. **V.** Non misit Deus Filium suum in mundum, ut ju-

dicet mundum, sed ut salvetur mundus per ipsum. Ut. Gloria Patri. Ut omnis.

Pro SS. martyribus Gordiano & Epimacho. **Lectio ix.**

**G**ordianus judex, cum ad eum Januarius presbyter ut condemnaretur, sub Juliano Apostata ductus esset, ab eodem in Christiana fide instructus, cum uxore & quinquaginta tribus aliis ex eadem familia Romæ baptizatur. Quare Præfectus, legato Januario, Gordianum à Clementiano Vicario includi jubet in carcerem: qui postea eundem Gordianum, vinctum catenis ad se accersitum, cum à fidei proposito detertere non posset, plumbatis diu cæsum, capite plecti imperat. Cujus corpus ante Apollinis templum canibus objectum, noctu à Christianis via Latina sepelitur in eadem crypra, in quam reliquiae beati Epimachi martyris translatae fuerant ab Alexandria: ubi is diu propter Christi confessionem constrictus in carcere, postremò combustus, martyrio coronatus est. **Te Deum.**

Festum S. Antonini Episc. & Confess. Semiduplex, transfertur in aliam diem.

**Die 14. Septembris.**

**INFRA OCTAVAM EXALTATIONIS S. CRUCIS.**

**Die 15. Sept. Secunda die.**

Fit de die Octava Nativitatis B. Mariæ, duplex, cum commemoratione Octavæ.

**Die 16. Sept. Tertia die.**

Fit de Sanctis Cornelio & Cypriano Pontif. mart. semiduplex, cum commemor. Octavæ.

**Die 17. Sept. Quarta die.**

Fit de sacris Stigmatibus in corpore S. Francisci, semiduplex, cum commemor. Octavæ.



*Die 18. Sept. Quinta die.*

Fit de sancto Thoma de Villanova, semi-duplex, cum commemoratione Octavæ.

*Die 19. Sept. Sexta die.*

Fit de sanctis Januario &amp; sociis, duplex, cum commemoratione Octavæ.

*Die 20. Sept. Septima die.*

Fit de sanctis Eustachio &amp; sociis, duplex, cum commemoratione Octavæ &amp; Vigiliæ.

*Die 21. Sept. In Octava.*

Fit de sancto Matthæo Apostolo &amp; Evang: duplex, cum commemoratione diei Octavæ.

INFRA OCTAVAS FESTO-  
RUM B. Mariæ Virginis.

## SECUNDA DIE.

*In secundo Nocturno.*

Sermo sancti Augustini Episcopi.

*Sermone 18. de Sanctis, in medio.**Lectio iv.*

**E**Xultat Maria, & matrem se læta miratur, & de Spiritu sancto se peperisse gaudet: nec quia peperit innupta, terretur: sed quia genuerit, cum exultatione miratur. O fœmina super fœminas benedicta, quæ virum omnino non novit, & virum suo utero circumdedit! Circumdat virum Maria, Angelo fidem dando, quia Heva perdidit virum, serpenti consentiendo. O felix obedientia, ô insignis gratia! quæ dum fidem humiliter dedit, cœli in se opificem corporavit. Hinc promeruit gloriam, quam ipsa postmodum auxit. Ecce, ait, ex hoc beatam me dicent omnes generationes.

*Responsoria variant. pro varietate Fessorum.**Lectio v.*

**O** Beata Maria, quis tibi dignè valeat jura gratiarum ac laudum præconia rependere, quæ singulari tuo assensu mundo succurristi perditio? Quas tibi laudes fragilitas humani generis persol-

vat, quæ solo tuo commercio recuperandi aditum invenit? Accipe itaque quascumque exiles, quascumque meritis tuis impares gratiarum actiones: & cum susceperis vota, culpas nostras orando excusa. Admitte nostras preces intra sacrarium exauditionis, & reporta nobis antidotum reconciliationis. *Lectio vi.*

**S**it per te excusabile, quod per te ingerimus; fiat impetrabile, quod fida mente poscimus. Accipe quod offerimus, redona quod rogamus, excusa quod timeamus: quia tu es spes unica peccatorum. Per te speramus veniam delictorum, & in te Beatissima nostrorum est expectatio præmiorum. Sancta Maria succurre miseris, juva pusillanimes, refove flebiles, ora pro populo, interveni pro clero, intercede pro devoto fœmineo sexu: sentiant omnes tuum juvamen, quicumque celebrant tuam sanctam festivitatem. *vel apponatur aliud nomen Festi beatæ Mariæ, de quo fit Officium.*

## TERTIA DIE.

*In secundo Nocturno.*

Sermo sancti Bernardi Abbatis.

*Sermone in c. 12. Apocal. Lectio iv.*

**N**ovum fecit Dominus super terram, ut mulier circumdaret virum, nec alium quam Christum, de quo dicitur: Ecce vir, Oriens nomen ejus. Novum quoque fecit in cælo, ut mulier sole appareret amicta. Denique & coronavit eum, & vicissim ab eo meruit coronari. Egredimini filia

filiae Sion, & videte regem Salomonem in diademate, quo coronavit eum mater sua. Verum hoc alias. Interim sane ingredimini magis, & videte Reginam in diademate, quo coronavit eam Filius suus. In capite, inquit, ejus corona stellarum duodecim.

Leſtio v.

**D**ignum plane stellis coronari caput, quod & ipsis longè clariùs micans, ornet potius, quàm ornetur ab eis. Quidni coronent sidera, quam sol vestit? Sicut dies verni circumdabant eam flores rosarum, & lilia convallium. Nimirum læva sponsi sub capite ejus, & jam dextera illius amplexatur eam. Quis illas æstimet gemmas, quis stellas nominet, quibus Mariæ regium diadema compactum est?

Leſtio vi.

**Q**uid ergo fidereum micat in generatione Mariæ? Plane quod ex regibus orta, quod ex semine Abraham, quod generosa ex stirpe David. Si id parum videtur, adde quod generationi illi ob singulare privilegium sanctitatis divinitus noscitur esse concessa: quod longè antè eisdem patribus cœlitus repromissa, quod mysticis præfigurata miraculis, quod oraculis prænuntiata prophetis. Hanc enim sacerdotalis virga, dum sine radice floruit: hanc Gedeonis vellus, dum in medio siccae areæ maduit: hanc in Ezechielis visione Orientalis

porta, quæ nulli umquam patuit, præsignabat.

QUARTA DIE.

In secundo Nocturno.

Sermo S. Joannis Chrysostomi.

Apud Metaphrasten.

Leſtio iv

**D**Ei Filius non divitem, aut locupletem aliquam foeminam sibi matrem elegit, sed beatam virginem illam, cujus anima virtutibus ornata erat. Cum enim beata Maria supra omnem humanam naturam castitatem servaret, propterea Christum Dominum in ventre concepit. Ad hanc igitur sanctissimam Virginem & Dei matrem accurrentes, ejus patrociniis utilitatem assequamur. Itaque quæcumque estis virgines, ad matrem Domini confugite. Illa enim pulcherrimam, pretiosissimam, & incorruptibilem possessionem patrociniis suis vobis conservabit.

Leſtio v

**M**agnum revera miraculum, fratres dilectissimi, fuit beata semper virgo Maria. Quid namq; illâ majus aut illustri<sup>9</sup> ullo umquã tempore inventum est, seu aliquando inveniri poterit? Hæc sola cœlum ac terram amplitudine superavit. Quidnam illâ sanctius? Non Prophetæ, non Apostoli, non Martyres, non Patriarchæ, non Angeli, non Throni, non Dominationes, non Seraphim, non Cheruhim, non deniq; aliud quidpiam inter creatas res visibiles aut invisibiles, majus aut excellen-



tius inveniri potest. Eadem ancilla Dei est & mater: eadem virgo & genitrix.

## Lectio vi.

**H**æcejus mater est, qui à Patre ante omne principium genitus fuit, quem Angeli & homines agnoscunt Dominum rerum omnium. Visne cognoscere quantò Virgo hæc præstantior sit cœlestibus potentiis? Illæ cum timore & tremore assistunt, faciem velantes suam: hæc humanum genus illi offert, quem genuit. Per hanc & peccatorum veniam consequimur. Ave igitur mater, cœlum, puella, virgo, thronus, Ecclesiæ nostræ decus, gloria & firmamentum, assidue pro nobis precare Jesum Filium tuum & Dominum nostrum: ut per te misericordiam invenire in die iudicii, & quæ reposita sunt iis qui diligunt Deum, bona consequi possimus, gratia & benignitate Domini nostri Jesu Christi: cum quo Patri simul & sancto Spiritui gloria, & honor, & imperium nunc & semper in sæcula sæculorum, Amen.

## QUINTA DIE.

In secundo Nocturno.

Ex libro sancti Epiphanii Episc.

adversus hæreses. Lib. 3. hæresi 78.

post medium.

Lectio iv.

**B**eata mater Dei Maria per Hevam significatur, quæ per ænigma accepit, ut mater viventium vocetur. Illa etenim mater viventium vocata est, etiam postquam audivit: Terra es, & in terram reverteris, post transgres-

sionem. Et mirum est, quòd post transgressionem hoc magnum cognomen habuit. Et quod quidem pertinet ad rem sensibilem, ab illa Heva omnis hominum generatio deducta est in terra: hic autem verè à Maria hæc vita mundo genita est, ut viventem gigneret, & fieret Maria mater viventium. Per ænigma igitur Maria mater viventium appellata est.

## Lectio v.

**H**evæ datum est operire corpus sensibile propter nuditatem sensibilem: Mariæ verò datum est à Deo, ut pareret nobis Agnum & ovem, & ex gloria ipsius Agni & ovis fieret nobis velut à vellere in sapientia per virtutem ipsius indumentum incorruptibilitatis. Heva etiā mortis causa facta est hominibus: per ipsam enim mors ingressa est in mundum: Maria verò causa vitæ, per quam genita est nobis vita, & per hanc Filius Dei advenit in mundum: & ubi abundavit peccatum, ibi superabundavit & gratia: & unde illata est mors, illinc processit & vita, ut vita pro morte fieret: & qui per mulierem nobis vita factus est, mortem ex muliere inductam excluderet. Et quoniam illic Heva, cum adhuc esset virgo, per inobedientiam transgressa est: è contrario per Virginem obedientia gratiæ facta est, annuntiato adventu in carne de cœlo, & vita æterna.

Lectio

Leſtio vi.

**D**E Maria accipitur (liceat mihi hoc dicere) quod ſcriptum eſt de Eccleſia: Relinquet homo patrem ſuum & matrem ſuam, & adhærebit uxori ſuæ: & erunt duo in carne una. Sanctus autem Apoſtolus dicit: Myſterium hoc magnum eſt, ego autem dico in Chriſto & Eccleſia. Et vide Scripturarum accuratam dicendi proprietatem, quod de Adam quidem dixit, formavit: de Heva verò non formatam eſſe, ſed ædificatam. Accepit enim, inquit, unam de coſtis ejus, & ædificavit ipſi in uxorem. Quo oſtendat, Dominum quidem de Maria efformaffe ſibi ipſi corpus, ab ipſa verò coſta ædificatam eſſe Eccleſiam, in eo quòd punctum & apertum eſt ipſius latus, & myſteria ſanguinis & aquæ, pretia redemptionis facta ſunt.

SEXTA DIE.

In ſecundo Nocturno.

Sermo ſancti Cyrilli Epiſcopi Alexandrini.  
Homilia contra Neſtorium.

Leſtio iv.

**H**ilarem video cœtum Sancto-  
rum omnium, qui conven-  
runt promptis animis, à ſancta  
& Dei matre Maria ſemper vir-  
gine convocati. Laus & gloria ſit  
tibi, ſancta Trinitas, quæ omnes  
nos ad hanc celebritatem convo-  
caſti. Sit etiam tibi ſancta Dei  
Mater laus. Tu enim es pretioſa  
margarita orbis terrarum: tu  
lampas inextingvibilis, corona  
virginitatis, ſceptrum orthodo-

xæ fidei, templum indiſſolubile,  
continens eum qui nuſquam con-  
tineri poteſt; Mater, & virgo;  
per quam benedictus, qui venit  
in nomine Domini, in ſanctis  
Evangeliiſ nominatur.

Leſtio v.

**P**er te Trinitas ſanctificatur,  
per te Crux pretioſa celebra-  
tur & adoratur in toto orbe ter-  
rarum. Per te exultat cœlum,  
lætantur Angeli & Archangeli,  
fugantur dæmones, & homo ipſe  
ad cœlum revocatur. Per te om-  
nis creatura idolorum errore  
detenta, converſa eſt ad agnitio-  
nem veritatis & fideles homines  
ad ſanctum Baptiſma pervene-  
runt, atque in toto orbe terra-  
rum conſtructæ ſunt Eccleſiæ.

Leſtio vi.

**T**E adjutrice gentes veniunt  
ad pœnitentiam. Quid plu-  
ra? Per te unigenitus Dei Filius;  
vera illa lux effulſit ſedentibus  
in tenebris & umbra mortis. Per  
te Prophetæ prænuntiarunt, per  
te Apoſtoli ſalutem Gentibus  
prædicarunt. Quiſnam poterit  
tuarum laudum præconia expli-  
care, Maria mater & virgo? Hanc  
fratres dilectiſſimi, celebremus,  
ejus Filium Eccleſiæ ſponſum  
immaculatum adorantes: cui ho-  
nor & gloria in ſæcula ſæculo-  
rum. Amen.

SEPTIMA DIE.

In ſecundo Nocturno.

Ex Epiſtola S. Ambroſii Epiſcopi

ad Siricium Papam: Epiſt. 81. al. 7.

Leſtio iv.

De



**D**E via perversitatis produntur dicere: Virgo concepit, sed non virgo generavit. Potuit ergo virgo concipere, non potuit virgo generare, cum semper conceptus præcedat, partus sequatur? Sed si doctrinis non creditur sacerdotum, credatur oraculis Christi, credatur monitis Angelorum dicentium: Quia non est impossibile Deo omne verbum. Credatur symbolo Apostolorum, quod Ecclesia Romana Intemeratum semper custodit & servat. Audivit Maria vocem Angeli, & quæ ante dixerat: Quomodo fiet istud? non de fide generationis interrogans, respondit postea: Ecce ancilla Domini, contingat mihi secundum verbum tuum.

Ex libro S. Hieronymi Presbyteri adversus Jovinianum.

De Apolog. ad Pammachium, pro lib. adversus Jovinianum, in fin. *Lectio v.*

**C**hristus virgo, Mater virginis nostri virgo perpetua, mater & virgo. Jesus enim clausis ingressus est ostiis & in sepulchro ejus, quod novum & in petra durissima fuerat excisum, nec antea quis, nec postea positus est. Hortus conclusus, fons signatus; de quo fonte ille fluvius manat, juxta Joel, qui irrigat torrentem vel funium, vel spinarum: funium peccatorum, quibus antea alligabamur: spinarum, quæ suffocant sementem patrisfamilias. Hæc est porta Orientalis, ut ait Ezechiel, semper clausa & lucida,

operiens in se, vel ex se proferens sancta Sanctorum: per quam sol justitiæ & Pontifex noster secundum ordinem Melchisedech ingreditur & egreditur.

Ex libro S. Irænei Episcopi & martyris adversus hæreses. *Lib. 5. cap. 19. Lectio vi.*

**I**N sua propria veniente Domino, & sua propria eum bajulante conditione, quæ bajulatur ab ipso, & recapitulationem ejusquæ in ligno fuit inobedientiæ, per eam quæ in ligno est, obedientiam faciente, & seductione illa soluta, qua seducta est matre illa, quæ jam viro destinata erat virgo Heva; per veritatem evangelizata est bene ab Angelo jam sub viro virgo Maria. Quemadmodum enim illa per angelicum sermonem seducta est, ut effugeret Deum, prævaricata verbum ejus: ita & hæc per Angelicum sermonem evangelizata est, ut portaret Deum, obediens ejus verbo. Et sicut illa seducta est, ut effugeret Deum, sic hæc suasa est obedire Deo, ut virginis Hevæ virgo Maria fieret advocata. Et quemadmodum adstrictum est morte genus humanum per virginem, solvatur per virginem, æqua lance disposita virginalis inobedientia per virginalem obedientiam.

### IN DIE OCTAVA.

In secundo Nocturno.

De Expositione S. Gregorii Papæ in libros Regum. In 1. Regum 1. *Lectio iv.*

**F**uit vir unus de Ramathaim Sophim, de monte Ephraim. Potest hujus montis nomine beatissima

tiffima ſemper virgo Maria, Dei genitrix, deſignari. Mons quippe fuit, quæ omnem electæ creaturæ altitudinem, electionis ſuæ dignitate transcendit. An non mons ſublimis Maria, quæ ut ad conceptionem æterni Verbi pertingeret, meritorum verticem ſupra omnes Angelorum choros, uſq; ad ſolum Deitatis erexit? Huj<sup>9</sup> enim montis præcellentiſſimam dignitatem Iſaias vaticinans, ait: erit in noviffimis diebus præparatus mons domus Domini in vertice montiũ. Mons quippe in vertice montium fuit, quia altitudo Mariæ ſupra omnes Sanctos refulſit.

Ex Epiftola S. Leonis Papæ ad Pulcheriam Auguſtam. Epift. 13. ante med. Leſtio v.

**S**acramentum reconciliationis noſtræ ante tempora æterna diſpoſitum, nullæ implebant figuræ: quia nondum ſupervenerat Spiritus ſanctus in Virginem, nec virtus Altiffimi obumbraverat ei, ut & intra intemerata viſcera, ædificante ſibi Sapientia domum, Verbum caro fieret, & forma Dei ac forma ſervi in unam conveniente perſonam, Creator temporum nasceretur in tempore, & per quem facta ſunt omnia, ipſe inter omnia gigneretur. Niſi enim novus homo, factus in ſimilitudinem carnis peccati, noſtram ſuſciperet vetuſtatem, & conſubſtantialis Patri, conſubſtantialis eſſe dignaretur & Matri, naturamque ſibi noſtram ſolus à peccato liber uniret; ſub

jugo diaboli generaliter teneretur humana captivitas.

De Expoſitione S. Baſili Episcopi in Iſaiam Prophetam. In cap. 8. poſt initium. Leſtio vi.

**A**cceſſit, inquit, ad Prophetiſam & in utero accepit, & peperit Filium. Quòd Maria Prophetiſſa fuerit, ad quam proximè acceſſit Iſaias per prænotationem ſpiritus, nemo contradixerit, qui ſit memor verborum Mariæ, quæ prophetico afflata ſpiritu elocuta eſt. Quid enim ait? Magnificat anima mea Dominum: & exultavit ſpiritus meus in Deo ſalutari meo: quia reſpexit humilitatem ancillæ ſuæ: Ecce enim ex hoc beatam me dicent omnes generationes. Quod ſi animum accomodaveris univerſis ejus verbis, non utique contentioſè negaveris eam fuiſſe Prophetiſam, quòd Domini Spiritus in eam ſupervenerit, & virtus Altiffimi obumbraverit ei.

Die 2. Februarii.

## INFRA OCTAVAM PURIFIC. B. MARIÆ.

Ave Regina cœlorum. non dicitur; niſi in fine completorii ultimæ diei Octavæ, vel in qua terminatur Octava, ſi intra eam occurrat Fena quarta Cinerum.

Die 3. Februarii. Secunda die.

In ſecundo Nocturno.

Per totam hanc Octavam in ſecundo Nocturno leguntur Leſtiones, ut infra Octavas feſtorum B. Mariæ, 21. cum ſequentibus Reſponſoriis.

**R.** iv. Simeon juſtus, & timoratus expectabat redemptionem Iſrael: \* Et Spiritus S. erat in eo. \* Reſponſum accepit Simeon à Spiritu ſancto, non viſurum ſe mor-



mortem; nisi videret Christum Dominum. Et Spiritus.

**R.** v. Responsum accepit Simeon à Spiritu sancto, non visurum se mortem, nisi videret Christum Domini: \* Et benedixit Deum, & dixit: Nunc dimittis servum tuum in pace, quia viderunt oculi mei salutare tuum, Domine. **V.** Cum inducerent puerum Jesum parentes ejus, ut facerent secundum consuetudinem legis pro eo: ipse accepit eum in ulnas suas. Et benedixit.

**R.** vi. Cum inducerent puerum Jesum parentes ejus in templum, ut facerent secundum consuetudinem legis pro eo, accepit eum Simeon in ulnas suas & benedixit Deum, dicens: \* Nunc dimittis Domine servum tuum in pace. **V.** Suscipiens Simeon puerum in manibus exclamavit, dicens. Nunc. Gloria Patri. Nunc.

In tertio Nocturno.

Lectio sancti Evangelii secundum Lucam.

Lectio vii. Cap. 1.

**I**N illo tempore: Postquam impleti sunt dies purificationis Mariæ secundum legem Moysi, tulerunt Jesum in Jerusalem, ut sisterent eum Domino, sicut scriptum est in lege Domini. Et reliqua.

Homilia sancti Joannis Chrysostomi.

Est Oratio .i. inter .ii. Declam. Patrum, circa medium.

**T**Ametu virgo nulla purificatione egeret; attamen, ne lex calcari videretur, adduxerunt puerum Jesum in Jerusalem, ut sisterent eum Domino, sicut scri-

ptum est in lege Domini. Ubi corporeæ expiationis mentio habetur, ibi lex Moysi tribuitur: ubi verò oblationis sanctæ, ibi, sicut in lege Domini scriptum est, dicitur. Hoc autem discriminē ea de causa non constituitur, quasi lex Moysi non sit lex Domini (quidquid enim Propheta Spiritu sancto afflatus, de re quapiam differens loquitur, Dominus suggerit) nihilominus, quod expiatio corporeum typum præferret, Moysi sanctio appellatur.

**R.** Suscipiens Jesum in ulnas suas Simeon: exclamavit, & dixit: \* Tu es verè lumen ad illuminationem Gentium, & gloriam plebis tuæ Israel. **V.** Cum inducerent puerum Jesum parentes ejus & ipse accepit eum in ulnas suas, & benedixit Deum, & dixit. Tu es.

Lectio viii.

**C**ONtra verò, quod omne primogenitum Domino sistetur, Evangelista, quod primò ex utero enatum erat, honorans, secundum legem Domini sisti perhibet. Sicut scriptum est in lege Domini: Omne masculinum adaperiens vulvam, sanctum Domino vocabitur. Hoc decretum, & hæc lex, totaque decreti & legis ratio & causa ob eum posita est, qui uterum aperturus erat. Nulla enim sive brutorum animalium, sive hominum primogenita comperta sunt umquam, quæ aperirent vulvam; quare tantum primogenita erant. Quem autem

autem virgo peperit, is solus  
uterum aperuit.

**R.** Senex puerum portabat: puer  
autem senem regebat: \* Quem  
virgo concepit, virgo peperit,  
virgo post partum, quem genuit,  
adoravit. ✠. Accipiens Simeon  
puerum in manibus, gratias a-  
gens benedixit Dominum. Quem  
Gloria Patri. Quem.

Nona Lectio de S. Blasio Episcopo.

Die 4. Februarii. Tertia die.

Fit de S. Andrea Corsino Episc. & Conf.  
Duplex, cum commem. Octava.

Die 5. Februarii. Quarta die.

Fit de S. Agatha virg. & mart. Duplex,  
cum commem. Octava.

Die 6. Februarii. Quinta die.

In tertio Nocturno.

Lectio sancti Evangelii secundum Lucam.

Lectio vii. Cap. 2.

**I**N illo tempore: Postquam im-  
pleti sunt dies purgationis Ma-  
riæ secundum legem Moyse, tu-  
lerunt Jesum in Jerusalem, ut si-  
sterent eum Domino, sicut scri-  
ptum est in lege Domini. Et reliq.

Homilia venerabilis Bedæ Presbyt.

Tom. 7. in die Purificationis Deiparæ.

**P**recepit Dominus in lege; ut,  
qui posset agnum pro filio vel  
filia simul & turturem sive co-  
lumbam offerret; qui verò non  
sufficeret ad offerendum agnum,  
duos jam turtures, vel duos co-  
lumbæ pullos offerret. Ergo Do-  
minus noster per omnia memor  
salutis, non solum homo fieri,  
cùm Deus esset; sed etiam cùm  
dives esset, pauper fieri dignatus  
est pro nobis, ut nos sua pauper-  
tate simul & humanitate, diviti-  
arum & divinitatis suæ donaret  
esse participes.

Octav. Rom.

**R.** Suscipiens. 24. Lectio viii.

**S**ed libet paulisper intueri, cur  
hæ maximè volucres in ho-  
stiam Domini jubentur offerri.  
Nam & Abraham Patriarcha tan-  
tò ante legem has in holocau-  
stum Domini legitur obtulisse: &  
in plerisque legis cæremoniis, qui  
mundandus esset, per has jube-  
batur mundari. Columba ergo  
simplicitatem, turtur indicat ca-  
stitatem: quia & columba sim-  
plicitatis, & castitatis amator est  
turtur; ita ut si conjugem casu  
perdiderit, non aliam ultrà quæ-  
rere curet. Meritò ergo turtur &  
columba Domino offeruntur in  
hostiam, quia nimirum simplex  
& pudica fidelium conversatio  
gratum est illi sacrificium justi-  
tiæ. **R.** Senex. *suprà*

Nona Lectio de S. Dorothea.

Die 7. Februarii. Sexta die.

Fit de S. Romualdo Abbate, Dupl. cum  
commem. Octava.

Die 8. Februarii. Septima die.

Fit de S. Joanne de Matha Confess. duplex,  
cum commem. Octava.

Die 9. Februarii. In die Octava.

In tertio Nocturno.

Lectio sancti Evangelii secundum Lucam.

Lectio vii. Cap. 2.

**I**N illo tempore: Postquam im-  
pleti sunt dies purgationis Ma-  
riæ secundum legem Moyse, tu-  
lerunt Jesum in Jerusalem, ut si-  
sterent eum Domino, sicut scri-  
ptum est in lege Domini. Et reliq.

Homilia S. Joannis Chrysostomi.

Ex orat. 7. inter 17. Declam. Patrum.

**L**umen ad revelationem Gen-  
tium. Cur lumen? quia Gen-  
tes in tenebris versabantur, &  
quia rursus obscurata, tetrisque

C

pec-



peccatorum tenebris obducta, per illud illustranda, & expianda erant. Et gloriam plebis tuæ Israel. Hic gloria, illic revelatio. Hic doctrinæ initium, illic disciplinæ persecutio. Ast objecerit hic forte quispiam: dic quæso, ubinam sunt Israëlita? Ecce habes Petrum, habes Paulum, habes Joannem, habes tria millia, habes quinque millia, habes Ecclesiam Jerosolymitanam, habes eos præterea Judæos, qui inter Gentes dispersi fidem susceperant.

**R.** Suscipiens Jesum. 24.

*Lectio viii.*

**I**Taque asservabatur in populo illo fidei semen, neque simul universus pessum ivit, absit: neque simul omnes Judæi in interitum ruerunt, sed plurimi. Neque id mirum: nam & nunc quoque infelici hac rerum constitutione, beataque vocatione, multi quidem sunt vocati, pauci vero electi. Non totus itaque populus ille simul interiit, non totus depravatus est, non totus in infidelitate permansit, non totus persecutus est Apostolos. Crediderunt enim per Apostolos simul tria millia, extra mulieres & parvulos, & facta est Jerosolymis Ecclesia admodum numerosa. **R.** Senex. 25.

*Nona Lectio de S. Apollonia.*

*Die 2. Julii.*

## INFRA OCTAVAM VISITATIONIS B. MARIÆ.

*In die festo, si sit primæ classis, Lectio vii. de Homilia S. Ambrosii erit, ut in Breviar.*

*Lectio viii. terminetur ad illa verba, Numerum custodisse, Lectio ix. Non enim sola, usque ad finem, omittit Lectio SS. Processi, &c. martyrum.*

*Die 3. Julii. Secunda die.*

*In secundo Nocturno.*

*Lectioes secundi Nocturni ut supra in Festis B. Mariæ. 18. cum sequentibus Responsoriis.*

**R.** iv. Ecce iste venit saliens in montibus, transfiliens colles:

Similis est dilectus meus capræ, hinnuloque cervorum. Exultavit ut gigas ad currendam viam, à summo cœlo egressio ejus. Similis.

**R.** v. Congratulamini mihi omnes, qui diligitis Dominum, quia cum essem parvula, placui Altissimo: \* Et de meis visceribus genui Deum & hominem.

\* Beatam me dicent omnes generationes, quia ancillam humilem respexit Deus. Et de.

**R.** vi. Beata quæ credidisti, quoniam perficientur in te quæ dicta sunt tibi à Domino. Et ait Maria: \* Magnificat anima mea Dominum. \* Venite, & audite, & narrabo quanta fecit Deus animæ meæ. Magnificat. Gloria Patri. Magnificat.

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 1. d.*

**I**N illo tempore: Exurgens Maria, abiit in montana cum festinatione in civitatem Juda. Et intravit in domum Zachariæ, & salutavit Elisabeth. Et reliqua.

*Homilia sancti Ambrosii Episcopi.*

*Lib. 2. in Lucam, cap. 1.*

**M**Orale est omnibus, ut qui fidem exigunt, fidem astruant. Et ideo Angelus, cum abscon-

fcon-

condita nuntiaret, ut fidem a-  
strueret exemplo, senioris scemi-  
næ sterilisque conceptum virgini  
Mariæ nuntiavit: ut possibile Deo  
omne, quod ei placuerit, affere-  
ret. Ubi audivit hoc Maria, non  
quasi incredula de oraculo, nec  
quasi incerta de nuntio, nec quasi  
dubitans de exemplo, sed quasi  
læta pro voto, religiosa pro offi-  
cio, festina pro gaudio, in mon-  
tana perrexit. Quò enim jam  
Deo plena, nisi ad superiora cum  
festinatione contenderet? Nescit  
tarda molimina S. Spiritus gratia.  
**R.** Beatam me dicent omnes ge-  
nerationes: \* Quia fecit mihi  
Domiaus magna, qui potens est,  
& sanctum nomen ejus. ✠. Et  
misericordia ejus à progenie in  
progenies timentibus eum. Quia.

*Lectio viii.*

**D**iscite & vos sanctæ mulieres  
sedulitatem, quam prægnan-  
tibus debeatis exhibere cognatis.  
Mariam, quæ antè sola in intimis  
penetralibus versabatur, non à  
publico virginitatis pudor, non  
ab studio asperitas montium, non  
ab officio prolixitas itineris re-  
tardavit. In montana Virgo cum  
festinatione, Virgo officii memor,  
injuriam immemor, affectu urgen-  
te, non sexu, relicta perrexit do-  
mo. Discite virgines non circum-  
cursare per alienas ædes, non de-  
morari in plateis, non aliquos in  
publico miscere sermones: Maria  
in domo sera, festina in publico,  
mansit apud cognatam suam tri-

bus mensibus.

**R.** Felix namque es sacra virgo  
Maria, & omni laude dignissima:  
\* Quia ex te ortus est sol justitiæ,  
\* Christus Deus noster. ✠. Ora  
pro populo, interveni pro clero,  
intercede pro devoto scemineo  
sexu: sentiant omnes tuum juva-  
men, quicumque celebrant tuam  
sanctam Visitationem. Quia ex  
Gloria Patri. Christus.

*Lectio ix.*

**D**idicistis virgines pudorem  
Mariæ, discite humilitatem.  
Venit propinqua ad proximam,  
junior ad seniore: nec solum  
venit, sed etiam prior salutavit.  
Decet enim, ut quantò castior vir-  
go, tantò humilior sit. Noverit  
deferre senioribus: sit magistra  
humilitatis, in qua est professio  
castitatis. Est & causa pietatis, est  
etiam norma doctrinæ. Contu-  
endum est enim, quia superior  
venit ad inferiorem, ut inferior  
adjuvetur: Maria ad Elisabeth,  
Christus ad Joannem. **Te Deum.**

*Die 4. Julii. Tertia die.*

*In tertio Nocturno.*

*Lectio sancti Evangelii secundum Lucam.*

*Lectio vii. Cap. i. d*

**I**n illo tempore: Exurgens Ma-  
ria, abiit in montana cum festi-  
natione in civitatem Juda. Et in-  
travit in domum Zachariæ & sa-  
lutavit Elisabeth. Et reliqua.

*De Homilia sancti Ambrosii Episcopi.*

*Unde super, paulò post.*

**E**xultavit Joannes, exultavit  
& Mariæ spiritus. Exultante  
Joanne, repletur Elisabeth: Ma-  
riam tamen non repleti spiritu,



sed spiritum ejus exultare cognovimus. Incomprehensibilis enim incomprehensibiliter operabatur in Matre: & illa post conceptum repletur, ista ante conceptum. Benedicta tu inter mulieres. Novit sermonem suum Spiritus sanctus, nec umquam obliviscitur. Et prophetia non solum rerum completur miraculis, sed etiam proprietate verborum.

*R.* Beatam. 27. *Lectio viii.*

**Q**uis est iste fructus ventris, nisi ille, de quo dictum est: Ecce hæreditas Domini, filii; merces, fructus ventris? Hoc est, hæreditas Domini filii sunt qui merces sunt fructus illius, qui de Mariæ ventre processit. Ipse fructus ventris est flos radices, de quo benè prophetavit Isaias, dicens: Exiet virga de radice Jesse, & flos de radice ejus ascendet. Radix enim est familia Judæorum, virga Maria, flos Christus: qui veluti bonæ arboris fructus pro nostræ virtutis processu nunc floret, nunc fructificat in nobis.

*R.* Felix. 27. *Lectio ix.*

**E**T unde hoc mihi, ut veniat Mater Domini mei ad me? Non quasi ignorans dicit: scit enim esse Spiritus sancti gratiam & operationem, ut mater Prophetæ à Matre Domini ad profectum sui pignoris salutetur. Sed quasi non humani hoc meriti, sed divinæ gratiæ munus esse cognoscat, ita dicit: Unde hoc mihi? hoc est, quò tantum bonum mihi

accidit, ut mater Domini mei veniat ad me? non cognosco meritum. Unde hoc mihi? qua justitia? quibus factis? pro quibus meritis? Non usitata hæc officia foeminarum sunt. *Te Deum.*

*Die 5. Julii. Quarta die.*

*In tertio Nocturno.*

*Lectio sancti Evangelii secundum Lucam.*

*Lectio vii. Cap. i. d*

**I**N illo tempore: Exurgens Maria, abiit in montana cum festinatione in civitatem Juda. Et intravit in domum Zachariæ, & salutavit Elisabeth. Et reliqua.

*De Homilia S. Ambrosii Episcopi.*

*Unde suprâ, paulò post.*

**V**ides non dubitasse Mariam, sed credidisse, & ideò fructum fidei consecutam. Beata, inquit, quæ credidisti. Sed & vos beati, qui auditis, & creditis: quæcumque enim crediderit anima, & concipit, & generat Dei Verbum, & opera ejus agnoscit. Et ait Maria: Magnificat anima mea Dominum. Sit in singulis Mariæ anima, ut Magnificet Dominum: sit in singulis spiritus Mariæ, ut exultet in Deo. Nam etsi secundum carnem una Mater est Christi, secundum fidem tamen omnium fructus est Christus.

*R.* Beatam. 27. *Lectio viii.*

**O**mnis enim anima concipit Dei verbum, si tamen immaculata & immunis à vitiis, intemerato castimoniam pudore custodiat. Quæcumque igitur talis esse potuerit anima; magnificat Dominum, sicut anima Mariæ magnificavit Dominum, & exultavit

tavit spiritus ejus in Deo salutari suo. Non quòd Domino aliquid humana voce possit adjungi, sed quia magnificatur in nobis. Sed Mariæ, quò persona melior, eò prophetia plenior.

*R.* Felix. 27.

*Lectio ix.*

**N**ec otiosum videtur, quod & ante Joannem Elisabeth prophetat, & Maria ante Domini ortum: serpunt enim jam tentamenta salutis humanæ. Nam sicut peccatum à mulieribus cœpit; ita etiam bonum à mulieribus inchoatur: ut fœminæ quoque muliebria opera deponentes, infirmitati renuntient; & anima, quæ non habet sexum, ut Maria, quæ nescit errorem, religioso imitetur studio castitatem. *Te Deum laudamus.*

*Die 6. Julii. Quinta die.*

*Fit de die Oct. SS. Apostolorum, cum commemor. Octavæ Visitationis.*

*Die 7. Julii. Sexta die.*

*In tertio Nocturno.*

*Lectio sancti Evangelii secundum Lucam.*

*Lectio vii. Cap. i. d*

**I**n illo tempore: Exurgens Maria, abiit in montana cum festinatione, in civitatem Juda. Et intravit in domum Zachariæ, & salutavit Elisabeth. Et reliqua.

*Homilia venerabilis Bedæ Presbyteri.*

*Ex Comm. in Luc. lib. i. c. 3.*

**N**otandum, quanta Elisabeth animum gratia, Maria intrante ditavit, quem simul de præterito, præsentem, atque futuro, per prophetiæ spiritum illustravit. Dicens enim: Beata, quæ credidisti: apertè indicat, quia verba

Angeli, quæ dicta ad Mariam fuerant, per spiritum agnovit. Atque subjungens, Perficientur ea quæ dicta sunt tibi à Domino, quæ etiã eam in futuro sequerentur, prævidit. Matrem verò Domini sui nominans, quia Redemptorem humani generis in utero porteret, intellexit. *R.* Beatam. 27.

*Ex Homil. ejusdem.*

*Lectio viii.*

**E**T quia per temeritatem seductæ mulieris mors in mundum introierat, congruum fuerat, ut in indicium vitæ revertentis mulieres se devotæ humilitatis invicem ac pietatis prævenirent obsequiis. Prior ergo nobis beata Dei Genitrix ad sublimitatem patriæ cœlestis iter ostendit humilitatis, non minùs religionis, quàm castitatis exemplo venerabilis. Siquidem gloria virginei & intemerati corporis qualis sit, vita supernæ civitatis, ad quam suspiramus, insinuat. Quis enim nesciat, virginem Deo consecratam, muliere Deo dedita gradum habere potiolem? Quis dubitet, Matrem Regis æterni jure matri militis præferendam? *R.* Felix. 27.

*Lectio ix.*

**I**ntrat ergo domum Zachariæ atque Elisabeth, quam servum ac præcursores Domini parituram noverat, salutavit: non quasi dubia de oraculo, quod acceperat, sed ut congratulatura de dono, quod conservam accepisse dicerat: non ut verbum Angeli mulieris attestatione probaret,



sed ut mulieri provectæ ætatis Virgo juvencula ministerium sedula impenderet. Aperiente os ad salutandum beata Maria, repleta est mox Spiritu sancto Elisabeth, repletus est & Joannes. Aderat namque tempus, quo impleretur Angeli sermo, quem dixerat, Quia Spiritu sancto replebitur adhuc ex utero matris suæ.

**Te Deum laudamus.**

*Die 8. Julii. Septima die.*

*Fir de S. Elisabeth Regina Portugalliæ, Senudupl. cum cominem. Octava.*

*Die 9. Julii. In die Octava.*

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 1. d.*

**I**N illo tempore: Exurgens Maria, abiit in montana cum festinatione, in civitatem Juda. Et intravit in domum Zachariæ, & salutavit Elisabeth. Et reliqua.

*Homilia sancti Bernardi Abbatis.*

*De Verb. Apoc. c. 12. circa fin.*

**M**irabatur Elisabeth personam venientis, dicens: Unde hoc mihi, ut veniat Mater Domini mei ad me? Commendabat & vocem salutaris, adjiciens: ut facta est vox salutationis tuæ in auribus meis, exultavit in gaudio infans in utero meo. Et beatificabat fidem credentis. Beata, inquires, quæ credidisti. Magna quidem præconia, sed & devota humilitas, nihil sibi passa retinere, in eum magis universa refudit, cujus in se beneficia laudabantur.

**R.** Beatam. 27. **Lectio viii.**

**T**U, inquit, magnificas matrem Domini: sed, Magnificat anima mea Dominum. In vo-

ce mea filium perhibes exultasse in gaudio; sed, Exultavit spiritus meus in Deo salutari meo: & ipse quoque tamquam amicus sponsi gaudet ad vocem sponsi. Beatam me esse dicis, quæ credidi: sed credulitatis & beatitudinis causa respectus est supernæ pietatis; ut ex hoc magis beatam me dicant omnes generationes, quia ancillam humilem & exiguam respexit Deus.

**R.** Felix. 27.

**Lectio ix.**

**V**erumtamen numquid putamus fratres, Elisabeth sanctam in eo, quod per Spiritum utique loquebatur, errasse? Absit. Beata planè, quam respexit Deus, & beata, quæ credidit. Hic enim magnus divinæ respectiois extitit fructus. Ineffabili siquidem artificio Spiritus superveniens tantæ humilitati, magnanimitas tanta in secretario virginei cordis accessit; ut quod videlicet nec humilitas tanta minuit magnanimitatem, nec magnanimitas tanta humilitatem. Sed cum in sua æstimatione tam humilis esset, nihilominus & in promissionis credulitate magnanimis: ut quæ nihil aliud, quam exiguam sese reputaret ancillam, ad inscrutabile Sacramentum nullatenus se dubitaret electam, & veram Dei & hominis genitricem crederet mox futuram.

**Te Deum laudamus.**

**INFRA OCTAVAM DEDICAT. B. MARIE ad Nives.**

*Die*

*Die 6. Augusti. Secunda die.*

Fit de Transfigur. Domini, dupl. cum commem. Octava.

*Die 7. Augusti. Tertia die.*

Fit de S. Cajetano Confess. Duplex, cum commem. Octava.

*Die 8. Augusti. Quarta die.*

Fit de SS. Cyriaco &c. mart. Semid. cum commem. Octava.

*Die 9. Augusti. Quinta die.*

In secundo Nocturno.

Per totam hanc Oct in ii. Noctur. sumuntur Lect. ut infra Octavam Fectorum B. Mariæ. 18. cum sequentibus Responsoris.

**R. iv.** Sicut cedrus exaltata sum in Libano, & sicut cypressus in monte Sion: quasi myrrha electa, \* Dedi suavitatem odoris. \* Et sicut cinnamomum, & balsamum aromatizans. Dedi suavitatem.

**R. v.** Quæ est ista quæ processit sicut sol, & formosa tamquam Jerusalem? \* viderunt eam filiæ Sion, & beatam dixerunt, & reginæ laudaverunt eam. \* Et sicut dies verni circumdabant eam flores rosarum, & lilia convallium. Viderunt.

**R. vi.** Ornatam monilibus filiam Jerusalem Dominus concupivit: \* Et videntes eam filiæ Sion, beatissimam prædicaverunt, dicentes: \* Unguentum effusum nomen tuum.

\* Astitit regina à dextris tuis in vestitu deaurato, circumdata varietate. Et. Gloria. Unguentum.

In tertio Nocturno.

Lectio sancti Evangelii secundum Lucam.

Lectio vii. Cap. ii.

**I**N illo tempore: Loquente Jesu ad turbas, extollens vocem quædam mulier de turba dixit illi: Beatus venter: qui te porta-

vit. Et reliqua.

Homilia sancti Irenæi Episcopi & martyris.

Lib. 3. adversus hæreses, cap. 32.

**E**Rrant qui dicunt, Christum nihilex Virgine accepisse, ut abjiciant carnis hæreditatem, abjiciant autem & similitudinem. Hoc autem dicere est, & putativè apparuisse eum, & tamquam hominem, cum non esset homo: & factum eum hominem nihil assumentem de homine. Si enim non accepit ab homine substantiam carnis, neque homo factus est, neque filius hominis, & Apostolus Paulus in Epistola, quæ est ad Galatas, manifestè ait: Misit Deus Filium suum factum de muliere.

**R.** Felix namque es sacra virgo Maria, & omni laude dignissima: \* Quia ex te ortus est Soli justitiæ, Christus Deus noster. \* Ora pro populo, interveni pro clero, intercede pro devoto fœmineo sexu: sentiant omnes tuum juvamen, quicumque celebrant tuam sanctam festivitatem. Quia ex te. **Lectio viii.**

**E**T rursus in ea, quæ est ad Romanos, De Filio autem, inquit, ejus, qui factus est ex semine David secundum carnem, qui prædestinatus est Filius Dei in virtute, secundum spiritum sanctificationis, ex resurrectione mortuorum Jesu Christi Domini nostri. Cæterum supervacua est in Mariam descensio ejus. Quid enim in eam descendebat, si nihil



incipiebat fumere ab ea? Aut si nihil sumpisset ex Maria, numquam eas percepisset escas, per quas nutritur corpus: nec quadraginta diebus esurisset corpus ejus, suam quærens escam.

**R.** Beatam me dicent omnes generationes: \* Quia fecit mihi Dominus magna, qui potens est, & sanctum nomen ejus. \* Et misericordia ejus à progenie in progenies timentibus eum. Quia fecit. Gloria Patri. Quia.

*Nona Lect. Homil. Vig. S. Laurentii.*

*Die 10. Augusti. Sexta die.*

*Fit de S. Laurentio martyre.*

*Die 11. Augusti. Septima die.*

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 11. d*

**I**n illo tempore: Loquente Jesu ad turbas: extollens vocem quædam mulier de turba dixit illi: Beatus venter, qui te portavit. Et reliqua.

*Homilia sancti Augustini Episcopi.*

*De sancta Virginit. cap. 3.*

**Q**uid aliud nos docet Dominus, nisi carnali cognationi genus nostrum spirituale præponere: nec inde beatos esse homines, si justis & sanctis carnis propinquitate junguntur; sed si eorum doctrinæ ac moribus obediendo, atque imitando cohærescunt? Beatior ergo Maria percipiendo fidem Christi, quàm concipiendo carnem Christi. Nam & dicenti cuidam: Beatus venter, qui te portavit: ipse respondit: Imò beati, qui audiunt verbum Dei, & custodiunt illud.

**R.** Felix. 31.

**Lectio viii.**

**D**enique fratribus ejus, id est secundum carnem cognatis, qui non in eum crediderant, quid profuit illa cognatio? Sic & materna propinquitatis nihil Mariæ profuisset, nisi felicius Christum corde, quàm carne gestasset. Ipsa quoque virginitas ejus ideò gratior & acceptior, quia non eam conceptus Christus viro violaturo, quam conservaret, ipse præripuit; sed priusquam conciperetur, jam Deo dicatam, de qua nasceretur, elegit. **R.** Beatam. 32.

*Nona Lectio sanctorum Tiburtii & Susannæ.*

*Die 12. Augusti. In die Octava.*

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 11. d*

**I**n illo tempore: Loquente Jesu ad turbas: extollens vocem quædam mulier de turba dixit illi: Beatus venter, qui te portavit. Et reliqua.

*Homilia sancti Joannis Chrysostomi.*

*In Joann. c. 2. Hom. 20. circa finem.*

**C**um audieris mulierem illam dicentem: Beatus venter, qui te portavit: & ubera, quæ tu suxisti: deinde Dominum respondentem: Quinimò beati, qui audiunt verbum Dei, & custodiunt illud: eâ sententiâ dictum existima, non quòd matrem negligeret, sed nihil ei utilitatis matris nomen allaturum ostenderet, nisi bonitate & fide præstaret. Quòd si Mariæ nihil sine virtute materna charitas erat profutura, longè minus nobis patris, fratris, matris,

tris, filii bonitas, nisi aliquid nostrum afferamus. *R. Felix. 31.*

*Lectio viii.*

**I**n nullo namque alio, nisi in solis sui ipsius virtutibus post divinam gratiam de salute cuiuspiam sperandum est. Nam si id profuturum erat per se Mariæ, profuisset etiam Judæis, quorum consanguineus erat Christus secundum carnem: profuisset civitati, in qua natus est, profuisset fratribus. Atqui dum fratres rerum suarum curam habuerunt, nihil eis propinquitatis nomen profuit, sed cum reliquo mundo damnati erant. *R. Beatam me dicent. 32.*

*Lectio ix.*

**T**unc autem admirationi esse coeperunt, quando propria claruerunt virtute: patria verò nihil inde consecuta cecidit, & incendio absumpta est: concives miserè interempti periére: consanguinei secundum carnem nil ad salutem lucrati sunt, deficiente virtutis patrocinio. Verùm Apostoli ante omnes clarissimi evaserunt, cum se ad veram & expetendam ejus familiaritatem consuetudinemque per obedientiam contulerunt. Hinc intelligimus, fide semper nobis opus esse, & vita, quæ virtutibus luceat: hæc dumtaxat salvos nos facere poterit. *Te Deum.*

*Festum S. Clare virg. Duplex, transfertur. Die 21. Novembris.*

**INFRA OCTAVAM  
PRÆSENTATIONIS  
Beatæ Mariæ virginis.**

*Lect. Secundi Nocturni infra Oct. festorum B. Mariæ. 18. Responsoria secunda & tertia Nocturni, ut infra Oct. S. Mariæ ad Nives. 31.*

*Die 22. Novembr. Secunda die.*

*Fir de S. Coecilia virg. & mart. Dupl. cum commem. Oct.*

*Die 23. Novembr. Tertia die.*

*De S. Clemente Papa & mart. Semid. cum commem. Oct.*

*Die 24. Novembr. Quarta die.*

*In tertio Nocturno.*

*Lectio vii. & viii. Homilia S. Irenæi. Errant qui dicunt, &c. ut in v. die infra Oct. S. Mariæ ad Nives. 31. Lectio ix. de S. Chrysostomo mart.*

*Die 25. Novembr. Quinta die.*

*De S. Catharina virg. & mart. Dupl. cum commem. Octava.*

*Die 26. Novembr. Sexta die.*

*In tertio Nocturno.*

*Lect. vii. & viii. de Homil. S. August. Quid aliud, &c. ut in vii. die S. Mariæ ad Nives. 32. Lectio ix. de S. Petro Episc. & mart.*

*Die 27. Novembr. Septima die.*

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 11. d*

**I**n illo tempore: Loquente Jesu ad turbas: extollens vocem quædam mulier de turba, dixit illi: Beatus venter, qui te portavit. Et reliqua.

*Homilia sancti Joannis Chrysostomi.*

*In cap. 12. Matth. Homil. 45. post initium.*

**U**na sola, & vera, & communis nobilitas atque necessitudo cum Christo est, ut voluntatem Dei facias. Hic propinquitatis modus multò melior est atque uberior: idcirco cum mulier quædam dixisset, Beatus venter, qui te portavit; & ubera, quæ suxisti; non respondit: Nullus me portavit venter, nec ulla ipse ubera suxi: sed, Beati, qui faciunt voluntatem Patris mei. Vides quemadmodum nullibi conjunctionem hanc naturæ homi-

num



num negat, sed addit semper illam, quæ à virtutibus est.

**R.** Felix. 31.

**Lectio viii.**

**N**on dixit, se non habere matrem, sed inde matrem quoque suam beatitudinem consecuturam asseruit, si Patris ejus faceret voluntatem. O admirabilem honorem! ô virtutis incredibiles honores! Quò ducitis benè viventes homines! quot mulieres sanctissimam illam Virginem beatificârunt? quot uterum illum admirantur? quot optârunt tales fuisse matres, & cætera contemnere omnia? quid igitur prohibet? **R.** Beatam. 32.

**Lectio ix.**

**E**cce nainque rectam, atq; facilem viam nobis proposuit, ut non fœminis solum, verum etiam viris ad hunc ordinem pervenire liceat; imò verò etiam ad majorem: multò enim propinquiore Deo sunt, qui voluntatem ejus faciunt, quam qui summa carnis necessitudine junguntur. Non ergo simpliciter propinquitatem illam desidera, verum etiam capeffe, magnoq; studio confice, quæ ad hoc desiderium te perducant. **Te Deum.**

*Die 28. Novembris. In die octava.*

*In tertio Nocturno.*

Homilia S. Joannis Chrysostomi. **Cum audieris**, ut in die Octava S. Mariæ ad Nives. 32

**INFRA OCTAVAM  
S. MICHAELIS ARCHANG.**

**& sanctorum Angelorum.**

*Die 20. Septembris.*

**IN DEDICATIONE S. MICHAELIS ARCHANGELI.**

*Die 30. Sept. Secunda die.  
Fit de S. Hieronymo Confess. & Doctore,  
dupl. cum commem. Octave.*

*Die 1. Octobris. Tertia die.*

*In secundo Nocturno.*

De Sermone sancti Gregorii Papæ.

Ex Homilia 34. in Evang.

**Lectio iv.**

**Q**uia Angelorum nomina interpretando perstrinximus, superest, ut ipsa officiorum vocabula breviter exequamur. Virtutes etenim vocantur illi nimirum Spiritus, per quos signa & miracula frequentius fiunt. Potestates etiam vocantur hi, qui hoc potentiùs cæteris in suo ordine perceperunt, ut eorum ditioni virtutes adversæ subjectæ sint, quorum potestate refrænantur, nec corda hominum tantum tentare prævaleant, quantum volunt.

**R.** Hic est Michâél Archangelus, princeps militiæ Angelorum: **\*** Cujus honor præstat beneficia populorum, & oratio perducit ad regna cælorum. **\*** Archangelus Michâél præpositus paradisi, quem honorificant Angelorum cives. Cujus. **Lectio v.**

**P**incipatus etiam vocantur, qui ipsis quoque bonis Angelorum spiritibus præsunt, qui subjectis aliis dum quæque sunt agenda disponunt, eis ad explenda divina ministeria principantur. Dominationes autem vocantur, qui etiam potestates principatuum dissimilitudine alta transcendunt. Nam principari est inter reliquos priorem existere: dominari verò est etiam subjectos quosque

quosque possidere. Throni quoque illa agmina sunt vocata, quibus ad exercenda judicia semper Deus omnipotens præsidet. Unde & per Psalmistam dicitur: Sedes super thronum, qui iudicas æquitatem.

**R.** Venit Michæel Archangelus cum multitudine Angelorum, cui tradidit Deus animas Sanctorum,

\* Ut perducatur eas in paradysum exultationis. ✠. Emitte Domine Spiritum sanctum tuum de cœlis, spiritum sapientiæ & intellectus. Ut.

*Leſtio vi.*

**C**herubim quoque plenitudo scientiæ dicitur, & sublimiora illa agmina idcirco Cherubim vocata sunt: quia tantò perfectiori scientia plena sunt, quanto claritatem Dei viciniùs contemplantur. Seraphim etiam vocantur illa spirituum sanctorum agmina, quæ ex singulari propinquitate Conditoris sui incomparabili ardent amore. Seraphim namque ardentes, vel incendentes vocantur: quorum profectò flamma amor est: quia quò subtiliùs claritatem divinitatis ejus aspiciunt, eò validiùs in ejus amore flammescunt.

**R.** In tempore illo consurget Michæel, qui stat pro filiis vestris: \* Et veniet tempus, quale non fuit, ex quo Gentes esse cœperunt, usque ad illud. ✠. In tempore illo salvabitur populus tuus omnis, qui inventus fuerit scriptus in libro vitæ. Et veniet.

Gloria Petri. Et veniet.

*In tertio Nocturno.*

*Leſtio S. Evangelii secundum Matthæum.*

*Leſtio vii. Cap. 18.*

**I**n illo tempore: Accesserunt discipuli ad Jesum, dicentes: Quis, putas, major est in regno cœlorum? Et reliqua.

*Homilia sancti Joannis Chrysostomi*

*Ex variis in Matth. Homil. 18.*

**V**æ mundo à scandalis. Mundum istum terrenum locum dicit. Neque verò de cœlo, & terra intelligere debemus mundum, sed mundum hic intelligamus terrenum; ideò quod dixit Dominus, Regnum meum non est de isto mundo. Si essem de mundo, amaret me mundus; & dicitur ad Apostolos: Vos non estis de mundo. Væ igitur mundo, hoc est terreno loco, ab scandalis: necesse enim est ut veniant scandala, non quia necesse, sed quia mundo necesse ut veniant.

**R.** In conspectu Gentium nolite timere: vos enim in cordibus vestris adorare, & timete Dominum: \* Angelus enim ejus vobiscum est. ✠. Stetit Angelus juxta aram templi, habens thuribulum aureum in manu sua Angelus.

*Leſtio viii.*

**V**idete quod dicimus, subtile est. Si necesse est ut veniant scandala, ergo absque culpa est ille, per quem venit scandalum. Sed nos dicimus scandalum non venit, nisi in terreno mundo. Vis non tibi venire scandalum? Vni noli esse terrenus. Propterea dico, mundus terrenus scandalum habet,



habet, terra ista necesse est ut habeat scandalum. Noli portare terrenum, sed cœlestem, & scandalum non habebis. Verumtamen vae homini illi, per quem scandalum venit.

**R.** Michæel Archangelus venit in adiutorium populo Dei: **S.** Stetit in auxilium pro animabus iustis.

**S.** Stetit Angelus juxta aram templi, habens thuribulum aureum in manu sua. Stetit. Gloria Patri. Stetit.

Nona Lectio de S. Remigio Episc. & Confes.

Die 2. Octobris. Quarta die.

Fit de SS. Angelis Custodibus, dupl. cum commemor. Octavæ.

Die 3. Octobris. Quinta die.

In secundo Nocturno.

De Sermone S. Gregorii Papæ. Lectio iv.

**E**T sunt nonnulli, qui acceptis, virtutibus, etiam electorum hominum merita transcendunt: cumque & bonis meliores sunt, electis quoque fratribus principantur: quò ergo isti sortem suam, nisi inter Principatum numeros accipiunt? Et sunt nonnulli, qui sic in semetipsis cunctis vitiis, omnibusque desideriis dominantur, ut ipso jure munditiæ dii inter homines vocentur; unde & ad Moysen dicitur: Ecce constitui te Deum Pharaonis: quo ergo isti, nisi inter numeros Dominationum currunt?

**R.** Hic est. 34.

Lectio v.

**E**T sunt nonnulli, qui dum sibimetipsis vigilantibus cura dominantur, dumque se sollicita intentione discutiunt, divino timori semper inhærentes, hoc in mu-

nere virtutis accipiunt, ut judicare rectè & alios possint: quid ergo isti, nisi Throni sui conditoris sunt? Vel quò, nisi ad supernarum sedium numeros adscribuntur? Per quos dum sancta Ecclesia regitur, plerumque de quibusdā suis infirmis actibus etiam electi judicantur. Et sunt nonnulli, qui tanta Dei ac proximi dilectione pleni sunt, ut Cherubim jure nominentur. Quia enim Cherubim plenitudo scientiæ dicitur; & Paulo dicente didicimus, quia plenitudo legis est charitas: omnes, qui Dei & proximi charitate cæteris ampliùs pleni sunt, meritorum suorum sortem inter Cherubim numerosperceperunt.

**R.** Venit. 35.

Lectio vi.

**E**T sunt nonnulli, qui supernæ contemplationis facibus accensi, in solo conditoris sui desiderio anhelant, nihil jam in hoc mundo cupiunt, solo æternitatis amore pascuntur, terrena quæq; abjiciunt, cuncta temporalia mente transcendunt, amant & ardent, atque in ipso suo ardore requiescunt, amando ardent, loquendo & alios accendunt; & quos verbo tangunt, ardere protinus in Dei amore faciunt. Quid ergo istos, nisi Seraphim dixerim, quorum cor in igne conversum lucet, & urit; quia & mentium oculos ad superna illuminant, & eos compungendo in fletibus vitiorum rubiginem purgant?

**R.** In tempore. 35.

In tertio Nocturno.

Lectio sancti Evangelii secundum Matthæum.

Lectio vii. Cap. 13.

**I**n illo tempore: Accesserunt discipuli ad Jesum, dicentes: Quis, putas, major est in regno cœlorum? Et reliqua.

Homilia sancti Ambrosii Episcopi.

Sermone 20. tom. 5.

**S**i diligenter audistis Evangelicam lectionem, intelligere potestis, quæ ministris ac sacerdotibus Dei reverentia debeatur: vel qua ipsos clericos invicem humilitatis sedulitate oporteat prævenire. Ait enim Dominus percontantibus discipulis, quis eorum in regno cœlorum major esset futurus, statuto coram puerulo: Quicumque humiliaverit se sicut puer iste, hic major erit in regno cœlorum. Unde intelligimus, quod humilitate pervenitur ad regnū, simplicitate penetratur ad cœlum. Quisquis ergo cupit divinitatis tenere fastigia, humilitatis ima sectetur.

**R.** In conspectu. 35. **Lectio viii.**

**Q**uod autem ait Evangelica lectio, Qui scandalizaverit unum de pusillis istis, & cætera; pusillos hic non ætate pueros, sed malitia parvulos dicit. Sicut Apostolus ait: Malitiā parvuli estote, ut sensibus perfecti sitis. Qui sunt isti, nisi clerici idonei, & monachi religiosi, vel laici? Quisquis igitur his irreverens, aut contumeliosus extiterit, hac velut pœna plectetur, ut infirmi saxo religato illi ad collum, præcipitur in mare. Sed videamus,

Octav. Rom.

cur scandalizantibus Christianis ista pœna data sit, aut quid sibi velit ipsa sententia: puto enim illam aliquod mysteriū continere.

**R.** Michæel. 36. **Lectio ix.**

**Q**uasi verò non sufficeret in mare homini demergendo saxum qualecumque non magnum aut enorme, sed molæ asinariæ lapidis ei religetur ad collum, ut cum perituro homine pereat res usui necessaria. Sed puto, hoc magis esse, quod in scripturis asini figura populus gentilium nuncupatur: qui clausis oculis circa ignorantiae molam erroris sui gyro pertrahitur: & in illa cursus directione vestigiis sæpè redeuntibus invitatus usui laborat alieno. Hic ergo gentilis populus cum persecutionem Christiano intulerit, hac pœna plectitur, ut cum sua sacrilega mola judicandi sæculi fluctibus demergatur. **T**e Deum.

Die 4. Octobris. Sexta die.

Fit de S. Francisco, duplex, cum commemo. Oct.

Die 5. Octobris. Septima die.

In secundo Nocturno.

De Sermone S. Gregorii Papæ. **Lectio iv.**

**F**ertur verò Dionysius Areopagita, antiquus videlicet & venerabilis Pater, dicere, quod ex minorum Angelorum agminibus foras ad explendum ministerium, vel visibiliter, vel invisibiliter mittuntur, scilicet quia ad humana solatia, aut Angeli, aut Archangeli veniunt, Nam superiora illa agmina ab intimis numquam recedunt, quoniam ea, quæ præminent, usum exterioris ministerii nequaquam habent,

D

Huic



Huic autem sensui & illud creditur non inconvenienter opiculari, quod per Daniele[m] dicitur: Millia millium ministrabant ei, & decies millies centena millia assistebant ei. **R.** Hic est. 34. **Lectio v.**

**A**liud namque est ministrare, aliud assistere: quia hi administrant Deo, qui ad nos nuntiando exeunt; assistunt verò, qui sic contemplatione intima perficiuntur, ut ad explenda foras opera minimè mittantur. Sed hoc quoque de ipsis agminibus, quæ mittuntur, certum tenemus: quia & cum ad nos veniunt, sic exterius implent ministerium, ut tamen nunquam desint interius per contemplationem. Et mittuntur igitur, & assistunt: quia etsi circumscriptus est Angelicus spiritus; summus tamen Spiritus ipse, qui Deus est, circumscriptus non est. Angeli itaque & missi, & ante ipsum sunt: quia quolibet missi veniant, intra ipsum currunt. **R.** Venit 35.

**Lectio vi.**

**S**ciendum quoque est, quia Splerumque ipsi beatorum spirituum ordines viciniorum sibi ordinum vocabula sortiuntur. Sed idcirco uno eodemque vocabulo communiter non censentur, ut ille ordo vocari privato uniuscujusque rei nomine debeat, qui hanc in munere plenius accepit. Seraphim namque incendium diximus, & tamen ardore conditoris simul omnes ar-

dent. Cherubim verò plenitudinem scientiæ dicimus, & tamen quis ibi aliquid nesciat, ubi ipsum omnes simul fontem scientiæ Deum vident? Quæ ergo ex parte ab omnibus habentur, eis in privato nomine data sunt, qui hæc in munere plenius acceperunt, **R.** In tempore. 35.

**In tertio Nocturno.**

Lectio S. Evangelii secundum Matthæum.

Lectio vii. Cap. 28.

**I**n illo tempore: Acceperunt discipuli ad Jesum, dicentes: Quis putas, major est in regno cælorum? Et reliqua.

Homilia sancti Bernardi Abbatis.

Serm. 2. in festo S. Michæelis.

**A**udistis, fratres, Evangelicam lectionem adversus eos, qui pusillos scandalizant, satis terribiliter intonantem. Nemini blanditur Veritas, neminem palpat, nullum seducit, apertè denuntiāns, quoniam vae homini illi, per quem scandalum venit. Perire siquidem necesse est hominem, qui charitatem non habet, etiam si tradiderit corpus suum ita ut ardeat. Et hoc dixerim, fratres, ut in ea charitate, & unanimitate, & pace, in qua statis in Domino, solliciti sitis perseverare & abundare magis. Quæ est enim spes nostra, & gaudium nostrum, & corona gloriæ? nonne unitas & unanimitas vestra?

**R.** In conspectu. 35. **Lectio viii.**

**I**n hoc enim cognoscunt omnes, etiam Angeli sancti, quod Christi estis discipuli, si dilectionem habueritis ad invicem. Numquid enim

enim

enim Christi gratia diligemur ab Angelis, si de mutuae dilectionis inopia cognoverint nequaquam ejus nos esse discipulos? Numquid diligemur ab eis propter nos ipsos, id est, spiritualis naturæ similitudine, si invenimur non diligere humanæ naturæ nostræ confortes? Denique, numquid Angeli diligunt nos propter se ipsos, & futuram de nobis civitatis suæ restorationem, si (quod absit) unum, quo solo uniri, & coedificari eis possumus, defuerit glutinum charitatis.

**R.** Michæel. 36.

Nona Lectio de SS. Placido, & soc.  
Die 6. Octobris.

Festum S. Brunonis transfertur in aliam diem.  
**IN DIE OCTAVA.**

In secundo Nocturno.  
Sermo sancti Bernardi Abbatis.

Serm. 2. in festo S. Mich. Lectio iv.

**A**ngelorum hodie memoria celebratur, & exigitis debitum pro tanta solemnitate sermonem. Credimus sanè & indubitata fide tenemus, divinâ eos præsentia & visione beatos sine fine lætari in bonis Domini; attamen, si multum est ad nos loqui de ea charitate & gloria, qua in semetipsis, imò in Deo suo Angeli sancti nostris omnino supererminent cordibus: de ea loquamur, quam nobis exhibent, gratia & charitate. Neque id cuiquam incredibile videatur, quandoquidem ipse quoque creator & Rex Angelorum venit non ministrari, sed ministrare, & animam suam dare pro multis.

**R.** Hic est. 34.

Lectio v.

**H**ujus itaq; tanti ministri gratia nihil mirum si dignanter nobis, imò & libenter Angeli sancti ministrent: ipsi enim amant nos, quia nos Christus amavit. Et hæc dixerim, fratres, ut ampliore erga beatos Angelos fiduciam habeatis, ac proinde familiarius in omni necessitate vestra eorum invocetis auxilia: sed & dignius in eorum præsentia conversari, & magis ac magis eorum vobis conciliare gratiam, captare benevolentiam, exorare clementiam studeatis.

**R.** Venit Michæel. 35. Lectio vi.

**C**avenda nobis eorum offensa & in his maximè exercendum, quibus eos novimus oblectari. Sunt enim plurima, quæ eis placent, & quæ in nobis invenire delectant: ut est sobrietas, castitas, paupertas voluntaria, crebri in cælum gemitus, & orationes cum lacrymis & cordis intentione. Attamen super omnia hæc unitatem & pacem à nobis exigunt Angeli pacis. Quidni maximè delectentur in his, quæ formam quandam civitatis suæ re præsentant in nobis, ut mirentur Jerusalem novam in terra?

**R.** In tempore. 35.

In tertio Nocturno.  
Lectio S. Evangelii secundum Matthæum.

Lectio vii. Cap. 18.

**I**n illo tempore: Accesserunt discipuli ad Jesum, dicentes: Quis, putas, major est in regno cælorum? Et reliqua.



Homilia sancti Joannis Chrysostomi.  
Ex Homil. 60. in Matth. circa medium.

**V**idete, ne contemnatis unum de parvulis istis. Parvulos hic non ætate, sed multorum æstimatione appellavit: pauperes, inquam, ignotos, cæterosque hujusmodi, quos multi contemnunt, qui reverà parvuli non sunt, cum Creatoris omnium amici sint, quos ipse multò magis venerabiliores facit, dicens: Quia Angeli eorum semper vident faciem Patris mei, qui in cœlis est.

**R.** In conspectu. 35. **Lectio viii.**

**H**inc manifestum est, quia omnes Sancti Angelos habent. Apostolus etiam ait de muliere, quoniam velamen debeat habere in capite propter Angelos; & Moyses: Statuit fines Gentium secundum numerum Angelorum Dei. Hic verò non de Angelis simpliciter dicitur, sed de Angelis excellentibus atque supremis. Nihil enim aliud designatur, cum dicit: Faciem Patris mei aspiciunt, quàm summa fiducia eorum, & honor præcipuus.

**R.** Michàel. 36. **Lectio ix.**

**V**ides, quot quibusque rationibus ad modestiam, & ad curam tenuiorum fratrum nos revocat. Infantem in medio statuit, & dixit: Efficiamini sicut parvuli: & quicumque talem susceperit parvulum, me suscipiet: & quicumque hunc scandalizaverit, extrema luet supplicia: & scandalizantes homines, etiamsi

loco manuum atque oculorum nobis essent, abscindere jussit; Angelorum quoque auctoritate, qui hos tenues fratres tutantur, ut eos veneremur, impellit. **Te Deum laudamus.**

*Die 8. Maji.*

**IN APPARIT. S. MICHAELIS Archangeli.**

*Die 9. Maji. Secunda die.*

Fit de S. Gregorio Nazianzeno Episcopo & Confess. duplex, cum commemor. Octavæ.

*Die 10. Maji. Tertia die.*

Fit de S. Antonino Episcopo & Confessore, semiduplex, cum commemoratione Octavæ.

*Die 11. Maji. Quarta die.*

In secundo Nocturno.

Tres Lectiones sancti Gregorii Papæ. Quia Angelorum, &c. ut in tertia die infra Octavam Dedicationis 34.

In tertio Nocturno.

Lectio S. Evangelii secundum Matthæum.

Lectio vii. Cap. 18.

**I**n illo tempore: Accesserunt discipuli ad Jesum, dicentes: Quis putas, major est in regno cœlorum? Et reliqua.

Homilia sancti Hieronymi Presbyteri.

Lib. 3. Comment. in cap. 18. Matth.

**P**ost inventum staterem, post tributa reddita, quid sibi vult Apostolorum repentina interrogatio, Quis, putas, major est in regno cœlorum? Quia viderant pro Petro & Domino idem tributum redditum, ex æqualitate pretii arbitrati sunt Petrum omnibus Apostolis esse prælatum, qui in redditione tributi Domino fuerat comparatus: ideo interrogant, quis major sit in regno cœlorum. Videntque Jesus cogitationes eorum, & causas erroris intelligens, vult desiderium gloriæ, humilitatis contentione

fana-

*Infra Octavam Appar. S. Michælis Archangeli.* 41  
sanare. *R.* In conspectu. 35.

*Lectio viii.*

**S**I autem manus tua, vel pes tuus scandalizat te, abscinde eum, & projice abs te. Neceffe est quidem venire scandala: vae tamen ei est homini, qui, quod necesse est ut fiat in mundo, vitio suo facit, ut per se fiat. Igitur omnis truncatur affectus, & universa propinquitas amputatur, ne per occasionem pietatis unusquisque credentium scandalis pateat. Si, inquit, ita est quis tibi conjunctus, ut manus, pes, oculus, & est utilis, atque sollicitus, & acutus ad perspicendum; scandalum autem tibi facit, & propter dissonantiam morum te pertrahit in gehennam: melius est, ut & propinquitatem ejus, & emolumentis carnalibus careas: ne, dum vis lucrificare cognatos & necessarios, causam habearis ruinarum.

*R.* Michæel. 36. *Lectio ix.*

**D**ico vobis, quia angeli eorum in cœlis semper vident faciem Patris mei. Suprà dixerat, per manum, & pedem, & oculum omnes propinquitates, & necessitudines, quæ scandalum facere poterant, amputandas: austeritatem itaque sententiæ, subiecto præcepto temperat, dicens: Videte ne contemnatis unum ex pusillis istis. Sic, inquit, præcipio severitatem, ut commisceri clementiam doceam: Quia Angeli eorum in cœlis semper vident fa-

ciem Patris. Magna dignitas animarum, ut unaquæque habeat ab ortu nativitatis in custodiam sui Angelum delegatum. Unde legimus in Apocalypsi Joannis: Angelo Ephesi, & reliquarum Ecclesiarum, scribe hæc. Apostolus quoque præcipit velari capita fœminarum in Ecclesiis propter Angelos. *Te Deum.*

*Die 12. Maji. Quinta die.*

*Fit de SS. Nereo, &c. mart. Semid. cum commemor. Octava.*

*Die 13. Maji. Sexta die.*

*In secundo Nocturno.*

*Sermo sancti Gregorii Papæ.*

*Ex Homilia 34. in Evang. Lectio iv.*

**S**ed quid prodest nobis de Angelicis spiritibus ista perstringere, si non studeamus hæc etiam ad nostros profectus congrua consideratione derivare? Quia enim superna illa civitas ex Angelis & hominibus constat, ad quam tantum credimus humani generis ascendere, quantos illic contigit electos Angelos remansisse, sicut scriptum est: Statuit terminos Gentium secundum numerum Angelorum Dei; debemus & nos aliquid ex illis distinctionibus supernorum civium ad usum nostræ conversationis trahere, nosque ipsos ad incrementa virtutum bonis studiis inflammare. *R.* Hic est, 34.

*Lectio v.*

**Q**uia enim illuc tanta ascensura creditur multitudo hominum, quanta multitudo remansit Angelorum: superest, ut ipsi quoque homines, qui ad cœ-

D 3 lestem



lestem patriam redeunt, ex ejus agminibus aliquid illuc revertentes imitentur. Distinctè namque conversationes hominum singulorum agminum ordinibus congruunt, ut in eorum sortem per conversationis similitudinem deputentur. Sunt plerique qui parva capiunt, sed tamen hæc eadem parva piè annuntiare fratribus non desistunt; isti itaque in Angelorum numerum currunt.

**R.** Venit. 35.

*Leſtio vi.*

**E**T sunt nonnulli, qui divinæ largitatis munere reſecti, ſecretorum cœleſtium ſumma & capere prævalent, & nuntiare: quò ergo iſti, niſi inter Archan- gelorum numerum deputantur? Et ſunt alii, qui mira faciunt, ſigna valenter operantur; quò ergo iſti, niſi ad ſupernarum virtutum ſortem, & numerum congruunt? Et ſunt nonnulli, qui etiam de obſeſſis corporibus malignos ſpiritus fugant, eoſq; virtute orationis & vi acceptæ po- teſtatis ejiciunt: quò itaque iſti meritum ſuum, niſi inter Po- teſtatum cœleſtiũ numerũ ſortiuntur?

**R.** In tempore illo. 35.

*In tertio Noſturno.*

Tres Leſtiones Homil. S. Ambroſii. Si di- ligenter, &c. ut ſuprà in v. die infra Octa- vam Dedic. 37.

*Die 14. Maji. Septima die.*

Leſt. ii. Noſtur. Fertur verò, &c. ut in vii. die infra Octav. Dedic. 37.

*In tertio Noſturno.*

Leſt. vii. & viii. Audiſtis, fratres, &c. ut in eadem vii. die 38. ix. Leſt. de S. Bonifacio mart.

*Die 15. Maji. In die Octava.*

Leſt. ii. Noſtur. Angelorum, &c. ut in die Octav. Dedic. 39.

Leſtiones in. Noſturni. Videte, &c. ut in eadem die Oct. 40.

## INFRA OCTAVAS SS. APOSTOLORUM.

*Leſtiones Propriæ.*

*Die 30. Novembris.*

### S. ANDREÆ APOSTOLI.

*Die 1. Decembris. Secunda die.*

*In ſecundo Noſturno.*

Sermo ſancti Petri Chryſologi.

*Serm. 133.*

*Leſtio iv.*

**B**Eatus Andreas meritò natus hodie creditur, quando non ad præſentem vitam materno eſt effuſus ex utero, ſed conceptu fidei, martyrii partu, cœleſtem noſcitur generatus ad gloriam; quando non eum maternâ cuna- bula ſuſcepere vagientem, ſed ſuperna triumphantem ſecreta receperunt; quando non infir- mum lactis paſtum genitricis tra- hit ex pectore, ſed pro rege ſuo devotiſſimus miles virtutis ſan- gvinẽ fudit. Vivit, quia mortem cœleſtis militiæ bellator occidit.

**R.** Homo Dei ducebatur, ut cru- cifigerent eum: populus autem clamabat voce magna, dicens: \* Innocens ejus ſangvis ſine cau- ſa damnatur. ✠. Cumque duce- rent eum, ut crucifigeretur, fa- ctus eſt concuſus populorum clamantium, & dicentium. In- nocens. *Leſtio v.*

**S**equitur hic moriendo, Domi- num æſtuans & anhelans, ac toto virtutis gradu Dominicis incumbit hæreſe veſtigiiſ, ne e- um curſus faciat diſparem fratri, quem natura ſimilem, vocatio

foci-

focium, parem gratia ipsa perfecerat. Ad unam vocem Domini, sicut ille, patrem, patriam, censum reliquit; laboribus, opprobriis, itineribus, contumeliis, vigiliis, Christi indefessè germani societate donavit. Solum est, quòd tempore Dominicæ passionis fugit: sed neque hoc impar, quia fugit. Negare autem si aliqua putatur culpa, non est gravius fugere, quàm negare. Sed tacenda sunt alia. Æquavit fratres venia, quos sic discreverat culpa.

**R.** O bona crux, quæ decorem, & pulchritudinem de membris Domini suscepisti: accipe me ab hominibus, & redde me magistro meo: \* Ut per te me recipiat, qui per te me redemit. **V.** Beatus Andreas expansis manibus ad cælum orabat, dicens, Salva me bona crux. Ut per.

Lectio vi.

**C**rucem, quam refugerant, postea conjunctis viribus ardentè invadunt; ut, unde reatum sumpserant, inde conscenderent cælum, inde præmium sumerent & coronam. Petrus namque Crucem, arborem conscendit Andreas; ut, qui Christo compati gestiebant, in semetipsis figuram formamque ipsius exprimerent passionis: & redempti ligno consummarentur ad palmam. Sic Andreas noster, etsi cedit ordini, præmio tamen non cedit & labori.

**R.** Expandi manus meas tota die

in cruce ad populum non credentem, sed contradicentem mihi: \* Qui ambulant vias non bonas, sed post peccata sua. **V.** Deus ultionum Dominus, Deus ultionum liberè egit: exaltare qui judicas terram, redde retributionem superbis. Qui. Gloria Patri. Qui.

In tertio Nocturno.

Lectio S. Evangelii secundum Matthæum.

Lectio vii. Cap. 4.

**I**n illo tempore: Ambulans Jesus juxta mare Galilææ, vidit duos fratres, Simonem, qui vocatur Petrus, & Andream fratrem ejus, mittentes rete in mare. Et reliqua.

De Homilia sancti Gregorii Papæ.

Homilia 5. in Evangelia.

**M**ultum dimisit, qui cum re possessa etiam concupiscenciis renuntiavit. A sequentibus tanta dimissa sunt, quanta à non sequentibus concupisci potuerunt. Nemo igitur etiam cum quosdam conspicit multa reliquisse, apud semetipsum dicat: Imitari mundi hujus contemptores volo, sed quod relinquam, non habeo. Multum, fratres, relinquitis, si desideriiis terrenis renuntiatis.

**R.** Oravit sanctus Andreas, dum respiceret in cælum, & voce magna clamavit, & dixit: Tu es Deus meus, quem vidi: ne me patiaris ab impio judice deponi: \* Quia virtutem sanctæ crucis agnovi. **V.** Tu es magister meus Christus, quem dilexi, quem cognovi, quem confessus sum; tantum-



modò in ista voce exaudi me.  
Quia virtutem.

**Lectio viii.**

**E**Xteriora etenim nostra Domino quantumlibet parva sufficiunt: cor namque, & non substantiam pensat, nec perpendit, quantum in ejus sacrificio, sed ex quanto proferatur. Nam si exteriorem substantiam perpendamus, ecce sancti negotiatores nostri perpetuam Angelorum vitam, datis retibus & navi mercati sunt. Æstimationem quippe pretii non habet, sed tamen regnum Dei tantum valet, quantum habes.

**R.** Videns crucem Andreas exclamavit, dicens: O crux admirabilis, ô crux desiderabilis, ô crux, quæ per totum mundum rutilas: \* Suscipe discipulum Christi, ac per te me recipiat, qui per te moriens me redemit. ✠. O bona crux, quæ decorem, & pulchritudinem de membris Domini suscepisti. Suscipe. Gloria Patri. Suscipe.

**Lectio ix.**

**V**aluit namque Zachæo dimidium substantiæ, quia dimidium aliud ad hoc, quod injustè abstulit, restituendum in quadruplum reservavit. Valuit Petro & Andreae, dimissis retibus, & navi. Valuit & viduæ duobus minutis. Valuit alteri calicem aquæ frigidæ. Regnum itaque Dei, ut diximus, tantum valet, quantum habes. **Te Deum.**

**Die 2. Decembris. Tertia die.**

Fit de S. Bibiana virgine & martyre, Sc-

midupl. cum commem. Octavæ.

**Die 3. Decembris. Quarta die.**

Fit de S. Francisco Xaverio Confess. Dupl. cum commemor. Octavæ.

**Die 4. Decembris. Quinta die.**

Fit de S. Petro Chrysologo Episcopo & Confess. Duplex, cum commem. Octavæ, Penitæ, ac S. Barbare virg. & mart.

**Die 5. Decembris. Sexta die.**

In secundo Nocturno.

Sermo sancti Bernardi Abbatis.

Sermone 1. longè post principium.

**Lectio iv.**

**B**Eati Andreae Apostoli sollemnitas hodie celebratur: quam si pia sollicitudine perscrutemur, multa inveniemus in ea, quæ ædificent animas nostras. In ipso siquidem conversionis suæ initio magnum nobis perfectæ obedientiæ præstat exemplum: quod quidem Christianis omnibus necessarium. Vis audire perfectæ obedientiæ formam? Vidit Dominus Petrum & Andream mittentes rete in mare, & ait illis: Venite post me, faciam de piscatoribus piscatores: imò prædicatores. At illi continuò, nihil judicantes, aut hæsitantes, nihil interrogantes, sine omni mora relictis retibus & navi secuti sunt eum. **R.** Homo Dei. 42.

**Lectio v.**

**A**Gnoscite fratres, quoniam propter vos scripta sunt hæc, propter vos singulis annis in Ecclesia recitantur; ut discentes veræ obedientiæ formam, castigatis corda vestra in obedientia charitatis. Sola est charitas, quæ obedientiam gratam facit, & acceptabilem Deo. Hilarem quippe datorem diligit Deus. Et item,

Si

Si tradidero, inquit, corpus meum, ita ut ardeam, charitatem autem non habeam, nihil mihi prodest. **R.** O bona crux. 43.

*Lectio vi.*

**V**ultis, ut de ipsa quoque beati hujus Apostoli passione, quam nimirum hodie celebramus, loquamur aliquid ad laudem Christi, & ædificationem vestram? Audistis certè, cum pervenisset beatus Andreas ad locum, ubi crux parata erat, quomodo confortatus sit in Domino, & per spiritum, quem una cum cæteris Apostolis in igneis linguis acceperat, verba verè ignea loqueretur. Videns ergo paratam eminus crucem, nequaquam (ut exigere videtur mortalis infirmitas) facies ejus expalluit, non contremuit corpus, nec mens turbata est, non recessit, ut assolet intellectus.

**R.** Expandi. 43.

*In tertio Nosturno.*

*Lectio S. Evangelii secundum Matthæum.*

*Lectio vii. Cap. 4.*

**I**n illo tempore: Ambulans Jesus juxta mare Galilææ, vidit duos fratres, Simonem, qui vocatur Petrus, & Andream fratrem ejus, mittentes rete in mare. Et reliqua.

*Homilia S. Joannis Chrysostomi.*

*Ex Homilia 14. in Matth. circa ioh.*

**E**t Joannes quidem aliter dixit eos vocatos: unde manifestum est, secundam hanc vocationem fuisse, idque ex multis rebus ostenditur. Nam, ibi quidem dicit, quod ad Christum,

antequam Joannes in carcerem duceretur, accesserint: hic verò, postquam ille inciderit in vincula: & ibi quidem, quod Andreas Petrum; hic verò quod Jesus ambos vocet. Et Joannes quidem ait, quod Jesus venientem ad se Petrum videns, dicit: Tu es Simon filius Jona, tu vocaberis Cephas, quod interpretatur Petrus: Matthæus verò asserit, quod isto jam nomine vocaretur.

**R.** Oravit. 43.

*Lectio viii.*

**S**ed à loco etiam, ex quo vocati sunt, aliisque multis id scire possibile est, & ab eo, quod facile obedierunt vocanti, suæque omnia reliquerunt. Erant quippe sufficienter jam antè prædocti: & ibi quidem Andreas in domum veniens, multaque à Christo audiens invenitur; hic verò unum audientes, nudumque verbum, confestim sequuntur. Videtur quippe fuisse consequens ut prius quidem audierint, & secuti sint; postea verò, cum & Joannem in carcere ligatum, & ipsum secessisse vidissent, reliquisse eos magistrum, atque ad artem propriam revertisse. Sic denique piscantes eos rursus invenit. **R.** Videns. 44.

*Lectio ix.*

**P**erpende verò & fidem, & obedientiam vocatorum (cognoscis quàm dulcis sit piscatio) siquidem in medio ipsius operis constituti, cum illum audissent jubentem, nihil distulerunt, nihil omni-



omnino cunctati sunt; non dixerunt: Revertemur domum, loquemur propinquis; sed cuncta illicò relinquentes fecerunt, quod Eliseus quoque sub Elia legitur impleſſe. Talem quippe à nobis obedientiam Christus efflagitat, ut neque punctum temporis differamus, etiamſi nos aliquid necessarium urgere videatur.

**Te Deum laudamus.**

*Die 6. Decembris. Septima die.*

*Fir de ſancto Nicolao Episcopo & Confess. Dupl. cum commem. Octava.*

*Die 7. Decembris.*

*Festum ſancti Ambrosii transfertur in aliam diem.*

## IN DIE OCTAVA.

*In ſecundo Nocturno.*

*De Sermone ſancti Bernardi Abbatis.*

*In Vigilia ſancti Andreae, in med.*

*Lectio iv.*

**Q**uanta exultatione univerſæ terræ celebrandum tantæ novitatis miraculum, tam magnificum opus divinæ virtutis! Andreas homo erat ſimilis nobis paſſibilis, & tam vehementi ardore ſpiritus crucem ſitiebat, tam inaudito à ſæculis gaudio tripudiabat, cum paratum ſibi eminus patibulum conſpexiſſet. O crux, inquit, diu deſiderata, & jam concupiſcenti animo præparata, ſecurus & gaudens venio ad te, ita ut & tu exultans ſuſcipias me. Videtis, quia non ſe capit præ magnitudine gaudii? ita, inquit, ut & tu exultans.

**R. Homo 42.**

*Lectio v.*

**E**rgone tanta eſt exultatio, ut exultet & ipſa crux, nec lethi quidquam habeat, ſed to-

tum lætitiæ ſit? Aut quis dicat minus, contra conſuetudinem, ſupra rationem, ultra naturam, crucifixum exultare, quàm crucem? Illi ſenſum lætitiæ natura negavit; huic, ſi quid prævalet, gaudium omne exterminat, ingeritque dolorem. Fratres, ignis vibrans eſt, non lingua loquens: & ſi lingua, certè ignea eſt. Carbones ſunt ignis illius, quem de excelſo Chriſtus miſerat in offibus ejus. Atque utinam deſolatorii nobis ſint, conſumentes & exurentes, quidquid in nobis eſt carnalis affectionis.

**R. O bona crux. 43.**

*Lectio vi.*

**P**lanè, Beate Andrea, granum ſinapis eſt fides tua, quæ tam inſperatum, ubi teri cœpit, cœpit ex ſe proferre fervorem. Quid ſi paulò ampliùs tereretur? Quis fervorem illum animus, quis verba illa ſuſtinere poſſet auditus? Terendum eum putat Ægeas, crucis ſupplicium minitans: ſed non eſt ita. Accenditur magis in verbo hoc, & liberè clamat: Ego ſi patibulum crucis expaveſcerem, crucis gloriam non prædicarem. Merito proinde crucis amatorem venerantur, quicumque ſunt ſervi crucis: ſed ab his ampliorem jure devotionem exigit, qui ſpecialiùs propoſuerunt tollere crucem ſuam.

**R. Expandi 43.**

*In tertio Nocturno.*

*Lectio S. Evangelii ſecundùm Matthæum.*

*Lectio vii. Caput 4.*

**I**N illo tempore: Ambulans Jesus juxta mare Galilææ, vidit duos fratres, Simonem, qui vocatur Petrus, & Andream fratrem ejus, mittentes rete in mare. Et reliqua.

Homilia venerabilis Bedæ Presbyteri.  
Ex Comment. in Marc. lib. 1. c. 6.

**I**sti primi vocati sunt, ut Dominum sequerentur. Piscatores & illiterati mittuntur ad prædicandum, ne fides credentium non in virtute Dei, sed eloquentia, atque doctrina putaretur. Quæri autem potest, quomodo binos vocaverit de naviculis piscatores, primò Petrum & Andream, deinde progressus paululùm, alios duos filios Zebedæi, sicut narrant Matthæus & Marcus, cùm Lucas dicat, ambas eorum naviculas impletas magnâ illâ capturâ piscium, sociosque Petri commemoret Jacobum & Joannem filios Zebedæi vocatos ad adjuvandû, cùm retia plena extrahere non possent. **R.** Oravit. 43.

Lectio viii.

**U**Nde & intelligendum est, hoc primò esse factum, quod Lucas insinuat, nec tunc eos à Domino vocatos, sed tantùm Petro fuisse prædictum, quòd homines esset capturus: quod non ita dictum est, quasi jam pisces numquam esset capturus: nam & post resurrectionem Domini legimus esse piscatos. Dictum est ergo, quòd deinceps capturus esset homines: non dictum est, quòd jam non esset capturus pisces.

**R.** Videns. 44. **Lectio ix.**

**U**Nde secundùm Lucam datur intelligi, eos ad capturam piscium ex more remeasse, ut postea fieret quod Matthæus, & Marcus narrant, quando eos binos vocavit, & ipse jussit, ut eum sequerentur, primò duobus Petro & Andreæ, deinde duobus Zebedæi filiis. Tunc enim subductis ad terram navibus tamquam cura redeundi, sed ita eum secuti sunt, tamquam vocantem, & jubentem, ut sequerentur.

**T**e Deum laudamus.

Die 25. Januarii.

CONVERSIONIS S. PAULI  
Apostoli.

INFRA OCTAVAM

Die 26. Januarii. Secunda die.

Fit de S. Polycarpo Episcopo & martyre, Semid. cum commenu. Octavæ.

Die 27. Januarii. Tertia die.

Fit de S. Joanne Chrysostomo Episc. & Confess. Duplex, cum commemor. Octavæ.

Die 28. Januarii. Quarta die.

In secundo Nocturno.

De Sermone sancti Augustini Episcopi.

Ex Sermone 14. de Sanctis. **Lectio iv.**

**Q**uid ergo prostratus audit? Saule, Saule, quid me persequeris? Membris adhuc positus in terra, caput clamabat in cælo: & non dicebat, Quid persequeris fideles meos? sed, Quid me persequeris? Et ille: Quid me jubes facere? Jam parat se ad obediendum, qui prius sæviebat ad persequendum. Jam formatur ex persecutore prædicator, ex lupo ovis, ex hoste miles. Ovis audiat quid facere debeat. Cæcus sanè factus, ut interiore luce fulgeret cor ejus. **R.**



**R.** Tu es vas electionis sancte Paule Apostole, prædicator veritatis in universo mundo: \* Per quem omnes Gentes cognoverunt gratiam Dei. \* Intercede pro nobis ad Deum, qui te elegit. Per.

## Lectio v.

**A** Dductus est ad Ananiam, & Ananias interpretatur Ovis. Ecce lupo rapax adducitur ad ovem sequendam, non rapiendam: & ne rapientem ovis expavesceret lupo, ipse pastor de cælo, qui omnia faciebat, nuntiavit lupo venturum ovi, sed non sæviturum: & tamen tam immanis fama lupo illum præcefferat, ut non posset ovis audito ejus nomine non conturbari. Mira & magna res geritur. Lupo sævitia interdicitur: lupo ad ovem captivus ducitur. Tanta autem præcefferat fama lupi raptoris, ut timeret ovis etiam sub manu pastoris.

**R.** Gratia Dei sum id quod sum: \* Et gratia ejus in me vacua non fuit, sed semper in me manet.

\* Qui operatus est Petro in Apostolatum, operatus est & mihi inter Gentes. Et gratia. **Lectio vi.**

**A** B agno pro ovibus mortuo fit ovis secunda de lupo. Ego, inquit, illi ostendam, quanta illi oporteat pati pro nomine meo. Ubi terror? Ubi salus? Quod faciebat contra nomen pastoris, patitur pro nomine pastoris. O sævitia, ô misericordia! Vides illum præparare ferrum: secaturus est,

non perempturus; curaturus, non occisurus. Sed quo fine? Ipsum, qui patiebatur, audite: Non sunt condignæ passionibus hujus temporis ad futuram gloriam, quæ revelabitur in nobis. Ac si dicat: Sæviat mundus, fremit mundus, quod potest, faciat: quid faciet rei quam accepturi sumus? Appendo quod patior, contra id quod spero. Hoc nunc sentio, illud credo: & tamen plus est quod credo, quam quod sentio.

**R.** Saulus, qui & Paulus, magnus prædicator, \* A Deo confortatus convalescebat, & confundebat Judæos. \* Ostendens quia hic est Christus Filius Dei. A Deo. Gloria Patri. A Deo.

In tertio Nocturno, Lectio vii. & viii. sumuntur ex quarta die Octava de Communi Abbatum, Homilia S. Joannis Chrysostomi. Si centuplum, &c. in Evangel. Ecce nos reliquimus, &c. ut infra, 257. cum sequentibus versis, & nona Lectio de S. Agnete secundo.

**R.** vii. Sancte Paule Apostole prædicator veritatis, & doctor Gentium: \* Intercede pro nobis ad Deum, qui te elegit, ut digni efficiamur gratia Dei. \* Tu es vas electionis sancte Paule Apostole, prædicator veritatis. Intercede.

**R.** viii. Damasci, præpositus Gentis Aretæ regis voluit me comprehendere: \* Et à fratribus per murum demissus sum in sporta, \* Et sic evasi manus ejus in nomine Domini. \* Deus & Pater Domini nostri Jesu Christi scit quia non mentior. Et à fratribus. Gloria Patri. Et sic.

*Die 29. Januarii. Quinta die.*

Fit de S. Francisco Salesio Episcopo & Confess. Duplex, cum commem. Octavæ.

*Die 30. Januarii. Sexta die.*

Fit de S. Martina virgine & mart. Semid. cum commem. Octavæ.

*Die 31. Januarii. Septima die.*

Fit de S. Petro Nolasco Confess. Duplex, cum commem. Octavæ.

*Die 1. Februarii.*

Festum S. Ignatii transfertur in aliam diem.

## IN DIE OCTAVA.

*In secundo Nocturno.*

Sermo sancti Joannis Chrysostomi.

Serm. de Ferendis reprehensionibus.

Lectio iv.

**S**Aulus autem adhuc spirans minas, & cædem in discipulos Domini. Atqui in epistolis Paulus vocatur: quare ergo nomen mutavit Spiritus sanctus? Quemadmodum dominus, qui servum mercatus est, ostendere volens se dominum servi, nomen illius immutat: ita & Spiritus sanctus fecit, ubi Paulum captivum accepit, vocabulum ejus mutavit, ut etiam inde disceret Paulus, se habere Dominum. Nominum enim impositio domini signum est, & præcipuum. Volens enim Dominus docere Adamum, quod eum principem & dominum omnium fecisset, adduxit ad eum omnia animalia, ut videret quid vocaret ea. **R. Tu es. 48.**

Lectio v.

**V**erum quam ob causam Spiritus sanctus non statim mutavit nomen Pauli, sed expectavit ad tantum tempus? Si statim converso Paulo mutatum fuisset & nomen ejus, tunc minus manifesta fuisset ejus conversio, & Octav. Rom.

ad fidem translatio. Nam sicut in famulis usu evenire solet, quod obscuro fiant, si quam primum fugam inierunt, sua nomina mutant; ita & in Paulo contigisset, si mox ut relictis Judæis ad nos venit, aliud nomen sortitus fuisset: nemo enim scivisset, quod persecutor ille esset Evangelista. Hinc enim omnes discabant, quod ille ipse esset, qui prius fuerat Ecclesiam persecutus. **R. Gratia. 48.**

Longè infra.

Lectio vi.

**A**grediuntur hic nos quidam dicentes: Et quid mirum, quod Paulus ad fidem pervenit, cum Deus vocem illam, quasi funem cervici ejus injecerit, vique ipsum ad se duxerit? Attendite diligenter. Qualis illa vis & necessitas, dic, ô homo? Vocavit eum supernè. Credis omnino quod vocavit eum supernè? Igitur & te hodie vocat per illam vocem, cur & tu non obedis? Vides non esse necessitatis negotium; nam si necessitas quædam foret, oportebat & te obedire: cum autem & tu non obedis, manifestum, quod ille voluntarius obediit. Multum quidem fecit ad salutem Pauli vocatio: non tamen destituit eum à suis operibus; & suæ propriæ voluntatis laude: neque nocuit ejus libero arbitrio, sed voluntarius advenit ipse, atque sua bona voluntate. **R. Saulus. 48.**

In iii. Noct. ut in die festo de Comuni Abbatum. Homil. S. Hieron. Grandis fiducia. &c. ut infra, 254

E

Dia



*Die 24. Februarii.***INFRA OCTAVAM  
S. MATHIÆ APOSTOLI.**

Si hoc festum venerit ante Quadrag. sit de illa Oct. usque ad Fer. iv. Cinerum exclusive. Lectiones & 3<sup>a</sup> secundi Nocturni de Communi Oct. Apostol. ut infra. Lect. iii. Noct. Homilin. Evang. *Confiteor tibi Pater, &c.* de Communi plurimorum Martyr. cum Resp. de Communi Oct. Apostolorum. 184

*Die 1. Maji.***SS. PHILIPPI & JACOBI  
Apostolorum.****INFRA OCTAVAM.**

Lect. ii. Noct. de Communi Oct. Apost. infra. & *Lux perpetua.* cum temp. u. in eodem Communi tempore Pasch. 80

*Die 2. Maji. Secunda die.*

Fit de S. Athanasio Episcopo & Conf. Duplex, cum commemor. Octavæ.

*Die 3. Maji. Tertia die.*

De Inventione S. Crucis, duplex, sine commemoratione Octavæ.

*Die 4. Maji. Quarta die.*

Fit de S. Monica Vidua, Duplex, cum commem. Octavæ.

*Die 5. Maji. Quinta die.*

Fit de S. Pio V. Papa & Confess. Semiduplex, cum commem. Octavæ.

*Die 6. Maji.*

Fit de S. Joanne ante portam latinam, Duplex, cum commem. Octavæ.

*Die 7. Maji.*

Fit de S. Stanislaw Episc. & Martyre, Semiduplex, cum commem. Octavæ.

*Die 8. Maji. In die Octavæ.**In tertio Nocturno.*

LECTIO sancti Evangelii secundum Joannem.

*LECTIO vii. Cap. 14.*

**I**N illo tempore: Dixit Jesus discipulis suis: Non turberur cor vestrum. Creditis in Deum, & in me credite. In domo Patris mei mansiones multæ sunt. Et reliqua.

Homilia sancti Augustini Episcopi.

*Tract. 68. in Joann.*

**Q**uomodo vadit, & parat locum, si jam multæ mansiones sunt? Aut, si adhuc parandus est, cur non meritò dixisset, Va-

do parare? An istæ mansiones & sunt, & parandæ sunt? Si quò minus enim essent, dixisset, Vado parare: & tamen quia ita sunt, ut parandæ sint, non eas vadit parare, sicut sunt: sed si abierit, & paraverit, sicut futuræ sunt, iterum veniens accipiet suos ad seipsum, & ubi est ipse, sint & ipsi. Quomodo ergo mansiones in domo Patris non aliæ, sed ipsæ, & sine dubio jam sunt sicut parandæ non sunt, & nondum sunt, sicut parandæ sunt?

**R.** Ego sum vitis vera, & vos palmites: \* Qui manet in me, & ego in eo, hic fert fructum multum, alleluja, alleluja. \* Sicut dilexit me Pater, & ego dilexi vos. Qui. *Lectio viii.*

**Q**uomodo ergo putamus, nisi quomodo etiam Prophetæ prædicat Deum, quia fecit quæ futura sunt? Non enim ait, Qui facturus est, quæ futura sunt; sed, Qui fecit quæ futura sunt. Ergo & fecit ea, & facturus est ea: nam neque facta sunt, si ipse non fecit; neque futura sunt, si ipse non fecerit. Fecit ergo ea prædestinando, facturus est operando. Sicut discipulos quando elegerit, satis indicat Evangelium, tunc utique quando eos vocavit: & tamen ait Apostolus: Elegit nos ante mundi constitutionem: prædestinando utique, non vocando. Quos autem prædestinavit, illos & vocavit. Sic & mansiones præparavit & præparat; nec alias, sed

fed quas præparavit, has præparat, qui fecit quæ futura sunt: quas præparavit prædestinando, præparat operando.

**R** Candidi facti sunt Nazaræi ejus, alleluja: splendorem Deo dederunt, alleluja: \*Et sicut lac coagulati sunt, alleluja, alleluja.

**W** Candidiores nive, nitidiores lacte, rubicundiores ebore antiquo, sapphiro pulchriores. Et. Gloria Patri. Et. **Lectio ix.**

**S**ed quid est, quòd ut præpararet abiit, cum profectò nos ipsos præparet, quòd non faciet, si reliquerit? Agnosco Domine, ut possum: nimirum illud significas, quia ut parentur istæ mansiones, vivere debet justus ex fide. Qui enim à Domino peregrinantur, opus habent ex fide vivere, quia per hanc ad speciem contemplandam parantur. Eat ergo Dominus, & paret locum. Eat ne videatur, lateat ut credatur. Tunc enim locus paratur, si ex fide vivatur. Creditus desideretur, ut desideratus habeatur. Desiderium dilectionis præparatio est mansionis. Ita Domine, para quod paras: non enim tibi paras, & te nobis paras; quoniam locum paras, & tibi in nobis, & in te nobis. Tu enim dixisti: Manete in me, & ego in vobis.

Te Deum laudamus.

Festum Apparitionis S. Michælis Archangeli transfertur in aliam diem.

Die 6. Maji.

**INFRA OCTAVAM  
SANCTI JOANNIS**

ante Portam Latinam.

Lect. secundi Noctur. de Communi Oct. Apostol. infra. **Lux perpetua.** cum aliquis de eodem Communi tempore Paschali. 80. **Die 7. Maji. Secunda die.**

Fit de S. Stanislao Episc. & mart. Semid. cum commemor. Octava.

**Die 8. Maji. Tertia die.**

De Apparitione S. Michælis Archangeli, Duplex, cum commem. Octava.

**Die 9. Maji. Quarta die.**

De S. Gregorio Nazianzeno Episc. & Confess. Duplex, cum commemor. Octava.

**Die 10. Maji. Quinta die.**

Fit de S. Antonino Episc. & Confess. Semiduplex, cum commemor. Octava.

**Die 11. Maji. Sexta die.**

In tertio Nocturno.

Lectio S. Evangelii secundum Matthæum.

Lectio vii. Cap. 20. c.

**I**n illo tempore: Accessit ad Jesum mater filiorum Zebedæi cum filiis suis, adorans & petens aliquid ab eo. Et reliqua.

Homilia sancti Ambrosii Episcopi.

Lib. 5. de Fide ad Gratianum, c. 2. post init.

**C**onsiderate, quæ mater filiorum Zebedæi cum filiis & pro filiis petat: Mater est utique cui pro filiorum honore sollicitæ immoderatio quidem, sed tamen ignoscenda mensura votorum est. Atque mater ætate longæva, studio religiosa, solatio destituta, quæ tunc temporis, quando vel juvanda, vel alenda foret validæ prolis auxilio, abesse sibi liberos patiebatur, & voluptati suæ mercedemsequentium Christum prætulera filiorum. Qui prima voce vocati à Domino (ut legimus) relictis retibus & patre secuti sunt eum. **R.** Ego sum. 50.

Lectio viii.

**H**æc igitur studio maternæ sedulitatis indulgentior obs-



crabat Salvatorem, dicens: Ut se-  
deant hi duo filii mei, unus ad  
dexteram tuam, & alter ad sini-  
stram in regno tuo. Et si error,  
pietatis tamen error est. Nesci-  
unt enim materna viscera pati-  
entiam: & si voti avara, tamen  
veniabilis cupiditas, quæ non pe-  
cuniæ est avida, sed gratiæ. Nec  
inverecunda petitio, quæ non sibi,  
sed liberis consulebat. Matrem  
considerate, matrem cogitate.

R. Candidi. 51.

Lectio ix.

**C**onsiderabat Christus matris  
dilectionem, quæ filiorum  
mercede grandævam solabatur  
senectam: & desiderii licet fessa  
maternis, charissimorum pigno-  
rum tolerabat absentiam. Con-  
siderate etiam foeminam, hoc est,  
sexum fragiliorem, quem Domi-  
nus propria nondum confirma-  
verat passione. Considerate, in-  
quam, Hevæ illius primæ mulie-  
ris hæredem, transfusa in omnes  
immoderatæ cupiditatis successi-  
one labentem: quam Dominus  
adhuc proprio sanguine non re-  
demerat, nondum inolitam affe-  
ctibus omnium immodici con-  
tra fas honoris appetentiam suo  
Christus cruore diluerat. Hære-  
ditario igitur mulier delinquebat  
errore. **T**e Deum laudamus.

Die 12. Maji. Septima die.

Fit de SS. Nereo &c. mart. Semidupl. cum  
commemor. Octavæ.

Die 13. Maji. In die Octava.

In tertio Nocturno.

Lectio sancti Evangelii secundum Mattheum.

Lectio vii. Cap. 22. c.

**I**n illo tempore: Accessit ad Je-

sum mater filiorum Zebedæi cum  
filiis suis, adorans & petens ali-  
quid ab eo. Et reliqua.

Homilia S. Joannis Chrysostomi.

Homil. 66. in Matth.

**N**on turbetur quisquam, si a-  
deo imperfectos dicimus A-  
postolos fuisse: nondum enim  
mysterium crucis erat consum-  
matum, nondum gratia Spiritûs  
in corda ipsorum infusa. Quod  
si virtutem ipsorum discere cu-  
pis, quales post datam gratiam  
Spiritûs fuerint, considera, & vi-  
debis, omnem ab illis perversam  
affectionem fuisse superatam. Hac  
enim de causa eorum modò im-  
perfectio revelatur, ut apertè per-  
cipere possis, quales subito per  
gratiam effecti fuerunt. Quod i-  
gitur nihil spiritale petebant, nec  
de cœlesti regno quidquam co-  
gitabant, perspicuum est. Sed ta-  
men inspiciamus etiam quomo-  
do accedant, & quid dicant. Vo-  
lumus, inquit, ut quodcumque  
petierimus, facias nobis. Ad quod  
Christus, Quid vultis? respondit:  
non ignorans certè, sed ut eos re-  
spondere cogat, & ulcus detegat,  
& ita medicamentum apponat.

R. Ego sum. 50. Lectio viii.

**I**lli verò cum erubescerent, &  
inverecundiâ prohiberentur, quo-  
niam humano affectu eò deve-  
nerant, seorsum ab aliis discipu-  
lis Christum accipientes, interro-  
gaverunt. Progressi sunt enim,  
inquit, ne illis manifesti fierent:  
& ita demum ea quæ volebant,  
dixe-

dixerunt. Volebant autem, ut ego conjicio, quoniam super duodecim sedes sessuros discipulos audierunt, primatum hujus confessus impetrare: & præponi quidem se cæteris sciebant, Petrum verò sibi præferri formidantes, dicere ausi sunt: Dic ut unus à dextris, alter à sinistris sedeat. Et urgent dicentes: Dic. Quid igitur ipse? Ut significaret eos nihil petere spiritale, sed nec scire quidem quid postulent: non enim petere auderent, si scirent: Nescitis, ait, quid petatis: nescitis quàm magnum hoc sit, quàm mirabile, ac ipsas superiores excedens virtutes.

R. Candidi. 51. **Lectio ix.**

**E**T adjecit: Potestis bibere calicem, quem ego bibiturus sum; & baptismo, quo ego baptizor, baptizari? Perpendis, quomodo statim ab hac opinione ipsos removet, contraria eis disserens. Nam vos, inquit, de honoribus & de coronis mecum agitis: ego verò de luctamine atque sudore differo. Non præmiorum hoc tempus est, nec illa gloria mea modò apparebit; sed cædis ac periculorum tempus præsens est. Perspice autem, qualiter ipso interrogationis modo & hortatur & allicit. Non enim dixit: Potestisne cædem subire? potestisne vestrum effundere sanguinem; sed, Quonam pacto potestis bibere calicem? Deinde alliciens, inquit, Quem ego bibitu-

rus sum: ut ipsa cum eo communicatione laborum promptiores redderentur. Te Deum.

Die 11. Junii.

**S. BARNABÆ APOSTOLI.  
INFRA OCTAVAM**

Lectioes & Responsorialia secundi Nocturni de Communi Octava Apostolorum, ut infra.

80 Die 12. Junii. Secunda die.

Fit de S. Joanne & S. Jacundo Conf. duplex, cum commemor. Octavæ.

Die 13. Junii. Tertia die.

Fit de S. Antonio de Padua Conf. duplex, cum commemor. Octavæ.

Die 14. Junii. Quarta die.

De S. Basilio Magno Episcopo & Confess. duplex, cum commemor. Octavæ.

Die 15. Junii. Quinta die.

In tertio Nocturno.

Lectio S. Evangelii secundum Matthæum.

Lectio vii. Cap. 10. b

**I**N illo tempore: Dixit Jesus discipulis suis: Ecce ego mitto vos, sicut oves in medio luporum. Et reliqua.

Homilia sancti Hilarii Episcopi.

Cap. 10. in Matth. circa med.

**I**nstructos nos serpentis prudentiâ monet esse oportere. Hunc, antequam Adam traduceret, jam sapientem Genesis nuncupavit, & prudentiam ejus malignantis consilii ordine docuit. Primum enim animam sexus mollioris aggressus est, spe deinde illexit, & communionem immortalitatis sponndit: & per hæc tanta præmia, opus consilii & voluntatis suæ gessit. Pari igitur opportunitate introspecta uniuscujusque & natura & voluntate, verborum adhibenda prudentia est: spes bonorum futurorum revelanda, & cœlestia perfectæ fidei præmia



proferenda. *R.* Isti sunt. 86.

*Lectio viii.*

**E**T quod ille mentitus est, nos prædicemus ex vero, secundum sponſionem Dei, Angelis similes futuros esse qui credent: ut mentes plebium faciles, & absolutas circumſævientibus licet lupis & hæreticis, promissis regnorum cœlestium occupemus, & rerum fidem serpentis prudentiâ, columbæ simplicitate tradamus. Monet etiam traditis abesse oportere curam responsionis, sed expectandum potius quid Spiritus Dei suggerat. Quia fides nostra omnibus præceptis divinæ voluntatis intenta, ad responsionem scientiæ instruatur, in exemplo habentes Abraham, cui postulato ad hostiam Isaac, non defuit aries ad victimam.

*R.* Isti sunt. 86.

*Lectio nona de SS. Vito, &c. mart.*

*Die 16. Junii. Sexta die.*

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 10. b*

**I**N illo tempore: Dixit Jesus discipulis suis: Ecce ego mitto vos sicut oves in medio luporum. Et reliqua.

*Homilia sancti Augustini Episcopi.*

*Serm. 119. de divers.*

**A**Udîstis, fratres, cum sanctum Evangelium legeretur, quemadmodum Dominus noster Jesus Christus disciplinâ suâ suos corroboraverit, dicens: Ecce ego mitto vos sicut oves in medio luporum. Considerate, fratres mei, quid faciat, si unus lupus inter

multas oves veniat: quantacumque sint ovium millia, uno-lupo in medio, turbabuntur; & si non omnes laniantur, omnes tamen terrentur. Qualis ergo erat ista ratio, quale consilium, qualis potestas, nec lupo ad oves admittere, sed in lupos oves mittere? Mitto, inquit, vos sicut oves in medio luporum: non ad limites luporum, sed in medio luporum. *R.* Isti sunt qui. 86.

*Lectio viii.*

**E**Rat ergo luporum agmen, oves paucæ. Cum enim multi lupi occiderunt paucas oves, conversi sunt lupi, & facti sunt oves. Audivimus ergo quod monuit qui coronas promisit, & agonem præmisit: & quia expectat certantes, adjuvat laborantes. Cujusmodi certamen indixit? Estote, inquit, astuti ut serpentes, & simplices sicut columbæ. Hoc qui intellexerit & tenuerit, securus moritur. Quis autem securus moritur, nisi qui se sic noverit moriturum; ut mors in illo moriatur, vita coronetur?

*R.* Isti sunt viri. 86. *Lectio ix.*

**Q**Uapropter, charissimi, exponendum est nobis, quamvis hinc jam sæpius dixerimus, quid sit simplices esse ut columbæ, astuti ut serpentes. Si jam simplicitas columbarum indicta est nobis, astutia serpentis quid facit in columbæ simplicitate? Amo in columba, quod fel non habet; timeo in serpente, quod vene-

venenum habet. Noli ex omni parte horrere serpentem: habet quod oderis, habet quod imiteris. Serpens enim cum fuerit senectute prægravatus, & senferit pondus vetustatis, coarctat super cavernam, & ponit tunicam veterem, ut novus exultet. Imitare illum Christiane, qui audis Christum dicentem, Intrate per angustam portam. Et Paulus Apostolus tibi dicit: Exuite veterem hominem cum actibus suis, & induite novum. **Te Deum.**

*Die 17. Junii. Septima die.*

*In tertio Nocturno.*

Lectio S. Evangelii secundum Matthæum.

*Lectio vii. Cap. 10. b*

**I**n illo tempore: Dixit Jesus discipulis suis: Ecce ego mitto vos, sicut oves in medio luporum. Et reliqua.

*De Homilia sancti Augustini Episcopi.*

*Unde supra.*

**H**abes ergo quod imiteris in serpente: noli mori pro vetustate, sed pro veritate. Qui moritur pro commodo temporali, pro vetustate moritur: cum autem exutus fueris omni ista vetustate, imitatus es astutiam serpentis. Imitare & illum in hoc: serva caput tuum, tene apud te Christum. Si fortè aliquis vestrum advertit aliquando, cum voluerit colubrum occidere, quomodo pro capite suo totum corpus obicit ictibus ferientis: illud in se feriri non vult, ubi se novit vitam habere. Et Christus vita nostra est: ipse enim dixit: Ego sum via, veritas, & vita.

Audi & Apostolum: Caput viri Christus est. Qui ergo Christum servat in se, caput suum servat pro se. **R.** Isti sunt qui. 86.

*Lectio viii.*

**J**am verò quid opus est commendare multis verbis simplicitatem columbarum? cavenda enim erant venena serpentis. Ibi imitatio periclitabatur, ibi erat quod timeretur. Columbam verò securus imitare, attende columbas in societate gaudere: ubique simul volant, simul pascuntur, nolunt esse solæ: communionem gaudent, charitatem servant, gemitibus amoris murmurant, osculis filios generant. Nam quando columbæ, quod plerumque advertimus, rixantur de cellulis suis, quodammodo pacata contentio est. Numquid quia rixantur, separantur? simul volant, simul pascuntur, & ipsa inter se pacata est rixa.

**R.** Isti sunt viri. 86. *Lectio ix.*

**V**ide rixam columbarum. Apostolus dicit: Si quis verbo nostro non obaudit per epistolam, hunc notate, & nolite commisceri cum eo. Ecce rixa: sed attende, quoniam columbarum est rixa, non luporum. Continuo subjecit: Et non ut inimicum existimetis, sed corripite ut fratrem. Columba amat, & quando rixatur: lupus odit, & quando blanditur. Columbarum ergo simplicitatem habentes, astutiam servate serpentum. **Te Deu.**



*Die 18. Junii. In die Octava.**In tertio Nocturno.**Lectio S. Evangelii secundum Matthæum.**Lectio vii. Cap. 10. b*

**I**N illo tempore: Dixit Jesus discipulis suis: Ecce ego mitto vos sicut oves in medio luporum. Et reliqua.

*Homilia sancti Joannis Chrysostomi.**Homilia 34. in Matth. paulò post init.*

**D**iligenter considera, qui sunt qui hæc ardua & laboriosa adeunt, formidolosi videlicet, & indocti, illiterati, rudes, obscuri quidam homines & ignoti, qui numquam Philosophorum perceperunt instituta, vixque umquam in forum descenderunt, piscatores, & publicani, multis repleti rebus, quæ jure animos eorum possent dejicere. Nam si magnos & claros viros tanta difficultas rerum potuisset commovere, quomodo non potuisset imperitos homines, quibus nullius rei magnæ aliquid venit in mentem? sed non dejecit, neque turbavit: nec id injuria, dicet quispiam: cum se intelligerent posse leprosos mundare, dæmonia ejicere, **R.** Isti sunt, qui. 85.

*Lectio viii.*

**E**Go autem dicere non dubitârim, quia videlicet id ipsum jure debebat ipsos conturbare; quoniam, qui tantam potestatem haberent, ut defunctos etiam à morte possent excitare, hi tanta pericula essent subituri, tanta bella gesturi, ad judices victi deducendi, communis denique totius orbis admonitio futuri. Quæ

igitur in omnibus his erat consolatio? sola mittentis virtus. Quocirca ita signanter incepit: Ecce ego mitto vos. Sufficiat hoc vobis ad omnem consolationem, satis sit ad confitendum. Vides, quanta ejus est auctoritas? intelligis, quoniam maxima sit potestas? percipis inexpugnabile ejus esse virtutem? **R.** Isti sunt viri.

*Lectio ix. de SS. Marco, &c. mart. 85.**Die 25. Julii.*

### S. JACOBI APOSTOLI. INFRA OCTAVAM

*Lect. &c. ii. Nocturni de Comuni Octava Apostolorum, ut infra. 80.**Die 26. Julii. Secunda die.**Fit de S. Anna dupl. cum commem. Oct.**Die 27. Julii. Tertia die.**In tertio Nocturno.**Lectio S. Evangelii secundum Matthæum.**Lectio vii. Cap. 20.*

**I**N illo tempore: Accessit ad Jesum mater filiorum Zebedæi cum filiis suis, adorans & petens aliquid ab eo. Et reliqua.

*Homilia S. Hilarii Episcopi. Can. 20.*

**N**on sine aliquo momento rerum ita effectum fuisse existimandum est, ut mater filiorum Zebedæi Dominum deprecaretur. Numquid & filiis petendi familiaritas non erat? sed erat gestorum effectibus prophetandum. Itaque in matre filiorum Zebedæi lex intelligitur, quæ confidentia privilegii sui pro credentibus ex se populis deprecatur: quæ quia superius audierat primos novissimos, & novissimos primos futuros; deferri filiis suis orat, ut in Domini regno unus ad dexteram ejus sedeat, alter ad sinistram.

Cui

Cui Dominus respondit, nescire eam quid oret. Nihil quidem de gloria Apostolorum ambigebatur, & judicatos eos sermo superior exposuit.

*R. Isti sunt, qui. 86. Lectio viii.*

**D**enique in medio sermone, an calicem suum possent bibere interrogat. At illi, qui jam martyrii libertatē constantiamq; retinebant, bibituros se pollicentur. Dominus collaudans eorum fidem, ait, martyrio quidem eos secum compati posse; sed lavæ ejus ac dexteræ affidere, aliis à Deo Patre fuisse depositum. Et quidem, quantum arbitramur, ita honor iste aliis est reservatus, quòd tamen nec Apostoli ab eo erunt alieni: qui in duodecim Patriarcharum sede confidentes Israël judicabunt. Cæterum, ut ratio spiritualis intelligentiæ plena esset, pro duobus Dominum mater oravit. Duæ enim sunt vocationes ex Israël: una discipulorum Joannis, altera Apostolorum & Phariseorum. Ideo igitur pro duobus oravit, quia Evangelio Christi hæ vocationes geminæ crediderunt. *R. Isti sunt viri. 86.*

*Nona Lectio de S. Pantaleone mart.*

*Die 28. Julii. Quarta die.*

*Fit de SS. Nazario &c. mart. semidupl. cum commemor. Octava.*

*Die 29. Julii. Quinta die.*

*De S. Martha virg. semid. cum commemor. Oct.*

*Die 30. Julii. Sexta die.*

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 20.*

**I**n illo tempore: Accessit ad Jesum mater filiorum Zebedæi

cum filiis suis, adorans & petens aliquid ab eo. Et reliqua.

*Homilia venerabilis Bedæ Presbyteri.*

*Post initium.*

**C**redendum est, quòd illa maxime causa, vel muliebrem matris affectum, vel carnales adhuc discipulorum animos ad hæc postulanda concitaverit, quia meminissent sermonis Domini, cum ait: Cum sederit Filius hominis in sede majestatis suæ, sedebitis & vos super sedes duodecim; nossetque se inter discipulos specialius à Domino diligere, se specialius cum beato Petro consocios sæpè factos arcanorum, quæ ignorarent cæteri, quod frequens sancti Evangelii textus indicat. Hinc est enim, quòd ipsis quoque quomodo Petro, novum ab illo nomen imponitur; ut sicut ille, qui prius Simon dicebatur, per fortitudinem ac stabilitatem fidei impugnabilis vocabulum Petri meruit; ita & isti Boanerges, hoc est, filii tonitruum vocarentur: quia videlicet & vocem Patris super Dominum in monte clarificatum unà cum Petro audirent, & plura aliis discipulis mysteriorum secreta cognoscerent. *R. Isti sunt, qui. 86.*

*Lectio viii.*

**Q**uia verò iidem filii Zebedæi promptum gerebant animum ad bibendum calicem Domini, constat eos cum cæteris Apostolis dignitatem sedium quam quærebant, accepisse; non tamen ea distinctione qua petebant, sed ambo



ambo prius ad sinistram ejus ad tempus, ambo nunc ad dextram ejus sedere perpetuo meruerunt. A sinistris quippe Christi sedebant, cum regendis in hac vita fidelium populis Apostolico jure præsiderent, illo nimirum in regno, de quo ipse ait: Regnum Dei intra vos est. Sedent à dextris nunc in illa, quæ mortem nescit, vita, iudices mundi cum illo, utramque hanc sedem illis ipso Filio cum patre parante. **R.** Isti sunt. 86.

Nona Lectio de SS. Abdor, & Sennen martyris, ut in Breviario.

Die 31. Julii. Septima die.

Fit de sancto Ignatio Confess. Dupl. cum commemor. Octava.

Die 1. Augusti.

Festum sancti Petri ad Vincula transferatur in aliam diem.

## IN DIE OCTAVA.

In tercio Nocturno.

Lectio sancti Evangelii secundum Matthæum.

Lectio vii. Cap. 20. c.

**I**N illo tempore: Accessit ad Jesum mater filiorum Zebedæi cum filiis suis, adorans & petens aliquid ab eo. Et reliqua.

Homilia sancti Hieronymi Presbyteri.

Lib. 2. Comment. in Matth. c. 20.

**U**Nde opinionem regni habet mater filiorum Zebedæi, ut cum Dominus dixerit, Filius hominis tradetur principibus sacerdotum, & Scribis, & condemnabunt eum morte, & tradent Gentibus ad illudendum, & flagellandum, & crucifigendum: & ignominiam passionis timentibus discipulis nuntiaret; illa gloriam postulet triumphantis? Hac, ut reor, ex causa, quia post omnia dixerat

Dominus: Et tertia die resurget; putavit eum mulier post resurrectionem illico regnaturum; & hoc quod in secundo adventu promittitur, in primo esse complendum: & aviditate foeminea præsencia cupit, immemor futurorum. **R.** Isti sunt qui. 86.

Lectio viii.

**M**Ater postulat, & Dominus discipulis loquitur: intelligens preces ejus ex filiorum descendere voluntate. Potestis bibere calicem, quem ego bibiturus sum? Calicem in Scripturis divinis intelligimus passionem, juxta illud: Pater, si possibile est, transeat à me calix iste. Et in Psalmo: Quid retribuam Domino pro omnibus, quæ retribuit mihi? Calicem salutaris accipiam, & nomen Domini invocabo. Statimque infert quis iste sit calix: Pretiosa in conspectu Domini mors Sanctorum ejus.

**R.** Isti sunt viri. 86.

Nona Lect. de SS. Machab. martyris, ut in Breviario.

Die 1. Augusti.

## INFRA OCTAVAM S. PETRI AD VINCULA.

Lectioes ii. Noct. de Comarum Qd. Apostolorum, ut in rago. cum sequent. h. p. d. l. o. r.

**R.** iv. Domine si tu es, jube me venire ad te super aquas: \* Et extendens manum apprehendit eum, & dixit Jesus: Modicæ fidei, quare dubitasti. **V.** Cumque vidisset ventum validum venientem, timuit: & cum cœpisset mergi, clamavit dicens: Domine saluum me fac. Et extendens.

**R.** v.

**R. v.** Surge Petre, & indue te vestimentis tuis, accipe fortitudinem ad salvandas Gentes: \* Quia ceciderunt catenæ de manibus tuis. **V.** Angelus Domini astitit, & lumen refulsit in habitaculo carceris, percussioque latere Petri excitavit eum dicens: Surge velociter. Quia.

**R. vi.** Tu es pastor ovium, princeps Apostolorum, tibi tradidit Deus omnia regna mundi: \* Et ideo tibi traditæ sunt claves regni cœlorum. **V.** Quodcumque ligaveris super terram, erit ligatum & in cœlis: & quodcumque solveris super terram, erit solutum & in cœlis. Et. Gloria Patri. Et.

*Die 2. Augusti. Secunda die.*

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 16.*

**I**N illo tempore: Venit Jesus in partes Cæsareæ Philippi: & interrogabat discipulos suos, dicens: Quem dicunt homines esse Filium hominis? Et reliqua.

*Homilia sancti Hilarii Episcopi.*

*Comment. in Matth. can. 16. post initium.*

**D**ominus à discipulis requirit, quem se homines esse dicerent: & adjecit, hominis filium. Hæc enim confessionis tenenda ratio est, ut sicut Dei Filium, ita & filium hominis meminerimus: quia alterum sine altero nihil spei tribuit ad salutem. Editis itaque, quæ diversæ de eo erant hominum opinionibus, quid de se ipsi sentiant quærit. Petrus respondit: Tu es Christus Filius Dei

vivi. Sed Petrus conditiones propositionis expenderit, Dominus enim dixerat: Quem me homines esse dicunt, filium hominis? Et certè filium hominis, contemplatio corporis præferabat. Sed addendo, Quem me esse dicunt, significavit, præter id quod in se videbatur, esse aliud sentiendum: erat enim hominis filius. Quod igitur de se opinandi iudicium desiderabat? Non illud arbitramur, quod de se ipse confessus est: sed occultum erat, de quo quærebatur, in quod se credentium fides debebat extendere.

**R.** Ego pro te rogavi Petre, ut non deficiat fides tua: \* Et tu aliquando conversus confirma fratres tuos. **V.** Caro & sanguis non revelavit tibi, sed Pater meus, qui est in cœlis. Et tu. *Lectio viii.*

**E**T dignum planè confessio Petri præmium consecuta est; quia Dei Filium in homine vidisset. Beatus hic est, qui ultra humanum oculos intendisse & vidisse laudatus est: non id quod ex carne & sanguine erat contuens, sed Dei Filium cœlestis Patris revelatione conspiciens: dignusque iudicatus, qui quod in Christo Dei esset, primus agnosceret. O in nuncupatione novi nominis felix Ecclesiæ fundamentum! dignaque ædificatione illius petra, quæ infernas leges, & tartari portas, & omnia mortis claustra dissolveret! O beatus cœli janitor, cujus arbitrio claves æterni



æterni aditus traduntur, cujus terrestre iudicium præjudicata auctoritas sit in cœlo! ut quæ in terris aut ligata sint aut soluta, statuti ejusdem conditionem obtineant & in cœlo.

**R.** Quem dicunt homines esse Filium hominis? dixit Jesus discipulis suis. Respondens Petrus, dixit: Tu es Christus Filius Dei vivi: **\*** Et ego dico tibi, quia tu es Petrus; & super hanc petram ædificabo Ecclesiam meam. **V.** Beatus es Simon Bar-Jona, quia caro & sanguis non revelavit tibi, sed Pater meus, qui est in cœlis. Et ego. Gloria Patri. Et ego.

Lectio ix. S. Stephani Papæ & mart.

Die 3. Augusti. Tertia die.

Fit de Inventionem sancti Stephani, semi-dupl. cum commemor. Octavæ.

Die 4. Augusti. Quarta die.

De sancto Dominico Confess. dupl. cum commemor. Octavæ.

Die 5. Augusti. Quinta die.

De Dedicat. sanctæ Mariæ ad Nives, dupl. cum commemor. Octavæ.

Die 6. Augusti. Sexta die.

De Transfiguratione Domini, duplex, cum commemor. Octavæ.

Die 7. Augusti. Septima die.

Fit de sancto Cajetano Confess. dupl. cum commemor. Octavæ.

Die 8. Augusti.

Festum SS. Cyriaci, &c. transfertur in aliam diem.

## IN DIE OCTAVA.

In tertio Nocturno.

Lectio S. Evangelii secundum Matthæum.

Lectio vii. Cap. 16. b.

**I**n illo tempore: Venit Jesus in partes Cæsareæ Philippi: & interrogabat discipulos suos, dicens: Quem dicunt homines esse Filium hominis? Et reliqua.

Homilia sancti Hieronymi Presbyteri.

Lib. 3. Commentar. in Matth. cap. 16.

**P**ulchrè interrogat: Quem dicunt homines esse Filium hominis? quia qui de Filio hominis loquuntur, homines sunt: qui verò divinitatem ejus intelligunt non homines, sed dii appellantur. At illi dixerunt: Alii Joannem Baptistam, alii autem Eliam. Miror quosdam interpretes causas errorum inquirere singulorum, & disputationem longissimam texere, quare Dominum nostrum Jesum Christum alii Joannem putaverint, alii Eliam, alii Jeremiam, aut unum ex Prophetis: cum sic potuerint errare in Elia & Jeremia, quo modo Herodes erravit in Joanne, dicens: Quem ego decollavi Joannem, ipse surrexit à mortuis, & virtutes operantur in eo.

**R.** Ego pro te. 59. Lectio viii.

**V**os autem quem me esse dicitis? Prudens lector attende, quòd ex consequentibus, textuque sermonis, Apostoli nequaquam homines, sed dii appellantur. Cum enim dixisset: Quem dicunt homines esse Filium hominis? subjecit: Vos autem quem me esse dicitis? Illis, quia homines sunt, humana opinantibus; vos qui estis dii, quem me esse existimatis? Petrus ex persona omnium Apostolorum proficitur: Tu es Christus Filius Dei vivi. Deum vivum appellat, ad distinctionem eorum deorum, qui putantur dii, sed mortui sunt, **R.** Quem dicunt. 60.

Lectio

Leſtio ix.

**R**espondens autem Jeſus, di-  
xit ei: Beatus es Simon Bar-  
Jona. Teſtimonio de ſe Apoſto-  
li reddit vicem. Petrus dixerat:  
Tu es Chriſtus Filius Dei vivi:  
mercedem recepit vera confeſ-  
ſio. Beatus es Simon Bar-Jona.  
Quare? Quia non revelavit tibi  
caro & ſanguis, ſed revelavit Pa-  
ter. Quod caro & ſanguis reve-  
lare non potuit, Spiritus ſancti  
gratiâ revelatum eſt. Ergo ex  
confeſſione ſortitur vocabulum,  
quod revelationem ex Spiritu  
ſancto habeat, cujus & filius ap-  
pellandus ſit. Siquidem Bar-Jo-  
na in noſtra lingua ſonat, filius  
columbæ. **Te Deum.**

Die 24. Auguſti.

S. BARTHOLOMÆI APOST.

Extra Roman.

INFRA OCTAVAM

Leſtiones & Reſponſoria ſecundi Nocturni  
de Comuni Octava Apoſtolorum ut infra.  
Reſponſoria tertii Nocturni, ex eodem. 86.

Die 25. Auguſti. Secunda die.

Fit de S. Ludovico Confeſſ. Semidupl. cum  
commemor. Octave.

Die 26. Auguſti. Tertia die.

In tertio Nocturno.

Leſtio ſancti Evangelii ſecundum Lucam.

Leſtio vii. Cap. 6.

**I**n illo tempore: Exiit Jeſus in  
montem orare, & erat perno-  
ctans in oratione Dei. Et cum  
dies factus eſſet, vocavit diſci-  
pulos ſuos. Et reliqua.

De Homilia ſancti Ambroſii Episcopi.

Lib. 5. in Luc. c. 6.

**N**on omnis, qui orat, aſcendit  
in montem: eſt enim oratio,  
quæ peccatum facit: ſed qui bene  
orat, à terrenis ad ſuperiora pro-  
Octav. Rom.

grediens, verticem curæ ſublimis  
aſcendit. At ille non aſcendit in  
montem, qui de ſæculi divitiis,  
aut de honore ſolicitus eſt: non  
aſcendit in montem, qui fundi  
jus optat alieni. Aſcendit ille, qui  
Deum quærit: aſcendit ille, qui  
curſus ſui Dominica adjumenta  
depoſcit. **R.** Iſti ſunt qui. 86.

Paulo pòit. Leſtio viii.

**N**oli inſidiatrices aperire au-  
res, ut putes filium quaſi in-  
firmum rogare, ut impetret quod  
implere non poſſit. Potestatis au-  
ctor, obedientiæ magiſter ad præ-  
cepta virtutis ſuo nos informat  
exemplo. Advocatum, inquit,  
habemus apud Patrem. Si advo-  
catus eſt, debet utique pro meis  
intervenire peccatis. Non ergo  
quaſi infirmus, ſed quaſi pius ob-  
ſecrat. Vis ſcire, quia omnia, quæ  
velit, poſſit? & advocatus & judex  
eſt: in altero pietatis officium,  
in altero inſigne eſt potestatis.  
**R.** Iſti ſunt viri. 86.

Leſtio ix. de S. Zephyrino Papa & mart.

Die 27. Auguſti. Quarta die.

In tertio Nocturno.

Leſtio ſancti Evangelii ſecundum Lucam.

Leſtio vii. Cap. 6. b

**I**n illo tempore: Exiit Jeſus in  
montem orare, & erat perno-  
ctans in oratione Dei. Et cum  
dies factus eſſet, vocavit diſci-  
pulos ſuos. Et reliqua.

Homilia venerabilis Bedæ Preſbyteri.

Fe lib. 2. Comment. in Luc. cap. 6.

**N**otandum, quod Evangelica  
& Apoſtolica ſcriptura non  
ſolum illos duodecim appellat  
diſcipulos Chriſti, ſed & omnes  
F qui



qui in eum credentes magisterio ejus ad regnum cœlorum erudiebantur. Discipuli quippe à discendo sunt vocati, ex quorum multitudine, quos ipse voluit, elegit, quos & Apostolos nominavit. Apostoli Græcè, Latine Missi dicuntur. *R.* Isti sunt qui.

86

*Lectio viii.*

**C**ujus sacramentum nominis exponens Evangelista Marcus, ait: Et fecit ut essent duodecim cum illo, & ut mitteret eos prædicare Evangelium. Et ipse Dominus dicit: Sicut misit me Pater, & ego mitto vos. Qui benè duodecim sunt electi, ut videlicet mundi salutem, quam verbo prædicarent, suo quoque numero mysticè commendarent.

*R.* Isti sunt viri. 86 *Lectio ix.*

**H**inc est enim, quia cum in typo Ecclesiæ Salomon Domino templum conderet, fecit & mare æneum, in quo sacerdotes lavarentur, duodecimque illud boum clunis imposuit, quorum tres Aquilonem, tres Occidentem, tres Meridiem, & tres aspicerent Orientem. Figuraliter insinuans, quoniā Apostoli Apostolorumque successores cunctas orbis quadrati plagas, fide & confessione sanctæ Trinitatis essent peccatorum labe purgaturi. *Te Deum.*

*Die 28. Augusti. Quinta die.**Fit de sancto Augustino Episcopo & Confess. Dupl. cum comm. Octava.**Die 29. Augusti. Sexta die.**De Decollatione sancti Joannis Baptistæ, Dupl. cum comm. Octava.**Die 30. Augusti. Septima die.**De S. Rosa virg. dupl. cum commem. Oct.**Die 31. Augusti. In die Octava.**In tertio Nocturno.**Lectio sancti Evangelii secundum Lucam.**Lectio vii. Cap. 6. b*

**I**n illo tempore: Exiit Jesus in montem orare, & erat pernoctans in oratione Dei. Et cum dies factus esset, vocavit discipulos suos. Et reliqua.

*Homilia venerabilis Bedæ Presbyteri.**Ex lib. 2. Comment. in Lucam c. 6.*

**B**artholomæus Syrum nomen est, non Hebræum, & interpretatur, Filius suspendentis aquas, hoc est, Filius Dei: qui prædicatorum suorum mentes ad cœlestia contemplanda suspendit, ut quò celsa liberius pervolant, eò terrenorum corda feracius dictorum suorum guttis inebrient. Unde benè Moyses de Ecclesiā mysticè differens, ait: Quia non est terra, ad quam ingredimini possidendam, similis terræ Ægypti, de qua existis, ubi jacto semine in hortorum morem aquæ ducuntur irriguæ, sed de cœlo pluvias expectans, quam Deus suus invisit omni tempore; sæcularis enim sapientia quasi coluber per humum serpit; divina autem de cœlestibus intonat.

*R.* Isti sunt qui. 86*Paulo infra.**Lectio viii.*

**E** Lecturus Apostolos Dominus in montana subiit, turbas verò docturus ad campestria redit; quia non nisi in humili Christum turbæ videre sufficiunt. Nam hæc est norma, quam secutus Apostolus ait: Non potui vobis loqui quasi spiritalibus, sed quasi

quasi carnalibus. Quasi parvulis in Christo lac vobis potum dedi, non escam; nondum enim poteratis, sed ne nunc quidem potestis. Apostoli autem ipsi secundum Matthæum quasi perfectiores, & in monte, & aperto Salvatoris ore docti esse narrantur.

R. Isti sunt viri. 86. *Lectio ix.*

**U**bi si quis diligentius utrumque velit Evangelistam perscrutari, potest intelligi, cum in monte duodecim discipulos elegit è pluribus, quos & Apostolos nominavit, quod Matthæus prætermisit, tunc illum habuisse sermonem, quem Matthæus interposuit, & Lucas tacuit; hoc est, in monte. Ac deinde, cum descendisset in loco campestri habuisse alterum similem, de quo Matthæus tacet, Lucas non tacet: & utrumque sermonem eodem modo esse conclusum; raroque uspiam vel turbas Dominum ad altiora sequi, vel quempiam debilem invenies in monte curari. Te Deum.

Festum S. Raymundi Nonnati, Duplex, transferatur in aliam diem.

## INFRA OCTAVAM S. BARTHOLOMÆI

Romæ & ubi celebratur die 25. Augusti.

Lect. & Respons. in Noct. de Comuni Oct. Apostolorum, infra. 2c.

*Die 26. Augusti. Secunda die.*

Fir de S. Ludovico Confess. Semid. cum commem. Oct. & S. Zephryani.

*Die 27. Augusti. Tertia die.*

In tertio Nocturno.

Lectio S. Evangelii secundum Lucam.

*Lectio vii. Cap. 6. b*

**I**n illo tempore: Exiit Jesus in

montem orare, & erat pernoctans in oratione Dei. Et cum dies factus esset, vocavit discipulos suos. Et reliqua.

De Homilia S. Ambrosii Episcopi.

Lib. 5. in Lucam, c. 6.

**N**on omnis, qui orat, ascendit in montem: est enim oratio, quæ peccatum facit: sed qui bene orat, à terrenis ad superiora progrediens, verticem curæ sublimis ascendit. At ille non ascendit in montem, qui de sæculi divitiis, aut de honore sollicitus est: non ascendit in montem, qui fundi jus optat alieni. Ascendit ille, qui Deum quærit: ascendit ille, qui cursus sui Dominica adjumenta deposcit. R. Isti sunt qui. 86.

Paulo post. *Lectio viii.*

**N**oli insidiatrices aperire aures, ut putes filium quasi infirmum rogare, ut impetret quod implere non possit. Potestatis auctor, obedientiæ magister ad præcepta virtutis suo nos informat exemplo. Advocatum, inquit, habemus apud Patrem. Si advocatus est, debet utique pro meis intervenire peccatis. Non ergo quasi infirmus, sed quasi pius obsecrat. Vis scire, quia omnia quæ velit possit? & advocatus & iudex est: in altero pietatis officium, in altero insigne est potestatis.

R. Isti sunt. 86. *Lectio ix.*

**E**Ligitur & Judas, non per imprudentiã, sed per providentiam. Quanta est veritas, quam nec adversarius minister infirmat? Quanta moralitas Domini,



qui periclitari magis apud nos iudicium suum, quam affectum maluit? Susceperat enim hominis fragilitatem, & ideò nec has partes recusavit infirmitatis humanæ. Voluit deferi, voluit prodigi, voluit ab Apostolo suo tradi; ut tu à socio desertus, à socio proditus, moderatè feras tuum errasse iudicium, perisse beneficium. **Te Deum.**

*Die 28. Augusti. Quarta die.*

Fit de S. Augustino Episc. & Confess. Dupl. cum commemor. Octavæ.

*Die 29. Augusti. Quinta die.*

De Decol. S. Joannis Baptista, dupl. cum commemor. Octavæ.

*Die 30. Augusti. Sexta die.*

Fit de S. Rosa virgine Limana, Duplex, cum commemor. Octavæ.

*Die 31. Augusti. Septima die.*

Fit de S. Raymundo Nonnato, Duplex, cum commemor. Octavæ.

*Die 1. Septembris. In die Octava.*

In tertio Nocturno.

Lectio S. Evangelii secundum Lucam.

Lectio vii. Cap. 6. b

**I**n illo tempore: Exiit Jesus in montem orare, & erat pernoctans in oratione Dei. Et cum dies factus esset, vocavit discipulos suos. Et reliqua.

Homilia venerabilis Bedæ Presbyteri.

Ex lib. 2. Comment. in Luc. cap. 6.

**N**otandum, quòd Evangelica & Apostolica scriptura non solum illos duodecim appellat discipulos Christi, sed & omnes qui in eum credentes magisterio ejus ad regnum cœlorum erudiebantur. Discipuli quippe à discendo sunt vocati, ex quorum multitudine, quos ipse voluit, elegit; quos & Apostolos nominavit. Apostoli Græcè, Latine

Missi dicuntur. **¶** Isti sunt qui. 86.

Lectio vii.

**C**ujus sacramentum nominis exponens Evangelista Marcus, ait: Et fecit ut essent duodecim cum illo, & ut mitteret eos prædicare Evangelium. Et ipse Dominus dicit: Sicut misit me Pater, & ego mitto vos. Qui benè duodecim sunt electi, ut videlicet mundi salutem, quam verbo prædicarent, suo quoque numero mysticè commendarent. **¶** Isti sunt viri. 86.

Nona Lectio de S. Agidio Albare.

*Die 21. Septembris.*

S. MATTHÆI APOSTOLI  
& Evangelistæ.

INFRA OCTAVAM

Lect. & Resp. ii. Noct. de Comuni Oct. Evangel. infra. 87.

*Die 22. Septembris. Secunda die.*

In tertio Nocturno.

Lectio S. Evangelii secundum Matthæum.

Lectio vii. Cap. 9. b

**I**n illo tempore: Vidit Jesus hominem sedentem in telonio, Matthæum nomine. Et ait illi: Sequere me. Et reliqua.

Homilia sancti Joannis Chrysostomi.

Ex Homil. 31. in Matth. initio.

**N**on est abs re, grandem Evangelistæ philosophiam admirari, qui anteaquam vitam suam non celavit, & nomen suum adscripsit, quod alii mutata appellatione occultaverunt. Sed cur dixit in telonio sedisse? Virtutem vocatis voluit ostendere, qui non imposito adhuc fine pravæ publicanorum conversationi, è medio malorum pelago ipsum abstraxit: sicut beatū Paulum quoque

que furentem, ac omni rabie ardentem, & ignem Ecclesiæ inferentem reduxit. Vidisti virtutem vocantis: disce nunc vocati obedientiam, **R.** Isti sunt. 86.

Lectio viii.

**N**on enim repugnavit, nec ambigendo secum dixit: Putasne publicanum, peccatoremque me rectè absque fraude vocaverit? non est enim hujuscemodi humilitas laudabilis: sed confestim ita obtemperavit, ut nec domum quidem ad communicandum rem cum suis profectus sit: verum, sicut piscatores, prius retibus unà cum navigio, atque patre relictis; sic iste publico officio, & quæstu relicto sequebatur. Sic præparatum animum, atque præmeditatum ostendens, sic ab omni sæculari negotio seipsum eripiens, mirabili hac obedientia testimonium vocanti perhibuit, quod opportunè ipsum vocaverit.

**R.** Isti sunt viri. 86.

Lectio ix. de SS. Mauritio, & sociis martyrib.

Die 23. Septembris. Tertia die.

Fic de S. Lino Papa & mart. Semid. cum commemor. Octava.

Die 24. Septembris. Quarta die.

Fic de B. M. V. de Mercede, Duplex, ubi festum ipsius celebratur die xxiv. Septembris, aliàs de Octava ut sequitur.

In tertio Nocturno.

Lectio sancti Evangelii secundum Matthæum.

Lectio vii. Cap. 9. b

**I**n illo tempore: Vidit Jesus hominem sedentem in telonio, Matthæum nomine. Et ait illi: Sequere me. Et reliqua.

Homilia sancti Joannis Chrysostomi.

Unde suprâ, immediatè.

**S**ed cur jam, inquires, non de omnibus scripsit, quomodo vocati sunt, sed de Petro, Jacobo, Joanne, atque Philippo solum, de cæteris verò nihil? Quia isti maxime in humili artificio, atque turpi quæstu versabantur. Quid enim publicano pejus, aut piscaturâ humilius? Philippum etiam non fuisse insignem, à patria ejus planum fieri potest. Idcirco de his maxime scribunt. Qua de causa, cum laudabilia narrant, suspectos habebis? præsertim cum multa signa, & miracula breviter transcurrant; Crucis verò patibulum, quod opprobrii plenum esse videbatur, exactissime profecti sunt, discipulorumque studia, artificia, quæstus, contemptum, & ipsius magistri progenitores, qui turpitudine aliqua detinebantur, magna voce in medium proferunt. **R.** Isti sunt, qui. 86.

Lectio viii.

**P**atet ergo, quanta sibi esset cura veritatis, cum nihil ad gratiam, nihil ad ostentationem ambitiosè conscripserint. Verum Matthæus, honorem quoque non minimum consecutus est: mensâ enim Domini continuò dignatus, poterat facilè majora quoque sperare, qui videbat jam se liberè cum Domino conversari: quamvis Jesus non cum illo solum ad mensam accubuerit, sed aliis quoque cum multis; quod sibi crimini à nobilioribus dabatur, qui peccatores depellendos esse censebant:



sebant: sed nec ipsum celârunt Evangelistæ, quòd ab improbis, atque invidis ad infamiam dicebatur. **R.** Isti sunt viri. 86.

*Lectio ix.*

**C**oncurrunt autem 'quasi ad consortem artificii multi publicani, quos Matthæus lætitiâ non parvâ propter accessum Christi invitavit, Domino ita disponente, qui omne genus curationis animorum exhibuit, nec disputando solum, aut ægrotos curando, aut inimicos redarguendo, verum etiam comedendo, atque bibendo, multos à vitiis ad virtutem reduxit, ut nos doctiores his omnibus efficeret: non esse tempus, nec opus, ex quo non possimus utilitatem subducere. **T**e Deum.

*Die 25. Septembris. Quinta die.*

*In tertio Nocturno:*

*Lectio S. Evangelii secundum Matthæum:*

*Lectio vii. Cap. 9. b*

**I**n illo tempore: Vidit Jesus hominem sedentem in telonio, Matthæum nomine. Et ait illi: Sequere me. Et reliqua.

*Homilia S. Petri Chrysologi. Serm. 28.*

**M**atthæum de telonio divitem, de usuris locupletem, lucris sæculi onustum, quòd in Apostolatum Christus elegerit, quid dicemus? Hodie Matthæus de se ipso sic cœpit: Et cum transiret inde Jesus, vidit hominem. Matthæus publicanus generat nobis non parvam suis quæstionibus quæstionem, & magnum nobis negotium sua negotiatione proponit. Quam quæstionem?

quod negotiû? Deus suscipit pauperes, sed divites non repellit. Habentes suscipit, & ad se attrahit non habentes. Abraham dives, dives Job, David dives: & quid Abraham beatius? quid fortius Job? quid David sanctius? **R.** Isti sunt, qui. 86. *Lectio viii.*

**S**ed ad hæc respondetur: Fugerunt sanctis innocentes divitiæ, utpote à Deo datæ, non turpiter acquisitæ; concessæ ad usum vitæ, non ad mortis usuram. Matthæum verò publicanum divitiæ sic cupiditatis publicabant magistrum, fornace avaritiæ sic coquebant, sic alligabant vinculis cautionum, facculorum ponderibus sic premebant, ut levare ad innocentiam, ad justitiam surgere, ad virtutem progredi non valeret. Unde & sedere ejus, erat jam subsidere, non sedere. Hunc ergo talem ad sua cur vocaverit Christus, cur elegerit ad divina, nisi quæratur altius, facit altissimam quæstionem: & non tantum quæstionem, sed & scandalum; sicut illo tempore circumstantium patefecit intentio.

**R.** Isti sunt viri. 86. *Lectio ix.*

**Q**uomodo enim infirmitas non laboraret humana, quando videbat apud Christum pecuniam sic valere, ut daret fraudulentum fidem, venali gratiam, cupiditatis magistro officium largitatis, doctori scænoris magistrum sanctitatis, publicano sæculi cœleste secretum? Urebat viden-

tes

tes quod usura, quæ vastat terram, tollebatur ad cælum: & hanc, quam detestantur homines, Deitas advocabat. Fratres, in quaestione hac ingenium laboraret interpretis, si non ipse Dominus totum, quod est quaestionis, auferret. Audiamus: Cum transiret, inquit, Jesus. Non dixit, Cum staret ibi: transivit & pertransivit, ne Matthæus remaneret ibi. Vidit hominem: quia in Matthæo homines liberaret, hoc est, homines, quos pecunia possidebat: servire Deo nequeunt pecuniæ servientes. Veni, sequere me: hoc est, depone pondera, disrumpe vincula, solve laqueos. **Te Deum.**

Die 26. Septembris. Sexta die.

In tertio Nocturno.

Lectio sancti Evangelii secundum Matthæum.

Lectio vii. Cap. 9. b

**I**n illo tempore: Vidit Jesus hominem sedentem in telonio, Matthæum nomine. Et ait illi: Sequere me. Et reliqua.

De Homilia S. Petri Chrysologi. Serm. 29.

**C**um Matthæum publicanum Dominus ad Apostolatûs fastigium evocat & extollit, dat manum lapsis, spem restituit desperatis, reddidit vitæ, quos sibi jam mors detinebat addictos. Cum præteriret, inquit, Jesus, vidit Levi Alphæi sedentem ad telonium. Sedebat utique, quia stare non poterat pondere cupiditatis oppressus, & ipsa totus conscientia fraudis incurvus. Aurum natura grave, gravius fit avaritia nimis. Hinc est, quod plus habentem depri-

mit, quam ferentem; & vehementius aggravat corda, quam corpora. Aurum erogare bonum, reponere malum, contemnere validum, fugere persecurum: quod sicut vincere virtutis est, ita felicitatis est evasisse. **R.** Isti sunt qui. 86. Post pauca. Lectio viii.

**M**erito Matthæum Dominus talibus vinculis absolvi cupiens, præpeditum suscitavit, dicendo: Sequere me: hoc est, me sequere de supernis ad superna tendentem, & non aurum de inferis ad inferna mergentem: ubi fuerit thesaurus tuus, illic & cor tuum erit. Matthæus non subtrahitur operi, sed mutatur; & telonium suscipit magis, quam relinquit: ut mansura Deo, non homini peritura conquirat: ut non trigessimum in quadragesimum, quinquagesimumque nummum tristis redigat supputator, sed trigessimum in sexagesimum, & centesimum gaudii fructum latus recondat, divinis commodis futurum. **R.** Isti sunt viri. 86. Nona Lectio de SS. Cypriano & Justina mart.

Die 27. Septembris. Septima die.

Fit de SS. Colma & Damiano mart. Semidupl. cum commem. Octava.

Die 28. Septembr. In die Octava.

In tertio Nocturno.

Lectio S. Evangelii secundum Matthæum.

Lectio vii. Cap. 9. b

**I**n illo tempore: Vidit Jesus hominem sedentem in telonio, Matthæum nomine. Et ait illi: Sequere me. Et reliqua.

De Homilia S. Petri Chrysologi. Serm. 30.

**H**odierna Evangelica lectio Matthæum publicanum sic



in Apostolum commutavit, ut qui erat fraudator pecuniæ, fieret gratiæ distributor; & de impietatis schola ad pietatis magisterium perveniret; fieretq; doctor misericordiæ, qui avaritiæ fuerat institutor. Dum transiret Jesus, vidit hominem. Vidit plus divinis oculis, quàm humanis: vidit hominem, ut peccata hominis non videret: vidit opus suum, ut despiceret opera peccatorum: vidit illum Deus, ut ille videret Deum: vidit illum Christus sedentem, quia pressus cupiditatis pondere surgere non valebat.

¶ Isti sunt, qui. 86. *Lectio viii.*

**D**Eterius sedebat in telonio publicanus iste, quàm paralyticus, de quo antè diximus, jacebat in lecto: quia ille carnis patiebatur paralyfim, iste mentis. In illo fuerat compago turbata membrorum: in isto totus ordo fuerat sensuum dissipatus. Ille jacebat captus carne: sedebat corpore & animo iste captivus. Ille doloribus succumbebat invitus: iste vitiis voluntarius serviebat. Iste sibi innocens avaritiæ videbatur in crimine: ille se cognoscebat inter vulnera peccatorum. Iste lucrorum cumulabat peccata: ille dolorum gemitibus peccata dolebat. Merito igitur paralytico dicitur, Dimittuntur tibi peccata tua, quia compensârat delicta doloribus: publicano autem dicitur, Veni, sequere me; ut sequendo me repares, quod

consequendo pecuniâ perdidisti.

¶ Isti sunt viri. 86. *Lectio ix.*

**S**ed dicit aliquis: Quare publicanus, qui major videtur in crimine, major habetur in munere? Nam mox Apostolatûs certa prædictus dignitate non solum ipse accepit, sed aliis indulgentiam tribuit peccatorum: totum orbem splendore Evangelicæ prædicationis irradiat, & paralyticus solâ dignus veniâ vix habetur. Vis nosse quare plus consecutus sit publicanus? Quia juxta Apostolum, Ubi abundavit peccatum, superabundavit & gratia simul: ut publicanus gentilis populi typum teneat, paralyticus Judaici populi sit figura: qui hodie malæ valetudinis tenetur in lecto, ut nisi portatus fuerit fide Gentium, oblatus Christo miseratione Sanctorum, Christiani populi credulitate salvatus, ad domum fidei, ad domum patriæ non potest pervenire. *Te Deum laudamus.*

*Festum S. Wenceslai mart. transfertur in aliam diem.*

*Die 28. Octobris.*

**SS. SIMONIS ET JUDÆ**

*Apostolorum.*

**INFRA OCTAVAM**

*Leſt. & Reſp. ii. Noſt. de Comuni Oct. Apostolorum, ut infra. 80.*

*Die 29. Octobris. Secunda die.*

*In tertio Nocturno.*

*Lectio ſancti Evangelii ſecundum Joannem.*

*Lectio vii. Cap. 15. c.*

**I**n illo tempore: Dixit Jesus discipulis suis: Hæc mando vobis, ut diligatis invicem. Si mundus vos odit; scitote, quia me priorem vobis

vobis odio habuit. Et reliqua.

De Homilia sancti Augustini Episcopi.  
Ex Tract. 87. in Joannem.

**P**RO hac autem dilectione, patienter debemus etiam mundi odia sustinere: necesse est enim, ut nos oderit, quos cernit nolle quod diligit. Sed plurimum nos de se ipso Dominus consolatur, qui adjecit atque ait: Si mundus vos odit, scitote quoniam me priorem vobis odio habuit. Cur ergo se membrum super verticem extollit? Recusas esse in corpore, si non vis odium mundi sustinere cum capite. Si de mundo, inquit, essetis, mundus, quod suum erat, diligeret. Universæ utique hoc dicit Ecclesiæ, quam plerumque etiam ipsam mundi nomine appellat: sicut est illud, Deus erat in Christo, mundum reconcilians sibi. Totus ergo mundus Ecclesiæ est, & totus mundus odit Ecclesiæ. **R.** Isti sunt, qui. 86.

LECTIO VIII.

**M**UNDUS igitur odit mundum, inimicus reconciliatū, damnatus salvatum, inquinatus mundatum. Sed iste mundus, quem Deus in Christo reconciliat sibi, & qui per Christum salvatur, & cui per Christum peccatum omne donatur; de mundo electus est inimico, damnato, contaminato. Ex eadem quippe massa, quæ tota in Adam periit, fiunt vasa misericordiæ, in quibus est mundus pertinens ad reconciliationem, quam mundus odit, ex eadem massa pertinens ad vasa iræ, quæ

perfecta sunt ad perditionem. Denique continuo subjecit: Quia verò de mundo non estis, sed ego elegi vos de mundo, propterea odit vos mundus: ergo & ipsi inde erant, unde ut non essent, electi sunt inde. **R.** Isti sunt. 86.

LECTIO IX.

**S**I autem quærat, quomodo se diligit mundus perditionis, qui odit mundum redemptionis: diligit se utique falsa dilectione, non vera. Proinde falsò se diligit, & verè odit: Qui enim diligit iniquitatem, odit animam suam. Sed diligere se dicitur, quoniam iniquitatem, qua iniquus est, diligit; & rursus odisse se dicitur, quoniam quod ei nocet, hoc diligit. Odit ergo in se naturam, diligit vitium: odit quod factum est per Dei bonitatem, diligit quod in eo factum est per liberam voluntatem. Unde nos quoque illum diligere & prohibemur, si rectè intelligimus & jubemur: prohibemur scilicet, ubi nobis dicitur, Nolite diligere mundum: jubemur autem, ubi nobis dicitur, Diligite inimicos vestros: ipsi sunt enim mundus, qui nos odit. Vitium quippe in illo diligere prohibemur, jubemurque diligere naturam: cum ipse in se diligit vitium, oderitque naturam: ut nos eum & diligamus, & oderimus rectè, cum se ipse diligit, oderitque perversè. **Te Deum.**

Die 30. Octobris Tertia die.

In tertio Nocturno.

LECTIO S. Evangelii secundum Joannem.

LECTIO



**I**N illo tempore: Dixit Jesus discipulis suis: Hæc mando vobis, ut diligatis invicem. Si mundus vos odit, scitote quia me priorem vobis odio habuit. Et reliqua.

De Homilia S. Augustini Episcopi.

Ex Tract. 89. in Joann. post initium.

**Q**uid est: Si non venissem, & locutus eis fuisset, peccatum non haberent? Numquid sine peccato erant Judæi, antequam Christus ad eos in carne venisset? Sed magnum quoddam peccatum, non omne peccatum, quasi sub generali nomine vult intelligi: hoc est autem quia non crediderunt in Christum, qui propterea venit, ut credatur in eum. Hoc peccatū, si non venisset, non utiq; haberent. Adventus quippe ejus quantum credentibus salutaris, tantum non credentibus exitialis factus est; tamquam & ipse caput, & princeps Apostolorum, quod de se ipsi dixerunt, extiterit quibusdam quidem odor vitæ in vitam, quibusdam verò odor mortis in mortem.

**R.** Isti sunt, qui. 86. **Lectio viii.**

**S**ed quod adjunxit, atque ait: Nunc autem excusationem non habent de peccato suo; potest movere quærentes, utrum hi, ad quos non venit Christus, nec locutus est eis, habeant excusationem de peccato suo. Si enim non habent, cur hic dictum est, propterea istos non habere, quia venit, & locutus est eis? Si autem habent, utrum ad hoc habeant, ut

à pœnis alienentur, an ut mitius puniantur? Ad hæc inquisita pro meo captu, Domino donante respondeo, habere illos excusationem, non de omni peccato suo, sed de hoc peccato, quo in Christum non crediderunt, ad quos non venit, & quibus non est locutus: sed non in eo sunt numero hi, ad quos in discipulis venit, & quibus per discipulos est locutus, quod & nunc facit. Ad hoc enim pertinet, quod ait: Qui vos recipit, me recipit; & qui vos spernit, me spernit. **Isti sunt viri.**

**Lectio ix.**

86.

**R**estat inquirere, utrum ii, qui priusquam Christus veniret in Ecclesiam ad Gentes, & priusquam Evangelium ejus audirent, vitæ hujus sine præventi sunt, seu præveniuntur, possunt habere hanc excusationem. Possunt planè: sed non ideò possunt effugere damnationem. Quicumq; enim sine lege peccaverunt, sine lege peribunt: & quicumque in lege peccaverunt, per legem judicabuntur. Tanta est autem suppliciorum, quanta diversitas peccatorum: quæ quomodo se habeat, altius indicat sapientia divina, quàm conjectura scrutatur, aut effatur humana. **Te Deum.**

Die 31. Octobris. Quinta die.

In tertio Nocturno.

Lectio S. Evangelii secundum Joannem.

Lectio vii. Cap. 15. c.

**I**N illo tempore: Dixit Jesus discipulis suis: Hæc mando vobis, ut diligatis invicem. Si mundus vos odit, scitote quia me priorem vobis

vobis odio habuit. Et reliqua.

De Homilia sancti Augustini Episcopi.

Unde supra, circa finem.

**Q**ui me odit, & Patrem meum odit. Hic nobis fortasse dicatur, Quis potest odisse quem nescit? Et utique dixerat: Hæc facient vobis, quia nesciunt eum, qui misit me. Non itaque diffimulanda nascitur quæstio, quomodo possint odisse quem nesciunt. Si enim Deum, non quod ipse est, sed nescio quid aliud eum suspicantur, aut credunt, & hoc oderunt, utique non ipsum oderunt, sed quod sua mendaci suspicione, vel vana credulitate concipiunt. Si autem quod est, hoc de illo sentiunt, quomodo eum nescire dicuntur? Et de hominibus quidem fieri potest, ut eos sæpè, quos numquam vidimus, diligamus; ac per hoc nec illud è contrario impossibile est, ut eos, quos numquam vidimus, oderimus. Fama quippe de aliquo fermocinante, seu benè, seu malè, fit non immeritò, ut amemus, vel oderimus ignotum. **R.** Isti sunt

Tract. 90. in Joan. circa fin. Lectio viii.

**S**icut fieri potest, ut homo bonus hominem bonum oderit nesciens, vel potius diligit nesciens; (ipsum enim diligit, cum bonum diligit; quia id quod est ille, hoc iste diligit) oderit autem nesciens, non ipsum, sed quod putat esse ipsum: ita fieri potest, ut etiam homo injustus oderit hominem justum, & dum æstimat se sui similem injustum diligere,

nesciens diligit justum: & tamen dum eum credit injustum, diligit non ipsum, sed quod putat esse ipsum. Quemadmodum autem hominem, sic & Deum. Denique si interrogarentur Judæi, utrum diligerent Deum; quid se aliud, quàm diligere responderent? nec ex animo mentientes, sed errando potius opinantes. Quomodo enim diligerent Patrem veritatis, qui haberent odio veritatem? Oderunt ergo quam nesciunt; & cum illam oderunt, profectò & eum, de quo nata est, nisi odisse non possunt. **R.** Isti sunt viri

Nona Lect. de Homilia Vigilie omnium Sanctorum.

Die 1. Novembris. Quinta die.

Fit de Festo omnium Sanctorum, Duplex.

Die 2. & 3. Novemb. Sexta & Sept. die.

De Octava omnium SS. semidupl. cum commem. Oct. SS. Apostolorum Simonis & Judæ.

Die 4. Novemb. In die Octava.

In tertio Nocturno.

Lectio S. Evangelii secundum Joannem.

Lectio vii. Cap. 15. c.

**I**n illo tempore: Dixit Jesus discipulis suis: Hæc mando vobis, ut diligatis invicem. Si mundus vos odit; scitote, quia me priorem vobis odio habuit. Et reliqua.

Homilia S. Cyrilli Episcopi Alexandrini.

in Joann. lib. 10. c. 27.

**F**acile, imò verò jucundum esse ostendit Christus, quod natura sui molestissimum est. Quid enim acerbius, & plerumque damnosius, quàm odio haberi? svave tamen id efficitur propter Deum: & quando gratia pietatis accidit, argumento est, non inhiare rebus caducis eum qui odio habetur. Idcirco longè à san-



à sancto profanum distinguitur, & mores probi conversatione improba pervertuntur: alterutri enim suis inhærentes studiis, mores alterius accusant: quas ob res necesse est, ut studiosus, qui vivendi probitate turpitudinem improborum, collatione morum, denudat, minimè à vitiosis diligatur. **R.** Isti sunt. 86.

*Lectio viii.*

**U**Nde non dolendum, sed gaudendum potius nobis esse Christus asserit: nam etsi detrimentum in rebus caducis multorum odium afferat, maximo tamen apud Deum est emolumento: imò verò velut, qui odio habetur à mundo, extra mundum est: sic qui à mundo diligitur, malis mundi subicitur. Efficitur autem à Christo his verbis, ut liberè & absque odii formidine discipuli prædicatione utantur, cum nihil dilectioni Dei præponendū esse doceantur. Non quæro placere hominibus, Paulus ait: si hominibus placerem, Christi servus non essem: non enim possunt, qui pravitatem eligunt, Deo placere. Quare qui Deo servire vult, ab eo mundum offendi necesse est, maximè cum à fordibus mundi alios revocare conetur.

**R.** Isti sunt. 86.

*Lectio ix. de SS. Vitale & Agricola marty.*  
*Finis Octavarum Sancti Apollinarum.*

*Die 22. Julii.*

**S. MARIE MAGDALENÆ.  
INFRA OCTAVAM**

*Responsoria sumuntur de Communi Octav.  
nec virg. nec mart. ut infra. 297.*

*Die 23. Julii. Secunda die.*

*Fit de S. Apollinari Episc. & martyre, duplex, cum cœnæmori. Octava.*

*Die 24. Julii. Tertia die.*

*Lectioes secundi Nocturni de Sermones S. Augustini Præstabit nobis, &c. ut in quarta die de Communi Octava nec virginis nec martyris. ut infra. 293.*

*In tertio Nocturno.*

*Lectio S. Evangelii secundum Lucam.*

*Lectio vii. Cap. 7. e*

**I**N illo tempore: Rogabat Jesus quidam de Phariseis, ut manducaret cum illo. Et ingressus domum Pharisei discubuit. Et reliqua.

*Homilia sancti Gregorii Papæ.*

*Homilia 33. in Evangelia.*

**C**Ogitanti mihi de Mariæ Magdalenæ poenitentia, flere magis libet, quàm aliquid dicere. Cujus enim vel saxeum petus illæ hujus peccatricis lacrymæ ad exemplum poenitendi non emolliant? Consideravit namque quid fecit, & noluit moderari quid faceret. Super convivantes ingressa est, non iussa venit, inter epulas lacrymas obtulit. Discite quo dolore ardet, quæ flere & inter epulas non erubescit.

**R.** Os suum. infra. 287. *Lectio viii.*

**H**Anc verò, quam Lucas peccatricem mulierem, Joannes Mariam nominat; illam esse Mariam credimus, de qua Marcus septem dæmonia ejecta fuisse testatur. Et quid per septem dæmonia, nisi universa vitia designantur? Quia enim septem diebus omne tempus comprehenditur, rectè septenario numero universitas figuratur. Septem ergo dæmonia Maria habuit, quæ uni-

universis vitiis plena fuit.

✠ Regnum. 285.

Nona Lectio Vigiliæ S. Jacobi.

Die 25. Julii. Quarta die.

Fit de sancto Jacobo Apostolo, duplex, sine commem. Octava.

Die 26. Julii. Quinta die.

De S. Anna, dupl. cum commem. Octava.

Die 27. Julii. Sexta die.

Lectioes secundi Nocturni, de Sermone S. Augustini, Prospiciens, &c. ut in sexta die de Comuni Octava nec virg. nec mart. infra.

295. In tertio Nocturno.

Lectio sancti Evangelii secundum Lucam.

Lectio vii. Cap. 7. e

**I**n illo tempore: Rogabat Jesum quidam de Phariseis, ut manducaret cum illo. Et ingressus domum Pharisei, discubuit. Et reliq.

De Homilia sancti Gregorii Papæ.

Unde supra.

**Q**uem Phariseus de falsa justitia præsumens, nisi Judai-cum populum; quem peccatrix mulier ad vestigia Domini veniens & plorans, nisi conversam Gentilitatem designat? Quæ cum alabastro venit, unguentum fudit, retrò secus pedes Domini stetit, lacrymis pedes rigavit, capillister sit, eosdemq; quos infundebat & tergebat pedes, osculari non desit. Nos ergo, nos illa mulier expressit, si toto corde ad Dominum post peccata redeamus, si ejus poenitentia luctus imitemur. Quid namque unguento, nisi bonæ odor opinionis exprimitur? Unde & Paulus dicit: Christi bonus odor sumus Deo in omni loco. ✠ Os suum. 285.

Lectio viii.

**S**i ergo recta opera agimus, quibus opinionis bonæ odore Ecclesiam respergamus, quid in Do-Octav. Rom.

mini corpore, nisi unguentum fundimus? Sed secus pedes Jesu mulier stetit: contra pedes enim Domini stetimus, cum in peccatis positi ejus itineribus renitebamur. Sed si ad veram poenitentiam post peccata convertimur, jam retrò secus pedes stamus: quia ejus vestigia sequimur, quem impugnabamus. Lacrymis mulier pedes ejus rigat: quod nos quoque veraciter agimus, si quibuslibet ultimis membris Domini per compassionis affectum inclinamur, si sanctis ejus in tribulatione compatimur, si eorum tristitiam, nostram putamus. ✠ Regnū.

Lectio ix. de S. Pantalione martyre. 285.

Die 28. Julii. Septima die.

De SS. Nazario &c. mart. semidupl. cum. commemor. Octava.

Die 29. Julii.

Festum S. Marthæ transfertur in aliam diem.

## IN DIE OCTAVA.

Lectioes secundi Nocturni, de Sermone S. Augustini. Duplicia, &c. ut in die Octava nec virg. nec martyr. infra. 297.

In tertio Nocturno.

Lectio sancti Evangelii secundum Lucam.

Lectio vii. Cap. 7. e

**I**n illo tempore: Rogabat Jesum quidam de Phariseis, ut manducaret cum illo. Et ingressus domum Pharisei, discubuit. Et reliq.

Homilia sancti Petri Chrysologi.

Sermone 93. post initium.

**V**enit mulier, & venit retrò: quia reus animus post tergum stat ad veniam, quia per culpam novit se vultus fiduciam perdidisse. Venit satisfactura Deo, non homini placitura, cum venit: venit pietatis illa, non voluptatis exhibitura convivium. Denique

G & poeni-



& pœnitentiæ ponit mensam, ferula compunctionis apponit, panem doloris infert, porum lacrymis temperat in mensura, & ad delicias Deitatis totas, totam pulsat cordis sui & corporis symphoniam, organi planctus dat clamorem, citharam per suspiria longa modulatur, gemitus aptat in fistulam: & dum pectus ipsam conscientiam arguens, sæpè percutit, facit placitura Deo cymbala personare: dumque taliter apportat divinis oculis cibos, totas misericordiæ copias sic reportat.

**R.** Os suum. 285. **Lectio viii.**

**E**Cce mulier, quæ erat in civitate peccatrix. Exaggerat Evangelista mulieris facinus, ut accumulet indulgentiam largitoris. In civitate peccaverat, quia fama sua famam totius tetigerat civitatis: sicque jam non peccatrix solum, sed ipsius civitatis facta fuerat ipsa peccatum. Hæc cognovit, quod nisi ab illo solo civitatis peccatum non posset auferri, qui solus mundi venerat abolere peccatum: & ut cognovit, quia accumberet Dominus in domo Pharisæi, non ad stantem, non ad sedentem audet venire peccatrix. Deus cum stat, corripit; cum sedet, judicat; prostratis conjacet, cum decumbit. **R.** Regnum 285.

**Lectio ix.**

**P**ortavit oleum, quia medicinam lethali vulnere à superno medico perquirebat: ad pedes tendit semper, citam veniam qui

requirit. Et benè stans, quia jam cadere non potest, qui ad pedes Christi meruit pervenire. Stans retrò secus pedes ejus: ut Christi vestigiis innixa percurreret per viam vitæ, quæ per vitam cucurrerat mortis. Lacrymis rigabat pedes ejus. En mutatur ordo rerum; pluviam terræ cœlum dat semper. Ecce nunc rigat terra cœlum: imò super cœlos, & usque ad ipsum Dominum imber humanarum profiliit lacrymarum, ut juxta Psalmistam & de aquis fletuum canteretur illud: Et aquæ omnes, quæ super cœlos sunt, laudent nomen Domini. O quanta vis in lacrymis peccatorum! rigant cœlum, terram diluunt, extinguunt gehennam, delent in omne facinus latam divina promulgatione sententiam. **Te Deū.**

*Die 29. Julii.*

### S. MARTHÆ VIRGINIS, INFRA OCTAVAM

*Lectioes & Responsoria ii. Noct. ex Comuni Octava Virginum. 261.*

*Die 30. Julii. Secunda die.*

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 10. g.*

**I**N illo tempore: Intravit Jesus in quoddam castellum: & mulier quædam, Martha nomine, excepit illum in domum suam. Et reliqua.

*Homilia sancti Augustini Episcopi.*

*Serm. 27. de Verbis Domini, tom. 10.*

**S**anctum Evangelium cum legeretur, audivimus, à foemina religiosa susceptum esse Dominum hospitio; eaque Martha

voca-

vocabatur. Et cum esset ipsa occupata in cura ministrandi, soror ejus Maria sedebat ad pedes Domini, & audiebat verbum ejus. Laborabat illa, vacabat ista. Illa erogabat, hæc implebatur. Verumtamen Martha laborans multum in illa occupatione & negotio ministrandi, interpellavit Dominum: & de sorore sua conquesta est, quod eam laborantem non adjuvaret.

℞. Hæc est. 273. *Lectio viii.*

**D**ominus autem pro Maria respondit Marthæ: & ipse ejus factus est advocatus, qui iudex fuerat interpellatus. Martha, inquit, circa multa es occupata, quando unum est necessarium. Maria meliorem partem elegit, quæ non auferetur ab ea. Audivimus enim & interpellationem interpellantis, & sententiam iudicis. Quæ sententia interpellanti respondit, susceptam defendit. Erat enim Maria intenta dulcedini verbi Domini. Intenta erat Martha quomodo pasceret Dominum, intenta Maria quomodo pasceretur à Domino. A Martha convivium Domino parabatur, in cujus convivio Maria jam jucundabatur. ℞. Media nocte.

*Lectio ix. de SS. Abdon & Sennen. 273.*

*Die 31. Julii. Tertia die.*

*Fit de sancto Ignatio, Duplex.*

*1. Augusti. Quarta die.*

*Fit de sancto Petro ad Vincula, dupl. cum commemor. Octavæ.*

*Die 2. Augusti. Quinta die.*

*Interitio Nocturno.*

*Lectio sancti Evangelii secundum Lucam.*

*Lectio vii. Cap. 10. g*

**I**n illo tempore: Intravit Jesus in quoddam castellum: & mulier quædam, Martha nomine, excepit illum in domum suam. Et reliqua.

*De Homilia sancti Augustini Episcopi.*

*Unde supra.*

**B**enè Martha circa corporalem Domini, quid dicam, necessitatem, an voluptatem? ministrabat carni mortali. Sed quis erat in carne mortali? In principio erat Verbum, & Verbum erat apud Deum, & Deus erat Verbum. Ecce quod Maria audiebat. Verbum caro factum est, & habitavit in nobis. Ecce Martha cui ministrabat. Ergo Maria meliorem partem elegit, quæ non auferetur ab ea. Hoc enim elegit, quod semper manebit, ideò non auferetur ab ea. ℞. Hæc est. 273.

*Lectio viii.*

**C**irca unum Maria se voluit occupari. Jam tenebat: Mihi autem adhærere Deo bonum est. Sedebat ad pedes capitis nostri. Quanto humilior sedebat, tanto amplius capiebat. Confluit enim aqua ad humilitatem convallis, denatat de tumoribus collis. Non ergo Dominus opus reprehendit, sed munus distinxit. Circa multa es occupata: porro unum est necessarium. Jam hoc sibi Maria elegit. ℞. Media nocte. 273.

*Lectio ix. de S. Stephano Papa & mart.*

*Die 3. Augusti. Sexta die.*

*De Inventione S. Stephani Protomart. Semidupl. cum commemor. Octavæ.*

*Die 4. Augusti. Septima die.*

*De sancto Dominico Conf. Duplex, cum commemor. Octavæ.*



*Die 1. Augusti.**Festum Nivis transfertur in primam diem non impeditam.*

## IN DIE OCTAVA.

*In tertio Nocturno.**Lectio S. Evangelii secundum Lucam.**Lectio vii. Cap. 10. g.*

**I**n illo tempore: Intravit Jesus in quoddam castellum: & mulier quædam, Martha nomine, excepit illum in domum suam. Et reliqua.

*De Homilia S. Augustini Episc. Unde supra.*

**T**ransit labor multitudinis, & remanet charitas unitatis.

Ergo quod elegit Maria, non auferetur ab ea: à te autem Martha, quod eligisti ( utique hoc sequitur, utiq; hoc subintelligitur) à te, quod elegisti, auferetur: sed bono tuo auferetur, ut quod melius est, detur. Auferetur enim à te labor, ut requies detur. Tu navigas, illa jam in portu est.

*R. Hæc est. 273. Lectio viii.*

**V**idetis ergo, charissimi, & quantum arbitror, jam intelligitis in his duabus mulieribus, quæ ambæ fuerunt Domino gratæ, ambæ amabiles, ambæ discipulæ: videtis ergo, & magnum aliquid intelligitis, quicumque intelligitis, quod audire & scire debetis etiam qui non intelligitis, in his duabus mulieribus duas vitas esse figuratas, præsentem & futuram, laboriosam & quietam, ærumnosam & beatam, temporalem & æternam. *R. Media nocte.*

*273.**Lectio ix.*

**D**uæ sunt vitæ: de illis vos copiosius cogitate. Quid habeat hæc vita, non dico mala, non

iniqua, non nefaria, non luxuriosa, non impia; sed laboriosa, & ærumnis plena, timoribus castigata, tentationibus sollicita: hanc ipsam innocentem vitam dico, qualem decebat habere Martham. Hanc ergo, quantum potestis, inspicite; & de hac, ut dixi, copiosius, quam loquimur, cogitate. Vita verò iniqua aberat ab illa domo, nec cum Martha erat, nec cum Maria: &, si aliquando fuit, Domino intrante fugit. **Te** Deum laudamus.

## INFRA OCTAVAS ALIORUM SANCTORUM.

Qui in Breviario seu Missali Romano proprium habent Evangelium, Lectiones tertii Nocturni in Officio, & Evangelium in Missa leguntur, ut infra ponuntur, juxta Rubricam à Sacra Rituum Congregatione approbatam, quæ habetur supra in Rubricis Titul. de Oct. num. 4. videlicet.

*Die 3. Decembris.*

Infra Octavam S. Francisci Xaverii Confessoris, lege Evangelium. Sint lumbi vestri. cum suis Homiliis de Octava Communi Confessoris non Pontificis. 237. Et in Missa lege idem Evangelium.

In die Octava lege Evangelium & Homiliam diei Festi.

*Die 27. Januarii.*

Infra Octavam S. Joannis Chrysostomi Episcopi Confess. & Doctoris Ecclesiæ, omnia sumuntur ex Communi Doctorum. infra. 221. Sed in quarta die legitur Homilia S. Augustini in Episcopi, incipiens, **Ostendit Dominus factuos esse judicandos**, &c. ut in Communi Doctorum, in Breviario.

*Die 4. Aprilis.*

Infra Octavam S. Ildori Episcopi Confessoris, & Ecclesiæ Doctoris, omnia dicuntur ut in Communi Doctorum. 221. In die autem Octavæ lege Homiliam diei Festi.

*Die 11. Aprilis.*

Infra Octavam sancti Leonis Papæ & Confessoris, lege Evangel. **Vigilate**. cum suis Homiliis de Octava Communi Confessor. Pontificis. 209. In die Octava, lege Evangelium cum Homilia sequenti.

*Lectio*

Lectio S. Evangelii secundum Mattheum.  
Lectio vii. Cap. 6. b

**I**N illo tempore: Venit Jesus in partes Cæsareæ Philippi: & interrogabat discipulos suos, dicens: Quem dicunt homines esse Filium hominis? Et reliqua.

Homilia sancti Leonis Papæ.

Sermone 3. in Annivers. assumptionis sue;  
post initium.

**A**postolos Dominus, quid de se homines opinentur, interrogat; & tamdiu sermo respondentium communis est, quamdiu humanæ intelligentiæ ambiguitas explicatur. At ubi quid habeat sensus discipulorum exigitur, primus est in Domini confessione, qui primus est in Apostolica dignitate. Qui cum dixisset: Tu es Christus Filius Dei vivi: respondit ei Jesus: Beatus es Simon Bar-Jona, quia caro & sanguis non revelavit tibi, sed Pater meus, qui in cœlis est. Id est, ideò beatus es, quia Pater meus te docuit: nec terrena opinio te fefellit, sed inspiratio cœlestis instruxit: & non caro & sanguis, sed ille me tibi, cujus sum unigenitus Filius, indicavit.

Amavit eum 204. Lectio viii.

**E**T ego, inquit, dico tibi; hoc est, sicut meus Pater tibi manifestavit divinitatem meam, ita & ego tibi notam facio excellentiam tuam, quia tu es Petrus; id est, cum ego sim inviolabilis petra, ego lapis angularis, qui facio utraque unum, ego fundamentum præter quod nemo po-

test aliud ponere: tamen tu quoque petra es, quia mea virtute solidaris, ut quæ mihi potestate sunt propria, sint tibi mecum participatione communia. Et super hanc petram ædificabo Ecclesiam meam, & portæ inferi non prævalebunt adversus eam. Super hanc, inquit, fortitudinem æternum extruam templum: & Ecclesiæ meæ cœlo inferenda sublimitas, in hujus fidei firmitate consurget. **R.** Sint lumbi vestri.

204.

Lectio ix.

**H**Anc confessionem portæ inferi non tenebunt, mortis vincula non ligabunt: vox enim ista vox vitæ est. Et sicut confessores suos in cœlestia provehit: ita negatores ad inferna demergit. Propter quod dicit beatissimo Petro: Tibi dabo claves regni cælorum. Et quæcumque ligaveris super terram, erunt ligata & in cœlis: & quæcumque solveris super terram, erunt soluta & in cœlis. Transivit quidem etiam in alios Apostolos vis potestatis istius, & ad omnes Ecclesiæ principes decreti hujus constitutio commeavit: sed non frustra uni commendatur quod omnibus intimatur. Petro enim ideò hoc singulariter creditur, quia cunctis Ecclesiæ rectoribus Petri forma præponitur. Manet ergo Petri privilegium, ubicumque ex ipsius fertur aequitate iudicium. Nec nimia est vel severitas, vel remissio, ubi nihil erit



**ligatum, nihil solutum, nisi quod beatus Petrus aut solverit, aut ligaverit. Te Deum laudamus.**

*Die 17. Aprilis.*

In festo & in die Octava sancti Aniceti Papæ & martyris, lege Evangel. **Quia plorabitis & flebitis.** cum sua Homilia de Octava Communi plurimorum Martyrum, tempore Paschali. 154

Infra Octavam, lege Evangelium, **Ego sum vitis vera.** cum suis Homiliis de Octava Communi plurimorum Martyrum tempore Paschali. 143.

*Die 21. Aprilis.*

Infra Octavam S. Anselmi Episcopi Confess. & Ecclesiæ Doctoris, omnia sumenda erunt ex Communi Doctorum, ut infra. 221. Sed in tertia die legitur Homilia S. Augustini Episc. **Ostendit Dominus, &c.** de eodem Communi, in Breviario.

*Die 2. Maji.*

Infra Octavam S. Athanasii Episcopi & Confessoris, lege Evangelium. **Vos estis sal terræ.** cum suis Homiliis de Octava Communi Doctorum. 221.

In die Octava, Evangelium & Homiliam, ut in die Festo; vel Homiliam Festi S. Polycarpi, 26. Januarii, in Breviario, quæ pertinet etiam ad textum Evangelii Festi S. Athanasii.

*Die 4. Maji.*

Infra Octavam S. Monicæ viduæ, lege Evangel. **Simile est regnum cælorum thesauro.** cum suis Homiliis de Octava Communi Virginum. 284.

In die Octava, lege Evangelium & Homiliam S. Ambrosii, quæ habetur in Breviario Feria v. Dominicæ iv. Quadrages. vel in fine Octavarum. 299.

*Die 12. Maji.*

Infra Octavam SS. Nerei & Achillei &c. lege Evangel. **Sedente Jesu.** cum suis Homiliis de Octava Communi plurimorum Martyrum. 171.

In die Octava, lege Evangelium & Homiliam S. Gregorii Papæ, ut in Dominica xx. post Pentecosten, in Breviario.

*Die 15. Junii.*

In festo & in die Octava SS. Viti, Modesti & Crescentiæ martyrum, lege Evangelium. **Qui vos audit.** cum sua Homilia de Communi Octava plurimorum Martyrum. 191.

Infra Octavam, lege Evangelium, **Sedente Jesu.** cum suis Homiliis de Octav. Communi plurimorum Martyrum. 171.

*Die 18. Junii.*

In festo & in die Octava SS. Marci & Marcelliani Martyrum, lege Evangelium **Vae vobis.** cum sua Homilia de Communi Octava plurimorum Martyrum. 190.

Infra Octavam, lege Evangelium, **Descendens Jesus.** cum suis Homiliis de eodem Communi. 166.

*Die 10. Julii.*

Infra Octavam Septem Fratrum martyrum, lege Evangelium, **Descendens Jesus.** cum suis Homiliis de Communi Octava plurimorum Martyrum. 166.

In die Octava lege Evangelium & Homiliam diei Festi.

*Die 12. Julii.*

Infra Octavam S. Joannis Gualberti Abbat. lege Evangelium, **Ecce nos reliquimus.** cum suis Homiliis de Oct. Communi Abbat. 254. In die Octava lege Evangelium & Homiliam diei Festi.

*Die 23. Julii.*

Infra Octavam S. Apollinaris Episc. & mart. lege Evangelium, **Si quis venit ad me.** cum suis Homiliis de Octava Communi Martyrum Pontificum. 105.

In die Octava lege Evangelium & Homiliam diei Festi.

*Die 7. Augusti.*

Infra Octavam S. Cajetani Thienæ Confess. lege Evangelium, **Sint iumbi.** cum suis Homiliis de Octava Communi Confessoris non Pontificis. 237.

In die Octava, lege Evangelium & Homiliam diei Festi.

*Die 7. Augusti.*

In festo & in die Octava S. Donati Episc. & martyris, lege Evangelium, **Videte, vigilate.** cum sua Homil. de Communi Octava Confess. Ponti. 221.

Infra Octavam, lege Evangelium, **Vigilate** cum suis Homiliis de Communi Octava Confessoris Pontificis. 209.

*Die 8. Augusti.*

Infra Octavam SS. Cyriaci, Largi & Simonis di martyrum, lege Evangelium, **Cum audieritis prælia.** de Communi Octava plurimorum Martyrum. 160.

In die Octava fit de Assumptione Beatæ Mariæ virginis.

*Die 29. Augusti.*

Infra Octavam Decollationis sancti Joannis Baptistæ, Lektionen secundi Nocturni sumuntur de Communi Octava unius Martyris non Pontificis: & in tertio Nocturno, lege Evangelium, **Nolite arbitrari.** cum suis Homiliis,

millis de Communi Octava unius Martyris non Pontificis. 122.

In die Octava, lege Evangelium & Homiliam diei Festi.

*Die 30. Augusti.*

In festo & in die Octava SS. Felicitis & Adae & Eti martyrum, lege Evangelium, **Qui vos audit**, de Communi Octava plurimorum Martyrum. 191.

Infra Octavam, lege Evangelium, **Sedente Jesu**, cum Homiliis de eodem Communi. 171.

*Die 25. Octobris.*

In festo & in die Octava SS. Chrysanthi & Dariae Martyrum, lege Evangel. **Væ vobis**, cum sua Homilia de Communi Octava plurimorum Martyrum. 190.

Infra Octavam, lege Evangelium, **Descendens Jesus**, cum suis Homiliis de eodem Communi. 166.

*Die 17. Novembris.*

Infra Octavam S. Gregorii Thaumaturgi Episcopi, lege Evangel. **Homo peregrin**, cum suis Homiliis de Octava Communi Confess. Pontificis. 204.

In die Octava, in tertio Nocturno, lege ut in die Festo.

*Die 22. Novembris.*

Infra Octavam S. Cæcilie virginis & Martyris, omnia de Communi Virginum. 266. Sed in quarta die legatur Homilia S. Gregorii Papæ, incipiens, **Sapè vos fratres**, &c. ex eodem Communi in Breviario.

Denique infra Octavas aliorum Sanctorum, qui videntur habere propriam Evangelium, sed verè desumptum est quodam modo

ex alieno, ut ita dicam, Communi Sanctorum, lege per totam Octavam idem Evangelium diei Festi cum suis Homiliis, quæ habentur in Octavis Communibus. Verbi gratia:

*Die 19. Maji.*

Infra Octavam S. Petri Coelestini Papæ & Confess. lege Homilias in Evangel. **Ecce nos reliquimus omnia**, de Communi Octava Abbatum. 254.

*Die 14. Junii.*

Infra Octavam S. Basilii Magni Episcopi & Confess. lege Homilias in Evangel. **Si quis venit ad me**, de Communi Octava unius Martyris Pontificis. 105.

*Die 2. Julii.*

Infra Octavam sancti Ignatii Loyolæ Confessoris, lege Homilias in Evangelium, **Designavit Dominus**, de Communi Octava Evangelistarum. 93.

*Die 4. Octobris.*

Infra Octavam S. Francisci, lege Homilias in Evangelium, **Confiteor tibi Pater**, de Octava Communi plurimorum Martyrum. 184.

*Die 10. Octobris.*

Infra Octavam S. Francisci Borgiæ Confessoris, lege Homilias in Evangelium, **Ecce nos reliquimus omnia**, de Octava Communi Abbatum. 254.

*Die 23. Novembris.*

Infra Octavam S. Clementis Papæ & mart. lege Homilias in Evangelium, **Vigilate**, de Octava Communi Confessoris Pontificis. 209. Et sic de similibus.

## Finis Octavarum Propriarum.





# O C T A V Æ COMMUNES SANCTORUM; HOC EST,

*Lectioes communes recitandæ infra Octavas in secundo Nocturno; & Homiliæ in tertio Nocturno super omnia Evangelia, quæ habentur in Communi Sanctorum in Missali Romano.*

## INFRA OCTAVAM APOSTOLORUM. SECUNDA DIE.

*In secundo Nocturno.*

*Sermo sancti Joannis Chrysostomi.  
In Encom. SS. duodecim Apostolorum  
apud Metaphrasten, initio.*

### Lectio iv.

**D**uodecim electi sunt athletæ, & nullus eorum mansit non coronatus: una enim gratia erat omnibus sociâ certaminis, & cum eis concurrebat, & uniuscujusque victoriâ reddebat magis probatam. Sed ô beatum & præclarum vestrum, ô Apostoli, cœtum, quod omnia facti estis omnibus, Dei gratiâ; non arundine, sed sermone greges hominum peritè capientes. Vos enim estis immobiles columnæ rectæ fidei, petra Ecclesiæ, Regni sceptrâ, & hujus maximi gregis vigiles defensores, morbi humanitatis gratuiti medici, & nostræ ad Deum pœnitentiæ susceptores misericordes.

*R.* Vidi conjunctos viros habentes splendidas vestes, & Angelus Domini locutus est ad me, dicens: \* Isti sunt viri sancti fa-

cti amici Dei. \* Vidi Angelum Dei fortem, volantem per medium cœlum, voce magna clamantem, & dicentem. Isti.

*Tempore Paschali. R.* Lux perpetua lucebit Sanctis tuis Domine, \* Et æternitas temporum, alleluja, alleluja. \* Lætitia sempiterna erit super capita eorum: gaudium, & exultationem obtinebunt. Et æternitas.

### Lectio v.

**C**um enim essetis, veluti quædam animatæ incudes, dum verberaremini, eos qui verberabant, fabricati estis ad agnitionem. Hinc Petrus Romam accipit in disciplinam, Paulus illinc mundo annuntiat Evangelium, Andreas corrigit Græciæ Sapientes, Simon Barbaros Deum docet, Thomas Baptismate dealbat Æthiopes; Jacobi Cathedram honorat Judæa, Marci thronum, quæ est ad Nilum, complectitur Alexandria: Lucas & Matthæus scribunt Evangelia: Joannes, qui vel post finem adhuc tractat Theologiam, tamquam vivus curat Ephesum: Bartholomæus erudit Lycaonas ad temperantiam, Philippus

lippus faciens miracula servat Hierapolim.

**R.** Beati estis cum maledixerint vobis homines, & persecuti vos fuerint, & dixerint omne malum adversum vos, mentientes, propter me: \* Gaudete, & exultate, quoniam merces vestra copiosa est in cœlis. \* Cum vos oderint homines, & cum separaverint vos, & exprobraverint, & ejecerint nomen vestrum tamquam malum propter Filium hominis. Gaudete.

**Tempore Paschali, R.** Virtute magna reddebant Apostoli, \* Testimonium resurrectionis Jesu Christi Domini nostri, alleluja, alleluja. \* Repleti quidem Spiritu sancto loquebantur cum fiducia verbum Dei. Testimonium.

**Lectio vi.**

**N**on cessant omnes omnibus ubique benefacere. Pulverem immortalem reliquerunt in sepulchris, nunc quidem pii cultores, paulò post autem sedentes mundi Iudices. Cum huic appropinquasset claudus, reversus est sanis & integris pedibus. Cum in illum incidisset paralyticus, iussus est ferre grabatum. Alius vocabat mortuos, illi verò ei statim obtemperarunt. Alterius autem umbra sola fugabat morbos. Alterius invocationem exhorrebant dæmones, & eorum sudaria distillabant medicinam: erant enim discipuli illius, cujus fimbria furto surrepta, contactu ejus quæ

sanguinis laborabat profluvio, exsiccavit rubrū Mare sanguinis.

**R.** Isti sunt triumphatores, & amici Dei, qui contemnentes iussa principum, meruerunt præmia æterna: \* Modò coronantur, & accipiunt palmam. \* Isti sunt, qui venerunt ex magna tribulatione, & laverunt stolas suas in sanguine Agni. Modò. Gloria Patri. Modò.

**Tempore Paschali, R.** Isti sunt agni novelli, qui annuntiaverunt, alleluja: modò venerunt ad fontes, \* Repleti sunt claritate, alleluja, alleluja. \* In conspectu Agni amicti sunt stolis albis, & palmæ in manibus eorum. Repleti. Gloria Patri. Repleti.

**TERTIA DIE.**

**In secundo Nocturno.**

Sermo sancti Augustini Episcopi.

Sermone 43. de Sanctis.

**Lectio iv.**

**S**i omnium Sanctorum martyrum grata nobis debet esse solemnitas, quantò gratior eorum, qui præsentem secuti sunt principem martyrum? Si agnorum, quantò magis arietum? Illorum enim filii non generatione carnis, sed imitatione virtutis facti sunt omnes, qui posterius usq; ad mortem confessi sunt Christum. His primùm Dominus, cum ad confessionem sui nominis hortaretur, non solum se promisit victoriæ coronatorem, sed & certaminis adiutorem: etiam in ipsis & posteros admonebat, quoniam quod dicebat, scriptum posteris relinquebat.

**R.**



82

**R.** Vidi conjunctos viros. *vel*  
Lux perpetua 80. **Lectio v.**

**I**llis ergo ait, exhortans eos:  
Cum autem adducent vos ad  
principes & potestates, nolite co-  
gitare, quid respondeatis, vel quid  
loquamini: non enim vos estis  
qui loquimini, sed Spiritus Patris  
vestri, qui loquitur in vobis. Me-  
ditari vetuit, & confiteri præce-  
pit. Maluit enim auferre præ-  
sumptionem humanam, & gra-  
tiam dare divinam, ut in semet-  
ipsis timidi & mundo essent au-  
daces. Unde & in Psalmo vox  
martyrum dicit, quasi ex parte  
humanæ fragilitatis verendo: E-  
ripe me de inimicis meis, Deus  
meus, & ab insurgentibus in me  
libera me. Et paulò post de auxi-  
lio divino confidens dicit: Forti-  
tudinem meam ad te custodiam.

**R.** Beati. *vel* Virtute. 81.

**Lectio vi.**

**S**upra cæteras enim turbas fi-  
delium, nec non antiquorum  
justorum & Prophetarum emi-  
nentes Apostolos suos volens Do-  
minus ostendere, dixit ad eos:  
Beati oculi, qui vident, quæ vos  
videtis, & aures, quæ audiunt, quæ  
vos auditis: multi enim Prophe-  
tæ & iusti voluerunt videre, quæ  
vos videtis, & non viderunt; &  
audire quæ auditis, & non audi-  
erunt. Item alibi: Jam, ait, non  
dicam vos servos, quia servus  
nescit, quid faciat Dominus ejus.  
Vos autem dixi amicos, quia o-  
mnia, quæcumque audiui à Patre

meo, nota feci vobis. Item ait  
idem alio loco: Quæcumque al-  
ligaveritis super terram, erunt  
ligata & in cælo: & quæcumque  
solveritis super terram, erunt so-  
luta & in cælo. **R.** Isti sunt tri-  
umphatores. *vel* Isti sunt agni. 81

**QUARTA DIE.**

*In secundo Nocturno.*

De Sermone sancti Augustini Episcopi.

*Unde supra.*

**Lectio iv.**

**I**sti sunt lux mundi: quia per  
ipsos lumen fidei & veræ sci-  
entiæ primum Dominus huic  
mundo tradidit, & ab errorum ac  
peccatorum tenebris Gentes &  
populos eruit. Isti sunt sal terræ:  
quia per eos, terrigenæ condi-  
mentum saporis vitæ æternæ per-  
ceperunt, ut restringerent carnis  
lasciviam, & à putredine pecca-  
torum & vitiorum vermibus ser-  
varentur illæsi. Isti sunt lapides  
pretiosi, quos in fundamento cæ-  
lestis ædificii positos Joannes in  
Apocalypsi sua describit: quia  
prædicatio eorum Ecclesiæ fun-  
damenta locavit. Unde & Pau-  
lus ait: Vos estis cives Sanctorum  
& domestici Dei, superædificati  
super fundamentum Apostolo-  
rum & Prophetarum.

**R.** Vidi. *vel* Lux. 80. **Lectio v.**

**T**res charissimi, quæ tanti du-  
ces populi nos docuerunt, stude-  
amus factis implere, quæ illi ius-  
serunt. Discamus eorum exem-  
plo mundi divitias contemnere,  
præsentis sæculi voluptatem non  
amare, regnum cœleste deside-  
rare,

rare, Christo nihil præponere, sed ejus mandatis in omnibus obedire, paupertatem præsentium rerum diligere, virtutum divitiis habere, sapientiæ thesaurum appetere, spirituales delicias quærere, nulli invidere, sed omnes homines diligere, amicos in Deo, & inimicos propter Deum, quia hæc est vera & sola dilectio.

℞. Beati. *vel* Virtute. 81. *Lect. vi.*

**I**sti ergo Principes nostri, in amore Dei perfectissimi, & in proximorum dilectione repleti, hinc potuerunt mundi impetum vincere, & cruentum sæculum domare, quia nihil amaverunt in omni re, nisi Dei voluntatem. Ita & nos, fratres, diligamus in omnibus rebus Dei facere voluntatem, & Creatorem nostrum amemus in semetipso, creaturam verò in conditore suo, & sic habebimus ordinatissimam charitatem: quia Deus charitas est, & qui diligit hanc dilectionem, diligit Deum. Et si ita dilexerimus, diligit nos ipse Deus, diligunt nos & sancti Apostoli iudices nostri, & exorant pro nobis, ut in universali judicio Christi cum ipsis in perpetuum coronemur.

℞. Isti sunt triumphatores. *vel* Isti sunt agni. 81.

QUINTA DIE.

In secundo Nocturno.  
Sermo sancti Petri Chrysologi.  
Serm. 29. *Lectio iv.*

**Q**uod sit virtutibus cognata paupertas, terrena & celestis comprobatur disciplina. Athle-

ta ad luctamen nudus accedit, configit cum fluctibus nauta nudus, miles in acie non nisi expectatus assistit: qui tendit ad philosophiam, totum, quod in rebus est, antè contemnit. Est ergo virtutibus cognata paupertas, & si paupertas virtutum parens, virtutum socia sic habetur, sapere convenit, quare Christus ad virtutis officium pauperes sic elegit. Sed in istis quantum vilis mundanus videbatur aspectus, pretiosas tantum animas Dei intuitus tunc videbat. Erant censu pauperes, sed innocentiam locupletes, loco humiles, sed sanctitate sublimes: viles arte, sed simplicitate pretiosi: obscuri vitæ, sed vitæ merito perlucetes.

℞. Vidi. *vel* Lux. 80.

Paulò post.

*Lectio v.*

**C**aptiores piscium, sed piscatores hominum jam decreti. Venite, inquit, & faciam vos fieri piscatores hominum; ut vitalis escæ jactu, ut hamo cœlestis verbi, de mortis gurgite animas ad lucem tollerent sempiternam. Captiores piscium fiunt hominum piscatores; de labore transeunt ad laborem, quia labor nescit lassescere meditatus: omnia quæ de usu veniunt, non fatigant; virtus exercitio perseverat.

℞. Beati. *vel* Virtute. 81. *Lectio vi.*

**I**nc est, quod Apostolos suos Christus humanis laboribus exerceri voluit, ut eos indefessos redderet in divinis: voluit eis Deus



Deus manere fortitudinem, de exercitio præstare virtutem. Et quia fructus provenit ex labore, voluit eos labores non perdere, sed mutare: ipse antè illis usum laboris indulgit, qui postea eis tolerantiam dedit virtutis. Hinc est quòd regna, gentes, carceres, vincula, tormenta, mortes, sævientes homines terris omnibus sic vicerunt. **R.** Isti sunt triumphatores. **vel** Isti sunt agni. 81.

## SEXTA DIE.

In secundo Nocturno.

Sermo sancti Joannis Chrysostomi.

Serm. 1 de Pent. tom. 3.

Lectio iv.

**Q**Uæ sunt tales stellæ, sicut Apostoli? Stellæ in cælo, Apostoli super cælos. Stellæ de igne insensibili, Apostoli de igne intelligibili. Stellæ in nocte lucent, in die obscurantur: Apostoli in die & in nocte suis radiis, hoc est, virtutibus effulgent. Stellæ orto sole obscurantur: Apostoli sole justitiæ resplendente, sua claritate lucescunt. Stellæ in resurrectione cadent sicut folia: Apostoli in resurrectione rapiuntur in aëra nubibus. Et in illis quidem sideribus alius Hesperus, alius Lucifer appellatur: in Apostolis autem nullus Hesperus est, omnes Luciferi, & ideò stellis majores Apostoli. **R.** Vidi. **vel** Lux. 80.

Lectio v.

**E**T quicumque eos luminaria vocaverit mundi, non peccabit: non solum dum essent in corpore, sed etiam magis nunc, quando de hac vita migrarunt:

gratia enim & merita Sanctorum non minuuntur morte, non retardantur die, non dissolvuntur in terra, nec nocte obscurantur, nec tenebris obumbrantur. Et hoc res ipsa demonstrat. Piscatores quippe erant, & illis dormientibus retia operabantur. Et tunc quidem pisces capiebant ad mortem, nunc autem homines capiunt ad salutem, claudos facientes currere, cæcos illuminantes, leprosos mundantes, dæmones effugantes, testatur multitudo credentium diurna. Vinitores erant, & illis absentibus corpore vinea efflorescit, & botros affert. **R.** Beati. **vel** Virtute. 81.

Paulo post med.

Lectio vi.

**U**Bi sunt nunc, qui audent Ecclesiæ contraire? Quando novella erat, in nullo potuit lædi: & nunc, quando usque ad cælum pervenit, existimas eam posse superari? Et tunc quidem, cum undecim essent Apostoli, nullus eos superare potuit, sed pauci homines totum ceperunt mundum: & nunc, quando terra, & mare, & orbis terrarum, & inhabitabiles regiones, & civitates, & omnes fines terræ pietate repleti sunt, putas eam te posse lædere? Sed non poteris: Christus enim propter eam passus est, portæ inferi non prævalebunt adversus eam. Facilius cælum exterminari potest, & terra perire, quàm aliquid mali pati Ecclesia. **R.** Isti sunt triumphatores. **vel** Isti sunt agni. 81.

SEPTI-

SEPTIMA DIE.

In secundo Nocturno.

Sermo sancti Gregorii Papæ.

Hom. 30. in Evang. post med. Lectio iv.

**S**criptum est: Spiritus Domini  
ornavit cœlos. Ornamenta  
enim cœlorum sunt virtutes præ-  
dicantium. Quæ videlicet orna-  
menta Paulus enumerat, dicens:  
Alii datur per Spiritum sermo  
sapientiæ, alii sermo scientiæ se-  
cundum eundem Spiritum, al-  
teri fides in eodem Spiritu, alii  
gratia sanitatum in uno Spiritu,  
alii operatio virtutum, alii pro-  
phetia, alii discretio Spirituum,  
alii genera linguarum, alii inter-  
pretatio sermonum. Hæc autem  
omnia operatur unus atque idem  
Spiritus, dividens singulis prout  
vult. *R. Vidi. vel Lux. 80.*

Lectio v.

**Q**uot ergo sunt bona prædi-  
cantium, tot sunt ornamenta  
cœlorum. Hinc rursus scriptum  
est: Verbo Domini cœli firmati  
sunt. Verbum enim Domini Filius  
est Patris. Sed eosdem cœlos, vi-  
delicet sanctos Apostolos, ut tota  
simul sancta Trinitas ostendatur  
operata, repente de sancti Spi-  
ritus divinitate adjungitur: Et spi-  
ritu oris ejus omnis virtus eo-  
rum. Cœlorum ergo virtus de  
spiritu sumpta est: quia mundi  
hujus potestatibus contraire non  
præsumerent, nisi eos sancti Spi-  
ritus fortitudo solidasset. Quales  
namque doctores sanctæ Eccle-  
siæ ante adventum hujus Spi-  
ritus fuerint, scimus: & post adven-

Octav. Rom.

tum illius, cujus fortitudinis facti  
sint, conspiciamus. *R. Beati. vel  
Virtute. 81.*

Lectio vi.

**C**erte iste ipse pastor Ecclesiæ,  
ad cujus sacratissimum cor-  
pus sedemus, quantæ debilitatis,  
quantæque formidinis ante ad-  
ventum Spiritus fuerit, ancilla  
ostiaria requisita dicat. Una enim  
mulieris voce percussus, dum mo-  
ri timuit, vitam negavit. Et pen-  
sandum, quia eum comprehen-  
sum Petrus negavit in terra, quem  
suspensum latro confessus est in  
cruce. Sed vir iste tantæ formidi-  
nis, qualis post adventum Spiritus  
existat audiamus. Fit conventus  
magistratus atque seniorum, cæ-  
sis denuntiatur Apostolis, ne in  
nomine Jesu loqui debeant: Petrus  
magna auctoritate respondet: O-  
bedire oportet Deo magis, quam  
hominibus. *R. Isti sunt trium-  
phatores. vel Isti sunt agni. 81.*

IN DIE OCTAVA.

In secundo Nocturno.

De Expositione sancti Augustini Episcopi,  
super Psalmum octogesimum sextum.

Ante medium.

Lectio iv.

**F**undamenta ejus in montibus  
sanctis, diligit Dominus por-  
tas Sion. Quare sunt fundamenta  
Apostoli & Prophetæ? Quia eo-  
rum auctoritas portat infirmita-  
tem nostram. Quare sunt portæ?  
Quia per ipsos intramus ad re-  
gnum Dei. Prædicant enim no-  
bis: & cum per ipsos intramus,  
per Christum intramus. Ipse est  
enim janua. Et cum dicuntur  
duodecim portæ Jerusalem, &

H

una



una porta Christus, & duodecim portæ Christus, quia in duodecim portis Christus, & ideò duodenarius numerus Apostolorum. Sacramentum magnum hujus duodenarii significatio est numeri. Sedebitis, inquit, super duodecim sedes, judicantes duodecim tribus Israël. **R.** Vidi. **vel** Lux. 80

## Lectio v.

**S**I duodecim sellæ ibi sunt, non est ubi sedeat tertiusdecimus Paulus Apostolus, & non erit quomodo judicet: & ipse se judicaturum dixit, non homines tantum, sed & Angelos. Quos angelos, nisi apostatas angelos? Nescitis, inquit, quia angelos judicabimus? Responderet ergo turba: Quid te jactas judicaturum? ubi sedebis? Duodecim sedes dixit Dominus duodecim Apostolos: unus cecidit Judas, in locum ipsius sanctus Mathias ordinatus est; impletus est duodenarius numerus sedium. Primò locum inveni, ubi sedeas, & sic te minare judicaturum. Duodecim ergo sedes quid sibi velint, videamus. Sacramentum est cujusdam universitatis, quia per totum orbem terrarum futura erat Ecclesia: unde vocatur hoc ædificium ad Christi compagem. **R.** Beati. **vel** Virtute. 81.

## Lectio vi.

**E**T ideò quia undique venit ad judicandum, duodecim sedes sunt: sicut quia undique intratur in illam civitatem, duodecim portæ sunt. Non solum ergo illi

duodecim, & Apostolus Paulus; sed quotquot judicaturi sunt, propter significationem universitatis ad sedes duodecim pertinent: quemadmodum quotquot intrabunt, ad duodecim portas pertinent. Partes enim mundi quatuor sunt, Oriens, Occidens, Aquilo, & Meridies. Istæ quatuor partes assidue nominantur in Scripturis. Ab istis quatuor ventis, sicut dicit Dominus in Evangelio, à quatuor ventis se collecturum electos suos: ab omnibus ergo istis quatuor ventis vocatur Ecclesia. Quomodo vocatur? Undique in Trinitate vocatur. Non vocatur nisi per baptismum in nomine Patris, & Filii, & Spiritus sancti. Quatuor ergo ter ducta duodecim inveniuntur.

**R.** Isti sunt triumphatores. **vel** Isti sunt agni. 81.

Lectiones iii. Nocturni habentur suprà in propriis lectis SS. Apostolorum, cum sequentibus Responsoriis.

**R.** vii. Isti sunt, qui viventes in carne, plantaverunt Ecclesiam sanguine suo: \* Calicem Domini biberunt, & amici Dei facti sunt. \* In omnem terram exivit sonus eorum, & in fines orbis terræ verba eorum. Calicem.

Tempore Paschali.

**R.** vii. Ego sum vitis vera, & vos palmites: \* Qui manet in me, & ego in eo, hic fert fructum multum, alleluja, alleluja. \* Sicut dilexit me Pater, & ego dilexi vos. Qui.

**R.** viii. Isti sunt viri sancti, quos elegit

elegit Dominus in charitate non ficta, & dedit illis gloriam sempiternam: \* Quorum doctrinâ fulget Ecclesia, ut sole luna. V. Sancti per fidem vicerunt regna, operati sunt iustitiam. Quorum. Gloria Patri. Quorum.

Tempore Paschali.

R. viii. Candidi facti sunt Nazaræi ejus, alleluja: splendorem Deo dederunt, alleluja: \* Et sicut lac coagulati sunt, alleluja, alleluja. \* Candidiores nive, nitidiores lacte, rubicundiores ebore antiquo, sapphiro pulchriores. Et. Gloria Patri. Et.

INFRA OCTAVAM  
EVANGELISTARUM.  
SECUNDA DIE.

In secundo Nocturno.

Sermo sancti Joannis Chrysostomi.

Homil. i. in Matth.

Lectio iv.

**P**Rincipio requirendum est, quænam illa causa sit, quod ex tam multis discipulis duo tantum scribunt Apostoli, & duo eorum, qui Apostolos sunt secuti: unus enim Petri, alter Pauli discipulus, præter Joannem atque Matthæum Evangelia condiderunt. Quia scilicet nihil ambitione moti faciebant, sed omnia ad utilitatem referebant. Quid igitur, non sufficiebat unus Evangelista cuncta memorare? Sufficiebat quidem, sed cum quatuor sint, qui Evangelia conscribant, nec eisdem temporibus, nec in eisdem locis, neque pariter congregati, & inter se conferentes, & tamen quasi uno ore omnia prænunti-

ant: fit hoc sine dubio veritatis grande indicium.

R. Vidi conjunctos. vel Lux perpetua. 80. Lectio v.

**V**erum è contrario, inquis, ista res accidit: in multis enim dissidere redarguuntur: imò hoc ipsum maximum est testimonium veritatis. Si enim ad unguem in omnibus consonarent, etiam usque ad tempora ac loca, ipsaq; adeò verba, nemo inimicus credidisset umquam, eos non communi ad decipiendum consilio congregatos, quasi ex humana quadam conspiratione Evangelium condidisse: non enim simplicitatis fuisse tam sollicitam consonantiam judicarent. Nunc verò, quæ videtur in rebus exiguis dissonantia, ab omni illos suspicionem defendit, & satis clarè scribentium existimationem tuetur.

R. Beati. vel Virtute. 81.

Lectio vi.

**S**I verò aliquid de temporibus ac locis variè dixerunt, nihil quidè dictorum obest veritati. Si verò in miraculis non omnes omnia dixerunt: sed hic quidem illa, alter verò alia narravit, nihil te omnino conturbet. Nam si unus universa dixisset, superfluous jam fuisset numerus cæterorum: sin varia omnes inter se scripssissent, ac nova omnia, nullum potuisset convenientiæ apparere documentum. Unde & simul omnia narrata fuerunt; sed & quivis illorum peculiare quiddam sibi su-



mens retulit, quò minus superfluous haberetur, & adiectus temerè, ac simul veritatis dictorum exactum, præberet nobis indicem.

**R.** Isti sunt triumphatores. **vel** Isti sunt agni. 81.

### TERTIA DIE.

*In secundo Nocturno.*

*De Sermone S. Joannis Chrysostomi.*

*Unde supra.*

*Lectio iv.*

**U**bi autem eorum unusquisque degens scripserit, non valdè est, cur contendamus. Quòd verò adversus se non scripserint, ex toto operis contextu tentabimus demonstrare. Et certè aliud est diverso modo quid dicere, aliud adverso. Nihil, inquam, horum loquor: Procul à me absit, ex aliorum dementia pro Evangelistis satisfactionem parare. Illud sanè libenter rogàrim, quoniam modo fidem dissona meruerint, quoniam pacto obtinere potuerint, unde admirationi fuerint, pugnantia inter se dicendo?

**R.** Vidi. **vel** Lux. 80. *Lectio v.*

**P**rædicabant passim per orbem habitabilem, quamvis multi testes eorum prædicationis existerent, tum etiam inimici, hostesque plurimi. Non enim in uno aliquo scribes angulo, ea quæ scripserant, occultaverunt: sed terras, mariaque lustrantes, in conspectu & auribus omnium volumina sacra replicabant. Quæ sicut etiam nunc fieri videmus, ipsis quoque præsentibus legabantur inimicis: nec quidquam tamen ex his quæ dicta sunt,

quemquam offendit; nec immerito: erat enim divina virtus, quæ omnia capeffit, ac corrigit apud omnes. **R.** Beati. **vel** Virtute. 81.

*Lectio vi.*

**N**isi enim istud fuisset, unde publicanus, unde piscator, unde illiteratus quivisset umquã tam sublimiter philosophari? Quæ enim sapientes sæculi, nec per somnium quidem aliquando imaginari potuerunt, hæc isti cum asseveratione manifesta annuntiant atque persuadent: idque faciunt non tantum in vivis agentes, sed etiam ubi fato functi sunt: & non duobus, non viginti, non centum, aut mille, aut decem milibus, sed urbibus, & Gentibus, & populis, & terræ prorsus, ac mari, Græciæ simul ac Barbariæ, & habitabilibus partibus orbis, ipsique deserto. Et certè ea persuadebant, quæ naturam nostram longè probantur excedere.

**R.** Isti sunt triumphatores. **vel** Isti sunt agni. 81.

### QUARTA DIE.

*In secundo Nocturno.*

*Sermo sancti Ambrosii Episcopi.*

*Lib. 10. Comment. in Luc. c. 21. paulò*

*ante medium.*

*Lectio iv.*

**P**ropter nos dividuntur vestimenta Christi, quia non possunt singuli habere omnia: & per sortes, quia non pro hominis voluntate divisio fit Spiritus sancti. Divisiones enim gratiarum sunt, sed omnia operatus est Spiritus, dividens singulis prout vult. Et fortasse milites isti, qua-

tuor

tuor Evangelistarum habent typum, qui scripserunt Evangelium: intueri nunc Christi vestimenta divisa. Ubi illa quæram? quære in Matthæo, invenies penes ipsum solū chlamydem coccineam, penes Joannem vestem purpuream, penes Marcum purpuram tantum, penes Lucam vestem albam: hac enim sola pro sua fuit portione contentus. Quantos verò Christus sua veste vestivit? Puto autem, quòd non quatuor tantum, sed omnes vestivit milites, & omnibus abundavit.

**R.** Vidi. **vel** Lux. 80. **Lectio v.**

**A**ccipe & aliud. Istæ quatuor partes, non partes vestium, sed qualitates mihi videntur esse virtutum. Alius enim de regno sublimius scripsit, alius de hominis institutione diffusius. Lucas nitorem sibi sacerdotalis vestis elegit: Marcus verborum textum non desideravit: Joannes verò quasi quasdam intexit sententias, quibus vestiatur fidem nostram. Nonne tibi videtur intextū grande illud, In principio erat Verbum, & Verbum erat apud Deum, & Deus erat Verbum. Hoc erat in principio apud Deum. Omnia per ipsum facta sunt. At verò Marcus, tamquam purpuræ fulgore, contentus, sine ulla intextione verborum: Initium, inquit, Evangelii Jesu Christi Filii Dei.

**R.** Beati. **vel** Virtute. 80.

**Lectio vi.**

**E**rgo cætera vestimenta Christi

divisa sunt, nempe vel gesta vel gratia; tunica verò non potuit dividi: & ideò secundum Joannem, super illa fors agitur: quia fides non proportionem singulorum, sed pro jure est omnium. Quod enim non dividitur, singulis manet integrum. Et bene de super texta in Joanne legitur: sic enim textitur fides Christi, ut de divinis ad humana descendat: eò quòd ante sæcula ex Deo genitus, posteriore tempore susceptionem carnis assumpserit. Per hoc ergo significatur nobis, quòd non debeat fides scindi, sed solida permanere. **R.** Isti sunt triumphatores. **vel** Isti sunt agni. 81.

## QUINTA DIE.

In secundo Nocturno.  
Sermo sancti Augustini Episcopi.  
Lib. 1. de consensu Evangelist. cap. 2.  
post initium. **Lectio iv.**

**M**atthæus & Joannes, etiam scripta de Christo, quæ scribenda visa sunt, libris singulis ediderunt. At ne putaretur, quòd attinet ad percipiendum & prædicandum Evangelium interesse aliquid, utrum illi annuntient, qui eundem Dominum hic in carne apparentem discipulatu famulante secuti sunt; an ii, qui ex illis fideliter comperta crediderunt: divina providentia procuratum est per Spiritum sanctum, ut quibusdam etiam ex illis qui primos Apostolos sequebantur, non solum annuntiandi, verum etiam scribendi Evangelium tribueretur auctoritas. Hi sunt

H 3

Marcus



Marcus & Lucas. **R.** Vidi. **vel** Lux. 80.

**Lectio v.**

**I**sti igitur quatuor Evangelistæ, universo terrarum orbe notissimi, & ob hoc fortasse quatuor, quoniam quatuor sunt partes orbis terræ, per cuius universitatem Christi Ecclesiam dilatari, ipso sui numeri sacramento quodammodo declarârunt, hoc ordine scripsisse perhibentur. Primum Matthæus, deinde Marcus, tertio Lucas, ultimo Joannes. Unde alius eis fuit ordo cognoscendi, atq; prædicandi, alius autem scribendi. Ad cognoscendum quippe atque prædicandum, primi utique fuerunt, qui secuti Dominum in carne præsentem, dicentem audierunt, facientemque viderunt, atque ex ejus ore ad evangelizandum missi sunt. **R.** Beati. **vel** Virtute. 81.

**Lectio vi.**

**S**ed in conscribendo Evangelio, quod divinitus ordinatum esse credendum est, ex numero eorum, quos ante passionem Dominus elegit, primum atq; ultimum locum duo tenuerunt, primum Matthæus, ultimum Joannes: ut reliqui duo, qui ex illo numero non erant, sed tamen Christum in illis loquentem secuti erant, tamquam filii amplectendi; ac per hoc in loco medio constituti, utroque ab eis latere munirentur. Horum sanè quatuor solus Matthæus Hebræo scripsisse perhibetur eloquio, cæteri Græco. **R.** Isti sunt trium-

phatores. **vel** Isti sunt agnī. 82.

**SEXTA DIE.**

In secundo Nocturno.

De Sermone sancti Augustini Episcopi.

Unde supra.

**Lectio iv.**

**E**T quamvis singuli suū quemdam narrandi ordinem tenuisse videantur, non tamen unusquisque eorum velut alterius præcedentisignarus voluisse scribere reperitur, vel ignorata prætermisisse, quæ scripsisse alius invenitur: sed, sicut unicuique inspiratum est, non superfluum cooperationem sui laboris adjunxit. Nam Matthæus suscepisse intelligitur Incarnationem Domini secundum stirpem regiam, & pleraque secundum hominum præsentem vitam, & facta, & dicta ejus. Marcus eum subsequens, tamquam pedisequus, & brevior ejus videtur: cum solo quippe Joanne nihil dixit, solus ipse perpauca, cum solo Luca pauciora, cum Matthæo verò plurima, & multa penè totidem, atque ipsis verbis, sive cum solo, sive cum cæteris consonante.

**R.** Vidi. **vel** Lux. 80. **Lectio v.**

**L**ucas autem circa sacerdotalem Domini stirpem, atque personam magis occupatus apparet. Nam & ad ipsum David, non regium stemma secutus ascendit, sed per eos, qui reges non fuerunt, exiit ad Nathan filium David, qui nec ipse rex fuit: non sicut Matthæus, qui per Salomonem regem descendens, cæteros etiam reges ex ordine profecutus est;

est; servans in eis, de quo postea loquemur, mysticum numerum. Dominus enim Jesus Christus unus verus Rex, & unus verus sacerdos, illud ad regendos nos, istud ad expiandos, has duas personas apud antiquos Patres singillatim commendatas suam figuram egisse declaravit, multisque documentis divinarum Scripturarum, Rex & Sacerdos Christus apparet. **R. Beati. vel Virtute. 81. Lectio vi.**

**C**um ergo Matthæus circa Regis, Lucas circa Sacerdotis personam gereret intentionem, utique humanitatem Christi maxime commendârunt. Secundum hominem quippe Christus & Rex & Sacerdos effectus est, cui dedit Deus sedem David patris sui, ut regni ejus non esset finis, & esset ad interpellandum pro nobis mediator Dei & hominum, homo Christus Jesus. Non autem habuit tamquam breviatorem conjunctum Lucas, sicut Marcum Matthæus. Et hoc fortasse non sine aliquo sacramento: quia regum est non esse sine comitum obsequio. Unde ille, qui regiam personam Christi narrandam suscepit, habuit sibi tamquam comitem adjunctum, qui sua vestigia quodammodo sequeretur. Sacerdos autem, quoniam in Sancta sanctorum solus intrabat, propterea Lucas, cujus circa sacerdotium Christi erat intentio, non habuit tamquam socium subse-

quentem, qui suam narrationem quodammodo breviaret.

**R. Isti sunt triumphatores. vel Isti sunt agni. 81.**

SEPTIMA DIE.

In secundo Nocturno.

De Sermonē sancti Augustini Episcopi.  
Unde suprā. Cap. 5. Lectio iv

**P**roinde cum duæ virtutes propositæ sint animæ humanæ, una activa, altera contemplativa: intelligi datur, si diligenter advertas, tres Evangelistas temporalia facta Domini & dicta, quæ ad informandos mores vitæ præsentis maxime valerent, copiosis profecutos; circa illam activam virtutem fuisse versatos, Joannem verò facta Domini multo pauciora narrantem, dicta verò ejus ea præsertim, quæ Trinitatis unitatem, & vitæ æternæ felicitatem insinuarent; diligentius & uberius conscribentem, in virtute contemplativa commendanda suam intentionem prædicationemque tenuisse.

**R. Vidi. vel Lux. 80. Lectio v.**

**U**nde mihi videntur, qui ex Apocalypsi illa quatuor animalia ad intelligendos quatuor Evangelistas interpretati sunt, probabilius aliquid attendisse; illi, qui leonem in Matthæo, hominem in Marco, vitulum in Luca, aquilam in Joanne intellexerunt. De principiis enim librorum quædam conjecturam alii capere voluerunt, non de tota intentione Evangelistarum, quæ magis fuerat perscrutanda. Multo enim



congruentius ille, qui regiam Christi personam maximè commendavit, per leonem significatus accipitur; unde & in Apocalypsi cum ipsa tribu regia leo commemoratus est: Vicit leo de tribu Juda. Quòd autem per vitulum Lucas significatus sit propter maximam victimam sacerdotis, neutri dubitaverunt.

**R.** Beati. **vel** Virtute. 80. **Lect. vi.**

**M**arcus ergo, qui neque stirpem regiam, neque sacerdotalem, vel cognationem, vel consecrationem narrare voluit, & tamen in eis versatus ostenditur, quæ homo Christus operatus est, tantum hominis figura in illis quatuor animalibus significatus videtur. Hæc autem animalia tria in terra gradiuntur; unde isti tres Evangelistæ in his maximè occupati sunt, quæ Christus in carne operatus, & quæ præcepta mortalis vitæ exercendæ carnem portantibus tradidit. At verò Joannes super nubila infirmitatis humanæ velut aquila volat, & lucem incommutabilis veritatis acutissimis atque firmissimis oculis cordis intuetur.

**R.** Isti sunt triumphatores. **vel** Isti sunt agni. 80.

### IN DIE OCTAVA.

In secundo Nocturno

De Expositione S. Gregorii Papæ super Ezechielem Prophetam. Sancta quatuor animalia, & cur in Breviario, de Communi Evangelistarum. In die verò Octava S. Matthæi & S. Marci, lege ut sequitur in secundo Nocturno.

De Expositione S. Gregorii Papæ super Ezechielem Prophetam.

Homilia 3. lib. 1. in Ezech. Lectio iv.

**Q**uatuor ergo facies uni sunt: quia si requiras quid Matthæus de incarnatione Domini sentiat; hoc nimirum sentit, quod Marcus, Lucas, & Joannes. Si quæras quid Joannes sentiat; hoc proculdubio, quod Lucas, Marcus, & Matthæus. Si quæras quid Marcus; hoc quod Matthæus, Joannes, & Lucas. Si quæras quid Lucas; hoc quod Joannes, Matthæus, & Marcus sentit. Quatuor ergo facies uni sunt: quia notitia fidei, qua cognoscuntur à Deo, ipsa est in uno, quæ est simul in quatuor. Quidquid enim in uno inveneris, hoc in omnibus simul quatuor cognosces.

**R.** Vidi. **vel** Lux. 80. **Lectio v.**

**E**t quatuor pennæ uni: quia Dei omnipotentis Filium Dominum nostrum Jesum Christum simul omnes concorditer prædicant: & ad divinitatem ejus mentis oculos levantes penna contemplationis volant. Evangelistarum ergo facies ad humanitatem Domini pertinet, penna ad divinitatem: quia in eum, quem corporeum aspiciunt, quasi facies intendunt: sed dum hunc esse incircumscriptum atque incorporeum ex divinitate annuntiant, per contemplationis pennam quasi in aëra levantur: Quia itaque una est fides incarnationis ejus in omnibus, & par contemplatio divinitatis ejus in singulis, rectè nunc dicitur: Quatuor facies uni, &

& quatuor pennæ uni. *R.* Beati.  
vel Virtute. 81. *Lectio vi.*

**S**ed quæ virtus esset, si fidem, atque contemplationem Domini habentes prædicatores illius, sancta opera non haberent? Sequitur: Et pedes eorum pedes recti. Quid per pedes, nisi gressus actuum designantur? Quatuor ergo animalium pedes recti esse describuntur, quia sanctorum Evangelistarum, atque omnium perfectorum opera ad sequendâ iniquitatem non sunt retorta. Hi autem pedes rectos non habent, qui ad mala mundi, quæ reliquerunt, reflectuntur. De quibus scriptum est: Canis reversus ad suum vomitum. *R.* Isti sunt triumphatores. vel Isti sunt agni. 81.

**INFRA OCTAVAM  
EVANGELISTARUM.**

*Lectioes tertii Nocturni.  
SECUNDA DIE.*

*In tertio Nocturno.  
Lectio sancti Evangelii secundum Lucam.  
Lectio vii. Cap. 10.*

**I**n illo tempore: Designavit Dominus & alios septuaginta duos: & misit illos binos ante faciem suam in omnem civitatem & locum, quod erat ipse venturus. Et reliqua.

*De Homilia sancti Gregorii Papæ.  
Ex Homilia 17. in Evangel.*

**M**issis autem prædicatoribus, quid dicat audiamus: Messis quidem multa, operarii autem pauci. Ad messem multam operarii pauci sunt, quod sine gravi mœrore loqui non possumus: quia etsi sunt qui bona audiant,

defunt tamen qui dicant: Ecce mundus sacerdotibus plenus est, sed tamen in messe Dei rarus valdè invenitur operator: qui officium quidem sacerdotale suscipimus, sed opus officii non implemus. Sed pensate, fratres charissimi, pensate quod dicitur: Rogate ergo dominum messis, ut mittat operarios in messem suam. Vos pro nobis petite, ut digna vobis operari valeamus, ne ab exhortatione lingua torpeat, ne postquam prædicationis locum suscepimus, apud justum judicem nostra nos taciturnitas addicat.

*R.* Isti sunt, qui. *vel* Ego sum vitis, pro varietate temporis. 86.

*Paulo post.*

*Lectio viii.*

**S**ed utinam, si ad prædicationis nostri officium in innocentia vitæ teneamus; nam subditur: Ecce ego mitto vos sicut agnos inter lupos. Multi enim cum regiminis curam suscipiunt, ad lacerandos subditos inardescunt, terrorem potestatis exhibent, & quibus prodesse debuerant, nocent. Et quia charitatis viscera non habent, domini videri appetunt, patres se esse minimè recognoscunt, humilitatis locum in elationem dominationis mutant: & si quando extrinsecus blandiuntur, intrinsecus sæviunt. De quibus alias Veritas dicit: Veniunt ad vos in vestimentis ovium: intrinsecus autem sunt lupi rapaces. *R.* Isti sunt. vel Candidi. 87.

*Lectio*



**C**ontra quæ omnia confiderandum nobis est, quia sicut agni inter lupos mittimur, ut sensum servantes innocentiae, mortuum malitiae non habeamus. Qui enim locum prædicationis suscipit, mala inferre non debet, sed tolerare; ut ex ipsa sua mansuetudine iram sævientium mitiget, & peccatorum vulnera in aliis ipse afflictionibus vulneratus sanet. Quod tunc benè rector exhibet, cum seipsum diligere per amorem privatum nescit: cum nulla, quæ mundi sunt, appetit: cum terrenæ cupiditatis oneribus nequaquam mentis colla supponit. Unde & subditur: Nolite portare sacculum. *Te Deum laudam⁹.*

## TERTIA DIE.

In tertio Nocturno.

Lectio sancti Evangelii secundum Lucam.

Lectio vii. Cap. 10.

**I**n illo tempore: Designavit Dominus & alios septuaginta duos: & misit illos binos ante faciem suam in omnem civitatem & locum, quò erat ipse venturus. Et reliqua.

De Homilia sancti Gregorii Papæ.

Unde supra.

**P**rædicatori tanta in Deo debet esse fiducia, ut præsentis vitæ sumptus, quamvis non provideat, tamen sibi hos non deesse certissimè sciat: ne, dum mens ejus occupatur ad temporalia, minus aliis provideat æterna. Quæ si quis verba etiam per allegoriam velit intelligi, in sacculo pecunia clausa est: pecunia verò

clausa, est sapientia occulta. Qui igitur sapientiæ verbum habet, sed hoc erogare proximo negligit, quasi pecuniam in sacculo ligatam tenet. Unde scriptum est: Sapientia abscondita, & thesaurus occultus, quæ utilitas in utrisque? *R. Isti. vel Ego sum. 86.*

Paulo post.

Lectio viii.

**E**cce autem, qui sacculum & peram portare prohibuit, sumptus & alimenta ex eadem prædicatione concedit. Nam sequitur: In eadem autem domo manete, edentes & bibentes, quæ apud illos sunt: ut ab eis terrena stipendia consequamur, quibus præmia vitæ cœlestis offerimus, unde etiā Paulus hæc ipsa pro minimo suscipiens, dicit: Si nos vobis spiritualia seminavimus, magnum est, si vestra carnalia metamus? Et notandum quod subditur: Dignus est operarius mercede sua: quia jam de mercede sunt operis ipsa alimenta sustentationis, ut hic merces de labore prædicationis inchoetur, quæ illic de veritatis visione perficitur. *R. Isti. vel Candidi. 87.*

Paulo post.

Lectio ix.

**S**ed quid nos (quod tamen sine dolore dicere non possumus) quid nos, o pastores, agimus, qui & mercedem consequimur, & tamen operarii nequaquam sumus? Fructus quippe sanctæ Ecclesiæ in stipendio quotidiano percipimus, sed tamen pro æterna Ecclesia minime in prædicatione labora-

boramus. Pensemus, cuius damnationis sit, sine labore hic percipere mercedem laboris. Ecce ex oblatione fidelium vivimus, sed numquid pro animabus fidelium laboramus? Illa in nostrum stipendium sumimus, quæ pro redimendis peccatis suis fideles obtulerunt: nec tamen contra peccata eadem vel orationis studio, vel prædicationis, ut dignum est, insudamus. **Te Deum.**

#### QUARTA DIE.

In tertio Nocturno.

Lectio sancti Evangelii secundum Lucam.

Lectio vii.

Cap. 10.

**I**n illo tempore: Designavit Dominus & alios septuaginta duos: & misit illos binos ante faciem suam in omnem civitatem & locum, quod erat ipse venturus. Et reliqua.

De Homilia S. Gregorii Papæ. Unde supra.

**S**ed quando nos vitam corrigere valemus alienam, qui negligimus nostram? Curis enim sæcularibus intenti, tantò insensibiliores intus efficimur, quantò ad ea, quæ foris sunt, studiosiores videmur. Usu quippe curæ terrenæ à cœlesti desiderio animus obdurefcit: & dum ipso suo usu durus efficitur per actionem sæculi, ad ea emolliri non valet, quæ pertinent ad charitatem Dei. Sacerdos enim non distat à populo, quando nullo vitæ suæ merito vulgi transcendit actionem. Ploremus Jeremiæ lacrymis: Quomodo obscuratū est aurum, mutatus est color optimus, dispersi

sunt lapides sanctuarii in capite omnium platearum! Aurum quippe obscuratum est: quia sacerdotum vita, quondam per gloriam virtutum clara, nunc per actiones infimas ostenditur reproba.

**R. Isti. vel Ego sum. 86.**

Lectio viii.

**C**olor optimus est mutatus: quia ille Sanctitatis habitus per terrena & abjecta opera ad ignominiam despectionis venit. Lapidēs verò sanctuarii intrinsecus habebantur, nec sumebantur in summi sacerdotis corpore, nisi cum Sancta sanctorum ingrediens, in secreto sui conditoris apparebat. Nos ergo sumus lapides sanctuarii, qui apparere semper debemus in secreto Dei, quos numquam necesse est foris conspici, id est, numquam in extraneis actibus videri: sed dispersi sunt in capite omnium platearum, quia hi, qui per vitam probam & orationem intus semper esse debuerant, per vitam reprobam foris vacant. Ecce jam penè nulla est sæculi actio, quam sacerdotes non administrent. **R. Isti. vel Candidi. 87.**

Nona Lectio vel de sancto Vitale, vel de sancto Hilarione.

#### QUINTA DIE.

In tertio Nocturno.

Lectio sancti Evangelii secundum Lucam.

Lectio vii. Cap. 10.

**I**n illo tempore: Designavit Dominus & alios septuaginta duos: & misit illos binos ante faciem suam in omnem civitatem & locum, quod erat ipse venturus. Et rel.

Homii-



Homilia sancti Ambrosii Episcopi.

Lib. 7. in Lucam, cap. 10.

**S**I quem movet, qua ratione in Ægypto calceati jubentur edere agnum, Apostoli autem sine calceamentis ad prædicandum Evangelium diriguntur: is considerare debet, quia in Ægypto positus debet adhuc morsus cavere serpentis: multa enim venena in Ægypto. Et qui in typicæ Pascha celebrat, patere potest vulneri: qui autem minister est veritatis, evitat venena, non trepidat. Et ut scias hoc verum esse, ipse Dominus ait: Ecce dedi vobis potestatem calcandi super serpentes & scorpiones, & supra omnes virtutes inimici, & nihil vobis nocebunt.

R. Isti. vel Ego sum. 86.

Lectio viii.

**N**on virgas in manu jubentur tollere Apostoli. Quid est virga, nisi proferendæ potestatis insigne, & ulciscendi instrumentum doloris? Ergo humilis Domini (in humilitate enim iudicium ejus sublatum est) humilis, inquam Domini præceptum discipuli ejus, humilitatis officiis exequuntur: eos enim misit ad seminandam fidem, qui non cogerent, sed docerent; nec vim potestatis exercerent, sed doctrinam humilitatis attollerent. Habet tamen quos, & cum virga Apostolos miserit, sicut Paulus testificatur, dicens: Quid vultis? in virga veniam ad vos, an in charitate, & spiritu mansuetudinis? Hanc vir-

gam etiam & Timotheo dedit Apostolus, dicens: Argue, obsecra, increpa. Aut fortasse ante passionem Domini: quæ nutantium populorum corda firmavit, necessaria sola fuerit mansuetudo, post passionem correptio. R. Isti. vel Candidi. 87.

Lectio ix.

**C**erte mulceat Dominus, increpet Paulus: suadeat, qui potest, pectora etiam dura molli- re: arguat qui non potest universa suadere. Virgam igitur Paulus ex doctrina legis assumpserat; legerat enim: Qui parcat baculo, odit filium suum. Et ideò Dominus in veteri Testamento ait: Visitabo in virga iniquitates eorum. In novo autem se ipsum obtulit, ut ignosceret universis, dicens: Si me quæritis, sinite hos abire. Sed & Paulus virgam quidem minatur, sed in spiritu mansuetudinis visitat delinquentes. Denique ut scias mitem esse doctorem; eorum ipsorum, quos arguit, consulit voluntatem. Quid vultis, inquit, in virga veniam ad vos, an in charitate, & spiritu mansuetudinis? Semel virgam dixit, bis mitiora subjecit, adjiciens mansuetudinem charitati.

Te Deum laudamus.

SEXTA DIE.

In tertio Nocturno.

Lectio sancti Evangelii secundum Lucam.

Lectio vii. Cap. 10.

**I**n illo tempore: Designavit Dominus & alios septuaginta duos: & misit illos binos ante faciem suam in omnem civitatem & locum,

locum, quò erat ipse venturus.  
Et reliqua.

De Homilia S. Ambrosii Episc. Unde supra.

**F**ortasse quibusdam hoc durum & superbum, nec mansueti & humilis Domini præcepto convenire videatur, quòd ille, qui etiam accubitionis loco præcipit esse cedendum, hoc loco mandet discipulis: Neminem salutaveritis in via; cum iste communis sit usus gratiæ. Sic inferiores superiorum sibi favorem conciliare consueverunt. Gentiles quoque cum Christianis habent hujusmodi officiorum commercia: quomodo Dominus hunc usum humanitatis avellit? *R. Isti. vel Ego sum. 86. Lectio viii.*

**S**ed considera, non hoc esse solum, Neminem salutaveritis; sed non frustrà additum, In via. Denique & Eliseus cum mitteret servum suum, ut baculum ejus poneret supra corpus defuncti pueruli, mandavit ei, ne per viam aliquem salutaret. Festinatio enim jubebat eum contendere, ut celebrandæ resurrectionis exequeretur officium, ne confabulatione alicujus obvii, mandato deflecteretur à munere.

*R. Isti. vel Candidi. 87.*

*Lectio ix.*

**E**rgo & hic non salutationis officium aufertur, sed obstaculum impediendæ devotionis aboletur: ut quando divina mandantur, paulisper sequestrentur humana. Pulchra est salutatio; sed eò pulchrior, quò præceptorum

Octav. Rom.

maturior executio divinorum, quæ per moram sapè traxit offensam. Ideò autem & honesta prohibentur, ne solemnis gratia obrepat officii, & impediat ministerium, cujus mora culpa sit. Te Deum laudamus.

## SEPTIMA DIE.

In tertio Nocturno.

Lectio sancti Evangelii secundum Lucam.

Lectio vii. Cap. 10.

**I**n illo tempore: Designavit Dominus & alios septuaginta duos: & misit illos binos ante faciem suam in omnem civitatem & locum, quò erat ipse venturus. Et reliqua.

Homilia sancti Augustini Episcopi.

Serm. 42. de Sanctis, circa medium.

**I**pse Dominus noster loculos habuit in via, & ipsos loculos Judæ commendaverat. Patiebatur quidem furem: sed ego à Domino meo discere cupiens dico: Domine patiebaris furem, unde habebas unde tolleret? Me hominem miserum & infirmum monuisti nec sacculum portare: tu portasti loculos, & erat ubi furem patereris: si non portares, nec ille inveniret, quod auferret. Quid restat? nisi quòd hic dicat mihi: Intellige, quod audis, Noli portare sacculum. Quid est sacculus? pecunia clausa, id est, occulta sapientia. Nolite fieri sapientes penes vosmetipsos. Accipite Spiritum sanctum. Fons in te debet esse, non sacculus: unde erogatur, non ubi includatur.

*R. Isti. vel Ego sum. 86.*

I

Lectio



**N**eminem in via salutaveritis. Potest quidem & simpliciter sic accipi, quia iussit nos festinanter agere injuncta. Sed est aliud, quod hic magis recogitem non dissimile intelligere, quod plus pertinet ad me, & ad omnes dispensatores, sed & ad vos auditores. Qui salutatur, salutem dicit: nam & antiqui in epistolis suis sic scribebant, Ille illi salutem. Salutatio à salute nomen accepit. Quid ergo est, Neminem in via salutaveritis? Qui salutant in via, per occasionem salutant. Video vos citò intellexisse, nec tamen debeo jam finire: non enim omnes citò intellexistis. Sed quia de via loquimur, tamquam in via ambulemus. Veloces tardos expectate, & pariter ambulate. **R.** Isti. **vel** Candidi. 87.

Lectio ix.

**Q**uid ergo dixi, Qui in via salutatur, per occasionem salutatur? Non ad eum ibat, quem salutatur; aliud agebat, aliud occurrit; aliud petebat, aliud transversò quod ageret, invenit. Si ergo prædicas, hoc age per dilectionem, non per occasionem. Sunt ergo homines, qui sua quærentes, non aliud prædicant Evangelium, de quibus Apostolus gemens dicit: Omnes enim sua quærent, non quæ Jesu Christi. Et hi salutabant, hoc est, salutem annuntiabant, Evangelium prædicabant, sed aliud quærebant, & ideo per occasionem salutabant.

Te Deum laudamus.

## IN DIE OCTAVA.

In tertio Nocturno.

In die Octava sancti Marci leguntur præcedentes tres Lectiones de Homilia sancti Augustini. Ipse Dominus, &c. ut supra 97.

In die verò Octava S. Lucæ leguntur sequentes Lectiones.

Lectio sancti Evangelii secundum Lucam.

Lectio vii. Cap. 10.

**I**n illo tempore: Designavit Dominus & alios septuaginta duos: & misit illos binos ante faciem suam in omnem civitatem & locum, quò erat ipse venturus. Et reliqua.

Homilia venerabilis Bedæ Presbyteri.

Ex Comment. in Lucam

**S**icut duodecim Apostolos foris & omnes Episcoporum exhibere simul & præmonstrare, nemo est qui dubitet; sic & hos septuaginta duos figuram presbyterorum, id est, secundi ordinis sacerdotum gessisse sciendum est: tametsi primis Ecclesiæ temporibus, ut Apostolica scriptura testis est, utrique presbyteri, utrique vocabantur Episcopi: quorum unum sapientiæ maturitatem, alterum industriam curæ pastoralis significat. Benè autem septuaginta duo mittuntur: sive quia totidè mundi Gentibus Evangelium prædicandum erat; ut quomodo duodecim tribus Israël, ita & hi propter exterarum Gentes destinerentur imbuendas: seu quòd ipso prædicantium numero totus orbis per Evangelium summæ & individue Trinitatis illustrandus intimabatur. **R.** Isti sunt, qui viventes. 86.

Lectio viii.

Sicut

**S**icut solem hunc constat tri-  
duanum suæ lucis ambitum  
mundo per septuaginta duas ho-  
ras afflare solitum: nam & Do-  
minus ipse se diem, suos verò A-  
postolos horas appellat, dicens:  
Nonne duodecim horæ sunt diei?  
si quis ambulaverit in die, non  
offendit. Et in Psalmis præcipi-  
tur: Benè nuntiate diem de die,  
salutare ejus; hoc est, lumen de  
lumine, Deum verum de Deo ve-  
ro. Sed & multis sanctæ Scriptu-  
ræ locis per tres dies mysterium  
Trinitatis ostenditur, præcipuè  
quia Dominus tertia die resurre-  
xit à mortuis. Sed & in veteri Te-  
stamento populus ad montem Si-  
nai perveniens, die tertia legem  
accepit. Item fluvium Jordanem,  
quo baptismi gratia commenda-  
ta est, tertia, quam adierat, dies  
transivit. *R. Isti sunt viri. 87.*

*Nona Lectio de SS. Chrysantho, & Dario Ma.*

**INFRA OCTAVAM  
UNIUS MARTYRIS Pontificis.**

**SECUNDA DIE.**

*In secundo Nocturno.*

*Sermo sancti Fulgentii Episcopi.*

*Est de sancto Cypriano.*

*Lectio iv.*

**C**larum tanti martyris nata-  
lis diem, beati scilicet *N.* quo  
terrenis ac moribundis membris  
exutus, ad æternæ præmia vitæ  
transmigravit, & sacerdotii ejus  
doctrinam, ac martyrii nobis vi-  
ctoriam commendavit, fecitque  
ex temporali quondam tristitia  
liberiores. Dum enim inter pe-  
riculum cruentæ mortis & glo-

riam devoti certaminis Episco-  
pus confitendo patitur, Ecclesia  
orando compatitur. Quis nesciat,  
hunc ipsum, qui nunc annua cir-  
cumstitutione festus nobis revol-  
vitur dies, Christianis ac religio-  
sis mentibus illo tunc tempore fu-  
isse sollicitum, dum adversus dia-  
bolum ab antistite, suscepto cul-  
mine, pia plebis expectatio tre-  
pidaret, atque ita fides resisteret  
persequenti, ne caro succumberet  
blandienti: ita pastor præcederet,  
ne ovile defereret, desertumque  
lupus invaderet.

*R.* Honestum fecit illum Domi-  
nus, & custodivit eum ab inimi-  
cis, & à seductoribus tutavit il-  
lum: \* Et dedit illi claritatem æ-  
ternam. *✠.* Descenditq; cum illo  
in foveam: & in vinculis non de-  
reliquit eum. Et dedit. *Lectio v.*

**D**olebat Ecclesia subtractum  
interim suo consortio tam  
clarissimum sacerdotem: sed ta-  
men gaudebat, prostrato adver-  
sario, Christi martyrem extitisse  
victorem. Erat in memoria do-  
ctrina laudabilis, versabatur ante  
oculos virtus mirabilis, quando  
Sanctus Deo servabat, quod do-  
cuerat: & quid cæteri facere de-  
berent, non jam verbis, sed ope-  
ribus demonstrabat, fidem ser-  
monum exemplis, rerum valida  
soliditate confirmans: credens &  
confidens: pro omnium salute  
Christum mortuum, ac se pro  
ejus nomine non subtrahere oc-  
cidendum. Cujus enim sanguine



tunc indignus redemptus fuerat, dignum suum sanguinem pro illo fundebat; & cujus sanguinem in hac vita fideliter biberat, ab ipso sibi aeternam vitam reddi posse crediderat.

**R.** Desiderium animæ ejus tribuisti ei Domine, \* Et voluntate labiorum ejus non fraudasti eum.

**V.** Quoniam prævenisti eum in benedictionibus dulcedinis: posuisti in capite ejus coronam de lapide pretioso. Et. **Lectio vi.**

**I**nterritus contempsit Principum jussa, & judicum edictum. Paratus excepit percussoris ictum, & animum soli Deo subditum etiam ipsa mors servavit invictum. Denique nihil eum revocavit à pastore gregisque custodia, apparitor violentus, persecutionis tempus, judicis metus, imminens gladius, proximus mortis occasus. Proinde considerantes ejus luctam, perseverantiam, victoriam pariter & coronam, & quid evaserit, quò pervenerit, dulci mentis speculo refoventes, annua devotione cantemus: Benedictus Dominus, qui non dedit nos in venatione dentibus eorum: laqueus contritus est, & nos liberati sumus.

**R.** Stola jucunditatis induit eum Dominus: \* Et coronam pulchritudinis posuit super caput ejus.

**V.** Cibavit illum Dominus pane vitæ, & intellectus: & aqua sapientiæ salutaris potavit illum. Et coronam. Gloria Patri. Et coronam.

## TERTIA DIE.

In secundo Nocturno.

Sermo sancti Augustini Episcopi.

Est de sancto Cypriano 12.

Lectio iv.

**S**ermonem exigit tam grata & religiosa solemnitas, qua passionem beati martyris N. celebramus. Tristis proculdubio tunc Ecclesia fuit, non damno cadentis, sed desiderio recedentis: semper cupiens videre præsentem tam bonum rectorem, atque doctorem. Sed quos afflixerat solitudo certaminis, consolata est corona victoris. Et nunc non solum sine ulla tristitia, verum etiam cum ingenti lætitia, cuncta quæ tunc gesta sunt, legendo recolimus, dieque isto gaudere nobis concessum est, non timere. Neque enim formidamus terribiliter ventientem, sed expectamus hilari-  
**R.** Honestum. 99

Lectio v.

**V**icina corporis morte, non moriebatur in animo pastoris vigilantia pastoralis, & cura tuendi Dominici gregis. Usque ad extremum vitæ hujus diem mente sobria tenebatur, nec excutiebat ab animo diligentiam fidelissimi dispensatoris, manus tam proxima cruenti carnificis. Ita se martyrem cogitabat futurum, ut esse non oblivisceretur Episcopum; magis curans, quam rationem Pastorum Principi de commissis sibi ovibus redderet, quam quid infideli de fide propria responderet. Amabat quippe eum, qui Petro dixerat: Amas me?

me? Pasce oves meas. Et pascebat oves ejus, pro quibus sanguinem fundere illum imitans præparabat. **R.** Desiderium. 100.

Lectio vi.

**P**Ræcesserant eum multi Martyres, quos flagrantissimis exhortationibus suis ad vincendum diabolum accenderat, & erat utique justum, ut quos veridicus loquendo præmiserat, patiando intrepidus sequeretur. Quid ad hæc dicamus? quid ad hæc exultemus tanta conceptione gaudiorum? in quid erumpat cor nostrum & os nostrum? Habentes memoriam præsentis loci, festivitatem solemnissimi diei, propositionem saluberrimi exempli, omnibus medullis nostris dicamus: Deo gratias. **R.** Stola. 100.

#### QUARTA DIE.

In secundo Nocturno.

Sermo sancti Petri Chrysologi.

Est de S. Apollinar. 128.

Lectio iv.

**M**ERITO sanctus **N.** quia juxta mandatum Dei sui perdidit animam suam, eam invenit in vitam sempiternam. Beatus, qui ita cursum consummavit, fidem servavit, ut verè primus à credentibus suo reperiretur in loco: nec eum quisquam confessoris vocabulo minorem credat esse quam martyrem, quem Dei nutu quotidianum & multiplicem reversum conspicit ad agonem. Audi Paulum dicentem: Quotidie morior. Semel mori parum est eum, qui potest Regi suo gloriosam sæpè de hostibus referre victoriam.

**R.** Honestum. 99. Lectio v.

**N**on tam mors, quam fides, & devotio martyrem facit: & sicut virtutis est in acie, in conflictu, pro regis amore succumbere; ita perfectæ virtutis est diu agere, & consummare certamina. Non ideo persecutus est martyrem, quia non statim intulit mortem; sed probavit martyrem, quia non elicuit fidem: injecit tela, quæ potuit, & omnium armorum suorum genera callidus exegit inimicus: nec tamen fortissimi ductoris movere mentem potuit, aut temerare constantiam.

**R.** Desiderium. 100. Lectio vi.

**S**ed ut propugnatorem suum sibi Ecclesia sancta retineret, Christo vehementer occurrit: ut vincenti justitiæ reservaret coronam, & sibi belli tempore præliatoris sui præsentiam condonaret. Et quid plura, fratres? Egit, egit Ecclesia sancta mater, ut nusquam à suo separaretur Antistite. Ecce vivit: ecce ut bonus pastor suo medius assistit in grege, nec unquã separatur spiritu, qui corpore præcessit ad tempus. Extinctus est diabolus, persecutor occubuit. Ecce regnat, & vivit, qui pro Rege suo desideravit occidi, qui vivit & regnat Deus per omnia sæculorum sæcula. **R.** Stola. 100.

#### QUINTA DIE.

In secundo Nocturno.

Sermo sancti Augustini Episcopi.

Serm. 50. de Verb. Domini. Lectio iv.

**P**astor bonus Christus. Quid Petrus? nonne bonus pastor?

I 3

nonne



nonne & ipse animam suam pro ovibus suis posuit? quid Paulus? quid ceteri Apostoli? quid eorum tempora consequentes beati Episcopi martyres? Quid etiam iste Sanctus **N.**? Nonne omnes pastores boni, non mercenarii, de quibus dicitur: Amen dico vobis, perceperunt mercedem suam? Omnes ergo illi pastores boni, non solum quia sanguinem fuderunt, sed quia pro ovibus fuderunt: non enim fuderunt elatione, sed charitate.

**R.** Honestum. 99. **Lectio v.**

**N**Am & apud hæreticos, qui propter iniquitates & errores suos aliquid molestiarum perpessi fuerunt, nomine martyrii se jactant: ut hoc pallio dealbati facilius furentur, quia lupi sunt. Si autem vultis scire, in quo numero habendi sunt, pastorem bonum Paulum Apostolum audite: quoniam non omnes, qui corpora sua in passione etiam ignibus tradunt, æstimandi sunt sanguinem fuisse pro ovibus, sed potius contra oves. Si distribuero, inquit, omnia mea pauperibus, & tradidero corpus meum, ut ardeam, jam ipsi sunt. Sed vide, quid sequitur: Charitatem autem non habeam, nihil mihi prodest. Ecce venit ad passionem: ecce venit & ad sanguinis effusionem, venit & ad corporum incensionem: & tamen nihil prodest, quia charitas deest. Adde charitatem, profunt omnia: detrahe

charitatem, nihil profunt cetera **R.** Desiderium. 100. **Lectio vi.**

**Q**uale bonum est charitas ista, fratres? quid pretiosius? quid luminosius? quid firmitus? quid utilius? quid securius? quomodo autem habet vel exiguam charitatem, qui etiam convictus non amat unitatem? Hanc Dominus unitatem commendans, pastoribus bonis commendans pastores bonos, noluit multos appellare pastores. Neque enim ut dixi jam, non erat pastor bonus Petrus, Paulus, Apostoli ceteri, & posteriores sancti Episcopi, beatusque **N.**? Omnes hi pastores boni: & tamen ille pastoribus bonis non commendavit pastores bonos, sed pastorem bonum. Ego sum, inquit, pastor bonus.

**R.** Stola. 100.

## SEXTA DIE.

In secundo Nocturno.

Sermo S. Maximi Episcopi.

De S. Cypriano Homil. 2. **Lectio iv.**

**I**N martyrio beatissimi **N.** fratres charissimi, universa vobiscum Christi exultat Ecclesia, quā in omne gaudium & cœlestis eruditione sermonis instruxit, & munere triumphalis sanguinis decoravit. Fuit enim in eo, sicut compertum habemus, & contra errores diaboli, spiritualis sapientiae plenitudo, & adversum persecutiones mundi, Christiani peccatoris infatigata constantia. Quis non hujusmodi virum, quantis valet præcordiis, prosequatur, cuius eloquentia inspirata divinitus

tus

tus & Ecclesias docuit, & sacu-  
lum confutavit?

**R.** Honestum. 99. **Lectio v.**

**V**erè hic mirabilis, atque om-  
nium ubique studiis cele-  
brandus, quem sanctitas sacerdo-  
tem, peritia doctorem, fides mar-  
tyrem consecravat. Pretiosa, in-  
quit David, in conspectu Domi-  
ni mors Sanctorum ejus. Videte,  
charissimi, in quantum venera-  
bilis **N.** etiam propheticam, su-  
pergressus est laudem, cujus in  
conspectu Domini non solum  
mors, sed & vita extitit pretiosa.  
Moriendo namque, proprium  
Christo sanguinem dedit, viven-  
do nihilominus cohortatione for-  
tissima, innumeros cælo marty-  
res acquisivit.

**R.** Desiderium. 100. **Lectio vi.**

**Q**uid hoc clarius sacerdote, qui  
inter hominum turbas glo-  
riæ cœlestis conversationis emi-  
cuit, atque inter Angelicos cœ-  
tus, & sua factus est, & aliorum  
morte conspicuus? Justissimè hic  
cum Patriarcha David cantavit  
Domino Deo suo, dicens: Cor  
meum, & caro mea exultaverunt  
in Deo vivo. Exultavit itaque  
cor ejus in Deo vivo, cum mori-  
entis ac morituri sæculi vanitate  
despecta, totum se divinis man-  
cipavit obsequiis. Exultavit & ca-  
ro ejus in Deo, quæ de hoc mun-  
do non miseri corruptione lan-  
guoris, sed piis pro religione sup-  
pliciis consecrata migravit.

**R.** Stola. 100.

SEPTIMA DIE.

In secundo Nocturno.

De Sermone sancti Maximi Episcopi.  
Unde supra. **Lectio iv.**

**H**ic est ille Evangelicus pater-  
familias, proferens de the-  
sauro suo nova & vetera, qui ve-  
teris novique Testamenti unum  
atque idipsum mysterium prædi-  
cans, Ecclesias Christi locupletif-  
sima disputatione ditavit. Incor-  
ruptibilis atque indefessus illius  
est hodie thesaurus, qui pecu-  
niam Domini sui nummulariis  
lœnerans, quotidie in corde fide-  
lium divitiarum sanctam con-  
quirrit usuram.

**R.** Honestum. 99. **Lectio v.**

**Q**uid igitur, fratres, tanto spe-  
ciosius viro, cujus hæc est  
regula & mensura sermonis, ut  
inter varias hominū causas, mo-  
tusque diversos, nunc affectione  
patris, nunc auctoritate docto-  
ris consoletur humiles, superbos  
comprimat, negligentes arguat,  
increpet infideles? Tantoq; de-  
niq; decore sacerdotium, vitamq;  
suam vir fidelissimus adornavit,  
ut doctrinam suā subsequentibus  
confirmaret operibus, Dominicā  
illam sententiam tenens: Qui do-  
cuerit & fecerit, hic magnus vo-  
cabitur in regno cœlorum.

**R.** Desiderium. 100. **Lectio vi.**

**Q**uam magnus hic, quamque  
præcipuus in regno cœlorū  
est, quem in omnem gloriam ser-  
mo propheticus, vita mirabilis,  
& mors Deo devota sublimat?  
Nec immeritò, fratres, tanto cum



honore nominis ejus memoria, per amplissima mundi spatia celebratur, quia per universum orbem ad firmamentum fidei nostræ, & passio ejus, & doctrina profecit. **R.** Stola. 100.

### IN DIE OCTAVA.

In secundo Nocturno.

Sermo S. Joannis Chrysostomi.

De S. Ignatio to. 5. circa med.

Lectio iv.

**T**Empus animadvertite, fratres, quo dignitatem Episcopalem beatus **N.** est affecutus. Neque enim est eadem nunc, quæ tunc erat, Ecclesiam gubernandi conditio: non æqualis est labor viam tritā & planē paratam post multos ingredi viatores; atque eam, quæ nunc primò secanda est, quæque prærupta & saxosa, ferisque plena, nec ullum adhuc viatorem admisit. Tunc autem, quocumque quis oculos verteret, ubique præcipitia, barathra, & bella, & pugnæ, & pericula: Imperatores, & Reges, & populi, & civitates, & Gentes, & domestici, & alieni credentibus insidias tendebant. **R.** Honestum. 99.

Lectio v.

**Q**uemadmodum igitur gubernatorē admiramur, non quod vectores possit in portum incolumes ducere, cum mare tranquillum est, cumque navis fertur ventis secundis: sed cum insaniente pelago, ventisq; sævientibus, qui in navi sunt inter se dissentiunt, magna tempestate intus & foris navigantes exagi-

tantē, navim tamen potest dirigere & conservare. Sic eos, qui tunc Ecclesiam regebant, multo magis, quàm illos, qui eam in præsentia gubernant, suspicere debemus, & admirari, quando multa bella intus & foris: quando fidei planta imbecillior erat adhuc, & diligentia magis indigebat: quando veluti modò genitus infans Ecclesiæ populus, magnam providentiam, atque sapientiam animæ, à qua nutriendus esset, postulabat.

**R.** Desiderium. 100.

Paulo post.

Lectio vi.

**V**erum ne totum tempus in Episcopatus consideratione collocantes ab iis, quæ ad eum, ut martyrem spectant, enarrandis excludamur; age ad illius certamina contendamus. Versutus enim diabolus, & ad fruendas aptus insidias, existimabat, si pastores sustulisset, ovilia se facile direpturum. Sed qui comprehendit astutos in eorum astutia, ostendens, Ecclesias suas non ab hominibus gubernari, sed eos, qui in ipsum credunt, semper à se regi; id fieri permittebat, ut cum cerneret, rectoribus sublati, non tamen religionem deleri, nec veritatis prædicationem extingvi, sed potius augeri: ex rebus ipsis & ipse, & qui ei inserviebant, omnes intelligerent, Christianorum disciplinam, non ab hominibus pendere, sed in cœlis radices agere, Deumque esse,

esse, qui ubique Ecclesias tue-  
retur. *R.* Stola. 100.

**INFRA OCTAVAM  
UNIUS MARTYRIS PONT.**

Homilia in Evangelium. Lucæ 14. Si quis  
venit ad me, in die festo habetur Homilia  
S. Gregorii Papæ. Si consideremus, &c. ut in  
Breviano, de communi unius Martyris.

**SECUNDA DIE.**

In tertio Nocturno.

Lectio sancti Evangelii secundum Lucam.

Lectio vii. Cap. 14.

**I**n illo tempore: Dixit Jesus tur-  
bis: Si quis venit ad me, & non  
odit Patrem suum, & matrem, &  
uxorem, & filios, & fratres, & so-  
rores, adhuc autem & animam  
suam, non potest meus esse disci-  
pulus. Et reliqua.

De Homilia sancti Gregorii Papæ.

Homilia 37. in Evangelia.

**U**t autem Dominus demon-  
straret hoc erga proximos  
odium, non de affectione proce-  
dere, sed de charitate, addit pro-  
tius dicens: Adhuc autem & a-  
nimam suam. Odisse itaque præ-  
cipimur proximos, odisse & ani-  
mam nostram. Constat ergo quia  
amando debet odisse proximum,  
qui sic eum odit sicut semetipsum.  
Tunc enim bene nostram animam  
odimus, cum ejus carnalibus de-  
sideriis non acquiescimus, cum  
ejus appetitum frangimus, ejus  
voluptatibus reluctamur. Quæ  
ergo contempta ad melius duci-  
tur, quasi per odium amatur.

*R.* Corona aurea super caput  
ejus, \* Expressa signo sanctitatis,  
gloria honoris, & opus fortitudi-  
nis. \* Quoniam prævenisti e-  
um in benedictionibus dulcedi-

nis, posuisti in capite ejus coronam  
de lapide pretioso. Expressa signo.

Lectio viii.

**S**ic nimirum exhibere uxori &  
proximis nostris odii discre-  
tionem debemus, ut in eis & di-  
ligamus quod sunt, & habeamus  
odio, quod in Dei nobis itinere  
obsistunt. Certè dum Paulus Je-  
rosolymam pergeret, propheta  
Agabus zonam illius apprehen-  
dit, suisque pedibus alligavit, di-  
cens: Virum, cujus hæc zona est,  
sic alligabunt Judæi in Jerusalem.  
Sed is, qui animam suam perfe-  
ctè oderat, quid dicebat? Ego non  
solum alligari, sed & mori in Je-  
rusalem paratus sum pro nomi-  
ne Domini Jesu, nec facio animam  
meam pretiosiores, quàm me.

*R.* Hic est verè martyr, qui pro  
Christi nomine sanguinem suum  
fudit: \* Qui minas judicium non  
timuit, nec terrenæ dignitatis  
gloriam quæsit, sed ad coelestia  
regna pervenit. \* Justum de-  
duxit Dominus per vias rectas,  
& ostendit illi regnum Dei. Qui.  
Gloria Patri. Qui.

Sequens Resp. dicitur post viii. Lectionem  
infra Octavas quinque SS. Mart. Pontii, Mar-  
celli, Joannis, Silverii, Marini & Pontiani.

*R.* Domine prævenisti eum in  
benedictionibus dulcedinis \* Po-  
suisti in capite ejus coronam de  
lapide pretioso. \* Vitam petiit  
à te, & tribuisti ei longitudinem  
dierum in sæculum sæculi. Po-  
suisti. Gloria. Posuisti. *Lectio ix.*

**E**cce quomodo amando ani-  
mam suam oderat, imò odi-  
ens



ens amabat, quam cupiebat pro Jesu nomine morti tradere, ut hanc ad vitam de peccati morte suscitaret. Ab hac ergo discretione odii nostri, trahamus formam ad odium proximi. Ametur quilibet in hoc mundo adversarius, sed in via Dei contrarius non ametur etiam propinquus. Quisquis enim jam æterna concupiscit, in ea quam aggreditur, causam Dei, extra patrem, extra matrem, extra uxorem, extra filios, extra cognatos, extra semetipsum fieri debet, ut eò verius cognoscat Deum, quò in ejus causa neminem recognoscit. **T**e Deum laudam?

### TERTIA DIE.

In tertio Nocturno.

Lectio sancti Evangelii secundum Lucam.

Lectio vii. Cap. 14.

**I**N illo tempore: Dixit Jesus turbis: Si quis venit ad me, & non odit patrem suum, & matrem, & uxorem, & filios, & fratres, & sorores, adhuc autem & animam suam, non potest meus esse discipulus. Et reliqua.

De Homilia sancti Gregorii Papæ.

Paulò post, unde supra.

**S**Cimus, quia, cum de terra Philistinorum arca Domini ad terram Israëlitarum rediret, plauastro superimposita est, & vaccæ plauastro subjunctæ sunt, quæ foetæ fuisse memorantur, quarum vitulos clauferunt domi. Et scriptum est: Ibant autem in directum vaccæ per viam, quæ ducit Bethsames, & itinere uno gradiabantur, pergentes & mugientes:

& non declinabant neque ad dexteram, neque ad sinistram. Quid igitur vaccæ, nisi fideles quosque in Ecclesia designant? qui dum sacri eloquii præcepta considerant, quasi superimpositam sibi Domini arcam portant.

**R.** Corona. 105. **Lectio viii.**

**D**E quibus hoc etiam est notandum, quòd fuisse foetæ memorantur: quia sunt plerique, qui in via Dei intrinsecus positi, foris carnalibus affectibus ligantur; sed non declinant à recto itinere, quia arcam Dei portant in mente. Ecce enim vaccæ Bethsames pergunt; Bethsames quippe dicitur Domus solis; & Propheta ait: Vobis autem, qui timetis Dominum, oriatur sol justitiæ. Si igitur ad æterni solis habitationem tendimus, dignum profectò est, ut de Dei itinere pro carnalibus affectibus non declinemus: tota enim virtute pensandum est, quòd vaccæ Dei plauastro suppositæ pergunt & gemunt: dant ab intimis mugitus, & tamen de itinere non deflectunt gressus. Sic nimirum fideles quique esse debent, ut compatiantur proximis per charitatem, & tamen de via Dei non exorbitent per compassionem.

**R.** Hic est. 105. **Lectio ix.**

**H**Oc ipsum verò animæ odium qualiter exhiberi debeat. Veritas subdendo manifestat, dicens: Et qui non bajulat crucem suam, & cætera. Crux quippe à crucia-

tu dicitur: Et duobus modis crucem Domini bajulamus, cum aut per abstinenciam carnem afficimus, aut per compassionem proximi necessitatem illius nostram putamus. Qui enim dolorem exhibet in aliena necessitate, crucem portat in mente. Sciendum verò est, quòd sunt nonnulli, qui carnis abstinenciam non pro Deo, sed pro inani gloria exhibent: & sunt plerique, qui compassionem proximo non spiritaliter, sed carnaliter impendunt, ut ei non ad virtutem, sed quasi miserando ad culpas faveant. Hi itaq; crucem quidem videntur ferre, sed Dominum non sequuntur: unde rectè hæc eadem Veritas dicit: Qui non bajulat crucem suam, & venit post me, non potest meus esse discipulus. **Te Deum laudamus.**

#### QUARTA DIE.

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 14.*

**I**n illo tempore: Dixit Iesus turbis: Si quis venit ad me, & non odit patrem suum, & matrem, & uxorem, & filios, & fratres, & sorores, adhuc autem & animam suam, non potest meus esse discipulus. Et reliqua.

*De Homilia S. Gregorii Papæ. Unde supra.*

**Q**uis enim ex vobis volens turrim ædificare, & cætera. Omne quod agimus prævenire per studium considerationis debemus. Ecce enim juxta Veritatis vocem, qui turrim ædificat, prius ædificii sumptus parat. Si

igitur humilitatis turrim ædificare cupimus, prius nos præparare ad adversa hujus sæculi debemus. Hoc enim inter terrenum & cœleste ædificium distat, quòd terrenum ædificium expensas colligendo construitur; cœleste verò ædificium expensas dissipando. Ad illud sumptus facimus, si non habita colligamus; ad istud sumptus facimus, si & habita relinquamus.

**R. Corona. 105. Lectio viii.**

**S**ed quia de construendo ædificio comparatio data est, nunc ex minore ad majus similitudo subditur: ut ex rebus minimis majora pensentur. Rex contra regem ex æquo venit ad prælium, & tamen si se perpendit non posse sufficere, legationem mittit, & ea quæ pacis sunt, postulat. Quibus ergo nos lacrymis veniam sperare debemus, qui in illo tremendo examine, cum Rege nostro ex æquo ad iudicium non venimus, quos nimirum conditionis infirmitas & causa inferiores exhibet?

**R. Hic est. 105. Lectio ix.**

**M**ittamus ad hunc legationem lacrymas nostras, mittamus misericordiæ opera: mactemus in ara ejus hostias placationis; cognoscamus nos cum eo in iudicio non posse contendere. Pensamus virtutem ejus fortitudinis, rogemus ea quæ pacis sunt. Hæc est nostra legatio, quæ Regem venientem placat, singulariter ad abso-



absolutionem nostram oblata cū lacrymis, & benignitate mentis sacri altaris hostia suffragatur: quia is, qui in se resurgens a mortuis jam non moritur, adhuc per hanc in suo mysterio pro nobis iterum patitur. Nam quoties ei hostiam suæ passionis offerimus, toties nobis ad absolutionem nostram, passionem illius reparamus. **T**e Deum laudamus.

### QUINTA DIE.

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 14.*

**I**n illo tempore: Dixit Jesus turbis: Si quis venit ad me, & non odit patrem suum, & matrem, & uxorem, & filios, & fratres, & sorores, adhuc autem & animam suam, non potest meus esse discipulus. Et reliqua.

*De Homilia sancti Gregorii Papæ.*

*Unde supra, circa finem.*

**R**elinquat ergo omnia, qui potest: qui autem omnia relinquere non potest, cū adhuc Rex longè est, legationem mittat, lacrymarum, eleemosynarum, hostiarum munera offerat: vult enim placari precibus, qui scit quia portari non possit iratus. Quòd adhuc moram facit venire, legationem pacis sustinet: venisset jã namque si vellet, & cunctos adverlarios suos trucidasset.

**R.** Corona. 105. *Lectio viii.*

**S**ed & quàm terribilis veniat, indicat, & tamen ad veniendum tardat, quia non vult invenire quos puniat: sed reatum no-

bis contemptus nostri denuntiat, dicens: Sic ergo omnis ex vobis, qui non renuntiat omnibus, quæ possidet, non potest meus esse discipulus: & tamen sperandæ salutis remedium confert: quia qui per iram non potest ferri, per postulatæ pacis vult legationem placari.

**R.** Hic est. 105. *Lectio ix.*

**L**avate ergo, fratres charissimi lacrymis maculas peccatorum, eleemosynis tergite, sacris hostiis expiate. Nolite possidere per desiderium, quæ adhuc per usum minimè reliquistis. Spem in solo Redemptore figite, ad æternam patriam mente transite. Si enim nihil in hoc mundo amando possideris, etiam possidendo cuncta reliquistis. Ipse nobis gaudia desiderata concedat, qui nobis æternæ pacis remedia contulit, Jesus Christus Dominus noster, qui vivit & regnat cum Patre & Spiritu sancto in sæcula sæculorum, Amen. **T**e Deum.

### SEXTA DIE.

*In tertio Nocturno.*

*Lectio sancti Evangelii secundum Lucam,*

*Lectio vii. Cap. 14.*

**I**n illo tempore: Dixit Jesus turbis: Si quis venit ad me, & non odit patrem suum, & matrem, & uxorem, & filios, & fratres, & sorores, adhuc autem & animam suam, non potest meus esse discipulus. Et reliqua.

*Homilia S. Joannis Chrysostomi.*

*Ex Homil. 36. in Matth. longè post incipit.*

**S**i quis venit ad me, & non habet odio patrem suum, & matrem,

erem  
fratre  
non  
Non  
ctos  
nim  
stifer  
petit  
habe  
gent  
nicio  
& cre  
fecit  
sti lib  
viden  
ut fa  
os ex  
debe  
non  
**R.**  
**D**  
verte  
Cum  
patre  
tulit  
nim  
uxo  
dos  
ma  
hanc  
dilig  
ti, ti  
citer  
ade  
cæ  
**R.**  
**N**  
pot

trem, & uxorem, & liberos, & fratres, & adhuc animam suam, non potest meus esse discipulus. Non simpliciter iussit te conjunctos tibi homines insequi; id enim iniquum omnino, atque pestiferum est: sed quando plus me petit aliquis diligere, odio ipsum habeas. ait: Hoc enim tam diligenti, quam ei, qui diligitur, perniciosissimum est. Hac doctrina & credentes filios majoris animi fecit; & patres ne ab amore Christi liberos deturbent, admonuit, videntes tantas esse ipsius vires, ut facile posset à parentibus filios eripere: quare ea tentare non debent, quæ ad finem deducere non possunt.

**R.** Corona. 105. **Lectio viii.**

**D**Einde ne molestè, aut graviter ferant fideles, animadvertente quò sermonem deducit. Cum enim dixerit, Qui non odit patrem, & matrem; confestim intulit, Et animam suam. Quid enim? parentes, fratres, sorores, uxorem, pro me solum abjiciendos putas? Nihil est homini anima sua conjunctius; & tamen nisi hanc etiam oderis, non ea quæ diligenti, sed ea quæ odio habenti, tibi retribuentur. Nec simpliciter odisse animam jubet; sed adeò, ut ad bellum, ad pugnas, ad cædem, ad sanguinem prodas.

**R.** Hic est. 105. **Lectio ix.**

**N**Am qui non portat crucem suam, & venit post me, non potest meus esse discipulus. Ita Octav. Rom.

non ad mortem simpliciter paratos esse jubet, sed ad mortem etiam violentam: nec ad violentam solum, verum etiam ad maximè omnium exprobrabilem. Nec tamen aliquid adhuc de sua passione differuit, ut istis interea castigati, æquiori animo de passione ipsius verba facturum audiant. An non est dignum vehementer admirari atque stupere, quomodo anima à corpore illorum non evolavit, qui hæc audierant? quomodo igitur non evolavit? maxima erat ac ineffabilis virtus dicentis, atque audientium charitas non parva. **Te** Deum laudamus.

## SEPTIMA DIE.

In tertio Nocturno.

Lectio sancti Evangelii secundum Lucam,

Lectio vii. Cap. 14.

**I**N illo tempore: Dixit Jesus turbis: Si quis venit ad me, & non odit patrem suum, & matrem, & uxorem, & filios, & fratres, & sorores, adhuc autem & animam suam, non potest meus esse discipulus. Et reliqua.

Homilia sancti Ambrosii Episcopi.

In Psalm. 118. Oton. 14.

**S**I quis otiosis hoc accipiat aures; fortasse dicat, Tu Domine Jesu legem dedisti, dicens: Dilige Dominum Deum tuum, dilige proximum tuum; &, ut impleres hanc legem, venisti. Dixisti per legem, Honora patrem & matrem; & in Evangelio jubes, ut parentes oderim: quomodo sibi conveniunt ista

**K** præ-



præcepta? sic mitis & humilis corde venisti? Non possum salvo pietatis jure odisse patrem, cui debeo quòd creatus sum; nec matrem, longo decem mensium fastidio pii foetus onera portantem, cui in absolutione plus periculi, in delatione plus tædii est. Quid dulcissimi merentur filii, ut paterno excludantur amore, cum sit impium mori nolle pro liberis? quid uxor charissima, quædam vitæ cohæres, & confortium communis naturæ?

*R. Corona. 105. Lectio viii.*

**O** Derim ergo pignora charitatis? ita Evangelii lenitate rigorem præduræ legis Judæis inflectis, ut quorum lex condemnat injurias, eorum tu Evangelio tuo condempnes gratiam? Video istiusmodi assertioni me respondere non posse: sed tu Domine responde. Respondebit igitur: Egone condempno pietatem, qui odi iniquitatem? Ego parentes præcipio non amandos, qui inimicos svadeo diligendos? Sed non legisti: Tempus amandi, & tempus odio habendi: & tempus belli, & tempus pacis? De quo hoc dicit Ecclesiastes? nonne de eo quod ratione temporis fiat, ut pie & amare & odisse possimus; ut quos dilexeris, odisse; & quos oderis, amare conveniat? Tempus igitur amandi, tempus odio habendi: hoc est, tempus martyrii, quando ea quæ divina sunt, omni charitati necessitudinum

præferenda sunt. Tempus belli, quo etiam bellum pro Christi nomine perfidis pignoribus inferamus. Tempus pacis, quia in pace locus ejus.

*R. Hic est. 105.*

*Lectio ix.*

**D** Enique ipse in Evangelio evidenter exposuit, qua ratione nostros debeamus odisse, dicens: Qui diligit patrem aut matrem plus quam me, non est me dignus. Non dixit indignos esse, qui parentes suos diligunt; sed eos indignos ait, qui plus parentes, quam Christum diligunt. Si enim ideò deferimus parentibus, quia nostræ generationis auctores sunt; quantò magis Christum oportet amare, qui ipsorum est auctor parentum? Isti dederunt quod non potestatis est, sed ministerii sui. Christus donat salutem, qui parentum beneficia conservat. **T**e Deum laudamus.

## IN DIE OCTAVA.

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 14.*

**I**N illo tempore: Dixit Jesus turbis: Si quis venit ad me, & non odit patrem suum, & matrem, & uxorem, & filios, & fratres, & sorores, adhuc autem & animam suam, non potest meus esse discipulus. Et reliqua.

*Homilia sancti Augustini Episcopi.*

*Ex Epistola 32*

**S**umptus ad turrim ædificandam & bellantium valentia decem millium adversus regem, qui viginti millia habet, nihil est aliud.

aliud, quàm ut renuntiet unus-  
quisque omnibus, quæ sunt ejus.  
Prælocutio autem superior cum  
extrema conclusione concordat:  
in eo enim, quòd unusquisque re-  
nuntiat omnibus, quæ sunt ejus,  
etiam illud continetur, ut oderit  
patrem suum, & matrem, & u-  
xorem, & filios, & fratres, & so-  
rores, adhuc & animam suam.  
Omnia enim hæc propria ejus  
sunt, quæ plerumq; implicant, &  
impediunt ad obtinenda, non ista  
propria temporaliter transitura,  
sed in æternum mansura commu-  
nia. R. Corona. 105. Lect. viii.

Nec succenseant parentes, hoc  
præcipere Dominum, ut eos  
oderimus, quando nobis hoc de  
anima nostra præcipitur. Sicut  
autem hoc præceptum, quo per-  
dere jubemur animam nostram,  
non ad id valet, ut se quisque in-  
terimat, quod inexpressibile nefas  
est; & tamen valet, ut interimat  
in se carnalem animæ affectum,  
quo cum impedimento futuræ  
vitæ præsens vita delectat: ita de  
parentibus rectissimè dicitur, ut  
qui eos amat, perdat eos, non mo-  
re parricidarum interficiens, sed  
spiritali gladio verbo Dei carna-  
lem affectum eorum, quo & se-  
ipsum & eos quos genuerunt, ir-  
ritamentis hujus sæculi obligare  
conantur, piè fidentérque percu-  
tiens & occidens, illud in eis vi-  
vere faciat, quo cum filiis suis  
temporalibus parentes æternos  
Deum Ecclesiamque cognoscunt.

R. Hic est. 105.

Lectio ix.

Tolle crucem tuam, & seque-  
re Dominum. Crux enim  
nostra, quam Dominus portari à  
nobis jubet, ut eum expeditissi-  
mi sequamur, quid aliud, quàm  
mortalitatem carnis hujus signi-  
ficat? ipsa enim nos cruciat, do-  
nec absorbeatur mors in victo-  
riam. Crux ergo hæc ipsa cruci-  
figenda est, & transfigenda est  
clavis timoris Dei, ne solutis & li-  
beris membris reluctanter por-  
tare non possis: sequi enim Do-  
minum, nisi eam portans, omni-  
no non vales. Nam quomodo e-  
um sequeris, si non es ejus? Qui  
autem Jesu Christi sunt, ait Apo-  
stolus, carnem suam crucifixe-  
runt cum passionibus & deside-  
riis. Te Deum laudamus.

IN FRA OCTAVAM  
UNIUS MARTYRIS Pontif.

Homilia in Evangel. Matth. cap. 16. Si quis  
vult post me venire, &c.

In die Festo habetur Homilia S. Gregorii. Quia  
Dominus ac Redemptor noster novus homo,  
&c. in Breviario de Communi unius Martyr.

SECUNDA DIE.

In tertio Nocturno.

Lectio S. Evangelii secundum Matthæum.

Lectio vii. Cap. 16.

In illo tempore: Dixit Jesus di-  
scipulis suis: Si quis vult post  
me venire, abneget semetipsum,  
& tollat crucem suam & sequa-  
tur me. Et reliqua.

De Homilia sancti Gregorii Papæ.

Ex Homilia 37. in Evangel.

Quid est, quod dicimus, Relin-  
quamus & nos? Si enim nos-  
metipsos relinquimus, quò ibi-  
mus extra nos? vel quis est qui



vadit, si se deserit? Sed aliud sumus per peccatum lapsi, aliud per naturam conditi: aliud quod fecimus, aliud quod facti sumus. Relinquamus nosmetipsos, quales peccando nos fecimus: & maneamus nosmetipsi, quales per gratiam facti sumus.

*R. Corona. 105. Lectio viii.*

**E**Cce enim qui superbus fuit, si conversus ad Christum humilis factus est, semetipsum reliquit. Si luxuriosus quisque ad continentiam vitam mutavit, abnegavit utique quod fuit. Si avarus quisque ambire jam desit, & largiri didicit propria, qui prius aliena rapiebat, procul dubio semetipsum reliquit. Ipse quidem per naturam, sed non est ipse per malitiam. Hinc enim scriptum est: Verte impios, & non erunt. Conversi namque impii non erunt, non quia non erunt omnino in essentia, sed scilicet non erunt in impietatis culpa.

*R. Hic est. 105. Lectio ix.*

**P**ensemus, quomodo se Paulus abnegaverat, qui dicebat: Vivo autem jam non ego. Extinctus namque fuerat sævus ille persecutor, & vivere cœperat pius prædicator. Si enim ipse esset qui prius, pius profectò non esset: sed qui se vivere denegat, dicat: Vivo autem jam non ego. Unde & post sancta verba, quæ per doctrinam veritatis clamat, protinus subdit: Vivit verò in me Christus. Ac si aperte dicat:

Ego quidem à me ipso extinctus sum, quia carnaliter non vivo; sed tamen essentialiter mortuus non sum, quia in Christo spiritaliter vivo. **Te Deum.**

### TERTIA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 16.*

**I**N illo tempore: Dixit Jesus discipulis suis: Si quis vult post me venire, abneget semetipsum, & tollat crucem suam, & sequatur me. Et reliqua.

*De Homilia S. Gregorii Papæ. Unde suprâ.*

**D**icat ergo Veritas, dicat: Si quis vult post me venire, abneget semetipsum: quia nisi quis à semetipso deficiat, ad eum qui super ipsum est, non appropinquat: nec valet apprehendere quod ultra ipsum est, si nescierit mactare quod est. Sic olerum plantæ transponuntur ut proficiant; itaque, ut ita dixerim, eradicantur, ut crescant: sic rerum semina, in terræ admixtione deficiunt, ut in reparatione sui generis uberius assurgant. Unde enim videntur perdidisse quod erant, inde accipiunt hoc apparere quod non erant.

*R. Corona. 105. Lectio viii.*

**S**equitur: Qui enim voluerit animam suam salvam facere, perdet eam. Sic dicitur fideli, ac si agricolæ dicatur: Frumentum si servas, perdis: si seminas, renovas. Quis enim nesciat, quod frumentum, cum in semine mittitur, perit ab oculis, in terra deficit;

ficit; sed unde putrescit in pulvere, inde viridescit in renovatione. Quia verò sancta Ecclesia aliud tempus habet persecutionis, atque aliud pacis, Redemptor noster ipsa ejus tempora distinguit in præceptis. Nam persecutionis tempore ponenda est anima: pacis autem tempore ea, quæ amplius dominari possunt, frangenda sunt desideria terrena.

*R. Hic est. 105.*

*Lectio ix.*

**U**nde & nunc dicitur: Quid enim proficit homo, si lucretur totum mundum, se autem perdat, & detrimentum sui faciat? Cum persecutio ab adversariis deest, valde vigilantius cor custodiendum est: nam pacis tempore, quia licet vivere, libet etiam ambire. Quæ profectò avaritia benè compescitur, si ipse status ambientis sollicitè consideratur. Nam cur instet ad colligendum, quando stare non potest ipse qui colligit? Cursum ergo suum quisque consideret, & cognoscet sibi posse sufficere parva quæ habet. *Te Deum.*

#### QUARTA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 16.*

**I**n illo tempore: Dixit Jesus discipulis suis: Si quis vult post me venire, abneget semetipsum, & tollat crucem suam, & sequatur me. Et reliqua.

*Homilia sancti Joannis Chrysostomi.*

*Et Homil. 16. in Matth. 16. 16.*

**P**erpende, quomodo nullo pacto cogit oratio: non enim

dixit, oportere ipsos pati, vel lent nollentque. Sed quid? Si quis, ait, post me venire vult, non impello, non urgeo, sed liberam singulorum voluntatem efficiens, dico, Si quis vult. Non enim ad afflictiones & onera, nec ad supplicia & pœnas, ut cogere mihi opus sit, sed ad ineffabilia bona convoco, quorum ea natura est, ut facile per se ipsa vos invitare possint. His dictis vehementer eos attraxit: potentior enim omnino est oratio mitis, quàm violenta. *R. Corona. 105. Lect. viii.*

**M**agna enim sunt, ait, quæ retribuo, ac talia, ut ultrò ac spontè homines ad ea concursuros dubitare non debeas. Non enim si quis aurum atque argentum proponeret, vim inferret; quantò igitur magis in cœlestibus bonis inferenda non est? Et certè si rerum ipsa natura non persuadet, & nisi spontè curras, nec accipere quidem dignus es; nec si acceperis, quale quantumcumque sit quod acceperis, cognosces: ideò non cogit Christus, sed hortatur, indulgens nobis. Minimè autem onerosam orationem reddit, quia non sibi soli hæc imminere, sed communiter universo terrarum orbi proponit, dicens: Si quis vult, sive vir, sive mulier, sive princeps, sive subditus, hanc viam ingrediatur.

*R. Hic est. 105.*

*Lectio ix.*

**E**T sermo quidem unum quid significare videtur, tria verò



continet, abnegationem tui ipsius, & ut crucem accipias, & tertio ut Christum sequaris: quorum duo conjuncta sunt, unum per se ipsum separatim ponitur. Consideremus igitur prius, quidnam sit abnegare seipsum. Si ergo intelligis quid sit alium abnegare, tunc recte percipies, quid sit abnegare teipsum. Quid igitur abnegare alium? qui alium jam abnegavit, fratrem puta, aut servum, aut quemvis alium, si cædi eum virgis videat, si arceri vinculis, non occurrit, non auxiliatur, nec prorsus ullo modo movetur; ceu ille qui penitus ab illo alienatus est. **T**e Deum laudamus.

### QUINTA DIE.

Lectio S. Evangelii secundum Matthæum.

**I**n illo tempore: Dixit Jesus discipulis suis: Si quis vult post me venire, abneget semetipsum, & tollat crucem suam, & sequatur me. Et reliqua.

De Homilia S. Joannis Chrysostomi.

**E**t tollat crucem suam. Nam, ne quis putet, ad verba usque tantummodo, ac contumelias & opprobria abnegationem hanc sui fieri oportere, id subjunxit, ut videas abnegandos nos esse usque ad mortem, & mortem turpissimam: quam designans, non dixit, Abneget seipsum usque ad mortem, sed, Tollat crucem suam. Non semel, nec bis, sed continue per totam vitam hanc tecum mortem circumferas, & conti-

nuè ad necem paratissimus sis.

**R.** Corona. 105. **Lectio viii.**

**M**ulti quidem pecunias contempsere, multi delicias vitæ ac gloriam conculcaverunt, mortem autem despiciere non potuerunt; sed pericula & dolores formidaverunt. Ego verò ad effusionem usque sanguinis volo certatores meos luctari, & ad necem usque pugnam continuare. Quare si mortem obire oporteat, & eam turpissimam, & æstimatione hominum pessimam, ferenda omnia sunt æquo, imò potius læto animo. Et sequatur me, inquit.

**R.** Hic est. 105. **Lectio ix.**

**N**am posset quis sic talia pati, ut Christum non sequeretur; si nihil videlicet propter ipsum pateretur? Quippe latrones, sepulchrorum violatores, dæmonum invocatores multa plerumque talia patiuntur. Ne igitur credas, ipsius passionis naturam per se sufficere, causam ejus subjecit. Quam ipsam? Ut quæ dicta sunt, universa faciens atque patiens, ipsum sequaris: ut scilicet propter ipsum omnia sustineas, utque omnem virtutis numerum habeas. Id enim est Dominum recte sequi, & ut oportet, si propter ipsum cuncta sufferas, & alias virtutes non negligas. **T**e Deum laudamus.

### SEXTA DIE.

**Lectio S. Evangelii secundum Matthæum.**

**I**n illo tempore: Dixit Jesus discipu-

*Intra Octavam unius Mart. Pontif. in iii. Nocturno.* 115

scipulis suis: Si quis vult post me venire, abneget semetipsum, & tollat crucem suam, & sequatur me. Et reliqua.

*Homilia sancti Hilarii Episcopi.*

*Canon. 16. 17.*

**O** Beatum damnum, & iactura felix! ditefcere nos Dominus detrimento animæ & corporis voluit, & esse sui similes hortatur: quia ipse in figura Dei constitutus usque ad mortem humilis & obediens factus, principatum potestatis totius, quæ in Deo est, accepit. Sequendus igitur est crucē assumpta, & passionis suæ, si non sorte, attamen voluntate comitandus est. Quid enim prodest occupasse mundum, & toto terrenæ potestatis dominatu opibus sæculi incubare, si perdenda anima, & suscipiendum vitæ detrimentum est?

*R. Corona. 105. Lectio viii.*

**Q**Uæ autem commutatio pro anima, cum fuerit amissa, quæretur? cum Angelis enim Christus aderit, reddens singulis ut merebuntur. Quid offeremus ad vitam? præparatos credo terrenarum opum futuris commerciis thesauros, ambitiosos dignitatum famæque titulos, aut veteres delegatæ nobilitatis imagines? Neganda sunt hæc omnia, ut melioribus abundemus: & contemptu universorum Christus sequendus est, & æternitas spirituum alium, terrenorum est damno comparanda. *R. Hic est. 105.*

*Lectio ix.*

**G**RAVE onus infirmitati humane imposuerat, ut cum sensum vitæ homines ex vivendi affectu habere cœpissent, fructū ejus, qui præsens corporibus blandiebatur, amitterent; negarentque se sibi, id est, quod esse cœpissent, esse se nollent: cum sensus hujus exordium ex affectu voluntatis habuissent. Opus ergo erat veri ac manifesti exempli auctoritate, ut contra vim sensumque; iudicii, optabile fieret præsentium damnum, lucro deinceps non ambiguo futurorum. Igitur postquam & tollendam crucem, & perdendam animam, & damno mundi commutandam vitæ æternitatem monuerat, conversus ad discipulos, ait: Quosdam ex his futuros, qui gustaturi mortem non essent, donec Filium hominis in regni sui gloria contuerentur. *Te Deum laudamus.*

### SEPTIMA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 16.*

**I**N illo tempore: Dixit Jesus discipulis suis: Si quis vult post me venire, abneget semetipsum, & tollat crucem suam, & sequatur me. Et reliqua.

*Homilia sancti Hieronymi Presbyteri.*

*Lip. 3. in Matth. cap. 16.*

**Q**UI deponit veterem hominem cum operibus suis, denegat semetipsum, dicens: Vivo autem, non ego, vivit verò in me Christus: tollit crucem suam, & mundo crucifigitur. Cui autem



mundus crucifixus est, sequitur Dominum crucifixum. Autquam dabit homo commutationem pro anima sua? Pro Israël datur commutatio Ægyptus, & Æthiopia, & Syene: pro anima humana illa sola est retributio, quam Psalmista canit: Quid retribuam Domino pro omnibus quæ retribuit mihi? Calicem salutaris accipiam, & nomen Domini invocabo.

*R. Corona. 105. Lectio viii.*

**F**ilius enim hominis venturus est in gloria Patris sui cum Angelis suis. Petrus ad prædicationem Dominicæ mortis scandalizatus, sententiâ Domini fuerat increpatus, provocati sunt discipuli ut abnegarent se, & tollerent crucem suam, & morientium animo sequerentur Magistrum. Grandis terror audientium, & qui possit, Principe Apostolorum perterritus, etiam aliis metum injicere: idcirco tristibus læta succedunt, & dicit: Filius hominis venturus est in gloria Patris sui cum Angelis suis. Times mortem? audi gloriam triumphantis: vereris crucem? ausculta Angelorum ministeria.

*R. Hic est. 105. Lectio ix.*

**T**errorem Apostolorum spe medicari voluerat promissorum, dicens: Filius hominis venturus est in gloria Patris sui cum Angelis suis: insuper auctoritate judicis addita, Reddet unicuique secundum opera sua. Poterat Apostolorum tacita cogita-

tio istiusmodi scandalum sustinere. Occisionem & mortem nunc dicis esse venturam: quod autem promittis te affuturum in gloria Patris cum Angelorum ministeriis & judicis potestate, hoc in dies erit, & in tempora longa differetur. Prævidens ergo occultorum cognitor, quid possent objicere, præsentem timorem præsentem compensat præmio. Quid enim dicit? Sunt quidam de hic stantibus, qui non gustabunt mortem, donec videant Filium hominis venientem in regno suo. **Te Deum laudamus.**

## IN DIE OCTAVA.

*In octavo Nocturno.*

Lectio S. Evangelii secundum Matthæum.

*Lectio vii. Cap. 16.*

**I**n illo tempore: Dixit Jesus discipulis suis: Siquis vult post me venire, abneget semetipsum, & tollat crucem suam, & sequatur me. Et reliqua.

Homilia sancti Augustini Episcopi.

*Sermon. 47. de diversis.*

**D**urum videtur & grave, quod Dominus imperavit; ut si quis eum vult sequi, abneget seipsum: sed non est durum, nec grave, quod ille imperat, qui adjuvat, ut fiat, quod imperat. Nam & illud verum est quod ei dicitur in Psalmo: Propter verba labiorum tuorum ego custodi vias duras. Quidquid enim durum est in præceptis, ut sit lene, charitas facit. Novimus quanta ipse amor facit. Quid autem est, Neget se? Non præsumat de se, sentiat se homi-

hominem, & respiciat dictum Propheticum: Maledictus omnis, qui spem suam ponit in homine: subducatur se sibi, sed non deorsum versus: subducatur se sibi, ut hæreat Deo. *R. Corona. 105* *Lectio viii.*

**T**ollat crucem suam, & sequatur me. Quò sequendus est Dominus? quò iit, novimus; resurrexit enim, & ascendit in cælum: illò sequendus est. Planè desperandum non est, quia ipse promissit, non quia homo aliquid potest. Jam quare desperemus, si membra illius capitis sumus? Bonum est illò eum sequi, sed videndum est, quà: etenim verba ista Dominus Jesus non tunc dicebat, quando à mortuis jam resurrexerat: nondum erat passus, venturus erat ad crucem, venturus ad exhonorationem, ad contumelias, ad flagella, ad spinas, ad vulnera, ad insultationes, opprobria, mortem. Quasi exasperata est via: pigrum te facis, non vis sequi: Sequere. Nam quis non velit ire ad exaltationem? omnes delectat celsitudo, sed humilitas gradus est. *R. Hic est. 105*

*Paulo post. Lectio ix.*

**Q**uid est, Tollat crucem suã? Ferat quidquid molestum est: sic me sequatur. Cum enim cœperit me moribus & præceptis meis sequi, multos habebit contradictores, multos habebit prohibitores, multos habebit dissuasores, & hos de ipsis quasi comitibus Christi. Cum Christo am-

bulabant, qui cæcos clamare prohibebant. Sive ergo minas, sive blandimenta, sive quaslibet prohibitiones, si sequi vis, in crucem verte: tolera, porta, noli succumbere. Videntur his verbis Domini exhortata martyria. Si persecutio est, nonne pro Christo debent cuncta contemni? Amatur mundus, sed præponatur, à quo factus est mundus. *Te Deum.*

**INFRA OCTAVAM  
UNIUS MARTYRIS**

*non Pontificis.*

**SECUNDA DIE.**

*In secundo Nocturno.*

*Sermo S. Ambrosii Episcopi.*

*Sermone 93. in Natali SS. Nazarii, &c.  
post medium. Lectio iv.*

**T**antus Christi testis pretiosus confessione, pretiosior sanguine, crudeli vulnere pretiosior, & tincta veste candidior, licet peculiaris putetur privilegio sepulchri, sed omnium est communione suffragii. Non clauditur locis, quod diffunditur meritis. Invocasti ubique martyrem, ubique te exaudit ille, qui honoratur in martyre. Moderante itaque eo, qui pensat vota tua, & dispensat munera sua, in tantum vicina præsentia efficacis præbebitur advocati, in quantum fuerit fides devota suscepti. Oratio enim quæ castitatis, justitiæ, eleemosynarum operibus adjuvatur, excedit mundum, penetrat paradysum, evolat usque ad ipsum summæ Majestatis, Angelo conferrante conspectum.

*R. Ho-*



*Honestum. 99. Lectio vi*

**Q**Uæ cum ita sint, honoremus beatos martyres, principes fidei, intercessores mundi, præcones regni, cohæredes Dei. Quod si dicas mihi, Quid honoras in carne jam resoluta atq; consumpta, de qua nulla jam Deo cura est? Et ubi est illud, charissimi, quod ipsa Veritas loquitur per Prophetam? Pretiosa, inquit, in conspectu Domini mors Sanctorum ejus. Et iterum: Mihi autem valdè honorificandi sunt amici tui Deus. Honorare debemus servos Dei, quantò magis amicos Dei? de quibus alio loco dicitur: Dominus custodit omnia ossa eorum, & unum ex his non contretur. *R.* Desiderium. 100.

*Lectio vi.*

**H** Onoro ergo in carne martyris exceptas pro Christi nomine cicatrices: honoro viventis memoriam: perennitatem virtutis. Honoro per confessionem Domini sacros cineres: honoro in cineribus semina æternitatis: honoro corpus, quod mihi Dominum meum ostendit diligere, quod me propter Dominum mortem docuit non timere. Cur autem non honorent corpus illud fideles, quod reverentur & dæmones? quod & affligerunt in supplicio, sed glorificant in sepulchro. Honoro itaque corpus, quod Christus honoravit in gladio, quod cum Christo regnabit in cælo.

*R.* Stola. 100.

**TERTIA DIE.**

*In secundo Nocturno.*

*Sermo sancti Augustini Episcopi.*

*Sermo 1. de S. Cypriano. cui est 113. de*

*11 verbis.*

*Lectio iv.*

**S** Piritus sanctus doceat nos in hac hora, quæ oporteat dicere: dicturi enim sumus aliquid de laude *N.* gloriosissimi martyris, cujus natalem hodie, sicut nostis, celebramus. Quod nomen sic frequentat Ecclesia, id est, natales, ut natales vocet pretiosas martyrum mortes. Quid est hoc, fratres? quando natus est, ignoramus: & quia hodie passus est, natalem ejus hodie celebramus. Sed illum diem non celebraremus, etsi nossemus: illo enim die traxit originale peccatum, isto autem die vicit omne peccatum.

*R.* Honestum fecit. 99.

*Sermo 1. de eodem.*

**I** Stum nobis festum diem passionis beatissimi *N.* martyris fecit: cujus nos victoriæ celebritas in istum locum devotissimos congregavit. Sed celebratio solemnitatis martyrum, imitatio debet esse virtutum. Facile est, honorem martyris celebrari: magnum est, fidem atque patientiam martyris imitari. Hoc sic agamus, ut illud optemus: hoc sic celebremus, ut illud potius diligamus. Quid laudemus in fide martyris? quia usque ad mortem certavit pro veritate, & ideò vicit. Blandientem mundum contempsit, sævienti non cessit: ideò victor ad Deum accessit. Abundant in

*isto*

isto sæculo errores & terrores: beatissimus martyr errores sapientiâ, terrores patientiâ superavit. *R. Desiderium. 100. Lectio vi.*

**C**ontemnite ergo sæculum Christiani, contemnite sæculum, contemnite. Contempserunt martyres, contempserunt Apostoli, contempsit beatus *N.* cuius hodie memoriam celebramus. Divites esse vultis, honorati esse vultis, sani esse vultis: totum ille contempsit, ad cuius memoriam convenistis. Quid obsecro tantum amatis, quod contempsit, quæ sic honoratis? quem, si ista non contempsisset, non utique sic honoraretis. Quare te invenio earum rerum amatorem, quarum veneraris contemptorem? certè illum, si hæc amaret, non venerareris. Et tu noli amare: non enim intravit, & ostium contra te clausit. Contemne & tu, & intra post illum. *R. Stola, 100*

#### QUARTA DIE.

*In secundo Nocturno.*

*Sermo sancti Petri Chrysologi.*

*De sancto Cypriano 129. Lectio iv.*

**Q**uoniam hodie Deo in natali sancti *N.* martyris convenimus, in quo miro certamine de dia bolo triumphavit; & quia nobis virtutum suarum gloriosum reliquit exemplum: ideò exultare nos convenit, & lætari. Natalem ergo Sanctorum cum auditis, charissimi, nolite putare illum dici quo nascuntur in terram de carne; sed de terra in cælum, de labore ad requiem, de tentatio-

nibus ad quietem, de cruciatibus ad delicias; non fluxas, sed fortes, & stabiles, & æternas: de mundanis risibus ad coronam & gloriam. Tales natales dignè martyrum celebrantur.

*R. Honestum. 99. Lectio v.*

**C**um ergo huiusmodi festivitàs agitur, noli æstimare, charissime, quòd in solis prandiis, & profusioribus epulis natales martyrum celebrentur: sed imitandum tibi proponitur, quod in memoria martyris celebras. Aspice ergo, charissime, alacritatem populi circumstantis: in hac enim die aliquando turba affitit impiorum, cum sanctus *N.* iussu tyranni feriretur: turbæ erant malorum, expectantium chori; nunc multitudo fidelium ad collatandū devota confluit: tunc turba sævientium, nunc exultantium: tunc desperatorū, nunc sperantiū.

*R. Desiderium. 100. Lectio vi.*

**I**dcircò ergo natales martyrum annuâ lætitiâ celebrantur, ut quod semel actum est, per omne ævum in memoria maneat devotorum. Gesta res est, charissime, ne te diceres ignorare: celebrantur annua, ne dicas, Oblitus sum. Ad hæc ergo imitando vos animate, charissimi, hanc magnanimitatis gratiam concupiscite: hoc petite dari vobis, quod ille meruit adipisci. *R. Stola 100.*

#### QUINTA DIE.

*In secundo Nocturno.*

*Sermo sancti Bernardi Abbatis.*

*De sancto Clemente. Lectio iv.*

Preli-



**P**retiosa in conspectu Domini mors Sanctorum ejus. Audiat peccator, & irascatur, dentibus suis fremit, & tabescat. Deprehensus est in astutia sua, cecidit in foveam, quam fecit, in laqueum incidit, quem tetendit: invidia siquidem diaboli mors intravit in orbem terrarum: sed ecce pretiosa facta est mors Sanctorum. Neque enim aliter, quam ipsa, hodie beatus martyr, cujus solennia celebramus, morte corporis triumphavit: fecit siquidem de necessitate virtutem, poenam peccati in meritum gloriæ commutavit; fidelem se probavit in modico, ut dignus inveniretur supra multa constitui.

**R.** Honestum. 99. **Lectio v.**

**F**idelem se probavit ei, qui dederat, cum pro ejus amore universa contempsit, omnia detrimentum faciens, & arbitratus ut stercora, ut lucrifaceret Christum. Sed fortè murmurat etiam nunc inimicus, Pellem, inquiens, pro pelle, & omnia quæ habet homo, dabit pro anima sua. Quid ergo? Putas, quòd in ipsa corporis sui vita, quam accepit à Domino, infidelis inveniat, ut vel ipsam præferat illi? Ecce habes potestatem, irrue in eum per satellites tuos, ut coarctetur è duobus, aut à Domino necesse habens, aut à corpore separari. Varia & immania exquirere genera tormentorum: sed noveris, te martyri nostro fabrica-

re coronas. **R.** Desiderium. 100

**Lectio vi.**

**C**oronabitur ergo, quia legitime certavit, quia fideliter vicit, quia nec blandimentis vitæ hujus, nec mortis horrore à charitate Christi potuit separari. Quid nos ad hæc dicimus, fratres? Congratulamur martyri, sed jam gloria ejus non sine nostra confusione est. Ecce enim, beatus **N.** homo erat similis nobis passibilis, eadem circumdatus infirmitate, & carni suæ eodem vinculo naturalis affectionis inhærens. Si ergo ille sic glorificavit Christum in corpore suo, & calicem salutaris accepit: quid nos retribuimus Domino pro omnibus, quæ retribuit nobis?

**R.** Stola jucunditatis. 100.

## SEXTA DIE.

In secundo Nocturno.

De Sermone S. Bernardi Abbatis.

Unde supra.

**Lectio iij.**

**U**T quid ergo? non possumus & nos cum beato **N.** Christi bibere calicem? Sed fortè respondent aliqui: Possemus, si oportunitas non deesset; sed persecutionis tempus cessavit. At ego, fateor, non satis crediderim ita dicentibus. Quid enim? quotidie ceditis punctiōni acus unius, & mucroni vos arbitramini posse resistere? in minimis probate conflictibus, quàm viriliter in majori certamine stare possitis. Novit Dominus figmentum nostrum, nec dat nobis tam forte certamen.

**R.** Honestum. 99.

**Lectio v.**

Beato

**B**Eato N. certamen forte dedit, ut vinceret, & disceret, quoniam omnium potentior est sapientia. Vestrum autem certamen quale est, fratres mei? Quotidie vobis suggeritur in cordibus vestris: Frange Ordinem tuum, murmura, detrahe, age remissius, infirmitatem simula, responde ei qui fortè durius locutus est, ut satisfacias desiderio tuo: nec dicitur cuiquam: Nisi hæc feceris morieris; sed, ut multum, cum difficultate & labore resistas animo tuo. **R.** Desiderium. 100.

**Lectio vi.**

**S**I ergo in huiusmodi certamine periclitamur, si vix resistimus, si interdum etiam succumbimus; quid in illo tam gravi certamine faceremus? Si iuncis fragilibus cedit infirmitas nostra, quomodo telis resisteret? Videtis, quomodo ad nihilum redacti sumus: & sicut solent mulieres aut parvuli, pugnantes laudamus alios, pugnare ipsi non possumus?

**R.** Stola. 100.

## SEPTIMA DIE.

In secundo Nocturno.

Tres Lectiones sancti Augustini. Triumphalis beati, &c. quæ habentur in Breviario in Comuni unius Martyris. Quod si lætæ fuerint in die Festo, legantur hac die **Lect.** S. Ambrosii. Principes persecuti, &c. ut in eodem Comuni.

## IN DIE OCTAVA.

In secundo Nocturno.

De Sermone sancti Augustini Episcopi.

Sermone 44. de Sanctis, circa med.

**Lectio iv.**

**P**atienter permittunt ægroti, se à medicis secari, uri, & variis amaritudinum confectionibus.

**Octav. Rom.**

bus anxari, ut temporali tandem restituantur sanitati: quanto magis vir beatus longanimiter toleravit omnem acerbicatem tormentorum temporalium, ut coronaretur in misericordia & miserationibus, & in bonis satiaretur desiderium suum? In torculari itaque conculcari voluit, ut tamquam uva matura in vinum deficeret, & vinum malorum granatorum dilecto suo propinaret, quo mentes religiosæ ebriatæ, sciunt utiliter conculcare, & ad æterna irretortis oculis anhelare.

**R.** Honestum. 99. **Lectio v.**

**Q**ui ergo in tyrocinio suo mundanas contempsit divitias, qui corporales etiam refrænavit illecebras, qui in provectu militiæ suæ multas est perpeffus injurias, in perfectione sacrificii nil sibi reservans, seipsum obtulit holocaustum, bibens illum calicem pretiosum, quem sedens ad magnam mensam sacre lectionis sibi prius ab invitatore suo videbat appositum. Cujus mors quantumcumque videatur in conspectu reproborum despicibilis, in oculis tamen ejus est pretiosa, qui in Sanctis suis est mirabilis.

**R.** Desiderium. 100. **Lectio vii.**

**I**pse enim primò vocavit militem suum, ipse justificavit, ipse magnificavit; ipse dedit ei pugnare, ipse dedit & vincere. Longè est dissimilis hæc militia mundanæ militiæ, in qua victores existimantur, qui quod malè deside-

**L**

rant,



**Infra Octavam unius Mart. non Pontif. in iii. Nocturno.**

rant, assequuntur: qui lætantur cum malefecerint, & exultant in rebus pessimis. In Christiano ergo agone manifesta est pœna, occulta victoria, secundum quod ex persona martyrum clamat Psalmista: Da nobis auxilium de tribulatione, quia vana est salus hominis: in Deo faciemus virtutem. Tamquam si dicerent, Victoria nostra, gloria nostra intus est, non foris est: foris despecti, intus dilecti. **R. Stola. 100.**

## **INFRA OCTAVAM UNIUS MARTYRIS**

**non Pontificis.**

*Homilia in Evangel. Matth. cap. 10. Nolite arbitrari, &c.*

### **IN DIE FESTO.**

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 10.*

**I**n illo tempore: Dixit Jesus discipulis suis: Nolite arbitrari, quia pacem venerim mittere in terram: non veni pacem mittere, sed gladium. Et reliqua.

*Homilia sancti Hilarii Episcopi. Can. 10.*

**Q**uæ ista divisio est? inter prima enim legis præcepta accepimus: Honora patrem tuum, & matrem tuam; & ipse Dominus ait: Pacem meam do vobis, pacem meam relinquo vobis. Quid sibi vult missus potius gladius in terram, & separatus à patre filius; & filia à matre, & nurus adversus socrum, & hominis domestici ejus inimici? Igitur exinde publica auctoritas impietati proferetur. Ubique odia, ubique bella, & gladius Domini,

inter patrem & filium, & inter filiam matremque desævians.

**R. Corona. 105. Lectio viii.**

**G**ladius telorum omnium telum acutissimum est, in quo sit jus potestatis, & iudicii severitas, & animadversio peccatorum. Et hujus quidem teli nomine novi Evangelii prædicationem appellatam frequens in Prophetis auctoritas est. Dei igitur verbum nuncupatum meminerimus in gladio: qui gladius missus in terram est, idest, prædicatione ejus hominum cordibus infusa. Fitque gravis in domo una dissensio, & domestica novo homini erunt inimica: quia ille per verbum Dei divisus ab illis, manere & interior & exterior, idest, & corpus & anima, in spiritu novitate gaudebit.

**R. Hic est. 105.**

**Lectio ix.**

**P**ergit deinde eodem præceptorum & intelligentiæ decursu. Nam posteaquam relinquenda omnia, quæ in sæculo charissima sunt, imperaverat, adjecit: Qui non accipit crucem suam, & sequitur me, non est me dignus: quia qui Christi sunt, crucifixerunt corpus cum vitiis & concupiscentia. Et indignus est Christo, qui non crucem suam, in qua compatimur, commorimur, consepelimur, conresurgimus, accipiens, Dominum sit secutus, in hoc sacramento fidei spiritus novitate victurus. **Te Deum laudamus.**

SE-

## SECUNDA DIE.

In tertio Nocturno.

Lectio S. Evangelii secundum Matthæum.

Lectio vii. Cap. 10.

**I**N illo tempore: Dixit Iesus discipulis suis: Nolite arbitrari, quia pacem venerim mittere in terram: non veni pacem mittere, sed gladium. Et reliqua.

Homilia sancti Hieronymi Presbyteri.

Lib. 1. in Matth. cap. 10.

**S**uprà dixerat, Quod dico vobis in tenebris, dicite in lumine: & quod in aure auditis, prædicate super tecta. Nunc infert, quid post prædicationem sequatur. Ad fidem Christi totus orbis contra se divisus est: unaquæq; domus & infideles & credentes habuit, & propterea bellum missum est bonum, ut rumpere pax mala. Tale quid & in Genesi adversus rebelles homines, qui moti fuerant de Oriente, & turrem extrudere festinabant, per quam cæli alta penetrarent, fecisse scribitur Deus, ut divideret linguas eorum.

R. Corona. 105. Lectio viii.

**V**eni enim separare hominem adversus Patrem suum. Hic locus propè iisdem verbis in Michæa Propheta scribitur. Et notandum, ubicumque de veteri Testamento testimonium ponitur, utrum sensus tantum, an sermo consentiat. Qui amat patrem aut matrem plusquam me, non est me dignus. Qui antè præmiserat: Non veni pacem mittere, sed gladium, & dividere homines

adversus patrem & matrem, nulum & socrum; ne quis pietatem religioni anteferreret, subiecit dicens: Qui amat patrem aut matrem plusquam me. Et in Cantico legimus canticorum: Ordinavit in me charitatem. Hic ordo in omni affectu necessarius est: ama post Deum patrem, ama matrem, ama filios.

R. Hic est. 105.

Lectio ix.

**O**rdo pulcherrimus; ad prædicationem mittit, docet pericula non timenda, affectum subiecit religioni. Aurum suprà tulerat, æs de zona excusserat. Dura Evangelistarum conditio. Unde ergo sumptus, unde victus necessaria? Austeritatem mandatorum spe temperat promissorum, Qui recipit, inquit, vos, me recipit: & qui me recipit, recipit eum, qui me misit: ut in suscipiendis Apostolis unusquisque credentium Christum se suscepisse arbitretur. Te Deum laudamus.

## TERTIA DIE.

In tertio Nocturno.

Lectio S. Evangelii secundum Matthæum.

Lectio vii. Cap. 10.

**I**N illo tempore: Dixit Iesus discipulis suis: Nolite arbitrari, quia pacem venerim mittere in terram: non veni pacem mittere, sed gladium. Et reliqua.

De Homilia S. Hieronymi Presbyteri.

Unde suprà.

**L**egimus in Propheta David: Ad excusandas excusationes in peccatis: quod multi peccatorum suorum quasi iustas præten-



dant occasiones; ut, quod voluntate delinquant, videantur necessitate peccare. Dominus scrutator cordis & renum futuras cogitationes in singulis contuetur. Dixerat: Qui recipit vos, me recipit; sed hoc præceptum multi pseudoprophetae & falsi prædicatores poterant impedire; medicatus est huic quoque scandalo, dicens: Qui recipit iustum in nomine iusti, mercedem iusti accipiet. *R. Corona. 105. Lect. viii.*

**R**ursus poterat alius causari, & dicere: Paupertate prohibeor, tenuitas me retinet, ut hospitalis esse non possim. Et hanc excusationem levissimo præcepto diluit, ut calicem aquae frigidae toto animo porrigamus. Frigidae, inquit, aquae, non calidae: ne & in calida paupertatis ex penuria lignorum occasio quaereretur. Tale quid & Apostolus ad Galatas præcepit: Communicet autem is qui catechizatur verbo, ei qui se catechizat, in omnibus bonis.

*R. Hic est. 105. Lectio ix.*

**E**t discipulos ad magistrorum refrigeria cohortatur: quia poterat quislibet obtendere paupertatem, & præceptum eludere, priusquam ille proponat, imminentem solvit quaestionem, dicens: Nolite errare; Deus non irridetur. Quae enim semina veritatis homo, hæc & metet. Et est sensus: Frustrà causaris inopiam, cum aliud habeat conscientia tua: me potes fallere cohortantem, sed

scito, quod quantumcumque seminaveris, tantum & messurus sis. *Te Deum laudamus.*

#### QUARTA DIE.

*In tertio Nocturno.  
Lectio S. Evangelii secundum Mattheum.*

*Lectio vii. Cap. 10.*

**I**n illo tempore: Dixit Iesus discipulis suis: Nolite arbitrari, quia pacem venerim mittere in terram: non veni pacem mittere, sed gladium. Et reliqua.

*Homilia sancti Jeannis Chrysostomi.*

*Homil. 36. in Matth. initio.*

**N**on veni pacem in terram mittere. Quomodo igitur præcipit, cum ad suscipientium domos ingrederentur, pacem omnibus dicere? Aut quomodo Angeli clamabant: Gloria in excelsis Deo, & in terra pax hominibus bonae voluntatis? Quomodo & omnes Prophetæ pacem tempore ipsius futuram prænuntiârunt? Quia videlicet præcipua singularisque pax tunc præstatur, quando quod tabe, vel sanie corruptum est, abscinditur atque projicitur: quando factiosa & improba pars repellitur, aut omnino destruitur; sic certè cœlis terra conjungi potest.

*R. Corona. 105. Lectio viii.*

**N**am & medicus hoc modo reliquum corpus conservat facile, si quod reduci ad sanitatem non potest, exciderit atque abjecerit: & militiæ dux ad solvendam militum conspirationem alterum in alterum concitat. Sic in turre factum videmus, quan-

do

Unde suprâ, paulò pòst.

do pernicioſa illa pax per vocis discrepantiam diſſoluta, tranquillam atque laudabilem pacem reddidit. Sic etiam Paulus eos, qui adverſus ſe conſpirabant, dividebat atque diſſipabat. Nec enim ſemper concordia laudanda, cum etiam latrones magna inter ſe concordia conſpirare ſciamus. Non igitur ex propoſito Chriſti, ſed ex mente animoque hominũ vitioſo bellum erumpit.

✠. Hic eſt. 105. *Lectio ix.*

**Q**uid igitur ait, Non veni mittere pacem? Nolite, ait, exiſtimare harum rerum cauſam vos futuros: ego ſum qui, quoniam homines ad vitia infidelitatemque proclives ſunt, hæc præparo. Non ergo, quaſi præter expectationem veſtram quidquam acciderit, turbatione aliqua moveamini, cum ideò venerim, ut bellum committam. Hæc voluntas mea eſt, nulla vos invadat turbatio, quaſi bello atque infidiis orbe terrarum ferociùs exagitato; nam ſi hoc modo peiorem partem conciderimus, tunc pars melior cœlo copulabitur.

**T**e Deum laudamus.

## QUINTA DIE.

*In tertio Nocturno.*

*Lectio S. Evangelii ſecundum Matthæum.*

*Lectio vii. Cap. 10.*

**I**n illo tempore: Dixit Jeſus diſcipulis ſuis: Nolite arbitrari, quia pacem venerim mittere in terram: non veni pacem mittere, ſed gladium. Et reliqua.

*De Homilia S. Joannis Chryſoſtomi.*

**N**on dixit bellum, ſed quod atrocius eſt, gladium. Quod ſi acerbius hæc & minus compoſitè dicta tibi videantur, nequaquam mireris: nam, ne ſuſpicari quis poſſit, verborum lenociniis alleſtos à Chriſto fuiſſe Apoſtolos, ac etiam ut aſperitate verborum ad injuſtas contumelias auditũ præparet, non jucundè rem aſperam, ſed aſperrimè atque duriffimè protulit. Nec iſta ſibi ſuſfecerunt, ſed latius naturam iſtiſus belli, ac ſingulas partes amplificans, omni bello inſeſtino atque civili multò magis peſtiferũ oſtendit, dicens: Veni enim ſeparare hominem adverſus patrem ſuum, & filiam adverſus matrem ſuam, & nurum adverſus ſocrum ſuam, & inimici hominis domeſtici ejus.

✠. Corona. 105. *Lectio viii.*

**M**agnum omnino, ac ſuper hominem eſt, quod qui primi hæc audierint, libenter ſuſcipere, & aliis perſuadere potuerunt. Et quamquam non ipſe, ſed hominum improbitas horum omnium cauſa futura eſſet, ſe tamen facturum omnia dicit: talis quippe Scripturarum eſt conſuetudo. Ut enim etiam alibi dicitur, Dedit ipſis Deus oculos ne videant: ſic etiam in hoc loco, ut quemadmodum diximus, hæc omnia præmeditati, atque his verbis ſtabiliti, cum opprobriis & contumeliis peterentur, minus



126 *Infra Octavam unius Mart. non Pontif. in iii. Nocturno.*  
turbari possent. *R.* Hic est. 105.

*Lectio ix.*

**S**I autem graviora hæc cuiquam videantur, priscam historiam animo verset. Hoc enim ipsum & superioribus temporibus contigit, quod maximo argumento est, cognata esse vetera novis: & eundem esse qui hæc dicat, & illa imperavit. Judæis enim tunc pepercit, cum singuli proximos suos interemissent: sic etiam quando vitulum consecrârunt, & quando Beelphegor dedicârunt. Ubi ergo sunt, qui dicere audent: Pestifer est ille Deus, hic propitius atque mitis? *Te Deum laudam?*

#### SEXTA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 10.*

**I**N illo tempore: Dixit Jesus discipulis suis: Nolite arbitrari, quia pacem venerim mittere in terram: non veni pacem mittere, sed gladium. Et reliqua.

*De Homilia S. Joannis Chrysostomi.*

*Longe post.*

**A**Nimadvertis, quot quibusque causis persuadet, & domos totius orbis Apostolis aperit, cum planè his omnibus significet universos sibi homines debitores futuros? Primum quia dixit: Dignus est operarius cibo suo. Deinde, quia nudos nihil habentes emisit. Tertiò, quia in bella & pugnas pro suscipientibus eos emisit. Quartò, quia mirabilibus atq; inauditis signis eos illustravit. Quintò, quia, quòd omnium bonorum causa, pacem ipsorum

ore ad domos recipientium adducit. Sextò, quia graviora non suscipientibus minatur supplicia, quàm Sodoma mereatur. Septimò, quia ipsum etiam cum Patre accipientes hospitari asseruit.

*R.* Corona. 105. *Lectio viii.*

**O**ctavò, quia Prophetæ mercedem ac justî futuram recipienti pollicetur. Nonò, quòd aquæ frigidæ calicem præbentes, non parvas sint retributiones habituri; quorû unumquodque per seipsum satis magnas vires ad atrahendum possidet. Quis enim militiæ ducem, quamvis vulneribus sanguinolentum videat, non magno gaudio tamen domi recipiat, cum ab acie redeuntem magnis trophæis, & singulari victoria videat?

*R.* Hic est. 105. *Lectio ix.*

**S**ed quisnam talis modò est, inquit, & recipiemus ipsum? Propterea discipuli, Prophetæ, ac justî denique nomen adjecit, ut discas, non ex dignitate recepti, sed ex voluntate recipientis mercedem omnem esse constitutam. Nam quòd in hoc loco de Prophetis, discipulis, ac justis dicit, id alibi de recipientibus abjectos ac minimos homines protulit. In quantum enim, inquit, uni minimorum fecistis, mihi fecistis; & contrà rursus, si nulli horum, nec mihi. *Te Deum.*

#### SEPTIMA DIE.

*In tertio Nocturno.*

*Lectio sancti Evangelii secundum Matthæum*

*Lectio vii. Cap. 10.*

*In*

**I**N illo tempore: Dixit Jesus discipulis suis: Nolite arbitrari, quia pacem venerim mittere in terram: non veni pacem mittere, sed gladium. Et reliqua.

Homilia S. Petri Chrysologi. *Sermone 164.*

**P**Utatis, quia pacem veni mittere in terram? non, dico vobis, sed separationem. Et ubi est illud: Ecce Agnus Dei? Ubi illud: Sicut ovis ad occisionem ductus est, & sicut agnus coram tondente se mutus, sic non aperuit os suum? Sed & illud: Dicite filiae Sion, ecce Rex tuus venit tibi mansuetus? Et quid est, quod Agnus iste tam dure in praedicatione percutit? quid sic arietat in verbo, qui in passione tantam patientiam tacet, in morte tota humilitate succumbit?

R. Corona. 105. *Lectio viii.*

**E**T revera, fratres, mundum Christus per omnia mitis & mansuetus intravit, dum nascitur nostro dulcis in germine, dum cunis blandè, blandior ipse fovetur, dum parvulus in gremio se fundit & resolvit humano, dum parentis in collo stringitur, & stringit toro charitatis amplexu. Pauper agit semper, solitarius semper incedit; quia pauper communis est semper: patet omnibus, solitarius semper. Et quid est, quod tantum verbis spargit ignem, quod tanta & talia inflamat & dilatat incendia?

R. Hic est. 105. *Lectio ix.*

**U**Rget aqua ignem, cogitan-

da est talis tam divisa conjunctio: urget unda flammam, multiplicat flamma undam. Quae est talis tam concors ista discordia? Geritur hic agricolae divini species: plena namque omnia calore germinant, humore nutriuntur. Unde rerum parens Deus ignis & aquae commercio nos germinat, nos enutrit, quorum tanto ardet, calet, exaestuatur, anhelat affectu. Putatis, ait, quia pacem veni mittere in terram? Non. Quare? quia conjunctio coelestis est in ista separatione terrena: nemo potest connecti terrae, & jungi caelo. Grata ergo & chara sit ista terrena separatio, quae nos sic a terrenis separat, ut inferat nos divinis.

Te Deum laudamus.

## IN DIE OCTAVA.

*In tertio Nocturno.*

*Lectio S. Evangelii secundum Matthaeum.*

*Lectio vii. Cap. 10.*

**I**N illo tempore: Dixit Jesus discipulis suis: Nolite arbitrari, quia pacem venerim mittere in terram: non veni pacem mittere, sed gladium. Et reliqua.

Homilia sancti Ambrosii Episcopi.

*Ex lib. 7. in Lucam.*

**C**UM in omnibus ferè Evangelii locis spiritualis intellectus operetur, tamen in praesentibus maximè: & ne quem duritia nudae expositionis offendant, spiritali altitudine sensus series temperanda est; praesertim cum sacrosancta religio moralibus disciplinis, & mitibus pietatis ex-



emplis, etiam fidei exules ad reverentiam tamen sui clementer invitet, ut præviam fidei disciplinam, mansuetudinem sui superstitionum dura dissolvat, & obnoxias erroribus mentes cogat etiam fide credere, quas potuit pietate mulcere. Etenim cum fidei alta pectoribus non capiuntur infirmis, per ea quæ præcepta sunt, ea quæ veneranda sunt, æstimantur: ut iusta de iusto, sancta de sancto, bonorum suorum bonum testentur auctorem.

*R. Corona. 105.*

*Lectio viii.*

**E**rgo Dominum illum, qui simul divinitatis reverentiam, & pietatis gratiam sua lege complexus est, dicens: Diliges Dominum Deum tuum; diliges proximum tuum, ita nunc mutatum esse opinabimur: ut abolere necessitudinum nomina, collidere pietatis affectus, charissimorum pignorum dissidia mandasse credamus? Et quomodo ipse est pax nostra, qui fecit utraque unum? Quomodo ipse dicit: Pacem meam do vobis, pacem meam relinquo vobis; si parentes à filiis, filios à parentibus dissidio necessitudinis separaturus advenit? Quomodo maledictus, qui non honorat patrem; religiosus, qui deserit?

*R. Hic est. 105.*

*Lectio ix.*

**S**ed si advertamus: quia prima causa religionis, secunda pietatis est, enodandam etiam hanc æstimabimus quæstionem.

Oportet enim, ut divinis humana posthabeas. Nam si officium parentibus exhibendū est: quanto magis auctori parentum, cui gratiam etiam pro parentibus tuis debes? Aut, si illi omnino non recognoscunt parentem, quemadmodum tu recognoscas? Non igitur dicit, renuntiandum esse pignoribus, sed Deum omnibus præferendum. Non diligere parentes, sed Deo præferre prohiberis: etenim naturæ pignora, Domini beneficia sunt.

*Te Deum laudamus.*

**INFRA OCTAVAM  
UNIUS MART. NON PONT.**

*Homilia in Evangel. Matth. cap. 10. Nihil est opertum, &c.*

**IN DIE FESTO.**

*In tertio Nocturno.*

*Lectio sancti Evangelii secundum Matthæum.*

*Lectio vii. Cap. 14.*

**I**n illo tempore: Dixit Jesus discipulis suis: Nihil est opertum, quod non revelabitur: & occultum, quod non scietur. Et reliqua.

*Homilia sancti Hilarii Episcopi.*

*Comment. in Matth. c. 10. post med.*

**D**ominus diem iudicii ostendit, quæ abstrusam voluntatis nostræ conscientiam prodet: & ea quæ nunc occulta existimantur, luce cognitionis publicæ detegit. Igitur non minas, non consilia, non potestates insectantium monet esse metuendas: quia dies iudicii nulla hæc fuisse atque inania revelabit. Et quod dico vobis in tenebris, dicite in lumine: & quod in aure auditis, prædicate super tecta, Non legimus, Dominum

minum solitum fuisse noctibus sermocinari, & doctrinam in tenebris tradidisse: sed quia omnis sermo ejus carnalibus tenebrae sunt, & verbum ejus infidelibus nox est.

*R. Corona. 105. Lectio viii.*

**I**taque id quod à se dictum est, cum libertate fidei & confessionis vult esse loquendum. Idcirco quae in tenebris dicta sunt, praedicari jussit in lumine: ut quae secreto aurium commissa sunt, super tecta, id est, excelsio loquentium praekonio audiantur. Constantem enim Dei ingerenda cognitio est, & profundum doctrinae Evangelicae secretum in lumine praedicationis Apostolicae revelandum: non timentes eos, quibus cum sit licentia in corpora, tamen in animam jus nullum est: sed timentes potius Deum, cui perdendae in gehenna & animae & corporis sit potestas.

*R. Hic est. 105. Lectio ix.*

**N**olite timere eos, qui occidunt corpus. Nullus igitur corporum nostrorum casus est pertimescendus, neque ullus interimentae carnis admittendus est dolor: quando pro naturae suae atque originis conditione resoluta, in substantiam spiritualis animae refundatur. Et quia doctrinis talibus confirmatos oportet liberam confitendi Dei habere constantiam; etiam conditionem, qua teneremur, adjecit: negaturum se eum Patri in caelis, qui se

hominibus in terra negasset: eum porro qui confessus coram hominibus se fuisset, à se in caelis confitendum: qualesque nos nominis sui testes hominibus fuifsemus, tali nos apud Deum Patrem testimonio ejus usuros.

*Te Deum laudamus.*

## SECUNDA DIE.

*In tertio Nocturno.*

*Lectio S. Evangelii secundum Matthaeum.*

*Lectio vii. Cap. 10.*

**I**n illo tempore: Dixit Jesus discipulis suis: Nihil est opertum, quod non revelabitur: & occultum, quod non sciatur. Et reliqua.

*Homilia S. Hieronymi Presbyteri.*

*Ex Comm. in Matth. cap. 10. lib. 1.*

**E**t quomodo in praesenti saeculo multorum vitia nesciuntur? Sed de futuro saeculo scribitur: Quando judicabit Deus abscondita hominum, & illuminabit latebras tenebrarum, & manifestabit consilia cordium. Et est sensus: Nolite timere persecutorum saevitiam, & blasphemantium rabiem; quia veniet dies judicii, in quo vestra virtus, & eorum nequitia demonstrabitur. Quod dico vobis in tenebris, dicite in lumine; & quod in aure auditis, praedicate super tecta. Quod auditis in mysterio, apertius praedicate: quod discitis absconditè, publicè loquimini: quod vos erudivi in parvulo Judaeae loco, in universis urbibus, & in toto mundo audacter dicite.

*R. Corona. 105. Lectio viii.*

*Eum*



**E**Um timete, qui potest animam & corpus perdere in gehennam. Nomen gehenna in veteribus libris non invenitur, sed primum à Salvatore ponitur. Quæramus ergo, quæ sit sermonis hujus occasio. Idolum Baal juxta Jerusale, ad radicem montis Moria, in quibus Siloe fluit, non semel legimus. Hæc vallis, & parva campi planities irrigua erat, & nemorosa, plenaque deliciis, lucusque in ea idolo consecratus erat. In tantam autem dementiam populus venerat, ut deserta templi vicinia, ibi hostias immolaret, & rigorem religionis deliciae vincerent, filiosque suos dæmoniis incenderent, vel initiarent: & appellabatur locus iste Gehennon, idest, Vallis filii Hennon. *R.* Hic est. 105.

*Lesio ix.*

**F**utura ergo supplicia, & pœnæ perpetuæ, quibus peccatores cruciandi sunt, hujus loci vocabulo denotantur. Duplicem autem esse gehennam, nimii ignis & frigoris, in Job plenissime legimus. Quod autem ait: Vestri autem capilli capitis omnes numerati sunt; derident intelligentiam Ecclesiasticam in hoc loco, qui carnis resurrectionem negant; quasi & nos capillos, qui numerati sunt, & à tonsore decisi, omnes dicamus resurgere: cum Salvator non dixerit, Vestri autem capilli capitis omnes salvandi sunt, sed, numerati sunt. Ubi

numerus, & scientia numeri demonstratur, non ejusdem numeri conservatio. *Te Deum.*

## TERTIA DIE.

*In tertio Nocturno.*  
Lesio S. Evangelii secundum Matthæum.

*Lesio vii. Cap. ix.*

**I**n illo tempore: Dixit Jesus discipulis suis: Nihil est opertum, quod non revelabitur: & occultum, quod non sciatur Et reliqua.

*Homilia sancti Petri Chrysologi. Ser. 101.*

**V**obis autem dico amicis meis; ne terreamini: quia libertatem probat virtus, metus indicat servitutem: nam liber ad gloriam, servus natus est ad timorem. Merito ergo ad Dei amicitias sublimatur qui propter Deum humanas despicit mortes, nescit timores. Si amicos morum facit imitatio, morum similitudo conjungit; convenienter eos amicos vocat Christus, quos imitatione sua mundi jacula, & ipsam mortis formidinem conspicit, & prævidet calcaturos.

*R. Corona. 105. Lesio viii.*

**V**obis autem dico, id est, non omnibus, sed amicis. Vobis autem dico, quos mors absolvit ista, non finit. Vobis dico, quos corporis resolutio promovet ad melius; non transducit ad pœnam. Vobis dico, quibus morte vita inchoatur, non finitur. Vobis dico, quorum mors pretiosa fit, non sui qualitate, sed causâ, dum vitæ magis lucra invenit, quam vitæ perdat usuram. Sed audiamus quid dicat amicis suis;

Ne

Infra Octavam unius Mart. non Pontif. in iii. Nocturno. 131

Ne terreamini ab his qui occidunt corpus.

*R.* Hic est. 105. *Lectio ix.*

**A**udiant qui de bono mortis veterum vetusta volumina detriverunt, nihil tamen inde capere virtutis, aut consolationis aliquid invenire valuerunt. Quis homini, quis sapienti dicat: Mori naturæ est, necesse est deperire? Nobis vixerunt veteres, vivimus nos futuris, nemo sibi. Quod non potest tolli, velle, virtutis est. Suscipe voluntarius, ad quod urgeris invitus. Mors antequam veniat, non est; cum autem venerit, venisse nescitur. Nec ergo amisisse te doleas; quod cum amiseris, non dolebis. *Te Deum.*

#### QUARTA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 10.*

**I**n illo tempore: Dixit Jesus discipulis suis: Nihil est opertum, quod non revelabitur: & occultum, quod non sciatur. Et reliqua.

*Homilia sancti Augustini Episcopi.*

*Serm. 13. de Verb. Apost. circa med.*

**C**um dicis mihi, Gehennam timeo, ardere timeo, in æternum puniri timeo; quid dicturus sum? Malè times? vanè times? Non audeo, quandoquidem ipse Dominus ablato timore subiecit timorem: & ait, ubi dixit: Nolite timere eos qui corpus occidunt, & postea non habent quid faciant: sed eum timete, qui habet potestatem & corpus & animam mittere in gehennam ignis: ita

dico vobis, hunc timete. Cum ergo Dominus timorem incusserit, & vehementer incusserit, & repetendo verbum, comminationem ingeminaverit, dicturus ego sum, Malè times? Ista non dicam. Planè time, nihil melius times: nihil est quod magis timere debeas. *R.* Corona. 105. *Lectio viii.*

**S**ed interrogo te, Si non te videret Deus quando facis, nec quisquam te convinceret in iudicio illius, faceres? Tu te vide: non enim potes ad verba omnia mea respondere, inspicere te ipsum. Faceres? Si faceres, ergo poenam times, castitatem nondum amas, charitatem nondum habes; serviliter times; formido est mali, nondum dilectio boni. Sed time tamen ut ista formido custodiat te, ut perducatur ad dilectionem. Timor enim iste, quo gehennam times, & ideò mala non facis, continet te; & sic volentem peccare animum interiore non finit. Est quidam custos timor, quasi pædagogus legis: littera est minans, nondum gratia juvans.

*R.* Hic est. 105. *Lectio ix.*

**C**ustodiat tamen te timor iste, dum non facis timendo, & veniat charitas, intret in cor tuum; & quantum illa intrat, tantum timor exit. Timor enim id agebat ne faceres; charitas hoc agit, ut nolis facere, etiam si impunè possis admittere. Dixi quid timeatis, dixi quid appetatis. Secutimini charitatem, intret charitas,



112 *Infra Octavam unius Mart. non Pontif. in ili. Nocturno.*

tas, admittite illam timendo peccare, admittite amorem non peccantem, admittite amorem benè viventem. Habet secum suum timorem, quem introducit ipsa charitas: sed illum castum, permanentem in sæculum sæculi.

**Te** Deum laudamus.

### QUINTA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 10.*

**I**N illo tempore: Dixit Jesus discipulis suis: Nihil est opertum, quod non revelabitur: & occultum, quod non sciatur. Et reliqua.

*Homilia sancti Joannis Chrysostomi.*

*Homil. 35. in Matth. circa med.*

**V**ides, quod non promittit ipsis huius vitæ perpetuitatem, mori autem promittit, ut majora sublimioraque conferat, quàm si numquam morti traderentur. Et certè multò melius est mortem omnino despicere, quàm eam effugere. Quocircà non in periculum mortis, cùm nati essent homines, ipsos introducit, sed terrore moriendi morte superiores facit. Ita brevi oratione duobus vel tribus verbis absoluta, salutarem de immortalitate opinionem in animis eorum fixit atque locavit.

**R.** Corona. 105. *Lectio viii.*

**P**osteà ne putarentur quasi se derelictos ab eo, ad cædem & violentum perventuros interitum, de providentia Dei disputat, dicens: Nonne duo passeressæ venduntur, & unus ex ipsis

non cadit in laqueum sine Patre vestro, qui est in cœlis? Vestri autem & capilli capitis omnes numerati sunt. Quid enim vilius passeribus? ait, sed tamen numquam ignorante Deo capiuntur. Non enim cooperante Deo incidere in laqueum passeressæ ait, quod divinæ majestati indignum est; sed non esse clàm Deo etiam vilissimarum avium causam, ostendit. Quod si nihil penitus Deus ignorat, at vos paternam charitate prosequitur, & ita amat, ut pilos capitis quoque vestri non negligat, quid timendum vobis est? **R.** Hic est. 105.

*Lectio ix.*

**H**oc autem dicebat, non quod Deus capillos numeret, sed quia perfectam cognitionem rerum omnium, & summam de omnibus Dei providentiam ostendere voluit. Si ergo cuncta novit quæ fiunt, si vult, potest simul servare vos: nolite, cùm tribulationes vobis acciderint, derelictos vos esse à Deo existimare: non enim ab incommodis corporis liberare vos vult, sed ad eam perfectionem adducere studet, ut incommoda corporis contemnatis. **Te** Deum.

### SEXTA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 10.*

**I**N illo tempore: Dixit Jesus discipulis suis: Nihil est opertum, quod non revelabitur: & occultum, quod non sciatur. Et reliqua

Ho-

Homilia sancti Augustini Episcopi.

Secm. 13. de Martyribus.

**A**dmonent nos eloquia divina, quæ lecta sunt, timendo non timere, & non timendo timere. Ait enim: Nolite timere eos, qui corpus occidunt, animam autem non possunt occidere. Ecce ubi monuit ne timeremus, videte ubi monuerit ut timeremus. Sed eum, inquit, time, qui potestatem habet corpus & animam occidere in gehenna. Ergo timeamus, ut non timeamus. Timor videtur ad ignaviam pertinere, timor infirmorum videtur esse, non fortium. Sed videte, quid ait Scriptura: Timor Domini, spes fortitudinis. Timeamus ne timeamus: hoc est, prudenter timeamus, ne inaniter timeamus. **R.** Corona. 105

Paulo post. Lectio viii.

**D**icat ergo fortissimus martyr, stans homo ante hominem: Non timeo, quia timeo. Tu quod minaris, si ille nolit, non facis: quod autem ille minatur, ut faciat, à nullo impeditur. Deinde, tu quod minaris, etsi permitteris, quid facis? usq; ad carnem sævis, anima tuta est: non occides quod non vides: visibilis visibilem terres. Habemus ambo invisibilem creatorem, quem simul timere debeamus, qui hominem ipsum ex visibili & invisibili creavit: visibilem de terra fecit, invisibilem flatu suo animavit. Potes ferire habitaculum, numquid habitatorem? Fugit

Octav. Rom.

perculo vinculo colligatus, & erit in occulto coronatus.

**R.** Hic est. 105. **Lectio ix.**

**Q**uid ergo minaris, qui animæ nihil facere potes? Per meritum ejus, cui facere nihil potes, resurget, cui facere aliquid potes. Per meritum enim animæ resurget & caro: & habitatori reddetur, jam non ruitura, sed mansura. Ecce verba martyris dico: Ecce propter ipsam carnem meam timeo comminantem. Caro mea subjacet potestati, sed etiam capilli capitis mei numerati sunt creatori. Quid timeo ne carnem perdam, qui nec capillum perdo? quomodo non attendit carnem meam, cui sic nota sunt vilia mea? **Te Deum.**

### SEPTIMA DIE.

In tertio Nocturno.

Lectio S. Evangelii secundum Mattheum.

Lectio vii. Cap. 10.

**I**n illo tempore: Dixit Jesus discipulis suis: Nihil est opertum, quod non revelabitur: & occultum, quod non sciatur. Et reliqua.

De Homilia sancti Augustini Episcopi.

Unde supra, circa finem.

**C**itote, certumq; tenete, corpus mortuum esse sine anima, animam mortuam esse sine Deo. Omnis homo sine Deo mortuam habet animam. Plangis mortuum: magis plange impium, plange infidelem. Scriptum est: Luctus mortui, septem dies; fatui autem & impii, omnes dies vitæ illorum. An verò non in te sunt viscera Christianæ misere-

M

ratio-



**174** *Intra Octavam unius Mart. non Pontif. in iii. Nocturno.*

rationis, ut plangas corpus, à quo discessit anima; & non plangas animam, à qua recessit Deus?

**R.** Corona. 105. *Lectio viii.*

**H**oc tenens martyr respondeat comminatori: Quid me cogis ut negem Christum? si noluerò, quid facis? Percutis corpus meum, ut recedat inde anima mea: sed ipsa anima mea ad se habet corpus. Non est imprudens, non est insipiens. Tu vis ferire corpus meum: vis ut, cum timeo ne ferias corpus meum, & recedat inde anima mea: ego feriam animam meam, & recedat inde Deus meus? Inde ergo Dominus, Qui habet potestatem & corpus & animam occidere in gehenna ignis. Quomodo? quando mittetur in gehennam impius, ardebit? Ibi corpus, ibi anima: mors corporis, sempiterna poena: mors animæ, Dei absentia.

**R.** Hic est. 105. *Lectio ix.*

**V**is nosse quæ sit mors animæ? intellige Prophetam dicentem: Tollatur impius, ut non videat claritatem Domini. Timeat ergo anima mortem suam, & non timeat mortem corporis sui: quia si timuerit mortem suam, & vixerit in Deo suo, non eum offendendo, & à se repellendo; merebitur in fine recipere corpus suum, non ad poenam æternam sicut impii, sed ad vitam æternam sicut iusti. Illam mortem timeantes, & illam vitam martyres diligentes, promissa Dei expectan-

tes; minas persecutorum contemnentes, & ipsi apud Deum coronari meruerunt, & nobis celebranda solemnia reliquerunt. Te Deum laudamus.

## IN DIE OCTAVA.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 10.*

**I**n illo tempore: Dixit Jesus discipulis suis: Nihil est opertum, quod non revelabitur: & occultum, quod non sciatur. Et reliqua.

*Homilia sancti Ambrosii Episcopi.*

*Lib. 7. in Lucam, cap. 12.*

**S**i tanta est Dei etiam æterna majestas, ut unus ex passeribus, aut nostrorum numerus capillorum præter scientiam Dei non sit; quàm indignum est æstimare, quòd fidelium corda Dominus aut ignoret, aut spernat, qui viliora cognoscat? Fortasse dicat aliquis, Quomodo Apostolus dixit: Numquid de bobus cura est Deo: cum utique bos pretiosior sit? Sed aliud est cura, aliud scientia. Denique numerus capillorum non in actu computationis, sed in facilitate cognitionis accipitur.

**R.** Corona. 105. *Lectio viii.*

**N**on enim sollicitam Deus curæ numerantis intendit excubiam, sed, cui cognita sunt omnia, quasi numerata sunt omnia. Bene tamen numerari dicuntur, quia illa, quæ volumus servare, numeramus. Possumus tamen hic discutere aliquod intelligentiæ spiritualis arcanum, præsertim cum

hoc

Homilia sancti Augustini Episcopi.  
Tract. 51. in Joann. sub med.

hoc videatur absurdum, ut homines non potius hominibus, quam passeribus comparentur. Unde benè Matthæus duos passeres posuit, corpus animamque significans, quoniam caro quoque si consentiens Dei legi, & exuens se lege peccati, in naturam animæ sensuum puritate transierit, alis ad cælum spiritalibus elevatur.

**R.** Hic est. 105. **Lectio ix.**

**J**Am illud non est dubium, animæ passerem comparari, cum legeris: Anima nostra sicut passer erepta est de laqueo venantium. Et alibi: Quomodo dicitis animæ meæ, Transmigre in montem sicut passer? In summa igitur hic sensus est: Si Dominus vilibus avibus, & infidelibus hominibus, vel in oriundo sole, vel in terrena sæcunditate prospexit, si misericordiæ suæ omnibus munus impertit, haud esse dubitandum, contemplationem apud illum fidelium valituram esse meritõrum. Te Deum laudamus.

**INFRA OCTAVAM  
UNIUS MARTYRIS  
non Pontificis.**

Homilia in Evangel. Joann. cap. 12. Nihil granum frumenti, &c.

**IN DIE FESTO.**

In tertio Nocturno.

Lectio sancti Evangelii secundum Joannem.

Lectio vii. Cap. 12.

**I**N illo tempore: Dixit Jesus discipulis suis: Amen, amen, dico vobis, nisi granum frumenti cadens in terram mortuum fuerit, ipsum solum manet. Et reliqua.

**I**psè Dominus Jesus erat granum mortificandum, & multiplicandum: mortificandum infidelitate Judæorum, multiplicandum fide populorum. Jam verò exhortans ad passionis suæ sectanda vestigia, Qui amat, inquit, animam suam, perdet eam. Quod duobus modis intelligi potest: Qui amat, perdet: idest, si amas, perdes. Si cupis vitam tenere in Christo, noli mortem timere pro Christo, Item alio modo: Qui amat animam suā, perdet eam: noli amare, ne perdas: noli amare in hac vita, ne perdas in æterna vita.

**R.** Corona. 105. **Lectio viii.**

**H**oc autem, quod posterius dixi, magis habere videtur Evangelicus sensus. Sequitur enim: Et qui odit animam suam in hoc mundo, in vitam æternam custodit eam. Ergo, quod suprā dictum est, qui amat (subintelligitur, in hoc mundo) ipse utique perdet: qui autem odit (utique in hoc mundo) in vitam æternam ipse custodit eam. Magna & mira sententia, quemadmodum sit hominis in animam suam amor ut pereat, odium ne pereat. Si malè amaveris, tunc odisti: si benè oderis, tunc amasti. Felices, qui oderunt custodiendo, ne perdant amando.

**R.** Hic est. 105. **Lectio ix.**

**S**ed vide ne tibi subrepat, ut te ipsum velis interimere, sic intelligendo, quòd debes odisse in



136 *Infra Octavam unius Mart. non Pontif. in ili. Nocturno.*  
hoc mundo animam tuam. Hinc enim quidam maligni atque perversi homines, & in seipsis crudeliores & sceleratiores homicidæ, flammis se donant, aquis se præfocant, præcipitio se collidunt, & pereunt. Hoc Christus non docuit: imò etiam diabolo præcipitium suggerenti respondit: Redi retrò satanas; scriptum est: Non tentabis Dominum Deum tuum. Petro autem dixit, significans qua morte clarificaturus erat Deum: Cum esses junior, cingebas te, & ambulabas quò volebas, cum autem senueris, alter te cinget, & feret quò tu non vis. Ubi satis expressit, non à seipso, sed ab alio debere occidi, qui vestigia sequitur Christi. **T**e Deum laudam⁹.

## SECUNDA DIE.

*In tertio Nocturno.*

*Lectio sancti Evangelii secundum Joannem.*

*Lectio vii. Cap. 12.*

**I**n illo tempore: Dixit Jesus discipulis suis: Amen, amen dico vobis, nisi granum frumenti cadens in terram mortuum fuerit, ipsum solum manet. Et reliqua.

*De Homilia S. Augustini Episc. Unde supra.*

**C**um ergo causæ articulus venerit, ut hæc condicio proponatur, aut faciendum esse contra Dei præceptum, aut ex hac vita emigrandum; quorum duorū homo si cogatur alterum eligere, comminante mortem persecutore, ibi eligat Deo dilecto emori, quàm offenso vivere. Ibi oderit in hoc mundo animam suam, ut in vitam æternam custodiat eam.

Si quis mihi ministrat, me sequatur. Quid est, Me sequatur, nisi, Me imitetur? Christus enim pro nobis passus est, ait Apostolus Petrus, relinquens nobis exemplum, ut sequamur vestigia ejus.

*R. Corona. 105. Lectio viii.*

**E**cce quod dictum est: Si quis mihi ministrat, me sequatur. Quo fructu? qua mercede? quo præmio? Et ubi sum, inquit, ego, illic & minister meus erit. Gratis ametur, ut operis, quo ministratur illi, pretium sit, esse cum illo. Ubi enim benè erit sine illo, aut quando esse malè poterit cum illo? Audi evidentius: Si quis mihi ministraverit, honorificabit eum Pater meus. Quo honore, nisi ut sit cum Filio ejus? Quod enim superius ait: Ubi ego sum, illic & minister meus erit: hoc intelligitur exposuisse, cum dicit: Honorificabit eum Pater meus. Nam quem majorem honorem accipere poterit adoptatus, quàm, ut sit ubi est unicus, non æqualis factus divinitati, sed consociatus æternitati. *R. Hic est. 105. Lectio ix.*

**Q**uid sit autem ministrare Christo, cui operi merces tanta proponitur, hoc potius debemus inquirere. Si enim hoc putaverimus esse Christo ministrare, ea quæ sunt corpori necessaria præparare, aut cœnanti cibum coquere, vel apponere, vel poculum dare, potumque miscere: fecerunt hoc illi, qui potuerunt eum in corpore habere præsentem,

tem, sicut Martha & Maria, quando & Lazarus unus erat ex discumbentibus. Sed eo modo Christo etiam Judas perditus ministravit. Nam & loculos ipse habebat: & quamvis ex eis, quæ mittebantur, sceleratissime furaretur, per illum tamen etiam necessaria parabantur. **Te Deum.**

### TERTIA DIE.

In tertio Nocturno.

Lectio S. Evangelii secundum Joannem.

Lectio vii. Cap. 12.

**I**N illo tempore: Dixit Jesus discipulis suis: Amen, amen dico vobis, nisi granum frumenti cadens in terram mortuum fuerit, ipsum solum manet. Et reliqua.

De Homilia S. Augustini Episcopi.

Unde supra.

**N**ullo modo igitur de huiusmodi ministris diceret Dominus: Ubi sum ego, illic & minister meus erit: & Si quis mihi ministraverit, honorificabit eum Pater meus: quoniam Judam talia ministrantem, reprobatum potius, quam honoratum videmus. Ut quid ergo alibi querimus, quid sit ministrare Christo, & non potius in istis ipsis verbis agnoscimus? Cum enim dixit: Si quis mihi ministrat, me sequatur: hoc intelligi voluit, ac si diceret: Si quis me non sequitur, non mihi ministrat. Ministrant ergo Jesu Christo, qui non sua querunt, sed quæ Jesu Christi.

**R.** Corona. 105. **Lectio viii.**

**M**inister est Christus usque ad illud opus magnæ charita-

tis, quod est animam suam pro fratribus ponere: hoc est enim & pro Christo ponere: quia & hoc propter sua membra dicturus est: Cum pro istis fecistis, pro me fecistis. De tali quippe opere etiam se ministrum facere & appellare dignatus est, ubi ait: Sicut Filius hominis non venit ministrari, sed ministrare, & animam suam ponere pro multis. Hinc est ergo unusquisque minister Christi, unde est minister & Christus. Sic ministrantem Christo honorificabit Pater ejus honore illo magno, ut sit cum Filio ejus, nec umquam deficiat felicitas ejus.

**R.** Hic est. 105.

**Lectio ix.**

**C**um ergo auditis fratres, Dominum dicentem: Ubi ego sum, illic & minister meus erit; nolite tantummodo bonos Episcopos & clericos cogitare: etiam vos pro modulo vestro ministrare Christo, bene vivendo, elemosynas faciendo, nomen doctrinamque ejus, quibus potueritis, prædicando: ut unusquisque etiam paterfamilias hoc nomine agnoscat paternum affectum suæ familiæ se debere. Pro Christo & pro vita æterna suos omnes admoneat, doceat, hortetur, corripiat, impendat benevolentiam, exerceat disciplinam: ita in domino sua ecclesiasticum & quodammodo Episcopale implebit officium, ministrans Christo, ut in æternum sit cum ipso.

**Te Deum** laudamus,



## QUARTA DIE.

*In tertio Nocturno.*

Lectio S. Evangelij secundum Joannem.

*Lectio vii. Cap. 12.*

**I**N illo tempore: Dixit Jesus discipulis suis: Amen, amen dico vobis, nisi granum frumenti cadens in terram, mortuum fuerit, ipsum solum manet. Et reliqua.

*Homilia sancti Joannis Chrysostomi.**Homil. 65. in Joann. p. 1. med.*

**T**Alem, de resurrectione discipulans, rationem Paulus etiam attulit. Quam igitur habebunt excusationem, qui resurrectionem non credunt, cum in feminibus & in plantis quotidie hoc videamus, ac etiam in nostro genere? Primum enim corrumpi semen oportet, inde fieri generationem. Omnino autem, cum Deus aliquid facit, nulla opus est ratione. Quomodo nos ex nihilo fecit? Hoc ad Christianos dico, qui se dicunt credere Scripturis. *R. Corona. 105.*

*Lectio viii.*

**E**Go autem & aliud dicam ex humanis rationibus: Alii malitiam, alii virtutem sectantur: sed malitiæ sectatorum multi feliciter in ultimam pervenerunt senectutem; virtutis autem contrā. Quomodo ergo pro meritis unusquisque accipiet? quando? Certē, inquit: sed corpora non resurgent. Nonne audiunt Paulum dicentem: Oportet autem corruptibile hoc induere incorruptionē? Neque animam intelligit, quippe quæ non corrumpitur: & resurrectio de mor-

tuo dicitur: Cecidit autem corpus. *R. Hic est. 105. Lectio ix.*

**Q**Uare corporis resurrectio nem negas? An non possibile Deo est? quod dicere summæ amentię est. An non decet? quāobrem? ut corruptibile, quod & laboris est & mortis particeps, in præmiis communicet. Si non decesset, neque à principio factum esset. Nonne carnem ipse accepit? Quod acceperit, & ipsam suscitaverit, audi quid dicat: Infer digitum tuum huc, & vide, quia spiritus ossa & nervos non habet. Quare Lazarum suscitavit, si melius fuisset sine corpore suscitare? Nolite, dilectissimi, ab hæreticis decipi: est enim resurrectio, est iudicium. Hæc tollunt, quicumque nolunt operum suorum rationem reddere. *Te Deum.*

## QUINTA DIE.

*In tertio Nocturno.*

Lectio S. Evangelij secundum Joannem.

*Lectio vii. Cap. 12.*

**I**N illo tempore: Dixit Jesus discipulis suis: Amen, amen dico vobis, nisi granum frumenti cadens in terram, mortuum fuerit, ipsum solum manet. Et reliqua.

*Homilia sancti Joannis Chrysostomi.**Homilia 66. in Joannem.*

**D**Ulcis præsens vita est, & multæ plena voluptatis, non tamen omnibus, sed iis tantum qui illi sunt affixi. Quod si quis in cælum suspexerit, & quæ ibi præclara sunt, contemplatus fuerit, statim hanc contemnet, ac nullius pretii existimabit. Nam

&amp;

& corporum pulchritudo, quoad pulchrius non deprehenditur, in admiratione habetur: cum verò aliud præstantius apparuerit, illa prior despicitur. Quòd si illam pulchritudinem etiam nos intueri voluerimus, & cœlestis regni speciem considerare, confestim nos hujus sæculi vinculis dissolvemur. *R.* Corona. 105.

*Lectio viii.*

**V** Inculum namque est terrenarum rerum affectio: ad cuius dissolutionem ut nos induceret Christus, quid dicat, attende: Qui amat animam suam, perdet eam: & qui odit animam suam in hoc mundo, in vitam æternam custodit eam. Ænigmati simile hoc dictum videtur: non tamen ita est, imò verò præcipuæ sapientiæ plenum. Et quomodo, qui amat animam suam, perdet eam? Qui absurdis ejus cupiditatibus obtemperat, qui præter debitum ei indulget: quemadmodum è contrario, qui odit eam in hoc mundo, custodit eam; hoc est, qui non paret ei, cum noxia jubet.

*R.* Hic est. 105.

*Lectio ix.*

**E**T non dixit, qui non paret, sed qui odit. Sicuti enim, quos odio habemus, ne vocem quidem audire, nec vultum eorum videre æquo animo patimur: ita & animæ, si quid præter Dei voluntatem nobis imperat, vehementer aversari oportet. Cum enim jam de morte ad eos verba facturus esset, de morte videlicet sua,

& prævideret eorum tristitiam, & exanimationem, per excessum locutus est, inquit: Quid dico, si mortem meam generosè non feretis? nisi vos ipsi moriamini, nullum vos sequetur emolumentum. *Te Deum laudamus.*

**S E X T A D I E.**

*In tertio Nocturno.*

*Lectio S. Evangelii secundum Joannem.*

*Lectio vii. Cap. 12.*

**I**N illo tempore: Dixit Jesus discipulis suis: Amen, amen dico vobis, nisi granum frumenti cadens in terram, mortuum fuerit, ipsum solum manet. Et reliqua. De Homilia S. Joannis Chrysost. *Unde supra:*

**E**T vide, quomodo lenit sermonem suum: gravius enim & molestius videbatur dicere homini animam amanti, esse moriendum. Et quid antiquitus dico, quando & nunc multos invenimus libenter omnia tolerantes, ut hac vita fruantur, & maxime qui futuram credunt: qui cum vident ædificia, molesque & machinas, lacrymantur, dicentes: Quot homo, & quanta molitur? & fit pulvis. Sic magna præsentis vitæ cupiditas.

*R.* Corona. 105.

*Lectio viii.*

**H**æc vincula Christus dissolvens, inquit: Qui odit animam suam in hoc mundo, in vitam æternam custodit eam. Quod enim ad eorum tollendum metum hæc diceret, audi quæ sequuntur: Qui mihi ministrat, me sequatur. De morte locutus, & operum sequelam atque imitationem exigit:



git: oportet enim omnino ministrum, eum cui ministrat, sequi.

*R. Hic est. 105. Lectio ix.*

**E**T considera, quando hæc loquitur, non cum persecutionem patiebantur, sed cum confidebant, cum se in tuto esse arbitrabantur, quod à multis honorarentur colerenturq;: quando & consurgere poterant, & audire: Et tollat crucem suam, & sequatur me: hoc est, semper paratus sis, inquit, ad pericula, ad mortem, ad terrena exilia. Inde cum gravia dixisset, præmium ponit, quod qui sequetur ipsum, erit ubi ipse est. Quibus verbis ostendit resurrectionē post mortem. Ubi ego sum, inquit, illic & minister meus. *Te Deum.*

### SEPTIMA DIE.

*In tertio Nocturno.*

*Lectio S. Evangelii secundum Joannem.*

*Lectio vii. Cap. x.*

**I**N illo tempore: Dixit Jesus discipulis suis: Amen, amen dico vobis, nisi granum frumenti cadens in terram, mortuum fuerit, ipsum solum manet. Et reliqua.

*Homilia sancti Augustini Episcopi.*

*Serm. 37. lib. 50. Homil.*

**M**Odò, fratres charissimi, cum divina lectio legeretur, audivimus Dominū dicentem: Qui amat animam suam, perdet illam. Huic sententiæ quasi contrarium videtur esse, quod ait Apostolus, Nemo umquam carnem suam odio habuit. Si ergo nemo est qui carnem suam oderit, quantò magis nemo est qui

oderit animam suam? multum quippe anima carni præponitur, quia ipsa est habitatrix, caro habitaculum. Et anima dominatur, caro autem servit: anima superior est, caro subiecta.

*R. Corona 105.*

*Lectio viii.*

**S**I ergo nemo umquam carnem suam odio habuit, quis est, qui animam suam oderit? Propter hoc non parvam quæstionem nobis intulit præsens Evangelica lectio, ubi audivimus: Qui amat animam suam, perdet illam. Sunt ergo qui perversè animam suam amant, & hoc vult Dei sermo corrigere, non ut oderint animam suam, sed ut rectè diligant. Malè enim diligendo perdunt eam, & fit quiddam magnum quasi præposterum & contrarium, sed ita tamen fit, ut, si diligas eam perversè, perdas illam; si oderis illam rectè, conserves illam. Est ergo quidam perversus amor ejus, & quoddam rectum odium ejus: sed amor perversus ab odio, odium rectum ab amore est.

*R. Hic est. 105.*

*Lectio ix.*

**Q**uis igitur modus diligendæ animam? Putatis martyres non amare animas suas? Videtis certè modò, si cuius vita præsentis sæculi periclitetur, quomodo amici ejus currunt pro ea, quomodo curritur ad Ecclesiam: rogatur Episcopus ut intermittat, si quas habet, actiones, currat, festinet. Quare? Pro anima. Et omnes

omnes contremiscunt, omnibus cæteris rebus intermissis, festinandum esse decernunt. Omnis festinatio laudatur, omnis tardatio accusatur. Quare? Pro anima. Quid est pro anima? Ne moriatur homo. Non noverant Martyres amare animas suas, & tamen hoc est pro anima ne moriatur homo. Mors hominis iniquitas est: si curris pro hac vita centum millia, quot millia debes currere pro vita æterna?

**T**e Deum laudamus.

### IN DIE OCTAVA.

*In tertio Nocturno.*

Lectio S. Evangelii secundum Joannem.

*Lectio vii. Cap. 12.*

**I**n illo tempore: Dixit Jesus discipulis suis: Amen, amen dico vobis, nisi granum frumenti cadens in terram, mortuum fuerit, ipsum solum manet. Et reliqua.

De Homilia sancti Augustini Episcopi.

*Unde supra.*

**D**iscamus ergo, fratres, amare animas nostras. Omnis voluptas sæculi transitoria est. Est amor utilis, est amor noxius: amor amore impeditur: amor noxius recedat, & amor utilis succedat. Sed quia homines nolunt illinc recedere, ideò in illos non potest aliud introire. Ut non capiant, pleni sunt: fundant, ut capiant. Vis ut intret mel, unde acetum nondum fudisti? funde quod habes, ut capias quod non habes. Ideò prima renuntiatio est huic sæculo, & deinde conversio ad Deum. Qui renuntiat,

fundit; qui convertitur, impletur: sed si non fiat corpore solo, sed & corde. **R.** Corona. 105.

*Lectio viii.*

**Q**uæritur autem, quomodo crescat iste amor: habet enim initia sua, habet augmenta sua, habet perfectionem suam. Primò illud attendat charitas vestra, amores omnes & dilectiones prius sunt in hominibus de se, & sic de alia re quam diligunt. Si diligis aurum, prius te diligis, & sic aurum; quia si tu mortuus fueris, nullus erit qui aurum possideat. Ergo dilectio unicuique à se incipit, & non potest nisi à se incipere, & nemo monetur ut se diligat. Primum ergo dilige Deum, deinde teipsum; post hæc dilige proximum tuum sicut teipsum. Prius tamen discere amare teipsum, sic, dilige proximum tuum sicut teipsum: nam si teipsum non nosti amare, quomodo proximum poteris in veritate diligere? **R.** Hic est. 105.

*Lectio ix.*

**S**i ergo vis veræ charitatis ordinem custodire, fac iustitiam, dilige misericordiam, fuge luxuriam, incipe, secundum præceptum Domini, non solum amicos, sed etiam inimicos diligere. Et hæc cum fideliter custodire toto corde contenderis, istis virtutibus quasi quibusdam gradibus poteris ascendere, ut merearis Deum toto animo, & tota virtute diligere. Et cum ad istam felicem



licem perfectionem veneris, omnes concupiscentias istius mundi tamquam stercora computabis. Et cum Propheta poteris dicere: Mihi autem adhærere Deo bonum est. **Te** Deum laudam?

## INFRA OCTAVAM MARTYRUM

tempore Paschali.

### SECUNDA DIE.

In secundo Nocturno.

Leguntur tres Lectiones S. Ambrosii. Dignum & congruum, &c. quæ habentur in Breuiar. in Communi Martyr. temp. Paschali cum sequentibus Responsoriis. Quod si lectæ fuerint in die festo, legantur hac die sequentes Lectiones. Et licet nos, &c. politæ infra in 3. die.

**R. iv.** Lux perpetua lucebit sanctis tuis Domine, \* Et æternitas temporum, alleluja, allel. **V.** Lætitia sempiterna erit super capita eorum: gaudium, & exultationem obtinebunt. Et æternitas.

**R. v.** In servis suis, allel. Consolabitur Deus, allel. **V.** Judicabit Dominus populum suum, & in servis suis. Consolabitur.

**R. vi.** Filiaë Jerusalem, venite & videte Martyres cum coronis, quibus coronavit eos Dominus, \* In die solemnitatis, & lætitiæ, allel. **V.** Quoniam confortavit seras portarum tuarum, benedixit filios tuos in te. In die. Gloria Patri. In die.

### TERTIA DIE.

In secundo Nocturno.

Si sequentes tres Lectæ fuerint in ii. die, legantur hodie Lectiones, ut in iv. die, infra. Quibus ego vos, &c.

De Sermonem S. Ambrosii Episcopi.

Sermone 74. Lectio iv.

**E**T licet nos in resolutione corporis mortis umbra circum-

det: tamen gressus suos vita non deleat, sed inter ipsas medias inferni leges incunctanter Christi virtutibus ambulamus. Unde ait sanctus Propheta: Nam & si ambulavero in medio umbræ mortis, non timebo mala, quoniam tu mecum es. Quod manifestius Dominus ait de fideli, dicens: Qui autem credit in me, non morietur in æternum; & licet moriatur, vivet.

**R.** Lux perpetua, ut supra.

Lectio v.

**E**Rgo, fratres, cum sanctis martyribus Paschæ Domini gloriam conferamus; conferamus, inquam; & licet melius noverint omnia, tamen nos illis prædicemus, quemadmodum de sepulchri gremio resurrexit ad superiores. Illi nobis revelent, quo pacto de inferni profundo remeaverit ad sepulchrum. Notum, inquam, nobis faciant, quemadmodum in exanime jam corpus & frigidum sese calor insinuaverit, spiritus ingesserit, sanguis infuderit, & gelatas humore venas pristini vigoris pulsus agitaverit.

**R.** In servis. ut supra. 142.

Lectio vi.

**N**Otum, inquam, nobis faciant, quemadmodum organum corporis dissipatum, in priorem statum nervorum rursus coaptaverit resoluta compago; & harmoniam viscerum jam silentem in veterem concentum spiritus vivificans animaverit. Sacerdo-

tes

tes ergo prædicent, quæ Salvator post resurrectione mirabilia gestit ad superos; martyres revelent, quanta in ipsa morte refrigeria operatus sit in defunctos.

Rz. Filia Jerusalem. ut suprâ. 142.

## QUARTA DIE.

In secundo Nocturno.

Leguntur tres Lecti. 3. Cypriani. Quibus ego vos laudibus, &c. que habentur in Brevariario de Comuni Martyr. tempore Pasch. Quod si Lecti fuerint in die Festo, pro hac die, & reliq. totius Octavæ, sumantur Lecti-ones de Octavis Communibus unius vel plurim. Mart. extra tempus Pasch.

## INFRA OCTAVAM MARTYRUM temp. Paschali.

Homilia in Evangel. Joann. cap. 15. Ego sum vitis vera, &c.

In die Festo habentur Lecti de Homil. S. Augustini. Iste locus Evangelicus, &c. in Brevariario de Comuni Mart. tempore Paschali.

## SECUNDA DIE.

In tertio Nocturno.

Lectio S. Evangelii secundum Joannem.

Lectio vii. Cap. 15.

**I**n illo tempore: Dixit Jesus discipulis suis: Ego sum vitis vera, & Pater meus agricola est. Et reliqua.

De Homilia sancti Augustini Episcopi.

Tract. 80. in Joannem.

**D**enique cum de Patre, tamquam de agricola dixisset, quod infructuosos palmites tollat, fructuosos autem purget, ut plus afferant fructum, continuo etiam se ipsum mundatorem palmitum ostendens: Jam vos, inquit, mundi estis propter sermonem, quem locutus sum vobis. Ecce & ipse mundator est palmitum, quod est agricola, non vitis officium, qui etiam palmites operarios suos fecit: nam etsi non

dant incrementum, impendunt tamen aliquod adjumentum, sed non de suo: quia sine me, inquit, nihil potestis facere.

R. Ego sum vitis vera, & vos palmites: \* Qui manet in me, & ego in eo, hic fert fructum multum, alleluja, alleluja. V. Sicut dilexit me Pater, & ego dilexi vos. Qui manet.

Lectio viii.

**A**udi etiam ipsos confitentes: Quid autem est Apollo? quid autem Paulus? Ministri, per quos credidistis, & unicuique sicut Dominus dedit. Ego plantavi, Apollo rigavit. Et hoc ergo, sicut unicuique Dominus dedit. Non itaque de suo. Jam verò quod sequitur: Sed Deus incrementum dedit; non per illos, sed per seipsum facit. Excedit hoc humanam humilitatem, excedit Angelicam sublimitatem: nec omnino pertinet, nisi ad agricolam Trinitatem.

R. Candidi facti sunt Nazaræi ejus, alleluja, splendorem Deo dederunt, alleluja: \* Et sicut lac coagulati sunt, alleluja, alleluja. V. Candidiores nive, nitidiores lacte, rubicundiores ebore antiquo, sapphiro pulchriores. Et sicut. Gloria Patri. Et sicut.

Lectio ix.

**J**am vos mundi estis: mundi scilicet, atq; mundandi: neque enim nisi mundi essent, fructum ferre potuissent. Et tamen omnem qui fert fructum, purgat agricola, ut fructum plus afferat. Fert fructum, quia mundus est: atq;

ut



ut plus afferat, purgatur adhuc. Quis enim est in hac vita sic mundus, ut non sit magis magisque mundandus? Ubi si dixerimus, quia peccatum non habemus, nos ipsos seducimus, & veritas in nobis non est. Mundet itaque mundos, hoc est fructuosos, ut tantò sint fructuosiores, quantò fuerint mundiores. *Te Deum laudam?*

## TERTIA DIE.

*In tertio Nocturno.**Lectio S. Evangelii secundum Joannem.*

**I**n illo tempore: Dixit Jesus discipulis suis: Ego sum vitis vera, & Pater meus agricola est. Et reliqua.

*De Homilia sancti Augustini Episcopi.**Unde supra.*

**Q**uare non ait, Mundi estis propter Baptismum quo loti estis: sed ait, Propter verbum quod locutus sum vobis: nisi quia & in aqua verbum mundat? Detrahe verbum, & quid est aqua, nisi aqua? Accedit verbum ad elementum, & fit Sacramentum, etiam ipsum tamquam visibile verbum. Nam & hoc utique dixerat, quando pedes discipulis lavit: Qui lotus est, non indiget nisi ut pedes lavet, sed est mundus totus. Unde ista tanta virtus aquæ, ut corpus tangat, & cor abluat, nisi faciente verbo? *R. Ego sum. 143.*

*Lectio viii.*

**N**on quia dicitur, sed quia creditur: nam & in ipso verbo aliud est sonus transiens, aliud virtus manens. Hoc est verbum fidei, quod prædicamus, ait Apo-

stolus. Unde in Actibus Apostolorum legimus: Fide mundans corda eorum. Christus quippe nobiscum vitis, cum Patre agricola, dilexit Ecclesiam, & seipsum tradidit pro ea. Lege Apostolum, & vide quid adjungat: Ut eam sanctificaret, inquit, mundans eam lavacro aquæ in verbo.

*R. Candidi. 143.**Lectio ix.*

**M**undatio igitur nequaquam fluxo & labili tribueretur elemento, nisi adderetur, in verbo. Hoc verbum fidei tantum valet in Ecclesia Dei, ut per ipsam credentem, offerentem, benedicentem, tingentem, etiã tantillum mundet infantem, quamvis nondum valentem corde credere ad justitiam, & ore confiteri ad salutem. Totum hoc fit per verbum, de quo Dominus ait: Jam vos mundi estis propter verbum, quod locutus sum vobis.

*Te Deum laudamus.*

## QUARTA DIE.

*In tertio Nocturno.**Lectio S. Evangelii secundum Joannem.**Lectio vii. Cap. 15.*

**I**n illo tempore: Dixit Jesus discipulis suis: Ego sum vitis vera, & Pater meus agricola est. Et reliqua.

*De Homilia sancti Augustini Episcopi.**Tract. 81. in Joannem.*

**V**item se dixit esse Jesus, & discipulos suos palmites, & agricolam Patrem: unde jam pridem, sicut potuimus, disputatum est. In hac autem lectione, cum adhuc de seipso, qui est vitis, & de suis

suis palmitibus, hoc est discipulis, loqueretur: Manete, inquit, in me, & ego in vobis: non eo modo illi in ipso, sicut ipse in illis: Utrumq; autem prodest non Ipsi, sed illis: ita quippe in vite sunt palmites, ut viti non conferant, sed inde accipiant, unde vivant; ita verò vitis in palmitibus, ut vitale alimentum subministret eis, non sumat ab eis.

**R.** Ego sum. 143. *Lectio viii.*

**A**C per hoc, & manentem in se habere Christum, & manere in Christo, discipulis prodest utrumque, non Christo. Nam præciso palmite, potest de viva radice alius pullulare; qui autem præcisus est, sine radice non potest vivere. Denique adjungit, & dicit: Sicut palmes non potest ferre fructum à semetipso, nisi manserit in vite; sic nec vos, nisi in me manseritis. Magna gratiæ commendatio, fratres mei: corda instruit humilium, ora obstruit superbiorum.

**R.** Candidi facti. 143. *Lectio ix.*

**E**Cce si qui audent, respondent, qui ignorantes Dei justitiam, & suam volentes constituere; justitiæ Dei non sunt subiecti. Ecce cui respondeant, sibi placentes, & ad bona opera, facienda Deum sibi necessarium non putantes; Nonne huic resistunt veritati, homines mente corrupti, reprobi circa fidem, qui respondent, & loquuntur iniquitatem, dicentes: A Deo habemus,

Octav. Rom.

quòd homines sumus; à nobis ipsis autem quòd justi sumus? Hæc sunt inania præsumptionis vestræ: & si est in vobis ullus sensus, horrete: qui enim à semetipso se fructum existimat ferre, in vite non est; qui in vite non est, in Christo non est.

**Te Deum laudamus.**

## QUINTA DIE.

*In tertio Nocturno.*

*Lectio sancti Evangelii secundum Joannem. Lectio vii. Cap. 15.*

**I**N illo tempore: Dixit Jesus discipulis suis: Ego sum vitis vera, & Pater meus agricola est. Et reliqua.

*De Homilia sancti Augustini Episcopi. Unde supra. sus. credunt.*

**N**E quisquam putaret saltem parvum aliquem fructum posse à semetipso palmitem ferre: cum dixisset, Hic fert fructum multum, non ait, Quia sine me parum potestis facere; sed, Nihil potestis facere. Sive ergo parum, sive multum, sine illo fieri non potest, sine quo nihil fieri potest: quia etsi parum attulerit palmes, eum purgat agricola, ut plus afferat. Tamen nisi in vite manserit, & vixerit de radice, quantumlibet fructum à semetipso non potest ferre. Quamvis autem Christus vitis non esset, nisi homo esset: tamen istam gratiam palmitibus non præberet, nisi etiam Deus esset.

**R.** Ego sum. 143. *Lectio viii.*

**V**erum quia ita sine ista gratia non potest vivi, ut & mors

N

in



in potestate sit liberi arbitrii: Si quis in me, inquit, non manserit, mittetur foras sicut palmes, & arefcet, & colligent eum, & in ignem mittent, & ardet. Ligna itaque vitis tantò sunt contemptibilia si in vite non manserint, quantò gloriosiora si manserint. Denique sicut de his etiam per Ezechielem Prophetam Dominus dicit: Præcisa nullis agricolarum usibus profunt, nullis fabrilibus operibus deputantur. Unum de duobus palmiti congruit, aut vitis, aut ignis: si in vite non est, in igne erit: ut ergo in igne non sit, in vite sit.

**R.** Candidi. 143.

**Lectio ix.**

**S**I manseritis in me, inquit, & verba mea in vobis manserint: quodcumque volueritis, petetis, & fiet vobis. Manendo quippe in Christo, quid velle possunt, nisi quod convenit Christo? Quid velle possunt manendo in Salvatore, nisi quod non est alienum à salute? Aliud quippe volumus quia sumus in Christo: & aliud volumus quia sumus adhuc in hoc sæculo. De mansione namq; huius sæculi nobis aliquando subrepat, ut hoc petamus, quod nobis non expedire nescimus. Sed absit ut fiat nobis, si manemus in Christo, qui non facit quando petimus, nisi quod expedit nobis.

**Te Deum laudamus.**

## SEXTA DIE.

In tercio Nocturno  
**Lectio sancti Evangelii secundum Joannem.**

**Lectio vii. Cap. 15**

**I**N illo tempore: Dixit Jesus discipulis suis: Ego sum vitis vera, & Pater meus agricola est. Et reliqua.

De Homilia sancti Augustini Episcopi.

Unde super.

**M**Anentes ergo in eo, cum verba ejus in nobis manent, quodcumque voluerimus, petimus, & fiet nobis: quia si petimus, & non fiet, non hoc petimus, quod habet mansio in eo, nec quod habent verba ejus quæ manent in nobis; sed quod habet infirmitas & cupiditas carnis, quæ non est in eo, & in qua non manent verba ejus: nam utique ad verba ejus pertinet oratio illa, quam docuit, ubi dicimus: Pater noster, qui es in cœlis.

**R.** Ego sum. 143.

**Lectio viii.**

**A**B hujus orationis verbis & sensibus non recedamus petitionibus nostris, & quidquid petierimus, fiet nobis. Tunc enim dicenda sunt verba ejus in nobis manere, quando facimus quæ præcepit, & diligimus quæ promissit: quando autem verba ejus manent in memoria, nec inveniuntur in vita, non computatur palmes in vite, quia vitam non attrahit ex radice.

**R.** Candidi. 143.

**Lectio ix.**

**A**D hanc differentiam valet quod scriptum est: & memoria retinentibus mandata ejus, ut faciant ea: multi enim memoria retinent, & contemnunt, vel etiam derident, & oppugnant ea. In his verba Christi non manent, quia

quia tangunt, & quodammodo non cohererunt; & ideo illis non erunt in beneficium, sed in testimonium: & quia sic insunt eis ut non maneant in eis, ad hoc tenentur ab eis ut iudicentur ex eis. **Te Deum laudamus.**

SEPTIMA DIE.

In tertio Nocturno.

LECTIO S. Evangelii secundum Joannem.

LECTIO VII. Cap. 15.

**I**N illo tempore: Dixit Jesus discipulis suis: Ego sum vitis vera, & Pater meus agricola est. Et reliqua.

Homilia sancti Joannis Chrysostomi.

Homil. 77. in Joann. Intro.

**E**GO sum vitis, vos palmites. Quid vult hæc parabola significare? quod qui non vacat doctrinæ, vivere non potest, & quod futura signa Christi virtute proveniunt. Pater meus agricola est. Quid? auxilio indiget Filius? Abiit: neque sic intelligitur. Vide quàm diligenter hanc parabolam exequitur: non enim radici, sed palmitibus agricolæ curam conferre dicit. Radicis autem non alia causa hic meminit, quàm ut discerent, sine ipsius potentia nihil fieri posse: & quod ita ipsi fide uniendi sunt, ut palmes viti. **R. Ego sum. 143.**

LECTIO VIII.

**O**mnem palmitem in me non ferentem fructum, tollet eum Pater. Hic signat vitam, ostendens, sine operibus neminem in ipso esse posse. Et omnem, qui fert fructum, purgabit: id est, incitabit ad virtutis curam. Atqui

radix circumfossione & cultu primum indiget; sed nihil de ea nunc dicit, sed de palmitibus, sibi ipsi se sufficere ostendens. Discipuli autem multa præceptoris curâ indigent, etiam si studiosi sint: ideo inquit, Omnem, qui fructum fert, purgabit eum; qui fructum non facit, non potest esse in vite: qui fructum fert, eum reddet fecundiores.

**R. Candidi. 143. LECTIO IX.**

**H**oc urgentis mœroris gratiâ eos allocutus est, dicet aliquis. Purgare enim palmitem, incidere est, ut fecundiores faciat: unde ostendit, tentationibus effici fortiores. Inde, ne de quibus dicat, interrogent, & iterum sollicitarentur, inquit: Jam vos mundi estis propter sermonem, quem locutus sum vobis. Vides, qualem se palmitum curatorem profiteatur? Ego vos purgavi, inquit. Atqui superius hoc Patris officium ostendit: sed nulla est inter Patrem & Filium differentia: jam vestrâ opus est diligentia. **Te Deum laudamus.**

IN DIE OCTAVA.

In tertio Nocturno.

LECTIO S. Evangelii secundum Joannem.

LECTIO VII. Cap. 15.

**I**N illo tempore: Dixit Jesus discipulis suis: Ego sum vitis vera, & Pater meus agricola est. Et reliqua.

Homilia S. Cyrilli Episcopi Alexandrini.

Lib. 10. cap. 145 in Joann.

**E**A de causâ vitem se appellâsse manifestè Dominus ostendit, ut quasi oculis hoc exemplo cer-



neremus, manentes in eo ut palmites, ex vite humore tracto, spiritalem posse fructum afferre: resiliens verò ab eo, vel quia in fide, vel quia in servatione mandati deficiant, non modò nihil fructus producturos, sed æternum etiam ignem passuros. Qui enim à pietate vel charitate Christi decedit, supplicis seipsum tradit, sicut decisus palmes ad nihil aliud quàm ad ignem utilis est.

*R. Ego sum. 143. Lectio viii.*

**R**adicem supernæ benevolentiae ac firmamentum esse ait: si quasi spiritale depositum, Evangelicæ disciplinæ dogmata & mandata servarint. Servantibus autem sine mora petita bona pollicetur affutura. Si manseritis, inquit, in me, & verba mea in vobis manserint, quodcumque volueritis, petetis, & fiet vobis. Fieri enim potest, ut in Christo maneas, & verba ejus in te non habeas. Duplex enim via est, per fidem & charitatem, propter quā mandata servantur.

*R. Candidi. 143. Lectio ix.*

**Q**uæ cum ita sint, qui verbis nudis Christum confitentur, sed mandatorum observatione, id est, charitate ad perfectionem non conformantur; quamvis Christo fide inhæreant, inque eo hac ratione maneant, verba tamen ejus non habent: non obliiti quidem illi prædicationis Evangelicæ, sed illecebris voluptatum capti, Spiritus gratiam ab-

jiciunt. Quare oportet ad fidem opera charitatis accedere: nam qui sic facit, is & in Christo per fidem manet, & in corde suo verba ejus conservat, ut in Psalmis dicitur: In corde meo abscondi eloquia tua, ut non peccem tibi. Te Deum laudamus.

## *INTRA OCTAVAM* **MARTYRUM**

*tem. in R. Mart.*  
*10 milia in Evangel. Joanni. cap. 15. Ego sum vitis, vos palmites.*

*Jo. in R. Mart. tempore Pasch. Ne quisquam putaret, &c. in R. Mart. tempore Pasch.*

### **SECUNDA DIE.**

*Lectio sancti Evangelii secundum Joannem.*

**I**n illo tempore: Dixit Jesus discipulis suis: Ego sum vitis, vos palmites: qui manet in me, & ego in eo, hic fert fructum multum: quia sine me nihil potestis facere. Et reliqua.

*De Homilia sancti Augustini Episcopi.*

**M**anentes ergo in eo cum verba ejus in nobis manent, quodcumque voluerimus, petimus, & fiet nobis: quia si petimus, & non fiet, non hoc petimus quod habet mansio in eo, nec quod habent verba ejus quæ manent in nobis; sed quod habet infirmitas & cupiditas carnis, quæ non est in eo, & in qua non manent verba ejus: nam utique ad verba ejus pertinet oratio illa, quam docuit, ubi dicimus: Pater noster, qui es in cœlis.

*R. Ego sum. 143. Lectio viii.*  
**Ab**

**A**B huius orationis verbis & sensibus non recedamus petitionibus nostris, & quidquid petierimus, fiet nobis. Tunc enim dicenda sunt verba ejus in nobis manere, quando facimus quæ præcepit, & diligimus quæ promissit: quando autem verba ejus manent in memoria, nec inveniuntur in vita, non computatur palme in vite, quia vitam non attrahit ex radice.

R. Candidi. 143. *Lectio ix.*

**A**D hanc differentiam valet quod scriptum est: Et memoria retinentibus mandata ejus, ut faciant ea: multi enim memoria retinent, & contemnunt; vel etiam derident, & oppugnant ea. In his verba Christi non manent, qui tangunt, & quodammodo non cohærent; & ideo illis non erunt in beneficium, sed in testimonium: & quia sic insunt eis ut non maneant in eis, ad hoc tenentur ab eis, ut judicentur ex eis. Te Deum laudamus.

### TERTIA DIE.

*In tertio Nocturno.*  
Lectio S. Evangelii secundum Joannem.  
*Lectio vii. Cap. 15.*

**I**N illo tempore: Dixit Jesus discipulis suis: Ego sum vitis, vos palmites: qui manet in me, & ego in eo, hic fert fructum multum: quia sine me nihil potestis facere. Et reliqua.

De Homilia sancti Augustini Episcopi.

*Tract. 82. in Joannem.*

**I**N hoc, inquit, glorificatus est Pater meus ut fructum pluri-

mum afferatis, & efficiamini mei discipuli. Sive glorificatus, sive clarificatus dicatur, ex uno Græco verbo utrumque translatum est. Doxa enim quæ Græcè dicitur, Latine Gloria est. Hæc est ad Deum gloria, qua glorificatur non homo, sed Deus, si non ex operibus, sed ex fide, justificatur, ut ex Deo illi sit, quod etiam bene operatur, quoniam palme, sicut jam superius dixi, non potest ferre fructum à semetipso. Unde & alibi, cum dixisset: Sic luceat lumen vestrum coram hominibus, ut videant opera vestra bona; ne à semetipsis putarent esse bona opera sua, mox addidit: Et glorificent Patrem vestrum, qui in cœlis est.

R. Ego sum. 143. *Lectio viii.*

**M**Anete, inquit, in dilectione mea. Quomodo manebimus? Audi quid sequitur: Si præcepta mea, inquit, servaveritis, manebitis in dilectione mea. Dilectio facit præcepta servare. An præcepta servata faciunt dilectionem? Sed quis ambigat, quod dilectio præcedit? Unde enim præcepta servet, non habet, qui non diligit. Quod ergo ait, Si præcepta mea servaveritis, manebitis in dilectione mea; ostendit, non unde dilectio generetur, sed unde monstretur.

R. Candidi. 143. *Lectio ix.*

**Q**Uamvis quod ait, Manete in dilectione mea, non apparet quam dixerit dilectionem, utrum

N3. qua



qua eum diligimus, an qua ipse diligit nos: sed ex verbo superiore dignoscitur. Dixerat quippe, Et ego dilexi vos: cui verbo continuo subjunxit, Manete in dilectione mea. Illa ergo qua dilexit eos. Quid est ergo, Manete in dilectione mea, nisi manete in gratia mea? Et quid est, si praecepta mea servaveritis, manebitis in dilectione mea; nisi, ex hoc scietis, quod in dilectione mea, qua vos diligo, manebitis, si praecepta mea servaveritis? Non ergo, ut nos diligat, prius ejus praecepta servamus: sed nisi nos diligat, praecepta ejus servare non possumus. **T**e Deum.

#### QUARTA DIE.

In tertio Nocturno.

Lectio sancti Evangelii secundum Joannem.

Lectio vii. Cap. 15.

**I**n illo tempore: Dixit Jesus discipulis suis: Ego sum vitis, vos palmites: qui manet in me, & ego in eo, hic fert fructum multum: quia sine me nihil potestis facere. Et reliqua.

De Homilia sancti Augustini Episcopi.

Tract. 83. in Joann.

**A**udistis, charissimi, Dominum dicentem discipulis suis: Hæc locutus sum vobis, ut gaudium meum in vobis sit, & gaudium vestrum impleatur. Quod est gaudium Christi in nobis, nisi quod dignatur gaudere de nobis? Et quod est gaudium nostrum, quod dicit implendum, nisi ejus habere consortium? Propter quod Petro dixerat; Si non laverò te, non habebis partem mecum.

Gaudium ergo ejus in nobis gratia est, quam præstitit nobis, & ipse est gaudium nostrum. Sed de hac ille etiam ex æternitate gaudebat, quando nos elegit ante constitutionem mundi.

**R.** Ego sum. 143. **Lectio viii.**

**N**ec rectè possumus dicere, quod gaudium ejus plenum non erat. Non enim Deus imperfectè aliquando gaudebat; sed illud ejus gaudium in nobis non erat, quia nec nos, in quibus esse posset, jam eramus; nec quando esse cœpimus, cum illo esse cœpimus. Gaudium igitur ejus de salute nostra, quod in illo semper fuit, cum præcivit & prædestinavit nos, cœpit esse in nobis, quando vocavit nos. Et hoc gaudium meritò nostrum dicimus, quod & nos beati futuri sumus: sed hoc gaudium nostrum crescit, & proficit, & ad suam perfectionem perseverando pertendit. Ergo inchoatur in fide nascentium, implebitur in præmio resurgentium. **R.** Candidi. 143. **Lectio ix.**

**E**cce unde dictum existimo, Hæc locutus sum vobis, ut gaudium meum in vobis sit, & gaudium vestrum impleatur: In vobis sit meum, impleatur vestrum. Semper enim erat meum plenum, & antequam vocaremini, cum vocandi à me præsciremini: sed fit & in vobis, cum hoc efficiamini, quod præcivi de vobis: implebitur autem vestrum, quia beati eritis, quod nondum estis,

estis, sicut creati estis, qui non fuistis. **Te** Deum laudamus.

### QUINTA DIE.

In tertio Nocturno.

Lectio S. Evangelii secundum Joannem.

Lectio vii. Cap. 15.

**I**N illo tempore: Dixit Jesus discipulis suis: Ego sum vitis, vos palmites: qui manet in me, & ego in eo, hic fert fructum multum: quia sine me nihil potestis facere. Et reliqua.

Homilia sancti Joannis Chrysostomi.

Ex Homilia 75. in Joan.

**E**go sū vitis, vos palmites. Quid vult hæc parabola significare? quod qui non vacat doctrinæ, vivere non potest, & quod futura signa Christi virtute proveniunt. Pater meus agricola est. Quid? auxilio indiget Filius? Absit: neque sic intelligitur. Vide quā diligenter hanc parabolam exequitur: non enim radici, sed palmitibus agricolæ curam conferre dicit. Radicis autem non alia causa hīc meminit, quā ut discerent, sine ipsius potentia nihil fieri posse: & quod ita ipsi fide uniendi sunt, ut palmes viti.

**R.** Ego sum. 143. **Lectio viii.**

**O**mnem palmitem in me non ferentem fructū, tollet eum Pater. Hīc signat vitam, ostendens, sine operibus neminem in ipso esse posse. Et omnem, qui fert fructum, purgabit: id est, incitabit ad virtutis curam. Atqui radix circumfossione & cultu primum indiget: sed nihil de ea nunc dicit, sed de palmitibus, sibi

ipsi se sufficere ostendens. Discipuli autē multā præceptoris curā indigent, etiam si studiosi sunt; ideò inquit, Omnem, qui fructum fert, purgabit eum; qui fructum non facit, non potest esse in vite; qui fructum fert, eum reddet fecundiores. **R.** Candidi. 143.

Lectio ix.

**H**oc urgentis mœroris gratiā eos allocutus est, dicet aliquis. Purgare enim palmitem, incidere est, ut fecundiores faciat: unde ostendit temptationibus effici fortiores. Inde, ne de quibus dicat, interrogent, & iterum sollicitarentur, inquit: Jam vos mundi estis propter sermonem, quem locutus sum vobis. Vides, qualem se palmitum curatorem profiteatur? Ego vos purgavi, inquit. Atqui superius hoc Patris officium ostendit: sed nulla est inter Patrem & Filium differentia: jam vestrā opus est diligentia. **Te** Deum laudamus.

### SEXTA DIE.

In tertio Nocturno.

Lectio S. Evangelii secundum Joannem.

Lectio vii. Cap. 15.

**I**N illo tempore: Dixit Jesus discipulis suis: Ego sum vitis, vos palmites: qui manet in me, & ego in eo, hic fert fructum multum: quia sine me nihil potestis facere. Et reliqua.

De Homilia S. Joannis Chrysostomi.

Unde suprā. circa medium.

**C**onsidera, quanta ejus auctoritate alloquatur. Non enim dixit, Manete in dilectione Patris, sed, Mea. Inde ne dicerent, Quando



do nos omnibus inimicos reddidisti, tunc nos dimittis, tunc discedis; hoc negat: sed ita eis, modo velint, conglutinari dicit, ut palmes viti. Rursusque in fiducia hoc pigriores ne redderentur, non duraturum bonum dixit, si id negligerent: & ne, si ad seipsum omnia referret, promptiores ad casum redderet, inquit: In hoc clarificatus est Pater. Semper enim & suam & Patris in eos dilectionem ostendit.

**R.** Ego sum. 143. **Lectio viii.**

**N**on ergo Judæorum res gloria Patris erat, sed quæ ipsi erant accepturi. Inde ne dicerent, Patrias possessiones reliquimus, & nunc omnium nudi deferimur; In me, inquit, respicite: diligit me Pater, & tamen hæc mihi subeunda proponuntur. Non igitur ego vos, quia non diligam, in præsentia relinquo: nam, etsi ego morior, nec tamen propterea non amari à Patre conjecturam facio, neque vos perturbari oportet: si in dilectione mea manebitis, nihil vobis horum nocere poterit.

**R.** Candidi. 143. **Lectio ix.**

**M**agnum namque & insuperabile quiddam dilectio est, quæ non nudis verbis, sed re ostendenda est. Ipse inimicos reconciliavit, nos in amore persequamur: ipse incepit, nos saltem prosequamur: ipse non sui commodi gratiâ, (nullius enim eget) nos saltem ad nostram utilitatem

diligamus: ipse inimicos, nos saltem amicos amore prosequamur. Nunc autem è contrario facimus. Te Deum laudamus.

### SEPTIMA DIE.

*In tertio Nocturno.*

*Lectio S. Evangelii secundum Joannem.*

*Lectio vii. C. p. 17.*

**I**n illo tempore: Dixit Jesus discipulis suis: Ego sum vitis, vos palmites: qui manet in me, & ego in eo, hic fert fructum multum: quia sine me nihil potestis facere. Et reliqua.

*Homilia S. Cyrilli Episcopi Alexandrini.*

*Lib. 10, c. 14. in Joann.*

**E**A de causa vitem se appellasse manifestè Dominus ostendit, ut quasi oculis hoc exemplo cerneremus, manentes in eo ut palmites, ex vite humore tracto, spiritalem posse fructum afferre: resiliens verò ab eo, vel quia in fide, vel quia in servatione mandati deficiant, non modò nihil fructus producturos, sed æternum etiam ignem passuros. Qui enim à pietate vel charitate Christi decedit, suppliciis seipsum tradit; sicut decisus palmes ad nihil aliud, quàm ad ignem utilis est. **R.** Ego sum. 143.

*Lectio viii.*

**R**adicem supernæ benevolentiae ac firmamentum esse ait, si quasi spiritale depositum, Evangelicæ disciplinæ dogmata & mandata servârint. Servantibus autem sine mora petita bona pollicetur affutura. Si manseritis, inquit, in me, & verba mea in vobis manserint, quodcumque vo-

lueri-

lueritis, petetis, & fiet vobis. Fieri enim potest, ut in Christo maneas, & verba ejus in te non habeas. Duplex enim via est, per fidem & per charitatem, propter quam mandata servantur.

R. Candidi 143. **Lectio ix.**

**Q**uæ cum ita sint, qui verbis nudis Christum confitentur, sed mandatorum observatione, idest, charitate ad perfectionem non conformantur; quamvis Christo fide inhæreant, inque eo hac ratione maneant, verba tamen ejus non habent: non obliti quidem illi prædicationis Evangelicæ, sed illecebris voluptatum capti, Spiritûs gratiam abjiciunt. Quare oportet ad fidem opera charitatis accedere; nam qui sic facit, is & in Christo per fidem manet, & in corde suo verba ejus conservat, ut in Psalmis dicitur: In corde meo abscondi eloquia tua, ut non peccem tibi. **Te** Deum laudamus.

# IN DIE OCTAVA.

**Lectio S. Evangelij secundum Joannem.**

**I**n illo tempore: Dixit Jesus discipulis suis: Ego sum vitis, vos palmites: qui manet in me, & ego in eo, hic fert fructum multum: quia sine me nihil potestis facere. Et reliqua.

De Homiliâ S. Cyrilli Episcopi Alexandrini.

**C**onsideratius videamus, quid est quod his verbis, Ut gaudium meum in vobis sit, Christus significavit. Duplex igitur

esse mihi sensus videtur: aut enim nihil curiosius hic locus affert; sed hoc planè dicit, ut gaudium in me habeatis, & sic ipsi quoque gaudeatis supernæ beatitudinis atque gloriæ magnitudinem intelligentes. Alius est, in quo altius quiddam latet, quod enodare non recusabimus. Quid igitur illud est, aut quid significat, Ut gaudium meum in vobis sit?

R. Ego sum. 143.

**H**omo factus unigenitus Dei Filius absque peccato omnia sustinuit, quæ Judæorum excogitare pervicacia potuit: nec umquam sputis dedecoratus, verbis derisus, verberibus cæsus, & tandem patibulo affixus ullo mœrore affectus fuit, sed decenti semper ipse gaudio plenus (quoniam voluntatem Patris consummari videbat, & homines hinc salutem habituros non ignorabat) illa opprobria delicias esse putabat. Exultavit enim spiritu, instante jam cruciatu, & dixit: Confiteor tibi, Pater, Domine cœli & terræ, quia occultasti hæc à sapientib⁹ & prudentibus, & revelasti ea parvulis.

R. Candidi. 143. **Lectio ix.**

**Q**uis ergo dubitabit, delicias illi fuisse salutem hominum? hanc enim voluntatem Patris appellat. Hæc, inquit, vobis locutus sum, ut gaudium meum in vobis sit: id est, ut illis solummodo lætari rebus velitis, quibus ego gaudeo. Sic enim fortes ad certa-



certamina eritis, & spe salvandorum hominum pericula libenter subibitis, non parum gaudentes: quoniam voluntas Patris, qui vult omnes ad cognitionem veritatis venire, pro virili parte vestra perficientur. Hanc ego elegi lætitiā: hanc etiam si vos habebitis, sincero ac integro afficiemini gaudio. **Te Deum laudamus.**

### INFRA OCTAVAM MARTYRUM temp. Paschali.

*Homilia in Iuan. 16. Martini cap. 16. Quia plorabitis, & flebitis, &c.*

#### IN DIE FESTO.

*In die festo Paschali.*

Lectio S. Evangelii secundum Joannem.

*Lectio vii. Cap. 16.*

**I**N illo tempore: Dixit Jesus discipulis suis: Amen, amen dico vobis: quia plorabitis, & flebitis vos, mundus autem gaudebit. Et reliqua.

*Homilia sancti Joannis Chrysostomi.*

*Homilia 79. in Iuan. 16. 17.*

**U**T ostenderet, post tristitiam gaudium secuturum, naturale adducit exemplum: Mulier, cum parit, tristitiam habet. Quia parabola in calamitatibus Prophetæ usi sunt. Quasi dicat: Dolores capietis, sed quales partus, quæ lætitiæ causa sunt. Simul & resurrectionem confirmat, indicans obitum suum perinde esse, ac si ex utero matris in lucem prodeat. Quasi dicat: Nolite admirari, si per hanc tristitiam ad optima vos ducam: nam & mater, ut fiat mater, sic per tristitiam transit.

*R. Ego sum. 143. Lectio viii.*

**S**ignificat autem hic & mysterium quoddam, quod mortis dolores solverit, & novum hominem regenerari fecerit. Neque dixit taurum tristitiam transituram, sed magnitudine lætitiæ succedente, nihil ejus penitus remansurum. Ita erit Sanctis. Atquinon propterea gaudet mulier, quia venit homo in mundum, sed quod filium peperit: nam si id esset, nihil prohiberet, quin, quæ non pariunt, aliis parientibus gauderent.

*R. Candidi. 143.*

*Lectio ix.*

**Q**ua ergo gratia sic inquit? Quia ad hoc solum adduxit exemplum, ut brevem tristitiam perpetuum gaudium secuturum, & se ad vitam transferri, & magnum malorum lucrum ostenderet. Et non dixit: Peperit filiū; sed, Quia venit homo in mundum: ubi suam significat resurrectionem, & se non morti illi parienti, sed regno parturiendum. Ideo non dixit, Quia natus est filius, sed homo. Et vos nunc quidem tristitiam habetis; Iterum autem videbo vos, & gaudebit cor vestrum. Inde, quod non amplius morietur, inquit: Et gaudium vestrum nemo tollet à vobis. **Te Deum laudamus.**

*Infra Octavam legimus in Missa, & Offic. Ego sum vitis vera, Iuan. 15. 1.*

*In die vero octavae, ut in die Festo*

### INFRA OCTAVAM PLURIMORUM

*Martyrum.*

SE-

## SECUNDA DIE.

In secundo Nocturno.

Ex Epistola S. Cypriani Episcopi & martyris ad  
Martyres. Epistola 29. Lectio iv.

**I**mposuerunt compedes pedibus  
vestris, & membra felicia, ac  
Dei templa infamibus vinculis li-  
gaverunt, quasi cum corpore li-  
getur & spiritus, aut aurum ve-  
strum ferri contagione macule-  
tur. Dicatis Deo, hominibus, &  
fidem suam religiosa virtute te-  
stantibus: Ornamenta sunt ista,  
non vincula: nec Christianorum  
pedes ad infamiam copulant, sed  
clarificant ad coronam. O pedes  
feliciter vincti, qui non à fabro,  
sed à Domino resolvuntur! O pe-  
des feliciter vincti, qui itinere sa-  
lutari ad paradysum diriguntur!  
O pedes in sæculo ad præsens li-  
gati, ut sint semper ad Domi-  
num liberi!

**R.** Sancti tui Domine mirabile  
consecutisunt iter, servientes præ-  
ceptis tuis: ut invenirentur illæsi  
in aquis validis; \* Terra appa-  
ruit arida, & in Mari rubro via  
sine impedimento. \* Quoniam  
percussit petram, & fluxerunt a-  
quæ, & torrentes inundaverunt.  
Terra. Lectio v.

**Q**uis non libenter & prom-  
ptè calicem salutis accipiat?  
Quis non appetat gaudibundus  
& lætus, in quo aliquid & ipse  
Domino suo retribuatur? Quis non  
pretiosam in conspectu Dei mor-  
tem fortiter & constanter exci-  
piat, placiturus ejus oculis, quinos  
in congressione nominis sui de-

super spectans, volentes compro-  
bat, adjuvat dimicantes, vincen-  
tes coronat, retributione bonita-  
tis ac pietatis paternæ remune-  
rans in nobis, quidquid ipse præ-  
stitit, & honorans quod ipse per-  
fecit?

**R.** Verbera carnificum non ti-  
muerunt Sancti Dei, morientes  
pro Christi nomine: \* Ut hære-  
des fierent in domo Domini.

\* Tradiderunt corpora sua pro-  
pter Deum ad supplicia. Ut hæ-  
redes. Lectio vi.

**Q**uis nunc vobis, dilectissimi  
fratres, conscientia victricis  
vigor? quæ sublimitas animi? quæ  
in sensu exultantia? qui trium-  
phus in pectore? unumquemque  
vestrū stare ad promissum Dei  
præmium, de judicii die esse se-  
curum? ambulare, captivo qui-  
dem corpore, sed corde regnan-  
te scire Christum secum esse præ-  
sentem, gaudentem tolerantia  
servorum suorum, per vestigia,  
& vias suas ad regna æterna gra-  
dientium? Planè, quia nunc vo-  
bis in precibus efficacior sermo  
est, & ad impetrandum quod pe-  
titur, faciliior oratio est: petite  
impensius, & rogate, ut qui hic  
charitatis & pacis vinculo copu-  
lati stetimus, pariter in regnis  
cœlestibus gaudeamus.

**R.** Tamquam aurum in fornace  
probavit electos Dominus, &  
quasi holocausti hostiam accepit  
illos: & in tempore erit respec-  
tus illorum: \* Quoniam donū,  
& pax



156 *Infra Octav. plurim. Mart. extr. temp. Pasch. in il. Noct.*

& pax est electis Dei. *¶* Qui confidunt in illum, intelligent veritatem; & fideles in dilectione acquiescent illi. Quoniam. Gloria Patri. Quoniam.

### TERTIA DIE.

*In octavo N. S. Sermo sancti Basilii Episcopi.*

*In Psal. 135. circa Cant. Lectio in.*  
**R**evera pretiosa est mors Sanctorum ejus; cum videlicet anima per vitæ istius curriculum expurgata, ab omni eluvie & inquinamento carnis emancipata, ac libertati reddita, nullam in se retinens maculam, aut rugam, duris pro pietate agonibus jam exantlatis probata, insignita coronâ justitiæ, perque hæc omnia admirabili decore virtutis interlucens Domino suo, atque omnium judici se præsentarit, lapide omni pretioso rutilantior, Dei munere eam adepta claritatem: quonam pacto non censeri debet pretiosa hominis istius mors in conspectu Domini?

*¶ Sancti tui. 155. Lectio v.*

**E**xitus itaque sanctorum virorum est vitæ istius stadio ne lugeamus, imò fletu magis prosequenda venit ipsa nativitas, & ex utero in hanc vitam progressio. Naturæ enim necessitas scetidum præscripsit nobis, & sanxit carnalis generationis ingressum: contra, exitus atq; hinc emigratio pretiosa est & illustris: neque interim omnium talis est, sed eorum, qui vitam hanc suam sanctè & justè traduxerunt. Itaque pre-

tiosa est mors, non item pretiosa nativitas: nam teste Apostolo, Seminatur in ignobilitate, surgit in gloria: seminatur in corruptione, surgit in incorruptione.

*¶ Verbera. 155. Lectio vi.*

**P**ro legis Judaicæ ritu si qui moriebantur, horum morticina habebantur abominationi: contra, mors si cuipiâ irrogatur pro Christi nomine, pretiosæ censentur reliquiæ Sanctorum ejus. In priori lege dicebatur Sacerdotibus & Nazaræis illud: Non contaminabitur super ullo mortuo; &, Si quis tetigerit cadaver, immundus erit; & hoc: Lavabit vestimenta sua. Nunc è diverso, Martyris ossa quisquis attigerit, ob gratiam corpori insidentem fit quadamtenus sanctificationis particeps. Quare pretiosa est in conspectu Domini mors Sanctorum ejus. *¶ Tamquam aurum. 155.*

### QUARTA DIE.

*In Psal. 135. Sermo sancti Ambrosii Episcopi. Sermones 77. Lectio vi.*

**E**xemplo Martyrum didicimus Christo credere, didicimus contumeliis vitam æternam quærere, mortem didicimus non timere. Videte ergo quid Martyribus debeamus, in quo alter tortus est, ut alius salvaretur: alter carnificem pertulit, ut Christum alter agnosceret: alter morti addictus est, ut alius vitâ potiretur æternâ: & ad postremum, Sanctus occisus est, ut peccator evaderet. Beati igitur Martyres, nec

sibi

sibi vixerunt, nec sibi sunt mortui: exemplum enim nobis reliquerunt, benè vivendo, conversationis; tolerando fortiter, passionis. **R.** Sancti tui. 155.

**Lectio v**

**N**Am ideò Dominus per totum mundum, diversis in locis pati martyres voluit, ut tamquàm idonei testes nos præsenti quodam fidei exemplo suæ confessionis urgerent, ut humana fragilitas, quæ prædicationi Dominicæ aditu longiore vix credit, vel præsenti oculorum testimonio martyrio crederet beatorum. Cuncti igitur Martyres devotissimè percolendi sunt, sed specialiter ii venerandi sunt à nobis, quorum reliquias possidemus. Illi enim nos orationibus adjuvant, isti etiam adjuvant passione. Cum his autem nobis familiaritas est: semper enim nobiscum sunt, nobiscum morantur, hoc est, & in corpore nos viventes custodiunt, & de corpore recedentes excipiunt.

**R.** Verbera. 155. **Lectio vi.**

**C**Um sanctis ergo Martyribus quiescentes, evadimus inferi tenebras eorum propriis meritis, attamen confocii sanctitate. Martyres enim inferni porta non possidet, quoniam eos paradisi regna suscipiunt. Nam videmus eos utique jam regnare: cernimus enim ab iis frequenter obsessos immundissimis dæmonibus homines liberari, ita ut cœlesti medicina & captiva anima de diaboli

laqueis eruat, & ipse diabolus vinculis igneis alligatus, producat, ut qui prædam paulò antè ceperrat, ipse subdatur in prædam. Hæc & alia potiora mirabilia per Sanctos fieri omnibus notum est: & ideò, fratres, veneremur eos in sæculo, quos defensores habere possumus in futuro.

**R.** Tamquam. 155.

**QUINTA DIE.**

*In secundo Nocturno.*

*Sermo sancti Gregorii Nysseni.*

*In 40. Mart. orat. 2. circa medium.*

*Lectio iv.*

**Q**Uale in cœlestibus accidit miraculis, cum serena ac pura nocte stellarum decor alius per alium distinguitur & ornatur, unaquaq; earum suum splendorem ad communem ornatum cœli simul contribuyente: tale erat Sanctorum spectaculum, verè, ut alicubi inquit Ezechiel Prophetæ, visio lampadarum inter se cœuentium, & quasi convolutarum. Quàm pulchrum igitur tunc intuentibus erat spectaculum! pulchrum, inquam, iis, qui pulchra atque præclara contueri volunt: pulchrum Angelis, pulchrum supramundanis virtutibus: acerbum verò dæmonibus, & quotquot dæmonum cultum amplectebantur. Homines, si modò homines dicendi, qui tanta magnitudine indolis excelluerunt, milites Christi, sancti Spiritus armigeri, fidei antesignani, turres divinæ civitatis?

Octav. Rom.

O



158 *Infra Octav. plurim. Mart. extr. temp. Pasch. in ii. Noct.*  
*R. Sancti tui. 155. Lectio v.*

**Q**ui omnem tormentorum poenam, atque contumeliam, omnes terrores ingruentes, omnem minarum vim tamquam puerilem quamdam amentiam deridebant: perinde ac si non corpora verberibus præberent, sed corporum umbras: qui cum carne carnem devicissent, & contemptu mortis omnes tyrannorum terrores magnitudine animi superassent, humana conditione superiores visi sunt. O qui præclare corporeis trophæis excitati, qui peritiam bellandi in aciem adversus diabolum instructam transtulerunt, non gladio manus armantes, neque clypeum lignum objicientes, sed armaturam Dei sumentes, quam Prætor & Dux Ecclesiæ, divinus ille Apostolus describit, scutum, & loriceam, & galeam, & gladium, ita tendebant adversus copias adversariorum.

*R. Verbera. 155. Lectio vi.*

**D**ux autem erat horum quidem cœlestis gratia, diaboli autem aciei, is qui mortis imperium tenet: locus eis aciei, nefariorum & sanguinariorum tribunal erat. Illic congressi decertabant, illi quidem minis pugnam lacescentes, hi verò per patientiam propulsantes, & resistentes. Ignis sub hæc intentabatur, & gladius, & barathrum, & quæcumq; sunt alia nomina suppliciorum: una vox ad hæc omnia

audiebatur, Christus, quem orē Sancti illi confitebantur. Hoc erat adversariorum vulnus: hanc cuspidem adversariis objiciebant: per hanc vocem in medio corde vulnus adversarius accepit. Hic est lapis, qui per manum Davidis fundā emittebatur, qui à galea adversarii, quò destinatus erat, non aberravit: nam Christi confessio, boni militis funda existit: cadit inimicus, & caput amittit.

*R. Tamquam. 155.*

## SEXTA DIE.

*In secundo Nocturno.*

*Tres Lectiones S. Augustini, Quotiescumque, fratres, &c. ut in brevatio de tormentis plurimorum Martyrum. Quod si lectæ fuerint in die festo, legantur sequentes.*

*Sermo sancti Augustini Episcopi.*

*Serm. 30. de Sanctis.*

*Lectio iv.*

**Q**uoniam dies Sanctorum martyrum est, unde potius aliquid delectet nos dicere, nisi de gloria ipsorum? Adjuvet nos Dominus martyrum. Audivimus paulò antè beatum Apostolum prædicantem: Quis nos separabit à charitate Christi? Ista vox est martyrum. Tribulatio, an angustia, an persecutio, an fames, an nuditas, an periculum, an gladius? sicut scriptum est: Propter te mortificamur tota die, deputati sumus ut oves occisionis: sed in his omnibus superamus propter eum, qui dilexit nos. Hæc est vox martyrum, omnia tolerare, & de se nihil præsumere; illum diligere, qui glorificatur in suis, ut qui gloriatur, in Domino gloriatur.

*R. Sancti tui. 155. Lectio v.*

*Nove-*

**N**overant & illud, quod nos cantavimus paulò antè: Lætamini in Domino, & exultate iusti. Si iusti in Domino lètantur, iniusti verò non noverunt lètari, nisi in sæculo, sed ipsæ sunt primæ acies debellandæ, primò vincendæ sunt delectationes, & postea dolores. Quomodo potest superare mundum sævientem, qui non potest superare blandientem? Blanditur hic mundus pollicendo honores, divitias, voluptates: minatur hic mundus intendendo dolores, egestates, humilitates. Qui non contemnit quod pollicetur, quomodo superare potest quod minatur?

**R.** Verbera. 155. **Lectio vi.**

**M**odò elige, modò pugna: modò videamus, si non sine causa cantasti: Lætamini in Domino, & exultate iusti. Modò videamus, si non sine causa audisti: Quis nos separabit à charitate Christi? Equidem prætermisit omnia, quibus blanditur mundus, & te voluit commemorare, cui blanditur mundus. Quare? Quia certamina martyrum prænuntiabat, illa utique certamina, ubi vicerunt persecutionem, famem, sitim, egestatem, ignominiam, ad extremum timorem mortis, hostemque novissimum.

**R.** Tamquam. 155.

## SEPTIMA DIE.

In secundo Nocturno.

Tres Lect. de s. Joannis Chrys. Nemo est, qui nesciat, &c. ut in Brev. de Comuni plur. Mart. Quod si lecta fuerint in

die festo, hac die legantur præcedentes. Quoniam dies. ut suprà.

## IN DIE OCTAVA.

In secundo Nocturno.

Sermo sancti Fulgentii Episcopi.

Sermone 10.

Lectio iv.

**D**electat videre campos segetum aureis maturatis calamis aristarum, delectabilius libet attendere campos Ecclesiæ martyrum micantes, plantatos de uno cruore per Agni sanguinem innocentem. Segetes etenim sunt passionum martyrum, juxta cursus aquarum rigati fontibus lacrymarum. Nam sic modò beatus David martyrum purpurata germina, & ante messores gaudiorum tamquam manceps secanti messoria cithara decantabat: Qui seminant, inquit, in lacrymis, in gaudio metent. Ubi seminant in lacrymis? nisi juxta arborem crucis, ubi est fons proximus Salvatoris.

**R.** Sancti tui. 155. **Lectio v.**

**I**nde de latere ejus sanguinis guttæ stillarunt, & pluvia cruoris & aquæ seminata est tolerantia confessorum. De ipso ligno virentis crucis juxta fontem sanguinis plantata virginitas floruit castitatis: inde plantata martyrum tolerantia cœpit seminis sui germina colligere purpurata. Nam unde martyres tolerant, nisi per Dominicam crucem? Unde martyres, in quorum cordibus lex Dei est, maledictiones non timent hominum, nisi quia Christus Dominus pertulit patienter impro-



peria Judæorum? Ista ergo seminatio sanguinis Christi fecit semina martyrum pullulare in campo matris Ecclesiæ, & dicit David: Qui seminant in lacrymis, in gaudio metent: euntes ibant, & flebant.

*R. Verbera. 155. Lectio vi.*

**S**ic perrexerunt, quomodo revertuntur? non flentes, sed gaudentes: non adhuc seminantes, sed manipulos suos læta cervice portantes. O germina, quæ non urit flamma, quia juxta flumen sunt vitreum in Jerusalem; & perpetuò virescunt florè immortalitatis vitæ æternæ. Nesciunt marcescere, quia non timebunt pro justitia flammis arderi: quia agnus deducet eos ad vitæ fontes aquarum, & delebit omnē lacrymam ab oculis eorum, & florebut sicut lilium in medio Angelorum. *R. Tamquam. 155.*

## **INFRA OCTAVAM PLURIMORUM**

*Martyrum.*

*Homilia in Evangel. Luca, cap. 21. Cum audieritis prælia, &c.*

*In die festo habentur tres Lectiones. Homilia S. Gregorii. Dominus ac Redemptor &c. in Breviar. de Commun. plurim. Martyrum.*

## **SECUNDA DIE.**

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 17.*

**I**n illo tempore: Dixit Jesus discipulis suis: Cum audieritis prælia & seditiones, nolite terreri: oportet primùm hæc fieri, sed nondum statim finis. Et reliqua.

*De Homilia sancti Gregorii Papæ.*

*Ex Homilia in Evangelia.*

**O**Mnia, quæ ad usum vitæ accepimus, ad usum convertimus culpæ: sed cuncta, quæ ad usum pravitatis infleximus, ad usum nobis vertuntur ultionis. Tranquillitatem quippe humanæ pacis ad usum vertimus vanæ securitatis: peregrinationem terræ pro habitatione dileximus patriæ: salutem corporum redigimus in usum vitiorum: ipsa serena blandimenta aëris ad amorem nobis servire coegimus: terrenæ delectationis. Jure igitur restat, ut simul nos omnia feriant, quæ simul omnia vitiis nostris malè subacta serviebant: ut quot prius in mundo incolumes habuimus gaudia, tot de ipso postmodum cogamur sentire tormenta.

*R. Propter testamentum Domini, & leges paternas Sancti Dei perstiterunt in amore fraternitatis: \* Quia unus fuit semper spiritus in eis, & una fides. V. Ecce quàm bonum, & quàm jucundum habitare fratres in unum. Quia unus. Lectio viii.*

**Q**uia autem cuncta hæc non de injustitia ferientis sunt, sed de merito mundi patientis, facta pravorum hominum præmittuntur, cum dicitur: Sed ante hæc omnia injicient vobis manus suas. Ac si apertè dicat: Prius corda hominum, & post elementa turbantur: ut cum rerum ordo confunditur, ex qua jam retributione veniat, demonstretur.

Nam

Nam quamvis finis mundi ex ipso suo ordine pendeat, perverfiores tamen quosque inveniens, quia dignè ruinis illius opprimantur, innotescit.

**R.** Sancti mei qui in carne positi, certamen habuistis: \* Mercedem laboris ego reddam vobis. \* Venite benedicti Patris mei, percipite regnum. Mercedem. Gloria Patri. Mercedem.

Sequens R. dicitur infra Octav. plur. Mart. fratrum post octavam Lect.

**R.** Hæc est vera fraternitas, quæ numquam potuit violari certamine; qui effuso sanguine secuti sunt Dominum: \* Contemnentes aulam regiam, pervenerunt ad regna cœlestia. \* Ecce quàm bonum & quàm jucundum habitare fratres in unum. Contemnentes. Gloria Patri. Contemnentes.

Lectio ix.

**S**ed auditis tot terroribus, turbari poterant infirmorū corda; atque ideò consolatio adiungitur, cum protinus subinfertur: Ponite ergo in cordibus vestris, non præmeditari quemadmodū respondeatis. Ac si apertè membris suis infirmantibus dicat: Nolite terreri, nolite pertimescere: vos ad certamen acceditis, sed ego prælior: vos verba editis, sed ego sum qui loquor. **Te Deum.**

### TERTIA DIE.

In tertio Nocturno.

Lectio sancti Evangelii secundum Lucam.

Lectio vii. Cap. 21.

**I**n illo tempore: Dixit Jesus discipulis suis: Cum audieritis prælia & seditiones, nolite terre-

ri: oportet primū hæc fieri, sed nondum statim finis. Et reliqua.

De Homilia sancti Gregorii Papæ.

Unde supra.

**S**equitur: Trademini autem à parentibus, & fratribus. Minorem dolorem mala ingerunt, quæ ab extraneis inferuntur: plus verò in nobis ea tormenta sæviunt, quæ ab illis patimur, de quorum mentibus præsumebamus: quia cum damno corporis, mala non cruciant amissæ charitatis. Hinc est enim, quòd de Juda traditore suo per Psalmistam Dominus dicit: Homo pacis meæ, in quo speravi, qui edebat panes meos, ampliavit adversum me supplantationem. Ac si dicat: Transgressionem ejus tantò gravius pertuli, quantò hanc ab eo, qui meus esse videbatur, sensi.

**R.** Propter. 160.

Lectio viii.

**O**mnes ergo electi, quia summi capitis membra sunt, caput quoque suum in passionibus sequuntur, ut ipsos quoque adversarios in sua morte sentiant, de quorum vita præsumebant, & tantò eis crescat merces operis, quantò eis virtutis lucrum proficit ex alienæ damno charitatis. Sed quia dura sunt, quæ prædicuntur de afflictione mortis, protinus consolatio subditur de gaudio resurrectionis, cum dicitur: Capillus de capite vestro non peribit.

**R.** Sancti mei. supra. Lectio ix.

**S**cimus, fratres, quia caro incisa dolet, capillus incisus non



dolet. Ait ergo martyribus suis. Capillus de capite vestro non peribit: videlicet apertè dicens: Cur timetis, ne pereat quod incisum dolet, quando & illud in vobis perire non potest, quod incisum non dolet? Sequitur: In patientia vestra possidebitis animas vestras. Idcirco possessio animæ in virtute patientiæ ponitur, quia radix omnium, custosque virtutum patientia est. **Te Deum.**

#### QUARTA DIE.

*In festo N. Gurno.*

Lectio sancti Evangelii secundum Lucam.

*Lectio vii. Cap. xi.*

**I**N illo tempore: Dixit Jesus discipulis suis: Cum audieritis prælia & seditiones, nolite terre-ri: oportet primùm hæc fieri, sed nondum statim finis. Et reliqua.

*De Homilia sancti Gregorii Papæ.*

*Unde supra.*

**P**ER patientiam verò posside-  
mus animas nostras: quia dum  
nobis ipsis dominari discimus,  
hoc ipsum incipimus possidere,  
quod sumus. Patientia verò est,  
aliena mala æquanimiter perpe-  
ti, contra eum quoque, qui mala  
irrogat, nullo dolore morderi.  
Nam qui sic proximi mala por-  
tat, ut tamen tacitus doleat, &  
tempus dignæ retributionis quæ-  
rat, patientiam non exhibet, sed  
ostendit. Scriptum quippe est:  
Charitas patiens est, benigna est.  
Patiens est, ut aliena mala tol-  
leret: benigna verò est, ut ipsos  
etiam quos portat, amet.

**R.** Propter. 160. *Lectio viii.*

**S**ED quia natalem martyrum  
shodierna die colimus, fratres  
mei, nequaquam nos à virtute  
eorum patientiæ existimare ex-  
traneos debemus. Si enim, adju-  
vante nos Domino, virtutem pa-  
tientiæ servare contendimus, &  
in pace Ecclesiæ vivimus, & ta-  
men martyrii palmam tenemus.  
Duo quippe sunt martyrii gene-  
ra, unum in mente, aliud in men-  
te simul & actione. Itaque esse  
martyres possumus, etiamsi nul-  
lo percutientium ferro trucidemur:  
mori quippe à persequente,  
martyrium in aperto opere est:  
ferre verò contumelias, odien-  
tem diligere, martyrium est in  
occulta cogitatione.

**R.** Sancti mei. 161. *Lectio ix.*

**P**ROBAMUS quotidie verum ef-  
se quod ante nos dictum est,  
quia sancta Ecclesia electorū flo-  
ribus plena, habet in pace lilia, in  
bello rosas. Sciendum præterea  
est, quòd tribus modis virtus pa-  
tientiæ exerceri solet. Alia nam-  
que sunt, quæ à Deo, alia quæ ab  
antiquo adversario, alia quæ à  
proximo sustinemus. A proximo  
namque persecutiones, damna, &  
contumelias; ab antiquo adver-  
sario tentamenta; à Deo autem  
flagella toleramus. **Te Deum.**

#### QUINTA DIE.

*In festo N. Gurno.*

Lectio sancti Evangelii secundum Lucam.

*Lectio vii. Cap. xi.*

**I**N illo tempore: Dixit Jesus di-  
scipulis suis: Cum audieritis  
prælia & seditiones, nolite terre-  
ri:

ri: oportet primum hæc fieri, sed nondum statim finis. Et reliqua.

De Homilia sancti Gregorii Papæ.

Unde supra, sub hæc.

**S**ed in omnibus his tribus modis vigilantia oculo semetipsa debet mens circumspicere, ne contra mala proximi pertrahatur ad retributionem mali, ne contra tentamenta adversarii seducatur ad delectationem, vel consensum delicti, ne contra flagella Opificis ad excessum proruat murmurationis. Perfecte enim adversarius vincitur, quando mens nostra & inter tentamenta ejus ad delectationem atque consensum non trahitur, & inter contumelias proximi custoditur ab odio, & inter flagella Dei compescitur à murmuratione. **R.** Propter. 160.

Lectio viii.

**N**ec hæc agentes, retribuere nobis bona præsentia requiramus: nam pro labore patientiæ, bona speranda sunt sequentis vitæ: ut tunc præmium nostri laboris incipiat, quando omnis jam labor funditus cessat. Unde & per Psalmistam dicitur: Non in finem oblivio erit pauperis, patientia pauperum non peribit in finem. Quasi enim periisse patientia pauperum cernitur, cum nihil pro illa in hac vita humilibus recompensatur: sed patientia pauperum in finem non peribit; quia tunc ejus gloria percipitur, cum simul omnia laboriosa terminantur. **R.** Sancti. 161.

Lectio ix.

**S**ervate ergo, fratres, in mente patientiam, eamque cum res exigit, exercete in operatione. Nullum vestrum ad odium proximi contumeliosa verba commoveant, nulla periturarum rerum damna perturbent. Si enim fixa mente mansura damna pertimescitis, damna rerum transuentium gravia non putatis. Si æternæ retributionis gloriâ concupiscitis, de temporali injuria non doletis. Tolerate ergo adversarios vestros, sed ut fratres diligite, quos toleratis. Æterna præmia pro damnis temporalibus quaerite. Nec quisquam vestrum suis se viribus hanc implere posse confidat, sed obtinere precibus, ut ipse, hanc qui imperat, præstet. **Te Deum.**

## SEXTA DIE.

In tertio Nocturno

Lectio S. Evangelii secundum Lucam.

Lectio vii. Cap. 21.

**I**n illo tempore: Dixit Jesus discipulis suis: Cum audieritis prælia & seditiones, nolite terri: oportet primum hæc fieri, sed nondum statim finis. Et reliqua.

Homilia venerabilis Bedæ Presbyteri.

Lib. 6 in Luca. cap. 21.

**C**apillus de capite discipulorum Domini non peribit, quia non solum fortia quæque gesta vel dicta Sanctorum, de quibus dicitur, Dominus custodit omnia ossa eorum; sed & volatilis, ut ita dicam, ac tenuissima cogitationum fidelium superficies, quæ de occulta cordis radice, quasi de



164 *Infra Octav. plurim. Mart. extr. temp. Pasch. in iiii. Noct.*

cerebro casaries exit, apud iustum iudicem conservata digna mercede donabitur.

*R. Propter. 160. Lectio viii.*

**U**Nde rectè Propheta, ut bonorum etiam cogitatum merita, Domino quàm sint accepta, demonstret: & reliquæ, inquit, cogitationum diem festum agent tibi. Unde etiam Nazareni in lege tempore consecrationis comam nutrire iubentur; & novacula super caput Samuel non ascendisse perhibetur. At contrà mulier captiva, ut viro Itraëlita nubere queat; mundatus à lepra, ut Ecclesiæ communicare mereatur; omnes sui corporis pilos præcipiuntur eradere.

*R. Sancti mei. 161. Lectio ix.*

**Q**uia videlicet omnis sapientium cogitatio, quæ bona placens, & perfecta est, salvatur in perpetuum, & apud Dominum est merces ejus: stultorum verò pravorumque, quasi Dei aspectibus indigna radix, operum cogitatio, poenitendo debet excidi. Et in patientia vestra possidebitis animas vestras. Sic enim conditi mirabiliter sumus, ut ratio animam, & anima possideat corpus. Jus verò animæ à corporis possessione repellitur, si non prius anima à ratione possidetur. Custodem igitur conditionis nostræ patientiam Dominus esse monstravit, qui in ipsa nos possidere nosmetipsos docuit. **T**e Deum laudamus.

## SEPTIMA DIE.

*In tertio Nocturno.*

*Lectio S. Evangelii secundum Lucam.*

*Lectio vii. Cap. 21.*

**I**N illo tempore: Dixit Jesus discipulis suis: Cùm audieritis prælia & seditiones, nolite terri: oportet primum hæc fieri, sed nondum statim finis. Et reliqua.

*Homilia sancti Ambrosii Episcopi.*

*In Luc. lib. 10. cap. 21.*

**Q**uia in occasu sæculi sumus, præcedunt quædam ægritudines mundi. Ægritudo mundi est fames, ægritudo mundi est pestilentia, ægritudo mundi est persecutio. Sunt autem & alia bella, quæ vir sustinet Christianus: diversarum quoque prælia cupiditatum, studiorumque conflictus, multoque graviores domesticus hostes, quàm extranei. Nunc avaritia stimulat, nunc accendit libido, nunc metus terret, nunc iracundia exagitat, nunc ambitio movet, nunc terrere tentant spiritalia nequitia, quæ sunt in cœlestibus.

*R. Propter. 160. Lectio viii.*

**I**Taque quasi quibusdam urgetur præliis, & quibusdam terræ motibus quatitur mobilis animi nutantis affectus. Sed fortior dicit: Si consistent adversum me castra, non timebit cor meum: si exurgat in me prælium, in hoc ego sperabo. Stat in acie ferens hosti obvium pectus: etiam si quis Goliath exurgat immitis atq; præcelsus, timentibus tamen cæteris, exurgit humilis quasi David,

vid, Regis abiciens arma terreni, sumens fidei tela leviora, & triplici sparto jaculum puræ confessionis intorquens, persecutoris vulnerat impudentiam, contemptor minarum, negligens potestatum; etiam idoneus in quo Christus loquatur.

*R. Sancti. 161.*

*Lesio ix.*

**A** Libi Christus, alibi Pater, alibi Spiritus loquitur Patris. Non discordant ista, sed congruunt: quod unus loquitur, tres loquuntur: quia vox una est Trinitatis. Huic victori, qui suo Goliath gladio peremerit, dum mortem pro Christo excipit, fugatis allophylis, occurrunt juvenulæ, illæ scilicet sicut aquilæ dicentes: Percussit Saul in millibus, David in decem millibus. Quod indicio est, victores sæculi principibus anteferri. Denique mortuis regibus in perpetuum, Martyres regno, cœlestis gratiæ honore succedunt, & illi fiunt supplices, hi patroni. **Te Deum laudamus.**

## **IN DIE OCTAVA.**

*In terris Nocturno.*

*Lesio S. Evangelii secundum Lucam.*

*Lesio vii. Cap. 11*

**I**n illo tempore: Dixit Jesus discipulis suis: Cum audieritis prælia & seditiones, nolite terri: oportet primum hæc fieri, sed nondum statim finis. Et reliqua.

*Homilia sancti Augustini Episcopi.*

*Sermo 14. Lib. 50. Noct.*

**D**ominus noster Jesus Christus testibus, id est, martyribus suis, pro humana fragilitate

solicitis, ne fortè eum confitendo atque moriendo perirent, magnam securitatem dedit, dicens: Capillus de capite vestro non peribit. Times ergo ne pereas, cujus capillus non peribit? Si sic custodiuntur superflua tua, in quanta securitate est anima tua? Non perit capillus, qui cum tondetur, non sentis; & perit anima, per quam sentis? Sanè multa dura eos passuros esse prædixit, ut prædicendo faceret paratiores, dicerentque illi: Paratum cor meum. *R. Propter. 160.*

*Lesio viii.*

**Q**uid est: Paratum cor meum; nisi Parata voluntas mea? Paratam ergo habent martyres voluntatem in martyrio, sed præparatur voluntas à Domino. Illis autem in malis duris, atque asperis futuris commemorans adjecit: In patientia vestra possidebitis animas vestras. In vestra patientia, inquit: non enim esset patientia tua, si non ibi esset & voluntas tua. In vestra patientia: sed unde vestra? Nostrum est quod à nobis habetur, nostrum est & quod nobis donatur.

*R. Sancti. 161.*

*Lesio ix.*

**Q**uomodo enim aliquid donas, nisi ut ejus sit cui donas? Aperta est enim illa confessio: Nonne Deo subjiçietur anima mea? ab ipso enim est patientia mea. Dicit nobis ipse, in vestra patientia: dicamus illi & nos, Patientia mea ab ipso est. Tuum fecit



166 *Infra Octav. plurim. Mart. extr. temp. Pasch. in ill. Noct.*

fecit donando, noli ingratus esse tibi assignando. Nonne in oratione Dominica dicimus, & nostrum est quod à Deo est? Quotidie dicimus, Panem nostrum quotidianum. Jam dixisti, Nostrum; & dicis, Da nobis: ecce, nostrum, ecce, da nobis? illo dante fit nostrum. **T**e Deum laudamus.

## IN FRA OCTAVAM PLURIMORUM

*Martyrum.*

*Homilia in Evangelium Lucæ, c. 6. Descendens Jesus, &c.*

*In diebus illis: Audientur tres Lectioes Homiliae sancti Ambrosii. Adverte omnia in Prevalio de concurru plurimorum Martyrum.*

### SECUNDA DIE.

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 6.*

**I**N illo tempore: Descendens Jesus de monte, stetit in loco campestri, & turba discipulorum ejus, & multitudo copiosa plebis ab omni Judæa, & Jerusalem, & maritima, & Tyri, & Sidonis. Et reliqua.

*De Homilia S. Ambrosii Episcopi.*

*Cap. 1. in Luc. cap. 6.*

**S**ecunda benedictio, Beati, inquit, mites. Tertia, Beati qui lugent. Quarta, Beati qui esuriunt & sitiunt justitiam. Quinta, Beati misericordes. Sexta, Beati mundo corde. Septima, Beati pacifici. Et bene septima; quoniam eo die ab omnibus mundi operibus requievit Deus: dies enim quietis & pacis est. Octava, Beati qui persecutionem patiuntur propter justitiam. Veni Domine Jesu, doce nos ordinem beatitudi-

num tuarum. **R.** Propter. 160.

*Lectio viii.*

**N**Eque enim sine ordine dixisti, primò beatos pauperes spiritu, secundò beatos mites, tertio beatos qui lugent. Etiam si cognosco aliquid, tamen ex parte cognosco. Si enim Paulus ex parte cognovit, quantum ego possum cognoscere, qui Paulo quantum vitæ, tantum etiam verbo inferior sum? Vita enim verbum exigit, & acquirit: sermo autem sine vita non est sermo Dei. Quantum me sapientior Paulus? ille gloriatur in periculis, ego gloriior in successibus.

**R.** Sancti. 161.

*Lectio ix.*

**S**ed tamen potest Deus de lapidibus homines suscitare, & verbum proferre de clausis, vocem elicere de mutis. Quia si oculos asinæ aperuit, ut videret Angelum; potens est & nobis quoque aperire oculos, ut possimus Dei videre mysterium. Beati, inquit, pauperes. Non omnes beati pauperes: paupertas enim media est; possunt & boni esse & mali pauperes. Nisi fortè ille intelligendus pauper beatus, quem Propheta describit, dicens: Quia melior pauper justus, quam dives mendax. **T**e Deum.

### TERTIA DIE.

*In tertio Nocturno.*

*Lectio S. Evangelii secundum Lucam.*

*Lectio viii. Cap. 6.*

**I**N illo tempore: Descendens Jesus de monte, stetit in loco campestri, & turba discipulorum ejus, &

& multitudo copiosa plebis ab omni Judæa, & Jerusalem, & maritima, & Tyri, & Sidonis. Et reliqua.

*De Homilia S. Ambrosii Episcopi. Unde supra.*

**B**Eatus pauper qui clamavit, & Dominus exaudivit eum. Pauper à crimine, pauper à vitiis, pauper in quo mundi princeps nihil invenit. Pauper illius æmulus Pauperis, qui cum dives esset, propter nos pauper factus est. Unde plenè Matthæus aperuit, dicens: Beati pauperes spiritu. Pauper enim spiritu non inflatur, non extollitur mente cordis sui.

*R. Propter. 160. Lectio viii.*

**P**Rima ergo ista benedictio est, cum deposuero omne peccatum, & exuero omnem malitiam, & simplicitate contentus fuero, inops malorum; superest ut mores meos temperem. Quid enim mihi prodest carere sæcularibus, nisi fuero mitis atque mansuetus? Nam qui sequitur viam rectam, sequitur utique illum qui ait: Discite à me, quia mitis sum & humilis corde.

*R. Sancti. 161. Lectio ix.*

**D**Epone igitur quæ improba sunt, egeto divitiis secundū bonam paupertatem, mitiga affectum tuum ut non irascaris, aut certè iratus ne peccaveris, juxta quod scriptum est: Irascimini & nolite peccare. Præclarum est enim motum temperare consilio: nec minoris virtutis docetur, cohibere iracundiā, indignationem

compescere, quā omnino non irasci; cum plerumque illud lentius, hoc fortius æstimetur. Cum hoc feceris, memento quia peccator es, & lugeto peccata tua, lugeto delicta. **T**e Deum.

#### QUARTA DIE.

*In tertio Nocturno.*

*Lectio S. Evangelii secundū Lucam.*

*Lectio vii. Cap. 6.*

**I**N illo tempore: Descendens Jesus de monte, stetit in loco campestri, & turba discipulorum ejus, & multitudo copiosa plebis ab omni Judæa, & Jerusalem, & maritima, & Tyri, & Sidonis. Et reliqua.

*De Homilia sancti Ambrosii Episcopi.*

*Unde supra.*

**E**T benè tertiā benedictio est, peccata desilentis, quia Trinitas est, quæ peccata condonat. Ablue igitur te lacrymistuis, fleatibus lava. Si tu ipse te fleveris, alius te non flebit: nam si Saul deflisset peccata sua, Samuel eum non flevisset. Habet unusquisque quos fleat mortuos suos. Mortui sumus quando peccamus, quando implemur ossibus mortuorum. Mortuus est sermo malus, qui exit ex ore; exit enim de sepulchro malo: Sepulchrum autem patens est guttur eorum.

*R. Propter. 160. Lectio viii.*

**I**Deò dicit Apostolus: Imitatores mei estote: vult nos delictorum meminisse nostrorum. Paulus non habebat quod lugeret, ex quo in Christum credidit; & tamen priora deflevit dicens: Quia



Quia non sum dignus vocari Apostolus, quia persecutus sum Ecclesiam Dei. Ille igitur peccator ante fidem, nos verò adhuc peccamus post fidem. Qui peccator est, defleat se, & arguat se, ut fiat justus: Justus enim accusator est sui. Ordinem igitur prosequamur, quia scriptum est: Ordinate in me charitatem.

*R. Sancti. 161. Lectio ix.*

**D**eposui peccatum, temperavi mores, delicta deflevi, esurire incipio, & sitire justitiam. Æger enim cum in gravi morbo est, non esurit, quia ægritudinis dolor famem excludit. Sed quæ est ista fames justitiæ? qui sunt isti panes quos esurit justus? Ne forte panes illi, de quibus dictum est: Juvenis fui, & senui, & non vidi justum derelictum, nec semen ejus quærens panem. Qui esurit, utique virium quærit augmentum: quod autem majus virtutis incrementum, quam norma justitiæ? **T**e Deum.

### QUINTA DIE.

*In tertio Nocturno.*

*Lectio sancti Evangelii secundum Lucam.*

*Lectio 11. Cap. 6.*

**I**n illo tempore: Descendens Jesus de monte, stetit in loco campestri, & turba discipulorum ejus, & multitudo copiosa plebis ab omni Judæa, & Jerusalem, & maritima, & Tyri, & Sidonis. Et reliqua.

*De Homilia S. Ambrosii Episcopi Unde supra.*

**P**ost has, Beati, inquit, misericordes: justitiam enim se-

quitur misericordia. Unde dictum est: Dispersit, dedit pauperibus, justitia ejus manet in æternum. Sed etiam qui misericordiam defert, mercedem amittit, nisi mundo corde misereatur: nam si instantiam quærat, nullus est fructus. Emunda igitur interiora mentis tuæ, & si diligenter peccatoris tui secreta mundaveris, compatere iis qui impugnantur: & intellige, quanti hominum, quanti fratrum tuorum auxilium tuum quærant. Sed nisi tu prius interiora tua vacua feceris ab omni labe peccati, ne dissensiones contentionesque ex affectu tuo prodeant, non potes aliis ferre medicinam. *R. Propter. 160.*

*Lectio vii.*

**A** Te igitur pacem incipe, ut, cum fueris ipse pacificus, pacem aliis feras. Quomodo enim potes aliorum corda mundare, nisi tuum antè mundaveris? Profuisti igitur aliis, tulisti auxilium pluribus: festina, contende ad finem. Multi cum essent exitus vitæ, unus Domino compete-  
tebat. Nam quod natum erat secundum carnem, oportebat secundum carnem mori. Elegit passionem, ut moreretur pro nobis: & tu dic de omnibus, quæ retribuit tibi Dominus: Calicem salutaris accipiam, & nomen Domini invocabo, hoc est, passionem.

*R. Sancti. 161.*

*Lectio ix.*

**V**ide igitur ordinem. Oportet te pauperem fieri spiri-  
tu.

Lectio viii.

tu. Humilitas enim spiritus divitiae virtutum sunt. Nisi pauper fueris, mitis esse non poteris. Qui mitis est, potest lugere praesentia. Qui inferiora luget, potest desiderare meliora. Qui superiora quaerit, inferiora devitat, ut & ipse a superioribus adjuvetur. Qui miseretur, cor suum mundat. Patientia vero perfectio est charitatis. Qui autem patitur persecutionem, in ultimo certamine constitutus probatur adversis: ut, cum legitime certaverit, coronetur. **Te Deum.**

SEXTA DIE.

In tertio Nocturno.

Lectio sancti Evangelii secundum Lucam.

Lectio vii. Cap. 5.

**I**N illo tempore: Descendens Jesus de monte, stetit in loco campestri, & turba discipulorum ejus, & multitudo copiosa plebis ab omni Judaea, & Jerusalem, & maritima, & Tyri, & Sidonis. Et reliqua.

De Homilia S. Ambrosii Episcopi. Unde sup.

**O**s quidem gradus volunt esse virtutum, per quos ab ultimis ad superiora possimus ascendere: denique sicut incrementa virtutum, ita etiam sunt incrementa praemiorum. Plus est enim Dei esse filium, quam possidere terram, & consolationem mereri. Sed quia & primum praemium regnum coelorum est, & ultimum praemium regnum coelorum est, numquid aequale praemium incipientibus atque perfectis est? **R. Propter. 160.**

Octav. Rom.

**A**bes primum regnum, quando Sancti rapiuntur in nubibus obviam Christo in aera. Multi enim dormientium surgent, isti in vitam aeternam, illi in opprobrium. Primum ergo regnum coelorum Sanctis propositum est in absolutione corporis: secundum regnum coelorum est, post resurrectionem esse cum Christo. Cum fueris in regno coelorum, tunc processus est mansionum: etsi unum regnum, diversa tamen merita sunt in regno coelorum.

R. Sancti. 161.

Lectio ix.

**P**ost resurrectionem terram tuam incipies possidere absolutus a morte. Ille enim, cui dicitur, Terra es, & in terram ibis, non possidet terram suam: non enim potest esse possessor, qui non capit fructum. Absolutus igitur per Dominicam crucem, si tamen intra jugum Domini fueris inventus, consolationem in ipsa possessione reperies. Consolationem sequitur delectatio, delectationem divina miseratio. Quem autem misereatur Dominus, & vocat: qui vocatur, videt vocantem: qui Deum viderit, in jus divinae generationis assumitur: tunc demum quasi Dei filius celestis regni divitiis delectatur. Ille igitur incipit, hic repletur. **Te Deum laudamus.**

SEPTIMA DIE.

In tertio Nocturno.

Lectio S. Evangelii secundum Lucam.

Lectio vii. Cap. 5.

P.

In



**I**N illo tempore: Descendens Jesus de monte, stetit in loco campestri, & turba discipulorum ejus, & multitudo copiosa plebis ab omni Judæa, & Jerusalem, & maritima, & Tyri, & Sidonis. Et reliqua.

*De Homilia S. Ambrosii Episcopi.*

**N**unc dicamus, quemadmodum in quatuor benedictionibus sanctus Lucas benedictiones sit octo complexus. Et quidem sci- mus, virtutes esse quatuor cardinales, temperantiam, justitiam, prudentiam, fortitudinem. Qui pauper est spiritu, avarus non est. Qui flet, non superbit, sed mitis est, & pacatus. Qui luget, humiliatur. Qui justus est, non negat, quod scit omnibus ad usum communiter datum. Qui miseretur, largitur de suo. Qui suum donat, non querit alienum, nec dolum proximo suo instruit.

*Propter. 160. Lectio viii.*

**C**onnexæ igitur sibi sunt concatenatæque virtutes, ut qui unam habeat, plures habere videatur: & Sanctis una competit virtus; sed ejus, quæ fuerit uberior, uberius est præmium. Quanta hospitalitas in Abraham, quanta humilitas, quanta charitas, ut fratris filium ab hoste servaret: & quanta abstinencia, ut nihil de præda quæreretur? Sed quia fide præstitit, fidei præ cæteris meruit principatum. Ergo unicuique plura præmia, quia plura incentiva virtutum.

*Sancti. 161.*

**E**d quod in aliquo merito copiosius, hoc etiam in præmio redundantius. Beati igitur pauperes spiritu. Habes temperantiam, quæ à peccato abstinet, sæculum calcat, illecebrosa non querit. Beati qui esuriunt & sitiunt: qui enim esurit, esurienti compatitur, compatiendo largitur, largiendo fit justus: quia justitia ejus manet in æternum. **Te Deum laudamus.**

## IN DIE OCTAVA.

*Lectio sancti Evangelii secundum Lucam.*

**I**N illo tempore: Descendens Jesus de monte, stetit in loco campestri, & turba discipulorum ejus, & multitudo copiosa plebis ab omni Judæa, & Jerusalem, & maritima, & Tyri, & Sidonis. Et reliqua.

*De Homilia sancti Ambrosii Episcopi.*

**E**T in Matthæo sitim & famem intelligimus spiritalem, qua cibus justitiæ desideratur, aut potus: quia virtus quasi materia quædam virtutum est, ut justus æqualem se inferioribus præstet, dolum excludat, veritatem requirat. Beati qui nunc fletis quia ridebitis. Habes prudentiam, cujus est flere occidua, & ea quæ æterna sunt querere, lugere sæcularia quæ se ipsa impugnent, Deum pacis inquirere, qui stulta mundi eligit, ut confundat sapientes, & qui ea quæ non sunt

Infra Octav. plurim. Mart. extr. temp. Pasch. in iii. Noct. 171

sunt destituat, ut quæ sunt possit adipisci. **R.** Propter. 160.

Lesio viii.

**B**Eati eritis, cum vos oderint homines. Habes fortitudinē, sed eam quæ non odium mereatur ex crimine, sed persecutionem patiat ex fide. Sic enim ad passionis pervenitur coronam, si gratiam hominum negligas, divinam sequaris. Denique, ut scias consummationem esse fortitudinis passionem, secundum hæc inquit, faciebant Prophetis patres eorum: quia Prophetas Judæi usque ad mortem corporis persecuti sunt.

**R.** Sancti. 161.

Lesio ix.

**E**t etiam fortitudinis, iram vincere, indignationemque cohibere: ac per hoc fortitudo animum corpusque confirmat. Nec perturbari sinit timore aliquo vel dolore: quibus velut pravis interpretibus plerumque percellimur. Ergo temperantiam cordis habet animique munditiam; justitia misericordiam, pacem prudentia, mansuetudinem fortitudo. Te Deum laudamus.

## INFRA OCTAVAM PLURIMORUM

Martyrum.

Homilia in Evangel. Matth. cap. 24. Seden-  
te Jesu super montem.

IN DIE FESTO.

In tertio Nocturno.

Lesio S. Evangelii secundum Matthæum.

Lesio vii. Cap. 24.

**I**N illo tempore: Sedente Jesu  
super montem Oliveti, acces-

serunt ad eum discipuli secreto,  
dicentes: Dic nobis, quando hæc  
erunt? Et reliqua.

Homilia sancti Hilarii Episcopi.

Comment. in Matth. can. 25.

**D**iscipuli Dominum interro-  
gant, quando hæc fierent,  
quodve signum & adventus sui  
& consummationis sæculi nosce-  
rent. Et quia tria hæc in unum  
quæ sita sunt; distinctis & tempo-  
ris intelligentiæ significationibus  
separantur. Respondetur igitur  
primum de civitatis occasu: &  
confirmantur veritate doctrinæ,  
ne quis fallax ignorantibus pos-  
set obrepere. Venturi enim erant  
etiā eorum tempore, qui se Chri-  
stum essent nuncupaturi. Ut igi-  
tur fides pestifero mendacio de-  
trahi posset, admonitio præcessit.

**R.** Propter. 160.

Lesio viii.

**C**onfirmat igitur eos ad tole-  
rantiam passionum, fugæ,  
verberationis, interitus, & publi-  
ci in eos odii propter nomen e-  
jus. Atque his quidem vexatio-  
nibus multi turbabuntur, & tan-  
tis insurgentibus malis scandali-  
zabuntur, & usque in mutuum  
odium excitabuntur. Et falsi pro-  
phetæ erunt, ( ut Nicolaus unus  
ex septem Diaconibus fuit ) mul-  
tosque ementita veritate perver-  
tent: & abundante nequitia cha-  
ritas refrigescet,

**R.** Sancti. 161.

Lesio ix.

**S**ed usque in finem perseve-  
rantibus salus reservata est: ac  
tum per omnes orbis partes vi-



ris Apostolicis dispersis, Evangelii veritas prædicabitur. Et cum universis fuerit cognitio sacramenti coelestis inuenta, tum Jerusalem occasus & finis incumbet: ut prædicationis fidem, & infidelium poena, & metus civitatis eruta consequatur. Hæc igitur in eam, ut fuerant prædicta, perfecta sunt: & lapidatis, fugatis, peremptis Apostolis, fame, bello, captivitate consumpta est. Actum fuit digna non esse, cum, ejectis prædicatoribus Christi, indignam Dei prædicatione se præbuit.

*Te Deum laudamus.*

## SECUNDA DIE.

*In tertio Nocturno.*

*Lectio sancti Evangelii secundum Matthæum.*

*Lectio vii. Cap. 24.*

**I**n illo tempore: Sedente Jesu super montem Oliveti, accesserunt ad eum discipuli secretò, dicentes: Dic nobis, quando hæc erunt? Et reliqua.

*Homilia sancti Hieronymi Presbyteri.*

*Lib. 4. in Matth. cap. 24.*

**U**bi verum lumen scientiæ nasccebatur, accedunt ad eum discipuli secretò, qui mysteria & futurorum revelationem nosse cupiebant, & interrogant tria: quo tempore Jerusalem destruenda sit: quo venturus Christus: quo consummatio sæculi futura sit. Multi enim venient in nomine meo, dicentes: Ego sum Christus, & multos seducunt: quorum unus est Simon Samaritanus, quæ in Actibus Apostolorum legimus, qui se magnam dicebat esse Dei

virtutem, hæc quoque & cætera; in suis voluminibus scripta dimittens: Ego sum sermo Dei, ego sum speciosus, ego paracletus, ego omnipotens, & ego omnia Dei.

*R. Propter. 160. Lectio viii.*

**H**æc autem omnia initia sunt dolorum. Non ambigo, hæc quidem juxta litteram futura quæ scripta sunt, sed mihi videtur regnum contra regnum, & pestilentia eorum, quorum sermo serpit ut cancer, & fames audiendi verbum Dei, & commotio universæ terræ, & à vera fide separatio, in hæreticis, magis intelligi, qui contra se invicem dimicantes, Ecclesiæ victoriam faciunt. Quod autem dixit: Hæc autem omnia initia sunt dolorum, melius transfertur, parturitionum: ut quasi conceptus quidam adventus Antichristi, non partus intelligatur.

*R. Sancti. 161. Lectio ix.*

**E**t quoniam abundavit iniquitas, refrigescet charitas multorum. Non omnium negavit fidem, sed multorum: multi enim vocati, pauci verò electi. Nam in Apostolis, & similibus eorum permanens est charitas, de qua scriptum est: Aquæ multæ non potuerunt extinguere charitatem. Et ipse Paulus: Quis nos separabit à charitate Christi? tribulatio, an angustia, an fames? & reliqua. *Te Deum laudamus.*

## TERTIA DIE.

*In tertio Nocturno.*

*Lectio*

Lectio S. Evangelii secundum Matthæum.

Lectio vii. Cap. 24.

**I**n illo tempore: Sedente Jesu super montem Oliveti, accesserunt ad eum discipuli secretò, dicentes: Dic nobis, quando hæc erunt? Et reliqua.

Homilia sancti Joannis Chrysostomi.

Ex Homilia 70. in Matth. initio.

**I**dcircò seorsum accesserunt, quia de magnis & occultioribus rebus interrogaturi erant. Duo igitur interrogant: unum, Quando hæc erunt, templi hujus scilicet everasio: alterum, Quod adventus tui signum est? Lucas verò unum, de Jerosolymis videlicet interrogasse ipsos exponit: putabant enim tunc statim adventum ejus futurum. Marcus autem non omnes de Jerosolymorum everisione, sed Petrum & Joannem, qui majorem apud eum fiduciam habebant, interrogasse ait. **R.** Propter. 160.

Lectio viii.

**Q**uid igitur ipse? Videte, ne quis vos seducat. Nam quoniam de Jerosolymæ suppliciis audientes quasi omnes periculi inexpertès futuri, de secundis solummodò cogitabant, quæ se citò consecuturos arbitrabantur, idcirco rursus difficiliora eis prædicat, suspensos faciens, & dupliciter ad vigilandum exhortans, ne adulatione seducentium circumveniantur, neve periculorum vi opprimantur. Duplex enim bellum futurum asserit, alterum à seductoribus, alterum

ab hostibus: sed illud multò gravius atque periculosius, quod in confusione atque turbatione rerum hominibus timore perterritis incumbet. **R.** Sancti 161.

Lectio ix.

**M**agna enim tunc profectò tempestas Judæam turbabat, Romana vi superante, multis urbibus expugnatis, & armis universa regione referta; qua de causa multa facillimè credebantur. Nam bella nunc non ea, quæ in aliis partibus orbis gesta fuerunt, (nulla enim illorum cura erat;) sed ea quæ adversus Jerusalem Romani susceperunt, prænuntiat. Jam enim Romanorum potentia sollicitos eos faciebat: ac, quoniam turbatura ipsos erat, hæc omnia prædicuntur: ut ostendat deinde se quoque ipsum in Judæos insurrecturum, non pugnas solum, verum etiam illata divinitus vulnera prædicat. **Te Deum laudamus.**

#### QUARTA DIE.

In id. No 3.

Lectio S. Evangelii secundum Matthæum.

Lectio vii. Cap. 24.

**I**n illo tempore: Sedente Jesu super montem Oliveti, accesserunt ad eum discipuli secretò, dicentes: Dic nobis, quando hæc erunt? Et reliqua.

De Homilia S. Joannis Chrysostomi.

Unde fuit.

**P**osteaquam sollicitos curiososque reddidit, & ad vigilandum paratiores, seductorum & pseudochristorum facta mentione, tunc demum Jerosolymorum



exponit afflictiones, à præteritis semper ita futura confirmans, ut vel rudiores ad credenda hæc facile induci queant. Bellum verò, & bellorum auditum, primos impetus appellat: & ne post illa bella consumptionem omnium futuram putarent, præmuniens intulit: Sed nondum est finis: surget enim, ait, gens adversus gentem. Afflictionum originem intelligit; hæc autem omnia dolorum principium sunt, eorum videlicet, quæ illis accident.

*R. Propter. 160. Lectio viii.*

**O**pportunè pericula discipulorum inseruit, ut à communibus eos consolaretur; nec tamen id ei suffecit, sed adjecit: Propter nomen meum. Eritis enim, ait, odio omnibus propter nomen meum. Tunc scandalizabuntur multi, Majus id malum est, siquidem intestina quoque bella ipsis imminet: multi enim falsi fratres facti, eos turbabunt. Vides bellum triplex futurum? unum ab hostibus, alterum à seductoribus, tertium à falsis fratribus.

*R. Sancti mei. 161. Lectio ix.*

**A**udi nunc Paulum de his plangentem atque dicentem: De foris pugnae, intus timores, & pericula in falsis fratribus. Et rursus: Tales enim falsi apostoli sunt, dolosi operarii, in Apostolos Christi se transformantes. Affert inde quod multò cæteris gravius erat, nec ab ipsa quidem charitate ullum eos solamen habi-

turos. Deinde ostendens, generoso excelsoque animo nihil hæc officere posse, Nolite timere, aut turbari, ait: nam si tolerantiam, ut decet, habebitis, non superabunt vos hæc mala. *Te Deum.*

## QUINTA DIE.

*In tercio Nocturno.*

*Lectio S. Evangelii secundum Matthæum.*

*Matthæi. Cap. 24.*

**I**N illo tempore: Sedente Jesu super montem Oliveti, accesserunt ad eum discipuli secretò, dicentes: Dic nobis, quando hæc erunt? Et reliqua.

*Homilia venerabilis Bedæ Presbyteri.*

*Libro 4. Comment. in Marcum.*

**S**edet Dominus in monte Olivarum contra templum, cum de ruina templi, & excidio gentis disputat: ut etiam ipso corporis situ, verbis, quæ loquitur, congruat, mysticè designans, quia quietus manens, in factis superbiorum detestatur amentiam. Quis enim non videat, quod mons Oliveti fructiferam designet sanctæ Ecclesiæ celsitudinem, quam Dominus semper inhabitare delectatur? quia videlicet mons ille non infructuosas habere arbores, & silvam sterilem, sed olivas gignere solebat, quibus ad repellendas noctium umbras lumen alitur, solvuntur infirmitates, & requies lassissimis tribuitur.

*R. Propter. 160. Lectio viii.*

**Q**uæ cuncta specialiter in Ecclesia fieri probat ipsa, cum dicit: Ego autem sicut oliva fructifera in domo Domini, sperabo

in misericordia Dei mei. Videte, ne quis vos seducat. Multi imminente Jerosolymorum excidio principes extitere, qui se esse Christos dicerent, tempusque libertatis jam jamque appropinquare referrent. Multi in Ecclesia ipsis etiam temporibus Apostolorum hæresiarchæ prodire qui inter alia plurima veritati contraria, diem Domini prædicarent instare: quos Apostolus in epistola ad Thessalonicenses damnat.

R. Sancti mei. 161. *Lectio ix.*

**M**ulti in nomine Christi venere Antichristi, quorum primus est Simon Magus, cui, sicut in Actibus Apostolorum legimus, auscultabant omnes qui in Samaria erant, à minimo usque ad maximum, dicentes: Hic est virtus Dei, quæ vocatur magna, eò quod multo tempore magicis artibus suis dementasset eos. Cum audieritis autem bella, & opiniones bellorum, ne timueritis. Bella ad hostes pertinent, seditiones ad cives. Quæ utraque à tempore Dominicæ passionis in populo Judæorum, qui sibi pro Salvatore Christo seditiosum latronem elegit, satis superque constat abundasse. *Te Deum laudamus.*

## SEXTA DIE.

*In tertio Moysi.*  
*Lectio S. Evangelii secundum Matthæum.*

*Lectio vii. Cio. 24.*

**I**n illo tempore: Sedente Jesu super montem Oliveti, accesserunt ad eum discipuli secreto,

dicentes: Dic nobis, quando hæc erunt? Et reliqua.

*Homilia sancti Augustini Episcopi.*

*De civitate Dei.*

**N**egare non possumus, etiam perseverantiam in bono proficientem usque in finem, magnum esse Dei munus: nec esse nisi ab illo, de quo scriptum est, Omne datum optimum, & omne donum perfectum de sursum est, descendens à Patre luminum. Nam si dixerimus, istam perseverantiam tam laudabilem, tamque felicem sic esse hominis, ut ei non sit ex Deo: illud primitus evacuamus, quod ait Dominus Petros: Rogavi pro te, ne deficiat fides tua. Quid enim ei rogavit nisi perseverantiam usque in finem.

R. Propter. 160. *Lectio viii.*

**D**einde cum dicit Apostolus: Oramus autem ad Deum, ne quid faciatis mali; proculdubio perseverantiam eis orat ad Deum. Neque enim nihil mali facit, qui bonum deserit, & à quo declinare debet; inclinatur in malum, non perseverans in bono. Nec aliud oramus, cum oramus, ut qui stat, steter, nisi ut perseveret. Quid est etiam, quod in Apostolorum Actibus legimus: Audientes autem Gentes gavissæ sunt, & exceperunt verbum Domini, & crediderunt quotquot erant ordinati in vitam æternam? Quis in æternam vitam potuit ordinari, nisi perseverantiæ dono?

R. Sancti mei. 161. *Lectio ix.*



**Q**ui perseveraverit usque in finem, hic salvus erit. Qua salute, nisi æterna? cum in oratione Dominica Deo Patri dicimus, Sanctificetur nomen tuum; quid aliud dicimus, quam ut nomen ejus sanctificetur in nobis? Quod cum jam per lavacrum regenerationis effectum sit, quare quotidie à fidelibus poscitur, nisi ut in eo, quod factum est in nobis, perseveretur à nobis? Nullo autem dubitante, quisquis à Domino, ut in bono perseveret, precatur; donum ejus esse talem perseverantiam confitetur.

*Te Deum laudamus.*

### SEPTIMA DIE.

*Lectionis S. Evangelii secundum Matthæum.*

**I**n illo tempore: Sedente Jesu super montem Oliveti, accesserunt ad eum discipuli secretò, dicentes: Dic nobis, quando hæc erunt? Et reliqua.

*Homilia sancti Joannis Chrysostomi.*

*In Homil. 34. in Matth. circa med.*

**Q**ui autem perseveraverit usque in finem, hic salvus erit. Hæc etiam alioquin animos discipulorum extollere possent, atque confirmare: quoniam tantam prædicationis suæ virtutem audiebant futuram, ut omnis sanguinis conjunctio virtute illius contemneretur, omnis affinitas sperneretur, omnia illi cederent adversa, omnis potestas undique pelleretur. Nam si nulla naturæ vis adversus sermonem

vestrum potest reluctari, sed universa deprimitur atque resolvitur, quidnam aliud vincere vos poterit? *R. Propter. 160.*

*Post multa.*

*Lectionis viii.*

**E**go certè stupeo, quòd nulla ambiguitate detenti fuerunt, nullam liberationem ab his malis quæsierunt, præsertim cum non per duos vel tres annos, sed per totam vitam hoc impendere sibi perciperent. Hoc enim ipsum signanter expressit, cum dixit: Qui autem in finem perseveraverit, hic salvus erit. Vult quippe non solum gratiâ sui ipsos esse munitos, sed à se ipsis etiam non nihil conferre. Quod ita esse videbis, si altius consideraveris, alia omnino ad eum, alia etiam ad discipulos posse referri.

*R. Sancti mei. 161.*

**C**ontinuum ergo patientiam quærit. Nam, ne quis nihil Apostolis, sed totum Christo attribuat; ne quis nihil mali per tulisse Apostolos putet, atque ideò de patientia ipsorum non admiretur, idcirco patientia quoque vestra opus est, ait; nam etsi primò vos à periculis eruam, graviora tamen alia atque alia deinde succedent, nec exitus umquam illorum erit in hac vita. Qui enim perseveraverit in finem, hic salvus erit. *Te Deum.*

### IN DIE OCTAVA.

*In tertio Nocturno.*

*Homilia S. Gregorii in evangel. Cum audieritis, &c. ut in Breviario in Capitulo plurimor. Martyr. Vel ea, quæ in hac Octava tractantur.*

*Infra Octav. plurim. Mart. temp. Pasch. in ill. Noct. 177*

*ferasse facit unum ob Dominicam, vel  
Primum infra Octavam occurrentem.*

## INFRA OCTAVAM PLURIMORUM

*Martyrum.*

*Homilia in Evangel. Matth. cap. 5. Videns  
Jesús turbas.*

### IN DIE FESTO.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 5.*

**I**N illo tempore: Videns Jesús turbas, ascendit in montem; & cum sedisset, accesserunt ad eum discipuli ejus. Et reliqua.

*Homilia sancti Augustini Episcopi.*

*Lib. 1. de Sermon. Domini in monte. sub initium.*

**S**I quæritur, quid significet mons, benè intelligitur significare majora præcepta justitiæ, quia minora erant, quæ Judæis data sunt. Unus tamen Deus per sanctos Prophetas & famulos suos, secundum ordinatissimam distributionem temporum, dedit minora præcepta populo, quem adhuc timore alligari oportebat; & per Filium suum majora populo, quem charitate jam liberari convenerat. Cum autem minora minoribus, majora majoribus dantur, ab eo dantur, qui solus novit congruentem suis temporibus generi humano exhibere medicinam.

*R. Propter. 160. Lectio viii.*

**N**Ec mirum est, quòd dantur præcepta majora propter regnum cœlorum, & minora data sunt propter regnum terrenum, ab eodem uno Deo, qui fecit cœlum & terram. De hac ergo ju-

stitia, quæ major est, per Prophetam dicitur: Justitia tua sicut montes Dei. Et hoc benè significat, quòd ab uno magistro, solo docendis tantis rebus idoneo, docetur in monte. Sedens autem docet, quod pertinet ad dignitatem magisterii. Et accedunt ad eum discipuli ejus, ut audiendis illius verbis hi essent etiam corpore viciniore, qui præceptis adimplendis etiam animo propinquabant. Et aperiens os suum docebat eos, dicens: Ista circumlocutio, qua scribitur, Et aperiens os suum, fortassis ipsa mora commendat, aliquantò longiorem futurum esse sermonem. Nisi fortè non vacet, quòd nunc enim dictum est aperuisse os suum, quòd ipse in lege veteri aperire solebat ora Prophetarum.

*R. Sancti mei. 161. Lectio ix.*

**Q**uid ergo dicit? Beati pauperes spiritu: quoniam ipsorum est regnum cœlorum. Legimus scriptum de appetitione rerum temporalium: Omnia vanitas, & præsumptio spiritûs. Præsumptio autem spiritûs, audaciam & superbiam significat. Vulgò etiã magnos spiritus superbi habere dicuntur: & rectè, quandoquidem spiritus etiam ventus vocatur. Unde scriptum est: Ignis, grando, nix, glacies, spiritus procellarum. Quis verò nesciat, superbos inflatos dici, tamquam vento distentos? Unde est etiam illud Apostoli: Scientia inflat, chari-



charitas verò ædificat. Quapropter rectè hic intelliguntur pauperes spiritu, humiles & timentes Deum, id est, non habentes inflantem spiritum. **Te Deum.**

## SECUNDA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 5.*

**I**N illo tempore: Videns Jesus turbas, ascendit in montem; & cum sedisset, accesserunt ad eum discipuli ejus. Et reliqua.

*De Homilia sancti Augustini Episcopi.  
Ex lib. i. de Sermone Domini in monte,  
cap. 1. & 2.*

**N**Ec aliunde omnino incipere oportuit beatitudinem, quàm à paupertate spiritus, siquidem perventura est ad summam sapientiam. Initium autem sapientiæ timor Domini: quoniam & e contrario, Initium omnis peccati superbia scribitur. Superbi autem appetunt & diligunt regna terrarum. Beati mites: quoniam ipsi hæreditate possidebunt terram. Illam credo terram, de qua in Psalmo dicitur: Spes mea es tu, portio mea in terra viventium. Significat enim quamdam soliditatem & stabilitatem hæreditatis perpetuæ; ubi anima per bonum affectum, tamquam loco suo requiescit, sicut corpus in terra, & inde cibo suo alitur, sicut corpus ex terra: ipsa est requies, & vita Sanctorum. Mites autem sunt, qui cedunt improbitatibus, & non resistunt malo, sed vincunt in bono malum.

**R. Propter. 160.**

*Lectio vii.*

**B**Eati lugentes: quoniam ipsi consolabuntur. Luctus est tristitia de amissione charorum: conversi autem ad Deum, ea, quæ in hoc mundo chara amplectebantur, amittunt. Non enim gaudent his rebus, quibus antè gaudebant: & donec fiat in illis amor æternorum, nonnullâ mœstitiâ sauciantur. Consolabuntur ergo Spiritu sancto, qui maxime propterea Paraclitus nominatur, id est, consolator: ut temporalia amittentes, æternâ lætitiâ perfruantur. **R. Sancti mei. 161.**

*Lectio ix.*

**B**Eati qui esuriunt & sitiunt justitiam: quoniam ipsi saturabuntur. Jam istos amatores dicit veri & inconcussi boni. Illo ergo cibo saturabuntur, de quo ipse Dominus dicit: Meus cibus est, ut faciam voluntatem Patris mei, quod est justitia: & illa aqua, de qua quisquis biberit, ut idem dicit, fiet in eo fons aquæ salientis in vitam æternam. Beati misericordes: quoniam ipsorum miserebitur Deus. Beatos esse dicit, qui subveniunt miseris: quod eis ita rependitur, ut de miseria liberentur. **Te Deum.**

## TERTIA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 5.*

**I**N illo tempore: Videns Jesus turbas, ascendit in montem; & cum sedisset, accesserunt ad eum discipuli ejus. Et reliqua.

*De Homilia sancti Augustini Episcopi.  
Ex lib. i. de Serm. Domini in monte, c. 2. & 3.*  
**Beati**

**B**eati mundo corde: quoniam ipsi Deum videbunt. Quam ergo stulti sunt, qui Deum istis exterioribus oculis quærunt, cum corde videatur, sicut alibi scriptum est: Et in simplicitate cordis quærite illum. Hoc est enim mundum cor, quod est simplex cor. Et quemadmodum lumen hoc videri non potest, nisi oculis mundis: ita nec Deus videtur, nisi mundum sit illud, quo videri potest. Beati pacifici, quoniam ipsi filii Dei vocabuntur. In pace perfectio est, ubi nihil repugnat: & ideò filii Dei pacifici, quoniam nihil in his resistit Deo, & utique filii similitudinem patris habere debent.

**Propter. 160. Lectio viii.**

**P**acifici autem in semetipsis sunt, qui omnes animi sui motus componentes & subjicientes rationi, id est menti & spiritui, carnalesque concupiscentias habentes edomitas, fiunt regnum Dei. In quo ita sunt ordinata omnia, ut id quod est in homine præcipuum & excellens, hoc imperet cæteris non reluctans, quæ sunt nobis bestiisque communia: atque id ipsum, quod excellit in homine: id est, mens & ratio, subjiçatur potiori, quod est ipsa veritas, unigenitus Filius Dei. Neque enim imperare inferioribus potest, nisi superiori se ipse subjiçiat. Et hæc est pax, quæ datur in terra hominibus bonæ voluntatis: hæc vita consum-

mati perfectique sapientis.

**R. Sancti mei. 161. Lectio ix.**

**D**E hujusmodi regno pacatissimo & ordinatissimo missus est foras princeps hujus sæculi, qui perversis inordinatisque dominatur. Hac pace intrinsicè constituta atq; firmata, quascumque persecutiones, ille qui foras missus est, forinsecus concitaverit, auget gloriam, quæ secundum Deum est: non aliquid in illo ædificio labefactans, sed deficientibus machinis suis innotescere faciens, quanta firmitas intus constructa sit. Ideò sequitur: Beati qui persecutionem patiuntur propter justiciam: quoniam ipsorum est regnum cælorum. **Te Deum.**

#### QUARTA DIE.

**Lectio S. Evangelii secundum Mattheum.**

**Matth. vii. Cap. 5.**

**I**n illo tempore: Videns Jesus turbas, ascendit in montem; & cum sedisset, accesserunt ad eum discipuli ejus. Et reliqua.

**De Homilia S. Augustini Episcopi.**

**Lib. de Serm. Domini in monte, c. 2.**

**S**unt autem omnes istæ octo sententiæ. Jam enim cætera compellans loquitur ad illos, qui aderant, dicens: Beati eritis, cum vobis maledicent, & persequerentur vos. Superiores autem sententias generaliter dirigebat. Non enim dixit: Beati pauperes spiritu: quoniam vestrum est regnum cælorum; sed, Quoniam ipsorum est, inquit, regnum cælorum; neque Beati mites: quoniam vos possidebitis



debitis terram; sed, Quoniam ipsi possidebunt terram: & ita ceteras, usque ad octavam sententiam, ubi ait: Beati qui persecutionem patiuntur propter iustitiam: quoniam ipsorum est regnum cœlorum. **R.** Propter. 160.

*Lectio viii.*

**I**Nde jam incipit loqui, præsentes compellans; cum & illa, quæ suprà dicta sunt, ad eos etiam pertinerent, qui præsentes audiebant: & hæc postea, quæ videntur præsentibus specialiter dici, pertinent etiam ad illos, qui absentes, vel post futuri erant. Quapropter iste sententiarum numerus diligenter considerandus est. Incipit enim beatitudo ab humilitate. Beati pauperes spiritu, id est, non inflati, dum se divinæ auctoritati subdit anima, timens post hanc vitam ne pergat ad pœnas, etiam si fortè in hac vita beati sibi esse videantur.

**R.** Sancti mei. 161. *Lectio ix.*

**I**Nde venit ad divinarum Scripturarum cognitionem, ubi oportet eam se mitem præbere pietate: ne id, quod imperitis videtur absurdum, vituperare audeat, & pervicacibus concertationibus efficiatur indocilis. Inde jam incipit scire, quibus nodis sæculi huius per carnalem consuetudinem ac peccata teneatur. **T**e Deum laudamus.

## QUINTA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 5.*

**I**N illo tempore: Videns Jesus turbas, ascendit in montem; & cum sedisset, accesserunt ad eum discipuli ejus. Et reliqua.

*De Homilia sancti Augustini Episcopi. Ex lib. x. de Serm. Domini in monte, c. 3. & 4.*

**I**Taque in hoc tertio gradu, in quo scientia est, lugetur amissio summi boni, quia inhæretur extremis. In quarto autem gradulabor est: ubi vehementer incumbitur, ut sese animus avellat ab eis, quibus pestifera dulcedine innexus est. Hic ergo esuritur & sititur iustitia, & multum necessaria est fortitudo: quia non relinquitur sine dolore, quod cum delectatione retinetur. Quinto autem gradu perseverantibus in labore datur evadendi consilium: quia nisi quisque adjuvetur à superiore, nullo modo sibi est idoneus, ut sese tantis miseriarum implicamentis expediat. Est autem iustum consilium, ut qui se à potentiori adjuvari vult, adjuvet & infirmiores, in quo est ipse potentior. Itaque beati misericordes: quia ipsorum miseretur Deus.

**R.** Propter. 160. *Lectio viii.*

**S**exto gradu est cordis munditia de bona conscientia bonorum operum, valens ad contemplandum summum illud bonum, quod solo puro & sereno intellectu cerni potest. Postremò est septima ipsa sapientia, id est, contemplatio veritatis, pacificans totum hominem, & suscipiens simi-

militudinem Dei; quæ ita concluditur: Beati pacifici: quoniam ipsi filii Dei vocabuntur. Octava tamquam ad caput redit, quia consummatum perfectumque ostendit, & probat. Itaque in prima & in octava nominatum est regnum cœlorum: Beati pauperes spiritu: quoniam ipsorum est regnum cœlorum: &, Beati, qui persecutionem patiuntur propter iustitiam: quoniam ipsorum est regnum cœlorum.

R. Sancti mei. 161. *Lectio ix.*

**C**UM jam dicitur: Quis nos se-  
parabit à charitate Christi?  
Tribulatio, an angustia, an per-  
secutio, an fames, an nuditas, an  
periculum, an gladius? Septē sunt  
ergo quæ perficiunt: nam octava  
clarificat, & quod perfectum est,  
demonstrat, ut per hos gradus  
perficiantur & cæteri, tamquam  
à capite rursus exordiens. Vide-  
tur ergo mihi etiam septiformis  
operatio Spiritus sancti, de qua  
Isaias loquitur, his gradibus sen-  
tentiisque congruere. Sed inter-  
est ordinis: nam ibi enumeratio  
ab excellentioribus cœpit, hic  
verò ab inferioribus. Ibi namque  
incipit à sapientia Dei, & desinit  
ad timorem Dei: sed initium sa-  
pientiæ timor Domini est.

Te Deum laudamus.

## SEXTA DIE.

In tertio Nocturno.

Lectio S. Evangelii secundum Matthæum.

Lectio vii. Cap. 5

**I**N illo tempore: Videns Jesus  
turbas, ascendit in montem; &  
Octav. Rom.

cum sedisset, accesserunt ad eum  
discipuli ejus. Et reliqua.

Homilia S. Augustini Episcopi.

Ex lib. 1. de Serm. Domini in montes, cap. 4.

**Q**Uapropter si gradatim tam-  
quam ascendentes numere-  
mus, primus ibi est timor Dei,  
secunda pietas, tertia scientia,  
quarta fortitudo, quintum consi-  
lium, sextus intellectus, septima  
sapientia. Timor Dei congruit  
humilibus, de quibus hic dicitur:  
Beati pauperes spiritu: quoniam  
ipsorum est regnum cœlorum:  
id est, non inflati, non superbi, de  
quibus Apostolus dicit: Noli al-  
tum sapere, sed time; id est, noli  
extolli. Pietas congruit mitibus.  
Qui enim piè quærit, honorat san-  
ctam Scripturam, & non repre-  
hendit, quod nondum intelligit,  
& propterea non resistit: quod  
est mitem esse. Unde hic dicitur:  
Beati mites, quoniam ipsi hære-  
ditate possidebunt terram.

R. Propter. 160. *Lectio viii.*

**S**cientia congruit lugentibus,  
qui jam cognoverunt in Scri-  
pturis, quibus malis victi tene-  
antur, quæ tamquam bona & u-  
tilia ignorantes appetierunt; de  
quibus hic dicitur: Beati, qui lu-  
gent nunc. Fortitudo congruit  
esurientibus, & sitientibus. La-  
borant enim desiderantes gaudi-  
um de veris bonis, & amorem à  
terrenis & corporalibus avertere  
cupientes; de quibus hic dicitur:  
Beati qui esuriunt, & sitiunt ju-  
sticiam. Consilium congruit mi-  
sericor-



sericordibus; hoc enim unum remedium est de tantis malis evadendi, ut dimittamus, sicut nobis dimitti volumus: & adjuvemus in quo possumus alios, sicut & nos, in quo non possumus, cupimus adjuvari; de quibus hic dicitur: Beati misericordes, quoniam ipsorum miserebitur Deus.

*R. Sancti mei. 161. Lectio ix.*

**I**ntellectus congruit mundis corde, tamquam purgato oculo, quo cerni possit, quod corporeus oculus non vidit, nec auris audivit, nec in cor hominis ascendit; de quibus hic dicitur: Beati mundo corde: quoniam ipsi Deum videbunt. Sapientia congruit pacificis, in quibus jam ordinata sunt omnia, nullusque motus adversus rationem rebellis est, sed cuncta obtemperant spiritui hominis, cum & ipse obtemperet Deo; de quibus hic dicitur: Beati pacifici. Unum autem præmium, quod est regnum cælorum, pro his gradibus variè nominatum est. **T**e Deum laudamus.

### SEPTIMA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 5.*

**I**n illo tempore: Videns Jesus turbas, ascendit in montem; & cum sedisset, accesserunt ad eum discipuli ejus. Et reliqua.

*Homilia sancti Augustini Episcopi.*

*Ex lib. 1. de Serm. Domini in monte, cap. 4.*

**I**n primo gradu, sicut oportebat, positum est regnum cælorum, quod est perfectæ summæq;

sapientiæ animæ rationalis. Sic itaque dictum est: Beati pauperes spiritu: quoniam ipsorum est regnum cælorum: tamquam diceretur: Initium sapientiæ timor Domini. Mitib<sup>9</sup> hæreditas data est, tamquã testamentum patris cum pietate quærentibus. Beati mites: quoniam ipsi hæreditate possidebunt terram. Lugentibus consolatio, tamquam scientibus quid amiserint, & quibus meriti sunt. Beati, qui lugent nunc: quoniam ipsi consolabuntur. Esurientibus & sitientibus saturitas, tamquam refectio laborantibus, fortiterque certantibus ad salutem. Beati, qui esuriunt & sitiunt iusticiam: quoniam ipsi saturabuntur.

*R. Propter. 160. Lectio viii.*

**M**isericordibus misericordia, tamquam vero & optimo consilio utentibus, ut hoc eis exhibeatur à potentiore, quod invalidioribus ipsi exhibent. Beati misericordes: quoniam ipsorum miserebitur Deus. Mundis corde facultas est videndi Deum, tamquam purum oculum ad intelligenda æterna gerentibus. Beati mundo corde: quoniam ipsi Deum videbunt. Pacificis Dei similitudo est, tamquam perfectè sapientibus, formatisque ad imaginem Dei per regenerationem renovati hominis. Beati pacifici: quoniam ipsi filii Dei vocabuntur. Et ista quidem in hac vita possunt compleri, sicut completa esse in Apostolis credimus. Nam illa omni-

moda

Homilia S. Augustini Episcopi.

De lib. 1. de Ser. Domini in Annot. c. 3.

moda & in Angelicam formam mutatio, quæ post hanc vitam promittitur, nullis verbis exponi potest. **R.** Sancti mei. 161.

Lectione ix.

**B**Eati ergo, qui persecutionem patiuntur propter justitiam: quoniã ipsorum est regnum cœlorum. Hæc octava sententia quæ ad caput redit, perfectumque hominem declarat, significatur fortasse & circumcissione octava die in veteri testamento, & Domini resurrectione post Sabbatũ, qui est utique octavus, idemque primus dies, & celebratione octavarum feriarum, quas in regeneratione novi hominis celebramus; & numero ipso Pentecostes: nam septenario numero septies multiplicato, quo fiunt quadraginta novem, quasi octavus additur, ut quinquaginta compleantur. Et tamquam redeatur ad caput, quo die missus est Spiritus sanctus, eo in regnum cœlorum ducimur, & hæreditatem accipimus, & consolamur, & pascimur, & misericordiam consequimur, & mundamur, & pacificamur. Atq; ita perfecti, omnes extrinsecus illatas molestias pro veritate, & justitia sustinemus. **Te Deum.**

## IN DIE OCTAVA.

In tertio Nocturno.

Lectione S. Evangelii secundum Mattheum.

Lectione vii. Cap. 5.

**I**N illo tempore: Videns Jesus turbas, ascendit in montem; & cum sedisset, accesserunt ad eum discipuli ejus. Et reliqua.

**B**Eati eritis, inquit, cum vobis maledicent, & persequentur vos, & dicent omne malum adversum vos, mentientes, propter me: gaudete, & exultate, quoniam merces vestra multa est in cœlis. Animadvertat quisquis delicias hujus sæculi, & facultates rerum temporalium quærit in nomine Christiano, intrinsecus esse beatitudinem nostram, sicut de anima Ecclesiastica ore Prophetico dicitur: Omnis gloria ejus filiæ Regis ab intus. Nam extrinsecus maledicta, & persecutiones, & detractiones promittuntur: de quibus tamen magna merces est in cœlis, quæ sentitur in corde patientium, eorum, qui jam possunt dicere: Gloriamur in tribulationibus, scientes quòd tribulatio patientiam operatur, patientia autem probationem, probatio verò spem, spes autem non confundit, quia charitas Dei diffusa est in cordibus nostris per Spiritum sanctum, qui datus est nobis. **R.** Propter. 163.

Lectione viii.

**N**on enim ista perpeti fructuosum est, sed ista pro Christi nomine non solum æquo animo, sed etiam cum exultatione tolerare: Nam multi hæretici nomine Christiano animas decipientes, multa talia patiuntur: sed ideò excluduntur ab ista mercede, quia non dictum est tantum: Beati, qui persecutionem patiuntur: sed ad-

Q2

dicum



dictum est, Propter justitiam. Ubi autem sana fides non est, non potest esse justitia: quia justus ex fide vivit. Neque schismatici aliquid sibi ex ista mercede promittant: quia similiter, ubi charitas non est, non potest esse justitia. Dilectio enim proximi malum non operatur, quam si haberent, non dilaniarent corpus Christi, quod est Ecclesia.

*Sancti mei. 161. Lectio ix.*

**Q**uid est sanè, quòd etiam hoc non est nudè positum, ut diceretur: Et dicent omne malum adversum vos; sed additum est, Mentientes; additum est etiam, Propter me? Propter eos additū puto, qui volunt de persecutionibus, & de famæ suæ turpitudine gloriari: & ideò dicere, ad se pertinere Christum, quia multa de illis dicuntur mala: cum & vera dicantur, quando & de illorum errore dicuntur: etsi aliquando etiam nonnulla falsa jactantur, quod temeritate hominum plerumque accidit, non tamen propter Christum illa patiuntur. Non enim Christum sequitur, qui non secundum veram fidem, & Catholicam disciplinam Christianus vocatur. **Te Deum laudamus.**

## INFRA OCTAVAM PLURIMORUM

*Martyrum.*

*Homilia in Evangel. Matth. cap. ii. Confiteor tibi Pater, &c.*

### IN DIE FESTO.

*In tertio Nocturno.*

*Lectio S. Evangelii secundum Mattheum.*

*Lectio vii. Cap. ii.*

**I**n illo tempore, respondens Jesus dixit: Confiteor tibi, Pater, Domine cœli & terræ, quia abscondisti hæc à sapientibus & prudentibus, & revelasti ea parvulis. Et reliqua.

*Homilia sancti Augustini Episcopi.*

*Serm. 101. de Verbis Domini.*

**V**enite ad me omnes, qui laboratis. Quare enim omnes laboramus, nisi quia sumus homines mortales, fragiles, infirmi, lutea vasa portantes, quæ faciunt invicem angustias? Sed si angustiantur vasa carnis, dilatentur spatia charitatis. Quid ergo dicit, Venite ad me omnes, qui laboratis, nisi ut non laboretis? Denique promissio ejus in promptu est, quoniā laborantes vocavit. Quærent fortè, qua mercede vocati sunt. Et ego vos, inquit, reficiam. Tollite jugum meum super vos, & discite à me, non mundum fabricare, non cuncta visibilia & invisibilia creare, non in ipso mundo mirabilia facere, & mortuos suscitare; sed, Quoniam mitis sum, & humilis corde.

*Propter 160. Lectio viii.*

**M**agnus esse vis? à minimo incipe. Cogitas magnam fabricam construere celsitudinis? de fundamento prius cogita humilitatis. Et quantā quisque vult & disponit superimponere molem ædificii, tantò erit majus ædificium, tantò altius fodit fundamentum. Et fabrica quidem cum construitur, in superna consurgit:

*Infra Octav. plurim. Mart. extr. temp. Pasch. in iii. Noct. 185*

surgit: qui autem fodit fundamentum, ad ima deprimitur. Ergo & fabrica ante celsitudinem humiliatur, & fastigium post humiliationem erigitur.

*R. Sancti mei. 161. Lectio ix.*

**Q**Uod est fastigium construendæ fabricæ, quam molimur? quò perventurum est cacumen ædificii? Citò dico, usque ad conspectum Dei. Videtis, quàm excelsum est, quanta res est conspiciere Deum. Qui desiderat, & quod dico, & quod audit, intelligit. Promittitur nobis conspectus Dei, veri Dei, summi Dei. Hoc enim bonum est, videntem videre. Nam qui colunt falsos deos, facile illos vident: sed eos vident, qui oculos habent, & non vident. Nobis autem promittitur visio Dei viventis & videntis. *Te Deum laudamus*

## SECUNDA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. II.*

**I**N illo tempore, respondens Iesus dixit: Confiteor tibi, Pater, Domine cœli & terræ, quia abscondisti hæc à sapientibus & prudentibus, & revelasti ea parvulis. Et reliqua.

*Homilia sancti Joannis Chrysostomi.*

*Homilia 39. in Matth. circa med.*

**N**on hic aut ille, sed omnes qui curis, qui doloribus, qui peccatis laboratis, venite ad me; non ut pœnas luatis, verum ut dolores peccataque vestra resolvantur. Venite ad me, non quia glorificari me à vobis opus est mihi,

sed quia salutem vestram maxime sitio. Ego, inquit, requiem vobis tribuam. Non dixit: Salvos faciam; sed quod majus est, In omni quiete constituam. Tollite jugum meum super vos. Nolite jugum pertimescere; suavitatis enim eximiæ plenum est: neque onus metuatis; leve enim est. *R. Propter. 160.*

*Lectio viii.*

**Q**Uomodo autem in superioribus dicebat angustam esse januam, & arduam tribulationibus viam? Quando videlicet desidiâ, quando ignaviâ dissolutus es. Nam, quando quæ dicta sunt, perfeceris, leve tunc erit onus: quapropter magnitudine retributionis etiam nunc leve appellatur. Quomodo autem, inquires, quæ dicta sunt, perficiam animo? Si humilitate sincera, si mansuetudine vera, si moderatione integra te communias. Hæc quippe virtus sublimioris Philosophiæ mater est, atque origo.

*R. Sancti. 161.*

*Lectio ix.*

**C**onsidera, quomodo his omnibus ut humilitatem præcipuè colant, ipsis persuadet. Primum in iis, quæ ipse peregit: Discite, inquit, à me, quoniam mitis sum. Deinde magnitudine retributionis: Invenietis enim requiem animabus vestris. Præterea iis, quæ ipse gratis affert: Ego enim, inquit, requiem vobis com præstabo. Ad hæc, quia facilem rem atque suavem esse approba-



vit: Suave namque jugum est, inquit, & onus meum leve.

**T**e Deum laudamus.

### TERTIA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. II.*

**I**n illo tempore, respondens Jesus dixit: Confiteor tibi, Pater, Domine cœli & terræ, quia abscondisti hæc à sapientibus & prudentibus, & revelasti ea parvulis. Et reliqua.

*Homilia sancti Joannis Chrysostomi.*

*Unde supra, paulo post.*

**S**ed quomodo, inquires, leve hoc onus est? Doceat te Paulus dicens: Quis nos separabit à charitate Christi? tribulatio, an angustia, an persecutio, an fames, an nuditas, an periculum, an gladius? Doceant te illi, qui à synagogis Judæorū post mille flagella ac verbera summo gaudio affecti redibant, quia videlicet digni sunt inventi, qui pro Christi nomine vexarentur. Quod si adhuc, jugum ac onus audiendo, formidas nimium, atque perhorrescis, non naturæ rerum hujusmodi timorem, sed ignaviæ totum attribuas. **R.** Propter. 160.

*Lectio viii.*

**Q**uapropter etiam Christus, ut quantâ curâ vigilandum esset, certiores nos redderet, non siluit onera, nec sœvia tacuit: sed utrumque complexus, & jugum dixit, & suave appellavit. Onus appositum, & leve adjecit: ut ne aut tamquam laboriosa nimium fugeres, aut tamquam ni-

miūm facilia contemptu prosequeris. Quod si post hæc omnia vehementer ardua difficilisque tibi virtus videtur, veniat in mentem tibi, quanto difficilior vitiositas est: quod ipse occultius significat, cum, antequam de jugo suo aliquid dixerit, Venite ad me omnes, exclamaverit, qui laboratis, & onerati estis.

**R.** Sancti. 161.

*Lectio ix.*

**H**ic enim ostendere voluit, quantum laborem, quantum gravamen intolerabile, peccatū hominibus afferat; idcirco non, Qui laboratis, solummodo ait, sed etiam, Qui onerati estis: quod Psalmista significavit apertius, & naturam ipsius peccati descripsit, dicens: Sicut onus grave gravatæ sunt super me. Zacharias quoque similiter plumbi talentum esse ait. Nullo enim pondere gravius premitur anima, nihil tam vehementer mentis restringit oculos, nihil magis dejecit atque prosternit, quàm malè actæ vitæ ac peccatorum conscientia & recordatio. **T**e Deum.

### QUARTA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. II.*

**I**n illo tempore, respondens Jesus dixit: Confiteor tibi, Pater, Domine cœli & terræ, quia abscondisti hæc à sapientibus & prudentibus, & revelasti ea parvulis. Et reliqua.

*Homilia sancti Hieronymi Presbyteri.*

*Lib. 2. in Matth. cap. II.*

**Audi-**

**A**udiant qui Salvatorem non natum, sed creatum calumniantur, quod Patrem suum vocet cœli & terræ Dominum. Si enim & ipse creatura est, & creatura conditorem suum patrem appellare potest: stultum fuit non & sui & cœli ac terræ Dominum vel patrem similiter appellare. Quia abscondisti hæc à sapientibus. Gratias agit & exultat in Patre, quod Apostolis sui adventus aperuerit sacramenta, quæ ignoraverint Scribæ & Pharisei, qui sibi sapientes videntur, & in conspectu suo prudentes. Justificata est sapientia à filiis suis.

**R.** Propter. 160. **Lectio viii.**

**O**mnia mihi tradita sunt à Patre meo. Et tradentem Patrem, & accipientem Filium mysticè intellige. Alioquin si juxta fragilitatem nostram sentire volumus, cum cœperit habere, qui accipit, incipiet non habere, qui dederit. Tradita autē sibi omnia, non cœlum & terra, & elementa intelligenda sunt, & cætera quæ ipse fecit & condidit: sed hi, qui per Filium accessum habent ad Patrem, & antē rebelles, Deum postea sentire cœperunt.

**R.** Sancti. 161. **Lectio ix.**

**E**os, qui gravissimo legis jugo premebantur, ad Evangelii invitat gratiam, Jugum enim meum suave est, & onus meum leve. Quomodo levius? lege Evangelium, cum in lege homicidium, in Evangelio ira damne-

tur. Qua ratione Evangelii gratia facilior, cum in lege adulterium, in Evangelio concupiscentia puniatur? In lege multa præcepta sunt, quæ Apostolus non posse compleri plenissimè docet. In lege opera requiruntur, quæ qui fecerit, vivet in eis. In Evangelio voluntas quæritur, quæ etiam si effectum non habuerit, tamen præmium non amittit.

**T**e Deum laudamus.

### QUINTA DIE.

In tertio Nocturno.

Lectio S. Evangelii secundum Matthæum.

Lectio vii. Cap. ii.

**I**n illo tempore, respondens Jesus dixit: Confiteor tibi, Pater, Domine cœli & terræ, quia abscondisti hæc à sapientibus & prudentibus, & revelasti ea parvulis. Et reliqua.

Homilia sancti Augustini Episcopi.

Serm. 9. de Verbis Domini.

**S**i digne, si diligenter, si quod primū est, piè consideremus, inveniēmus primitus, non semper, cum in Scripturis legimus confessionem, debere nos intelligere vocem peccatoris. Maxime autem hoc dicendum fuit, & hinc admonenda charitas vestra, quia mox ut hoc verbum sonuit vox Lectoris, secutus est etiam sonus tusionis pectoris vestri, audito scilicet, quod Dominus ait, Confiteor tibi Pater. Tunderē autem pectus quid est, nisi arguere, quod latet in pectore, & evidenti pulsu occultum castigare peccatum. **R.** Propter. 160.

Lectio viii.



**N**unc ergo advertite. Si, Confiteor, Christus dicit, à quo longè est omne peccatum; non solius est confiteri peccatoris, sed etiam aliquando laudatoris. Confitemur ergo, sive laudantes Deum, sive accusantes nosmetipsos. Pia est utraque confessio, sive cum te reprehendis, qui non es sine peccato, sive cum illum laudas, qui non potest habere peccatum. Si autem benè cogitemus, reprehensio tua laus ipsius est. Quare enim jam confiteris in accusatione peccati, in accusatione tui ipsius? quare confiteris? quia ex mortuo factus es vivus.

*R. Sancti. 161.*

*Lectio ix.*

**S**criptura ait: A mortuo quasi qui non sit, perit confessio. Si perit à mortuo confessio, qui confitetur, vivit: & si peccatum confitetur, utique à morte revixit. Si peccati confessor revixit à morte, quis illum suscitavit? Nullus mortuus est sui ipsius suscitator: ille solus se potuit suscitare, qui mortua carne non mortuus est: etenim hoc suscitatur, quod mortuum fuit. Ille suscitabat, qui vivebat in se. Mortuus autem est peccator, maximè ille, quem moles consuetudinis premit, quasi sepultus Lazarus. Quis eum suscitavit, nisi qui remoto lapide clamavit, dicens: Lazare veni foras? Ergo in confessione sui accusatio, Dei laudatio est. **Te Deum.**

**SEXTA DIE.**

*In tertio Nocturno.*

*Lectio S. Evangelii secundum Matthæum.*

*Lectio vii. Cap. ii.*

**I**n illo tempore, respondens Iesus dixit: Confiteor tibi, Pater, Domine cœli & terræ, quia abscondisti hæc à sapientibus & prudentibus, & revelasti ea parvulis. Et reliqua.

*Homilia sancti Augustini Episcopi.*

*Unde suprè.*

**A**udi ergo Dominum confitentem, Confiteor tibi Pater, Domine cœli & terræ. Quid confiteor? in quo te laudo? Hæc enim confessio, ut dixi, laudem habet. Quia abscondisti hæc à sapientibus & prudentibus, & revelasti ea parvulis. Quid est hoc, fratres? A contrario sensu intelligite. Abscondisti hæc, inquit, à sapientibus & prudentibus: & non dixit, Revelasti ea stultis & imprudentibus; sed ait, Et revelasti ea parvulis. Sapientibus & prudentibus irridendis, arrogantibus falsò grandibus, verè autem tumentibus opposuit non insipientes, non imprudentes, sed parvulos. *R. Propter. 160.*

*Lectio viii.*

**Q**ui sunt parvuli? Humiles. Ergo abscondisti hæc à sapientibus & prudentibus. Nominè sapientium & prudentium, superbos intelligi posse, ipse exposuit. cum ait: Revelasti ea parvulis. Ergo abscondisti non parvulis. Quid est, non parvulis? non humilibus. Quid est, Non humilibus, nisi superbis? Hæc via Domini, aut non erat, aut latebat,

bat, ut revelaretur nobis. Unde Dominus exultavit, quia revelatum est parvulis. Debemus esse parvuli: nam si voluerimus esse magni, quasi sapientes & prudentes, non nobis illud revelatur.

**R.** Sancti. 161. **Lectio ix.**

**Q**ui sunt magni? Sapientes & prudentes. Dicentes se esse sapientes, stulti facti sunt. Habes remedium à contrario. Si dicendo te esse sapientem, stultus factus es; dic te stultum, & sapiens eris. Sed dic, dic, & intus dic: quia sic est, ut dicis. Si dicis, noli coram hominibus dicere, & coram Deo non dicere. Prorsus, quod ad te ipsum pertinet; quòd ad tua tenebrosus es. Quid enim est aliud, esse stultum, nisi esse tenebrosum in corde? Dic, quia tu tibi lumen non es. **Te Deum.**

### SEPTIMA DIE.

*In terra Nocturno.*

**Lectio S. Evangelii secundum Matthæum.**

**Lectio vii. Cap. ii.**

**I**n illo tempore, respondens Jesus, dixit: Confiteor tibi, Pater, Domine cœli & terræ, quia abscondisti hæc à sapientibus & prudentibus, & revelasti ea parvulis. Et reliqua.

*Homilia sancti Augustini Episcopi.*

*Serm. 9. de Verbo Domini.*

**M**irum quibusdam videtur, cum audiunt Dominum dicentem: Venite ad me omnes, qui laboratis, & onerati estis, & ego reficiam vos. Tollite jugum meum super vos, & invenietis requiem animabus vestris. Jugum enim

meum leve est, & sarcina mea levis. Et considerant eos, qui jugum ipsum intrepida cervice subierunt, & illam sarcinam mansuetissimis humeris acceperunt, tantis agitari & exerceri difficultatibus huius sæculi, ut non à laboribus ad quietem, sed à quiete ad laborem vocati videantur: cum & Apostolus dicat: Omnes, qui volunt in Christo pie vivere, persecutionem patientur.

**R.** Propter. 160. **Lectio viii.**

**A**it ergo aliquis: Quomodo jugum leve est, & sarcina levis: quandoquidem illud jugum & sarcinam ferre, nihil est aliud, quam pie vivere in Christo? Et quomodo dicitur: Venite ad me omnes, qui laboratis, & onerati estis, & ego reficiam vos? ac non potius dicitur: Venite, qui vacatis, ut laboretis? nam & vacantes invenit, quos conduxit in vineam, ut ferrent æstum diei, & sub illo jugo levi & sarcina levi audiamus Apostolum dicere: In omnibus commendantes nosmetipsos, tamquam Dei ministros, in multa patientia, in tribulationibus, in necessitatibus, in angustiis, in plagis.

**R.** Sancti. 161.

**Lectio ix.**

**O**mnia ergo illa, quæ commoravit aspera & gravia, frequentius & abundantius sustinebat, sed profectò aderat ei Spiritus sanctus, qui in exterioris hominis corruptione interiorem renovaret de die in diem; & gustata



ſtata requie ſpiritali in affluentia deliciarum Dei, in ſpe beatitudinis futuræ, omnia præſentia deliniret aſpera, & omnia gravia relevaret. Omnia enim ſæva & immania, prorſus facilia & propè nulla efficit amor. **Te Deum.**

## IN DIE OCTAVA.

*In teſto Noſtromo.*

*Leſtio 8. Evangelii ſecundùm Matthæum.*

*Leſtio vii. Cap. ii.*

**I**n illo tempore, reſpondens Jeſus dixit: Conſiteor tibi, Pater, Domine cœli & terræ, quia abſcondiſti hæc à ſapientibus & prudentibus, & revelâſti ea parvulis. Et reliqua.

*Homilia ſancti Gregorii Papæ.*

*Ex lib. 74. Moralium, cap. ultim. poſt mediū.*

**A**udiamus cuncti, quod magiſtra Veritas docet, dicens: Diſcite à me, quia mitis ſum, & humilis corde. Ad hoc namque unigenitus Dei Filius formam infirmitatis noſtræ ſuſcepit, ad hoc inviſibilis, non ſolùm viſibilis, ſed etiam deſpectus apparuit; ad hoc contumeliarum ludibria, irriſionū opprobria, paſſionumq; tormenta toleravit; ut ſuperbum non eſſe hominem doceret humilis Deus. Quanta ergo humilitatis virtus eſt, propter quam ſolam veraciter edocendam, is, qui ſine æſtimatione magnus eſt, uſq; ad paſſionem factus eſt parvus? **R.** Propter. 160.

*Leſtio viii.*

**O**uia enim originem perditioni noſtræ ſuperbia præbuit diaboli, instrumentum redem-

ptionis noſtræ inventa eſt humilitas Dei. Hoſtis quippe noſter magnus inter omnia conditus, videri ſuper omnia voluit elatus. Redemptor autē noſter magnus manens ſuper omnia, fieri inter omnia dignatus eſt parvus. Sed meliùs & elationis cauſam detegimus, & fundamenta humilitatis aperimus, ſi brevi commemoratione perſtringimus, quid mortis auctor, quid vitæ conditor dicat. Ille namque ait: In cœlum aſcendam: iſte autem per Prophetam dicit: Vita mea inferno appropinquavit. **R.** Sancti. 160.

*Poſt pauca.*

*Leſtio ix.*

**I**lle nihil aliud mentes ſibi ſubditas docet, quàm celſitudinis culmen appetere, cuncta æqualia mentis tumore transcendere, ſocietatem omnium hominum alta elatione tranſire, ac ſeſe & contra potentiam conditoris erigere, ſicut de eiſdem per Pſalmiſtam dicitur: Tranſierunt in diſpoſitionem cordis, cogitaverunt, & locuti ſunt nequitias, iniquitatem in excelſo locuti ſunt. Iſte ad ſputa, ad palmas, ad colaphos, ad ſpineam coronam, ad crucem, ad lanceam, uſque ad mortem veniens, membra ſua admonet; dicens: Si quis mihi miniſtrat, me ſequatur. **Te Deum** laudamus.

## INFRA OCTAVAM PLURIMORUM

*Martyrum.*

*Homilia in Evangel. Luc. cap. ii. V2 vobis, qui ædificatis, &c.*

**IN**

Infra Octav. plurim. Mart. extr. temp. Pasch. in iii. Noct 191

## IN DIE FESTO.

In tercio Nocturno.

Lectio sancti Evangelii secundum Lucam.

Lectio vii. Cap. ii.

**I**N illo tempore: Dicebat Jesus turbis Judæorum, & principibus sacerdotum: Væ vobis, qui ædificatis monumenta Prophetarum: patres autem vestri occiderunt illos. Et reliqua.

Homilia venerabilis Bedæ Presbyteri.

Lib. 4. in Luc. ii. cap. xi. paulo ante finem.

**N**ON monumenta Prophetarum ornare, sed interfectores Prophetarum imitari, sceleris est. Judæi ergo Prophetarum monumenta ædificando, patrum suorum facta, qui eos occiderunt, arguebant: sed paterna facinora æmulando, dum Christum Apostolosque illius insequuntur, in seipsum sententiam retorquebant, eadem videlicet ipsi, quæ in parentibus damnavant, agentes. Simulabant quidem se, ob favorem vulgi captandum, patrum suorum horrere perfidiam, memorias Prophetarum, qui ab eis occisi sunt, magnificè ornando: sed ipso opere testificantur, quantum paternæ nequitiae consentiant, Dominum, qui ab iisdem Prophetis est prænuntiatus, injuriis agendo. **R.** Propter. 160.

Lectio viii.

**U**T inquiratur sanguis omnium Prophetarum, qui effusus est à constitutione mundi à generatione ista. Quæritur, quomodo sanguis omnium Prophetarum atque justorum ab una

Judæorum generatione requiratur; cum & multi Sanctorum, sive ante incarnationem, seu post mortem resurrectionemque Salvatoris, ab aliis sint nationibus interempti; & ipse Dominus, Judæis licet acclamantibus, à Romano tamen Præfide, Romanisque sit militibus crucifixus.

**R.** Sancti. 161. **Lectio ix.**

**S**ED moris est Scripturarum, duas sæpè generationes hominum, bonorum scilicet malorumque computare, hoc est, eorum qui non ex sanguinibus, neque ex voluntate carnis, neque ex voluntate viri, sed ex Deo nati sunt: & eorum quibus dicitur, Vos ex patre diabolo estis: & alibi: Serpentes generatio viperarum. A sanguine Abel usque ad sanguinem Zachariæ. Quare usque ad sanguinem Zachariæ, cum & multi post eum sint ab hac generatione perempti; nisi fortè, quia Abel pastor ovium, Zacharias sacerdos fuit; & ille in campo, hic in atrio templi necatus est, utriusque gradus martyres, & laici scilicet, & altaris officio mancipati, sub eorum voluit intinere vocabulo? **T**e Deum.

Infra Octavam in Missa & Officio legatur Evangelium. Descendens Jesus, cum suis discipulis, ut in hoc eodem Communi, supra 166.

In die Octava, ut in die Festo.

## INFRA OCTAVAM PLURIMORUM

Martyrum.

Homilia in Evangel. Luc. cap. ix. Qui vos audit, me audit, &c.

IN



## IN DIE FESTO.

*In tertio Nocturno.**Lectio sancti Evangelii secundum Lucam.**Lectio vii. Cap. 10.*

**I**N illo tempore: Dixit Jesus discipulis suis: Qui vos audit, me audit: & qui vos spernit, me spernit. Et reliqua.

*Homilia venerabilis Bedæ Presbyteri.**Lib. 3. in Luc. 10. cap. 42. paulò ante finem.*

**U**T in audiendo quisque vel spernendo Evangelii prædicatore, non viles quasque personas, sed Dominum Salvatorem, imò ipsum Patrem spernere se vel audire disceret, ait: Qui vos audit, me audit; & qui vos spernit, me spernit: qui autem me spernit, spernit eum, qui me misit. Quia proculdubio in discipulo magister auditur, & in filio pater honoratur. Potest & ita intelligi: qui non facit misericordiam uni de fratribus meis minimis, nec mihi facit; quia & ipse pro his formam servi, & pauperis habitum suscepi.

*R. Propter. 160. Lectio viii.*

**R**everfi sunt autem septuaginta duo cum gaudio, dicentes: Domine, etiam dæmonia subijciuntur nobis in nomine tuo. Benè quidem confessi sunt, deferentes honorem nomini Christi; sed quia infirma adhuc fide gaudabant in virtutibus, vide quid audiunt. Et ait illis: Videbam satanam sicut fulgur de cælo cadentem. Non modò video, sed prius videbam, quando corruit. Quòd autem ait, Sicut fulgur,

vel præcipitem de supernis ad ima lapsum significat; vel quia dejectus, adhuc transfiguratur se in angelum lucis.

*R. Sancti. 161.**Lectio ix.*

**E**Cce dedi vobis potestatem calcandi supra serpentes, & scorpiones. Hoc est, omne genus immundorum spirituum de obsessis corporibus ejiciendi. Quamvis ad literam rectissime possit accipi: siquidem & Paulus à vipera invasus, nihil adversi patitur. Hoc sanè inter serpentes, qui dente; & scorpiones, qui caudâ nocent, distare arbitror: quòd serpentes apertè sævientes, scorpiones clanculò insidiantes, vel homines, vel dæmones significant. Serpentes, qui inchoandis virtutibus venena pravae persuasionis objiciunt: scorpiones, qui consummatas virtutes ad finem vitare contendunt. Verumtamen in hoc nolite gaudere: quia spiritus ejicere, sicut & virtutes alias facere; interdum non est ejus meriti, qui operatur, sed invocatio nominis Christi hoc agit. Te Deum laudamus.

*Infra Octavam in Missa & Officio legatur Evangel. Sedente Jesu, cum suis Homiliis, ut suprâ. 171.*

*In die Octava, ut in die Festo.*

## INFRA OCTAVAM PLURIMORUM

*Martyrum.*

*Homilia in Evangel. Lucæ, cap. 12. Attendite à fermento, &c.*

## IN DIE FESTO

*In tertio Nocturno**Lectio 5. Evangelii secundum Lucam.**Lectio*

**I**N illo tempore: Dixit Jesus discipulis suis: Attendite à fermento Phariseorum, quod est hypocrisis. Et reliqua.

Homilia venerabilis Bedæ Presbyteri.

Lib. 4. in Luc. cap. 12.

**D**E hoc fermento Apostolus præcipit: Itaque epulemur, non in fermento veteri, neque in fermento malitiæ & nequitiae, sed in azymis sinceritatis & veritatis. Nam sicut modicum fermentum totam farinæ, cui injicitur, massam corrumpit, universamque mox conspersionem suo sapore commaculat: sic nimirum simulatio, cujus semel animum imbuerit, tota virtutum sinceritate & veritate fraudabit. Est ergo sensus: Attendite ne æmulemini simulators, quia veniet profectò tempus, in quo & vestra virtus omnibus, & eorum reveletur hypocrisis.

R. Propter. 160. Lectio viii.

**V**erum quod sequitur, Quoniam quæ in tenebris dixistis, in lumine dicentur: non solum in futuro, quando cuncta cordium abscondita proferentur ad lucem, sed & in præseni tempore potest congruenter accipi: quoniam quæ inter tenebras quondam pressurarum, carcerumque umbras, vel locuti vel passi sunt Apostoli, nunc clarificata per orbem Ecclesia, lectis eorum actibus publicè prædicantur. Ne timeamini ab his, qui occidunt corpus. Si persecutores Sanctorum,

Octav. Rom.

occisis corporibus, non habent amplius quid contra illos agant; ergo supervacua furunt insania, qui mortua Martyrum membra feris avibusque discerpenda projiciunt, cum nequaquam omnipotentiae Dei, quin ea resuscitando vivificet, obsistere possint.

R. Sancti. 161.

Lectio ix.

**D**uo autem sunt genera persecutorum: unum palam savientium, alterum fecte fraudulenterque blandientium. Contra utrumque nos munire atque instituire volens Salvator, & supra ab hypocrisi Phariseorum attendere, & hic à carnificum cæde præcipit non timere: quia videlicet post mortem nec horum crudelitas, nec illorum valeat simulatio durare. Nonne quinque passeris veneunt dipondio? Si minutissima, inquit, animalia, & quæ quolibet per aëra feruntur volatilia, Deus oblivisci non potest; vos qui ad imaginem facti estis Creatoris, non debetis terri ab his, qui occidunt corpus: quia qui irrationabilia animalia gubernat, rationabilia curare non desinit. Te Deum.

## SECUNDA DIE.

In tertio Nocturno.

Lectio sancti Evangelii secundum Lucam.

Lectio vii. Cap. 12.

**I**N illo tempore: Dixit Jesus discipulis suis: Attendite à fermento Phariseorum, quod est hypocrisis. Et reliqua.

Homilia venerabilis Bedæ Presbyteri.

Unde Apł.

R

Quarrit



**Q**Uærit fortasse aliquis, quomodo dicat Apostolus: Numquid de bobus cura est Deo? cum utique bos passere pretiosior existat. Sed aliud cura, aliud verò est scientia. Denique numerus capillorum, de quo consequenter ait: Sed & capilli capitis vestri omnes numerati sunt; non in actu computationis, sed in facultate cognitionis accipitur. Non enim sollicitam Deus curæ numerantis intendit excubiam, sed cui cognita sunt omnia, quasi numerata sunt omnia. Benè tamē numerata dicuntur: quia quæ volumus servare, numeramus.

**R.** Propter. 160. **Lectio viii.**

**D**erident intelligentiam ecclesiasticam in hoc loco, qui carnis resurrectionem negant, quasi nos, ipsam terrenam materiem, quæ discedente anima, sit cadaver, ita resurrectione reparandam dicamus; ut ea quæ dilabuntur, & in alias atque alias aliarum rerum species formalq; vertuntur, quamvis ad corpus redeant unde dilapsa sunt, ad easdem quoque corporis partes, ubi fuerunt, redire necesse sit: alioquin si capillis capitis redit quod tam crebra tonsura detrahit, si ungribus, quod toties dempsit exsectio, immoderata & indecens cogitantibus, & ideo resurrectionem carnis non credentibus, occurrit informositas.

**R.** Sancti mei. 161. **Lectio ix.**

**S**ed quemadmodum si statua a cujuslibet solubilis metalli, aut igne liqueceret, aut confunderetur in massam, & eam vellet artifex rursus ex illius materiae quantitate reparare, nihil interesset ad ejus integritatem, quæ particula materiae, cui membra statuae redderentur, dum tamen totum, ex quo constituta fuerit, resumeret: ita Deus mirabiliter atque ineffabiliter artifex de toto, quo caro nostra constituerat, eam restituet, nec aliquid attinebit ad ejus redintegrationem, utrum capilli ad capillos redeant, & ungues ad ungues, an quidquid eorum perierat, mutetur in carnem, & in partes alias corporis revoletur, curante artificis providentia, ne quid indecens fiat.

**T**e Deum laudamus.

### TERTIA DIE.

In tertio Nocturno.

Lectio S. Evangelii secundum Lucam.

Luc. vii. Cap. 12.

**I**n illo tempore: Dixit Jesus discipulis suis: Attendite à fermento Phariseorum, quod est hypocrisis. Et reliqua.

Homilia sancti Petri Chrysologi.

Ex sermone 177.

**Q**uia in fermento non est moles magnitudinis, sed tumoris, & conspersio tali specie inflata est, non ditata; (quantum enim efferbuerit ferventiùs, tantum farris massa turgescit, & totam formam levitatis implet & tumoris:) congruè à Domino dictum est: Attendite vobis à fermento.

mento Phariseorum, quod est hypocrisis. Quid est hypocrisis, nisi species arte composita, quæ aliud in re agit, aliud promit in vultu? Hæc penes Phariseos per scientiam tumescebat, Apostolo sic dicente: Scientia inflat. Illos namque scientia inflabat ad superbiam, non instruebat ad vitam: & corrumpebat ad malitiam, non ad prudentiam promovebat.

R. Propter. 160. *Lectio viii.*

**E**Rat in eorum facie hypocrisis, erat in eorum mente invidiæ hydrops, erat in pectore ficticulosus fons: erat ardens unda, quæ suis magis ac magis inflammabatur fluentis, ut bibentis non extingueret sitim, sed augeret incendium. Sic, sic hypocrisis ministrante, suis semper invidia propinat. Ab hoc nos morbo subtrahit Apostolus, cum nos non in fermento veteri, neque in fermento malitiæ & nequitiae, sed in azymis sinceritatis & veritatis sanctum Pascha Domini celebrare compellit.

R. Sancti mei. 161. *Lectio ix.*

**V**eritas nescit tumorem, simplicitas hypocrisim prorsus ignorat in azymis sinceritatis & veritatis. Hæc sunt cordis azyma, hæc cœlesti dulcedine confecta, hæc gratiæ saporata pinguedine, hæc sancti Spiritus igne decocta, hæc nos manducantes Agnum Dei, Agnum qui tollit peccatum mundi, nostrum Pascha solemni-ter immolamus, quibus Christus

ad lætitiā totam est natus, & immutatus ad gloriā. *Te Deum.*

## QUARTA DIE.

*In tertio Nocturno.*

*Lectio S. Evangelii secundum Lucam.*

*Lectio vii. Cap. 12.*

**I**N illo tempore: Dixit Jesus discipulis suis: Attendite à fermento Phariseorum, quod est hypocrisis. Et reliqua.

*Homilia sancti Ambrosii Episcopi.*

*Lib. 7. in Lucā, cap. 12.*

**P**ulcherrimum locum tenendæ simplicitatis, & æmulandæ Fidei Salvator intexuit, ne Judaicæ perfidiæ more alia premamus affectu, alia voce simulemus: cum ultimo tempore occulta cogitationum accusantium, aut etiam defendentium, secretum, nostræ mentis apertura videantur. Quæ enim major est simplicitatis illecebra, quam ut unusquisque cognoscat, latebram fraudis esse non posse?

R. Propter. 160. *Lectio viii.*

**S**ed quoniam gemina est causa perfidiæ, quia aut ex inolita malitia, aut ex accidentali metu nascitur: ne quis metu territus potestatis Deum, quem corde cognoscit, negare cogatur, pulchrè addidit, animæ tantum formidabile esse supplicium, poenam corporis non esse metuendam. Mors enim naturæ finis, non poenæ est: & ideo mortem supplicii corporalis esse defectum, poenam verò animæ esse perpetuam: eoque Deum solum esse metuendū, cuius potestati non natura præscri-



bat, sed eadem natura subiaceat.

*R. Sancti. 161.**Lectio ix.*

**I**nspiraverat Dominus simplicitatis affectum; virtutem mentis erexerat, fides sola nutabat, bene eam de vilioribus roboravit. Nam si Deus oblivionem passerum non habet, hominum habere quī potest? Quod si tanta est Dei & tam æterna majestas, ut unus ex passeribus, aut nostrorū numerus capillorum præter scientiam Dei non sit, quā indignum est æstimare, quod fidelium corda Dominus aut ignoret, aut spernat, qui viliora cognoscat? *Te Deum laudamus.*

## QUINTA DIE.

*In tertio Nocturno.**Lectio sancti Evangelii secundum Lucam**Lectio vii. Cap. 12.*

**I**n illo tempore: Dixit Jesus discipulis suis: Attendite à fermento Phariseorum, quod est hypocrisis. Et reliqua.

*Homilia sancti Ambrosii Episcopi.**Unde supra, post pauca.*

**V**identur quinque isti passeres, quinque esse corporis sensus, tactus, odoratus, gustus, visus, auditus: qui modo passerum, si terrenarum sordium rimentur illuviem, atque ex incultis locis & foetidis cibum quærant, delictorum suorum laqueis occupati, ad superiorum operum fructus, quibus epulantur animi, revolare non possunt. Itaque variarum capti illecebris voluptatum, aut venundamur sub peccato, aut redimimur à peccato,

Christus nos redimit, adversarius vendit. *R. Propter. 160.**Lectio viii.*

**I**taque docemur, quia volandi nobis gratiam natura dedit, voluptas abstulit, quæ malorum escis gravat animam, atque in naturam corporeæ molis inclinat. Meritoque posuit Matthæus, quia nemo illorum cadit sine voluntate DEI: quod enim cadit, vergit in terram; & quod volat, ad fastigium immortalitatis evehitur. Ne cui autem dubium esset quod Matthæus dixit, Lucas evidenter absolvit: quia voluntas Dei, cognitio Dei. Non enim quisquam voluntate Dei cadit; sed qui delictorum suorum mole ruerit, Deū latere non potest.

*R. Sancti. 161.**Lectio ix.*

**E**rgo passer bonus est, cui volandi vim natura suppeditat. Est etiam malus passer, qui volandi usum terrenæ vitio labis aboleverit: quales sunt isti passeres, qui dipondio veneunt. Alibi asse veneunt, alibi dipondio. Quanta vilitas delictorum! mors enim vilis, sed pretiosa virtus. Etenim adversarius tamquam captiva mancipia vilioris pretio æstimationis addicit. At verò Dominus, tamquam speciosa servitia, quæ ad imaginem & similitudinem sui fecit, idoneus sui operis æstimator, magno pretio nos redemit, sicut sanctus Apostolus dixit: Empti enim estis pretio magno. *Te Deum.*

SEX-

SEXTA DIE.

In tertio Nocturno.

Lectio sancti Evangelii secundum Lucam.

Lectio vii. Cap. 12.

**I**N illo tempore: Dixit Jesus discipulis suis: Attendite à fermento Phariseorum, quod est hypocrisis. Et reliqua.

Homilia sancti Petri Chrysologi.

Serm. 107.

**V**obis autem dico amicis meis, ne terreamini: quia libertatem probat virtus, metus indicat servitutem: nam liber ad gloriam, servus natus est ad timorem. Merito ergo ad Dei amicitias sublimatur, qui propter Deum humanas despicit mortes, nescit timores. Si amicos morum facit imitatio, morum similitudo conjungit; convenienter eos amicos vocat Christus, quos imitatione sua mundi jacula, & ipsam mortis formidinem conspiciat & prævidet calcaturos.

**R.** Propter. 160. **Lectio viii.**

**V**obis autem dico, id est, non omnibus, sed amicis. Vobis autem dico, quos mors absolvit ista, non finit. Vobis dico, quos corporis resolutio promovet ad melius, non transducit ad poenam. Vobis dico, quibus morte vita inchoatur, non finitur. Vobis dico, quorum mors pretiosa fit non sui qualitate, sed causa, dum vitæ magis lucra invenit, quam vitæ perdat usuram. Sed audiamus quid dicat amicis suis: Ne terreamini ab his, qui occidunt corpus.

**R.** Sancti mei. 161. **Lectio ix.**

**A**udiant qui de bono mortis veterum vetusta volumina detriverunt, nihil tamen inde capere virtutis, aut consolationis aliquid invenire valuerunt. Quis homini, quis sapienti dicat? Mori naturæ est, necesse est deperire? Nobis vixerunt veteres, vivimus nos futuri, nemo sibi. Quod non potest tolli, velle virtutis est. Suscipe voluntarius, ad quod urgeris invitus. Mors antequam veniat, non est; cum autem venerit, venisse nescitur. Nec ergo amisisse te doleas; quod, cum amiseris, non dolebis. **T**e Deum.

SEPTIMA DIE.

In tertio Nocturno.

Lectio S. Evangelii secundum Lucam.

Lectio vii. Cap. 12.

**I**N illo tempore: Dixit Jesus discipulis suis: Attendite à fermento Phariseorum, quod est hypocrisis. Et reliqua.

Homilia sancti Augustini Episcopi.

Sermone 19, de Verbo Apostoli. dicitur.

**C**um dicis mihi, Gehennam timeo, ardere timeo, in æternum puniri timeo; quid dicturus sum? Malè times? vanè times? Non audeo, quandoquidem ipse Dominus ablato timore subjecit timorem: & ait, ubi dixit, Nolite timere eos qui corpus occidunt, & postea non habent quid faciant: sed eum timete, qui habet potestatem & corpus & animam mittere in gehennam ignis: ita dico vobis, hunc timete. Cum ergo Dominus timorem incusserit,

**R.** 3

&



& vehementer incusserit, & repetendo verbum, comminationem ingeminaverit, dicturus ego sum, Malè times? Ista non dicam. Planè time, nihil melius times, nihil est, quod magis timere debeas.

*R. Propter. 165. Lectio viii.*

**S**ed interrogo te, Si non te videret Deus quando facis, nec quisquam te convinceret in iudicio illius, faceres? Tu te vide: non enim potes ad verba omnia mea respondere, inspicere te ipsum. Faceres? Si faceres, ergo pœnam times, castitatem nondum amas, charitatem nondum habes: serviliter times, formido est mali, nondum dilectio boni. Sed time tamen ut ista formido custodiat te, ut perducatur ad dilectionem. Timor enim iste, quo gehennam times, & ideò mala non facis, continet te; & sic volentem peccare animum interiorem non finit. Est quidā custos timor, quasi pædagogus legis: littera est minans, nondum gratia juvans.

*R. Sancti mei. 161. Lectio ix.*

**C**ustodiat tamen te timor iste, dum non facis timendo, & veniat charitas: intret in cor tuum; & quantum illa intrat, tantum timor exit. Timor enim id agebat ne faceres; charitas hoc agit, ut nolis facere, etiamsi impune possis admittere. Dixi quid timeatis, dixi quid appetatis. Secutimini charitatem, intret charitas, admittite illam, timendo peccare, admittite amorem non pec-

cantem, admittite amorem benè viventem. Haber secum suum timorem, quem introducit ipsa charitas: sed illum castum, permanentem in sæculum sæculi. Te Deum laudamus.

## IN DIE OCTAVA.

*In tertio Nocturno.*

*Lectio S. Evangelii secundum Lucam.*

*Lectio. Cap. 12.*

**I**n illo tempore: Dixit Iesus discipulis suis: Attendite à fermento Phariseorum, quod est hypocrisis. Et reliqua.

*Homilia sancti Joannis Chrysostomi.*  
*Homilia p. in Pharisæos, c. 12.*

**V**ides, quòd non promittit ipsis hujus vitæ perpetuitatem, mori autem promittit, ut majora sublimioraque conferat, quàm si numquam morti traderentur. Et certè multò melius est mortem omnino despicere, quàm eam effugere, Quocircà non in periculum mortis, cum nati essent homines, ipsos introducit, sed terrore moriendi morte superiores facit. Ita brevi oratione duobus vel tribus verbis absoluta, salutarem de immortalitate opinionem in animis eorum fixit atque locavit.

*R. Propter. 160. Lectio viii.*

**P**ostea ne putarentur quasi se derelictos ab eo, ad eadem & violentum perventuros interitum, de providentia Dei disputat, dicens: Nonne duo passeressæ venduntur, & unus ex ipsis non cadit in laqueum sine Patre vestro, qui est in coelis? Vestri autem

autem capilli capitis omnes numerati sunt. Quid enim vilius passeribus? ait, sed tamen numquam ignorante Deo capiuntur. Non enim cooperante Deo incidere in laqueum passeret ait, quod divinæ majestati indignum est; sed non esse clām Deo etiam vilissimarum avium causam, ostendit. Quod si nihil penitus Deus ignorat, at vos paterna charitate prosequitur, & ita amat, ut pilos capitis quoque vestri non negligat, quid timendū vobis est?

R. Sancti mei. 161. Lectio ix.

**H**oc autem dicebat, non quod Deus capillos numeret, sed quia perfectam cognitionem rerum omnium, & summam de omnibus Dei providentiam ostendere voluit. Si ergo cuncta novit, quæ fiunt, si vult, potest simul servare vos: nolite, cum tribulationes vobis acciderint, derelictos vos esse à Deo existimare: non enim ab incommodis corporis liberare vos vult, sed ad eam perfectionem adducere studet, ut incommoda corporis contemnatis. Te Deum laudamus.

**INTRA OCTAVAM  
CONFESSORIS**

Pontificis.

**SECUNDA DIE.**

In festo Natalis  
Sermo sancti Ambrosii Episcopi.  
De Depositione S. Basilii.  
Lectio iii.

**D**epositionem sancti N. hodie celebramus. Quid est depositio? Non illa utique, quæ sepe-

liendis in terra membrorum reliquis clericorum manibus procuratur: sed illa, qua homo vinculis carnalibus absolutus liber iturus ad cælum, terrenum corpus exponit. Ipsa planè est depositio, in qua concupiscere abjicimus, cessamus delinquere, peccare desinimus; & totum quidquid saluti est grave, quasi abjectâ facinâ oneris, exponimus. Nam ideò hæc dies pro celebritate maxima procuratur, quia verè est summa festivitas, mortuum esse vitiis, soli vivere justitiæ.

R. Inveni David servum meum, oleo sancto meo unxi eum.\* Manus enim mea auxiliabitur ei.  
\*. Nihil proficiet inimicus in eo, & filius iniquitatis non nocebit ei. Manus. Lectio v.

**U**nde & depositionis ipsa dies natalis dicitur, quod delictorum carcere liberati, libertati nascimur Salvatoris. Sed videamus, sanctus N. cum qua gloriâ ad hanc diem depositionis advenit. Volare non potest, nisi quod purum, leve atq; subtile est, cujus nec sinceritas intemperantiâ retardatur, nec alacritas, nec velocitas mole gravatur. Gravari autem volatum dico, non tam mole membrorum, quam delictorum. Unde puto etiam in ipsis avibus ideò velocius columbam penè præ omnibus volitare, quod alacritatem & innocentiam comitetur.

R. Posui adjutorium super potentem, & exaltavi electum de



plebe mea: \* Manus enim mea auxiliabitur ei. ✠. Inveni David servum meum, oleo sancto meo unxi eum. Manus.

## Lectio vi.

**D** Enique sanctus David, cum puritate mentis volare concupisceret, non alterius animantis nisi columbæ optavit alas, dicens: Quis dabit mihi pennas sicut columbæ, & volabo, & requiescam? Intelligebat enim, quod altiora facilius penetrentur simplicitate mentis, quam levitate pennarum. Volavit ergo hac die sanctus **N**. Æstimemus jam ejus innocentiam de volatu, & puritatem ejus de ipsa elatione judicemus: tamquam columba enim in domo Dei degens, assumpsit spirituales pennas, & requievit in monte.

**R.** Iste est, qui ante Deum magnas virtutes operatus est, & omnis terra doctrinā ejus repleta est: \* Ipse intercedat pro peccatis omnium populorum. ✠. Iste est, qui contempsit vitam mundi, & pervenit ad cœlestia regna. Ipse. Gloria Patri. Ipse.

## TERTIA DIE.

In secundo Nocturno.

Sermo sancti Gregorii Nysseni.

In funere magni Meletii, circa medium.

## Lectio iv.

**C** Um primum benè morata ac modesta Ecclesia beatum **N**. vidit, vidit faciem ad imaginem Dei verè formatam, vidit dilectionem fontis modo scaturientem, vidit gratiam labiis circumfusam,

animi demissionis summum gradum, post quem ampliùs quidquam cogitari non potest. Vidit mansuetudinem atque clementiam, qualis in Davide fuit: qualis in Salomone, intelligentiam atq; prudentiam: qualis in Moyse, bonitatem: qualis in Samuele, perfectionem: qualis in Iosepho, continentiam pudicitiamque: qualis in Daniele, sapientiam, quemadmodum magnus Elias zelo fidei præditum: sicut sublimis Joannes, integritate corporis ornatum: sicut Paulus, inexsuperabili præditum dilectione. Vidit tot bonorum circa unam animam concursum. Amore beato vulnerata est, casto bonoque sponsum suum amore atque benevolentia prosecuta dilexit.

**R.** Inveni. 199. **Lectio v.**

**S** Ed priusquam cupiditatem expleret, antequam desiderium recrearet atq; sedaret, amoris vi fervens, tentationibus athletam ad certamina vocantibus, sola relicta est. Atque ille quidem in certaminibus pro pietate susceptis desudabat; hæc verò durabat in castitate matrimonium conservans. Non ablatus est à nobis sponsus: in medio nostrū stat, etiamsi nos non videamus; in adytis ac penetralibus Sacerdos est, in interioribus veli; quo præcursor pro nobis ingressus est Christus, reliquit carnis tegumentum. Non ampliùs signo & umbræ cœlestium servit, sed in ipsam

ipsam rerum imaginem intue-  
tur: non amplius per speculum  
atque per transennam & ænigma,  
sed ipsa facie cum facie collata  
intercedit apud Deum.

**R.** Posui. 199. **Lectio vi.**

**I**ntercedit autem pro nobis, &  
populi erratis. Deposuit tuni-  
cas pelliceas: neque enim talibus  
tunicis opus habent, qui inpara-  
diso degunt: sed habet indumen-  
ta, quæ puritate vitæ suæ conte-  
xuit, iisque sese exornavit. Ho-  
norata: ac pretiosa coram Domi-  
no talis viri mōrs est: imò verò  
non mors, sed ruptura membro-  
rum est. Dirupisti enim, inquit,  
vincula mea. Dimissus est Sime-  
on, liberatus est à vinculis cor-  
poris: laqueus contritus est, & a-  
vicula avolavit. Ingressus est ter-  
ram promissionis, in monte cum  
Deo philosophatur. Solvit animæ  
calceamentum, ut pura planta  
mentis terram sanctam, ubi con-  
spicitur Deus, conscenderet.

**R.** Iste est. 200.

#### QUARTA DIE.

In secundo Nocturno.

Sermo sancti Joannis Chrysostomi.

In cap. 15. Epistolæ ad Romanos,  
Sermonem 19. circa finem.

**Lectio iv**

**C**hristum diligens, & gregem  
illius utique diligit. Et Moy-  
sen tum primū super populum  
Judæorum posuit, quando, qua  
esset in illum benevolentia, re-  
ipsa jam declaraverat. David quo-  
que simili modo regno inaugu-  
ratus est, posteaquam apparue-

rat, quā amico esset in popu-  
lum affectu. Ita quippe juvenis  
adhuc, populi causā doluit ac ze-  
lavit, ut & animam suam expo-  
neret, cum videlicet barbarum  
illum è medio tollebat. Quod ve-  
rò dicebat: Quid dabitur ei, qui  
alienigenam hunc interfecerit?  
non ideò dicebat, quòd merce-  
dem exigeret, sed quo sibi cre-  
deretur, & in pugnam cum illo  
committeretur; nam cum adepta  
jam victoria ad regem esset in-  
gressus, nihil de mercede memi-  
nit. **R.** Inveni. 199. **Lectio v.**

**E**T Samuel quoque benignus  
erat, & amator populi: unde  
& dicebat: Absit autem hoc à me  
peccatum, ut cessem pro vobis  
orare Dominum. Ita & Paulus,  
imò non ita, sed multò plus o-  
mnibus ardebat erga subditos.  
Unde & discipulos ita erga se a-  
nimavit, ut diceret: Si possibile  
fuiſſet, oculos vestros eruiſſetis  
mihique dedissetis. Et Christus  
optimi Pastoris regulam profe-  
rens dixit: Bonus pastor animam  
suam ponit pro ovibus. Sunt  
enim Sanctorum animæ vehe-  
menter mites & hominum aman-  
tes, non solum erga domesticos,  
sed alienos, ita ut hanc suam  
mansuetudinem etiam ad ani-  
mantia bruta extendant. Propte-  
reà & Sapiens quispiam dixit:  
Justus miseretur animarum ju-  
mentorum suorum. Si jumen-  
torum, multò magis hominum.

**R.** Posui. 199. **Lectio vi.**

Verum



**V**erum quoniam pecorum mentionem feci, perpendamus & ovium pastores illos, qui in Cappadocum regione sunt, qualia & quanta pro pecorum suorum custodia patiantur. Illi sæpenumero universum triduum nive obruti perdurant. Dicuntur autem, & qui in Libya sunt, non minora mala ferre, dum integros menses difficilem illam solitudinem, pessimarumque bestiarum plenam vagando circumeunt. Si tantum erga pecora diligentiae impendunt pastores illi; quam quæso excusationem habebimus, quibus rationales animæ concreditæ sunt, quod profundum hunc somnum dormimus? An ignoras gregis hujus dignitatem? an illius gratiâ Dominus tuus innumera non fecit? an non postremo & sanguinem suum fudit? Tu verò requiem quæris? Et quid poterit pejus esse pastoribus istis?

*R.* Iste est. 200.

## QUINTA DIE.

*In secundo Nocturno.*

*De Sermone sancti Joannis Chrysostomi.*

*Unde supra. Lectio iv.*

**E**T homines quidem, qui populis præsent, si quando de rebus fortuitis consultaturi sunt, diebus non contenti, noctes etiam vigilando adhibent: nos verò, qui pro ipso cælo certamen habemus, ipso quoque die dormimus. Quis, quæso, ab eo nos supplicio eripiet, quod istis debetur? Si enim corpus trucidandum

exponere, si innumeras mortes ferre oportebat, numquid ad hoc munus, tamquam ad nundinas currendum erat? Hæc autem non solum pastores, sed & oves audiant, ut alacriores faciant pastores, aliud quidem nihil, verum omnem obedientiam, animumque, cui persuaderi queat, exhibentes. *R.* Inveni. 199.

*Lectio v.*

**I**Ta Paulus præcepit dicens: Obédite ducibus vestris, & subditi estote: nam ipsi vigilant pro animabus vestris, tamquam rationem daturi. Quando verò dicit, Nam ipsi vigilant, innumeros labores, curas & pericula completur. Bonus enim pastor, & talis qualem Christus vult, innumeris comparatur martyribus. Propter Christum quippe martyr semel quidem est mortuus, hic verò millies propter gregem, si quidem talis sit Pastor, qualem esse oportet: talis enim pastor singulis diebus mori potest. Propterea & vos, cognito isto labore, & precibus, & diligentia, & animi alacritate, & dilectione nos juvate, ut & nos vestra, & vos vicissim nostra gloriatio sitis.

*R.* Posui. 199.

*Lectio vi.*

**N**Am ideò Christus istud Apostolorum Summati, & plus ipsum quam reliqui diligenti, commendans, & injungens, primum rogabat, an ab ipso diligeretur; ut discas, quòd istud sit ante omnia reliqua dilectionis in Christi-

Christum positum signum: strenuo siquidem animo hic opus est. Hæc verò mihi de optimis pastoribus dicuntur, non de meipso, & mei similibus: sed si quis talis sit, qualis erat Paulus, qualis Petrus, qualis **N.** Istos itaque imitemur & superiores, & subditi: licet enim & subdito pro parte pastorem agere, nempe domus suæ, amicorum, domesticorum, uxoris, liberorum. **R.** Iste est. 200.

## SEXTA DIE.

In secundo Nocturno.

Tres Lect. de Serm. S. Maximi. Ad sancti ac beatissimi Patris, &c. ut in Breviario de Comuni Confessoris Pontificis. Quod si lecta fuerint in die festo sumantur hodie Lect. ex sequenti die septima.

## SEPTIMA DIE.

In secundo Nocturno.

Tres Lect. de Serm. S. Maximi. **N.** &c. ut in Brev. in non. cedunt Comuni. Quod si lecta fuerint in die festo, sumantur pro hac die Lectiones sequentis diei Octavæ.

## IN DIE OCTAVA.

In secundo Nocturno.

Si sequentes Lectiones lecta fuerint in præcedenti die, sumantur hodie Lectiones recte in die festo.

Sermo sancti Gregorii Papæ.

Part. 2. Pastoralis, cap. 1. Lectio iv.

**T**antum debet actionem populi actio transcendere præfulis, quantum distare solet à grege vita pastoris. Oportet namq; ut metiri se sollicitè studeat, quanta tenendæ rectitudinis necessitate constringitur, sub cuius æstimatione populus grex vocatur. Sic ergo necesse est cogitatione mundus, actione præcipuus, discretus in silentio, utilis in verbo, singulis compassione proximus,

præ cunctis contemplatione suspensus, benè agentibus per humilitatem socius, contra delinquentium vitia per zelum iustitiæ erectus, internorum curam in exteriorum occupatione non minuens, exteriorum providentiam in internorum solitudine non relinquens. **R.** Inveni. 199.

Part. 2. Pastor. cap. 9. & 10. Lectio v.

**C**onsiderandum quoque est, quia cum curam populi electus præsul suscipit, quasi ad ægrum medicus accedit. Si ergo adhuc in ejus corpore passionibus vivunt, qua præsumptione percussum mederi properat, qui in facie vulnus portat? Ille modis omnibus debet ad exemplum benè vivendi pertrahi, qui cunctis carnis passionibus moriens, jam spiritualiter vivit, qui prospera mundi postponit, qui nulla adversa pertimescit, qui sola interna desiderat: cujus intentioni bene congruens, nec omnino per imbecillitatem corpus, nec valdè per contumaciam repugnat spiritus: qui ad aliena cupiendâ non ducitur, sed propria largitur.

**R.** Posui. 199.

Ibid. cap. 2.

Lectio vi.

**U**nde ipsum quoque Episcopatus officium boni operis expressione definitur, cum dicitur: Si quis Episcopatum desiderat, bonum opus desiderat. Ipse ergo sibi restis est, quia Episcopatum non appetit, qui non per hunc boni operis ministerium, sed



sed honoris gloriam quærit. Sacrum quippe officium non solum non diligit omnino, sed nescit, qui ad culmen regiminis anhelans, in occulta meditatione cogitationis, cæterorum subjectione pascitur, laude propria lætatur, ad honorem cor elevat, rerum affluentium abundantia exultat. Mundi ergo lucrum quæritur sub ejus honoris specie, quo mundi destrui lucra debuerant.

*R.* Iste est. 200.

## INFRA OCTAVAM CONFESSORIS

Pontificis.

*Homilia in Evang. Matth. cap. 27. Homo peregrè, &c.*

*In die Festo habetur Homil. S. Gregorii.  
Lectio S. Evangelii, &c. in Breviar. in eadem  
Commun. Confessoris Pontif.*

### SECUNDA DIE.

*In tertio Nocturno.*

*Lectio S. Evangelii secundum Mattheum.*

*Lectio vii. Cap. 25.*

**I**N illo tempore: Dixit Jesus discipulis suis parabolam hanc: Homo peregrè proficiscens, vocavit servos suos, & tradidit illis bona sua. Et reliqua.

*De Homilia S. Gregorii Papæ.*

*Ex Homilia 9. in Evang. circa suam.*

**S**ciendum verò est, quòd nullus ab hac talenti acceptione securus est. Nullus namque est, qui veraciter dicat: Talentum minimè accepi, non est unde ratione ponere cogar: talenti enim nomine cuilibet pauperi etiam hoc ipsum reputabitur, quod vel minimum acceperit. Alius namque acceperit intelligentiam: prædicationis ministerium debet ex ta-

lento. Alius terrenam substantiam accepit: erogationem talenti debet ex rebus. Alius didicit artem, qua pascitur: ipsa ars ei in talenti acceptione reputatur. Alius familiaritatis locum apud divitem meruit; talentum profectò familiaritatis accepit. Si ergo nihil pro indigentibus loquitur, pro talenti retentione damnatur.

*R.* Amavit eum Dominus, & ornavit eum: stolam gloriæ induit eum, \* Et ad portas paradisi coronavit eum. \* Induit eum Dominus lorica fidei, & ornavit eum. Et. *Lectio viii.*

**T**antum quippe ab unoquoque nostrum venturus iudex exigit, quantum dedit. Ut ergo de talenti sui rationibus, redeunte Domino, quisque securus sit; cum timore penset quotidie quid accepit. Ecce namque jam juxta est, ut ille, qui peregrè profectus est, redeat. Quasi quippe peregrè abiit, qui scilicet de hac terra, in qua natus est, longè discessit, sed profectò revertitur, ut de talentis rationes ponat: quia si à bona actione torpescimus, de ipsis donis, quæ contulit, nos districtius judicat.

*R.* Sint lumbi vestri præcincti, & lucernæ ardentes in manibus vestris. \* Et vos similes hominibus expectantibus dominum suum, quando revertatur à nuptiis. \* Vigilate ergo, quia nescitis, quâ horâ Dominus vester venturus sit. Et. Gloria Patri. Et.

*Lectio*

*Lectio ix.*

**C**onsideremus igitur quæ accepimus, atque in eorum e-rogatione vigilemus. Nulla nos à spirituali opere terrena cura impediatur, ne si in terra talentum absconditur, talenti Dominus ad iracundiam provocetur. Piger etenim servus, cum jam culpas iudex examinat, talentum de terra levat: quia sunt plerique, qui tunc se à terrenis desideriis, vel operibus subtrahunt, quando jam per animadversionem iudicis ad æternum supplicium trahuntur. Antè ergo de talenti nostri ponenda ratione vigilemus, ut cum jam iudex ad feriendum imminet, lucrum nos, quod fecimus, excuset. **Te** Deum laudamus.

**TERTIA DIE.**

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 25.*

**I**n illo tempore: Dixit Jesus discipulis suis parabolam hanc: Homo peregrè proficiscens, vocavit servos suos, & tradidit illis bona sua. Et reliqua.

*Homilia sancti Joannis Chrysostomi.*

*Ex Homil. 79. in Matth. circa med.*

**T**alenta hic pro eo, quod unusquisque facere potest, accipimus, sive auctoritate protegere, sive pecuniis juvare, sive doctrinâ admonere, sive alia quam re proximis prodesse queas. Nemo secū dicat, Cum unum talentum habeam, nihil possum efficere: potes profectò ex ea una re sola comprobari. Non es pauperior illa vidua, non es Petro at-

Octav. Rom.

que Joanne rusticior: qui quamvis rudes simul atque illiterati fuerunt, quoniam magno studio communem utilitatem complexi fuerant, cœlorum principes facti sunt. **R.** Amavit. 204.

*Lectio viii.*

**Q**uipe nulla res Deo gratior est, quàm ut universam vitam ad commune commodum conferas. Idcirco ratione atque oratione nos Deus decoravit, mentem & ingenium concessit, manus, pedes, vires corporis dedit, ut his omnibus & nos ipsos & proximos tutemur. Non enim ad agendas gratias solummodo confert oratio, verum etiam ad docendum, & admonendum perutilis est: qua in re si ea diligenter utemur, Dominum; sin verò in contrariis, diabolum imitabimur. **R.** Sint lumbi. 204.

*Lectio ix.*

**N**am & Petrus quandoquidem Christum confitebatur, quasi ea dicens, quæ Patris sunt, beatificabatur: quòd autem crucem horrebat atque repellebat, quasi ea quæ diaboli sunt, sapiens acriter increpabatur. Si ergo ignorance crucem recusando reprehensus est, quam nos spontè peccantes veniam impetrabimus? Ea ergo loquamur, quæ Christi verba esse confestim cognoscuntur. **Te** Deum laudamus.

**QUARTA DIE.**

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 25.*

**S**

**I**n



**I**N illo tempore: Dixit Jesus discipulis suis parabolam hanc: Homo peregrè proficiscens, vocavit servos suos, & tradidit illis bona sua. Et reliqua.

Homilia S. Hieronymi, Presbyteri.

Lib. 4. in Matth. cap. 25.

**H**Omo iste paterfamilias, haud dubium quin Christus sit: qui ad Patrem post resurrectionem victor ascendens, vocatis Apostolis, doctrinam Evangelicam tradidit; non pro largitate & parcitate alteri plus & alteri minus tribuens, sed pro accipientium viribus: quomodo & Apostolus eos, qui solidum cibum capere non poterant, lacte potasse se dicit. Denique & illum, qui de quinque talentis decem fecerat, & qui de duobus quatuor, simili recepit gaudio: non considerans lucri magnitudinem, sed studii voluntatem. **R.** Amavit. 204.

Leccio viii.

**I**N quinque, & duobus, & uno talento, vel diversas gratias intelligamus, quæ unicuique traditæ sunt: vel in primo omnes sensus examinatos; in secundo intelligentiam, & opera; in tertio rationem, qua homines à bestiis separantur. Acceptis ille terrenis sensibus, cœlestium sibi notitiam duplicavit, ex creaturis intelligens creatorem, ex corporalibus incorporalia, ex visibilibus invisibilia, ex brevibus æterna. Et iste pro viribus quidquid in lege didicerat, in Evangelio duplicavit: sive scientiam & opera præ-

sentis vitæ, futuræ beatitudinis typos intellexit.

**R.** Sint lumbi. 204. **Leccio ix.**

**G**Rande tempus est inter ascensionem Salvatoris, & secundum ejus adventum. Si autem Apostoli reddituri sunt rationem, & sub metu judicis resurrecturi, quid eos oportet facere? Et notandum, quod omnia quæ in præsentia habemus; licet magna videantur & plurima, tamen comparatione futurorum, parva & pauca sunt. Intra, inquit, in gaudium Domini tui; & suscipe, Quæ nec oculus vidit, nec auris audivit, nec in cor hominis ascenderunt. Quid autem potest majus dari fideli servo, quam esse cum Domino, & videre gaudium Domini sui? **Te Deum laudamus.**

## QUINTA DIE.

In tertio Nocturno.

Leccio S. Evangelii secundum Matthæum.

Leccio vii. Cap. 25.

**I**N illo tempore: Dixit Jesus discipulis suis parabolam hanc: Homo peregrè proficiscens, vocavit servos suos, & tradidit illis bona sua. Et reliqua.

Homilia sancti Hilarii Episcopi.

Can. 27.

**D**ivisio pecuniæ inæqualis est, sed non ad dividendum referenda diversitas est. Ait enim, unumquemque secundum virtutem suam accepisse. Igitur unusquisque secundum fidei suæ mensuram talentum, id est Evangelii prædicationem à prædicante suscepit. Sed servus ille, qui quinque

quinque talenta accepit, populus ex lege credentium est; ex qua profectus, meritum ipsius rectè probèque perfunctus, Evangelicæ fidei operatione duplicavit. In ratione autem ponenda iudicii examen est, quo cœlestis verbi usus, & redditus dispensati talenti postulatur.

*R. Amavit. 204. Lectio viii.*

**I**gitur, cui erant quinque commissæ, Domino reverso, de quinque decem obrulit: talis scilicet in fide repertus, qualis in lege: qui decem verborum quinque libris Moysei præceptorum obedientiam per gratiam Evangelicæ justificationis expleverit. Igitur iubetur in gaudium Domini introire, id est, in honorem gloriæ Christi recipitur. Ille verò servus, cui duo talenta commissæ sunt, Gentium populus est, fide atque confessione & Filii justificatus & Patris, Dominum nostrum Jesum Christum Deum atque hominem & spiritu & carne confessus: nam & corde fides, & ore confessio est. Hæc ergo huic sunt duo talenta commissæ.

*R. Sint lumbi. 204. Lectio ix.*

**S**ed ut prior ille omne Sacramentum in quinque talentis, id est, in lege cognoverat, idque ipsum fide Evangelii duplicaverat: ita iste incremento duum talentorum, atque operatione promeruit, ratione ac redditu dissimili. Par tamen à Domino munus amborum est, ut Gentium

fidem exæquatam credentium ex lege scientiæ nosceremus: nam cum laudatione eadem iubetur in gaudium Domini introire. Est autem duplicatio sumptæ pecuniæ, operationem fidei addidisse; & quæ opinione crediderant, rebus factisque gessisse. *Te Deum.*

## SEXTA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 25.*

**I**n illo tempore: Dixit Jesus discipulis suis parabolam hanc: Homo peregrinè proficiscens, vocavit servos suos, & tradidit illis bona sua. Et reliqua.

*Homilia sancti Joannis Chrysostomi.  
In Gen. c. 22. Homil. 45. circa audientiam.*

**N**obis non satis est, quòd extradamnum sumus, & quod nostrum est implemus: sed volumus, ut & vos ex dinumeratis pecuniis multum negotiemini, ut ne obnoxii fiatis supplicio, quod luit ille, qui talentum recondidit, & Dominicam pecuniam non solum non multiplicavit, sed & ipsam in terra defodit. Tales enim sunt, qui sermones audiunt: talentum enim hoc vocat, & pecuniam: neque operam dant, ut fructum afferant.

*R. Amavit. 204. Lectio viii.*

**S**ed fortè dixerit quispiam, parabolam istam talentorum de doctoribus esse dictam: nec ego hoc nego. Verum si diligenter eam intueamini, scietis, quòd doctores quidem debent dinumerare pecuniam: sed vos non solum

*S: eam*



eam servare, sed & similiter negotiari debetis. Et quare ille, qui duo attulit talenta, eundem consequitur honorem, quem ille, qui talenta quinque attulerat? Merito: augmentationem enim & diminutionem, non vel hujus diligentia, vel illius negligentia fecit, sed concreditorum quantitas. Nam quod ad diligentiam attinet, ambo pares fuerunt, proinde & eandem dignitatem assecuti sunt.

*R. Sint lumbi. 204. Lectio ix.*

**V**erum alius ille nihil tale fecerat. Sed quid? Accessit dicens, Cognovi te, quod austerus homo sis, metens ubi non seminas, & congregans ubi non spargis: & veritus abii, & occultavi talentum in terra. O nequitiam servi! ô insignem ignaviam! Nam non solum iussa contempsit, & nihil negotiatus est talento sibi concredito, sed & pro talento accusationem attulit: ita enim solet malitia, obtenebrat rationem, & eum, qui semel à via aberravit, per abrupta præcipitem dat. *Te Deum.*

### SEPTIMA DIE.

*In tertio Nocturno.*

*Lectio S. Evangelii secundum Mattheum.*

*Lectio vi. Cap. 25.*

**I**n illo tempore: Dixit Jesus discipulis suis parabolam hanc: Homo peregrè proficiscens, vocavit servos suos, & tradidit illis bona sua. Et reliqua.

*De Homilia S. Joannis Chrysost. U. de suprà.*

**H**æc autem omnia de magistris dicta sunt, ut talenta sibi

concredita non abscondant, sed omni diligentia discere cupientibus apponant. Verum ultra audi, dilecte, ex indignatione erga illū, quomodo & discipuli rei sunt: & non solum illa repetuntur, quæ concredita, sed & cum lucro operatio quæritur. Quid igitur dicit illi Dominus? Serve nequam. Terribilis indignatio, & minæ valentes per se percellere animum. Oportebat te pecuniam tuam dinumerare mensariis, & ego cum venissem, cum lucro repetissem illam. Pecuniam dicens eloquia pretiosa: nummularios autem vos, qui suscipitis.

*R. Amavit. 204. Lectio viii.*

**Q**uocirca, dilecti, cum vobis concredita dinumeraverimus, vobis necessarium erit duplicem afferre laborem & vigilantiam, tum quod dinumerata custodienda sunt, ut fixa maneant, tum quod operandum; ut & aliis communicetur, & multos in viam virtutis inducant: ut bifariam vobis lucrum accrescat, tum pro salute vestra, tum pro aliorum utilitate. Igitur fratres vestros nolite negligere, neque solum spectare quæ ad vos attinent, sed unicuique cura sit, quomodo proximum suum è diaboli faucibus eripiat.

*R. Sint lumbi. 204. Lectio ix.*

**S**imili modo & nos erga fratres nostros benè affecti magnam adhibeamus diligentiam, & obli-

irri-

irritos ejus faciamus conatus. Nam si singuli, qui adsint, unum lucrifacere possent, cogita quantam nobis lætitiā Ecclesia multitudinē filiorum suorum ostenderet: & quomodo diabolus confunderetur, videns in vanum & frustrā extendi sua retia? Quod si hoc feceritis, audieris & vos in die illo: Serve bone & fidelis, in pauca fuisti fidelis, supra multa te constituam. **Te Deum.**

**IN DIE OCTAVA.**

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 25.*

**I**N illo tempore: Dixit Jesus discipulis suis parabolam hanc: Homo peregrinū proficiscens, vocavit servos suos, & tradidit illis bona sua. Et reliqua.

*Homilia sancti Ambrosii Episcopi.  
Lib. 2. de voc. gen. cap. 2. post medium.*

**D**atur unicuique hic sine merito, unde tendat ad meritum; & datur ante ullum laborem, unde quisque mercedem accipiat secundum suum laborem. Quod ita esse, Evangelicæ veritatis testimonio agnoscitur, ubi per comparationem dicitur, quod homo peregrinū proficiscens vocavit servos suos, & tradidit illis substantiam suam, & uni dedit quinque talenta, alii autem duo, alii verò unum, unicuique secundum propriam virtutem, id est, secundum propriam & naturalem possibilitatem, non autem secundum proprium meritum: quia aliud est posse operari, aliud ope-

rari: & aliud est, posse habere charitatem; aliud, habere charitatem.

**R.** Amavit. 204. **Lectio viii.**

**N**on itaque omnis reparabilis reparatur, nec omnis sanabilis sanatus est: quia reparabilem & sanabilem esse, de natura est; reparatum autem & sanatum esse, de gratia est. Denique isti, quibus secundum modulum capacitatis suæ, quem in eis distributor substantiæ prævidebat, dispar creditus est numerus talentorum; non meriti remunerationem, sed operis accepere materiam.

**R.** Sint lumbi, 204. **Lectio ix.**

**I**N qua duorum fervorum vigilantissima industria, non solum gloriosis laudibus honestatur, sed etiam in æterna Domini sui gaudia intrare præcipitur: Tertii verò pigrum otium & desidiosa nequitia sic punitur, ut & vituperationis dedecoretur opprobrio, & portione, quam acceperat, exuatur. Dignus enim erat perdere inutilem fidem, qui non exercuerat charitatem. **Te Deum.**

**INFRA OCTAVAM  
CONFESSORIS**

**Pontificis.**

*Homilia in Evangel. Matth. cap. 24. Vigilare, quia nescitis, &c.*

*In die festo habetur Homilia S. Hilarii. Ut ignorantiam, &c. ut in Breviario de Communi Confessoris Pontificis.*

**SECUNDA DIE.**

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 24.*

**I**N illo tempore: Dixit Jesus discipulis suis: Vigilate, quia nescitis



scitis qua hora Dominus vester venturus sit. Et reliqua.

Homilia sancti Fulgentii Episcopi.  
Sermone de Confessoribus.

**D**ominicus sermo, quem debemus omnes non solum studiosè, verum etiam sapienter audire, cui nos oportet humiliter ac delectabiliter obedire, moderationis suæ tenens ubique temperiem, ut nec ovibus desint pabula, nec pastoribus alimenta: quædam specialiter solis præcipit nobis, quædam verò generaliter & nobis & vobis. Nobis namque (id est servis, quos ille paterfamilias, rerum omnium Dominus, ad hoc in sua magna domo constituit, ut populo ejus verbum gratiæ ministremus) specialiter iungitur sanctæ prædicationis officium: generaliter verò & nobis, & vobis salutaris indicitur obedientia mandatorum.

*R.* Amavit. 204. *Lectio viii.*

**S**ervorum igitur, quos populo suo præposuit Dominus, specialiter volens officium demonstrare, ait: quod ex Evangelio modò audivimus: Quis, putas, est fidelis dispensator, & prudens, quem constituit Dominus super familiam suam, ut det illis in tempore tritici mensuram? Beatus ille servus, quem, cum venerit Dominus, invenerit ita facientem. Quis est iste Dominus, fratres? Christus sine dubio, qui suis discipulis ait: Vos vocatis me magister & Domine, & benè dicitis: sum etenim.

*R.* Sint lumbi. 204. *Lectio ix.*

**Q**uæ est etiam hujus Domini familia? Nimirum illa est, quam ipse Dominus de manu inimici redemit, & suo dominio mancipavit. Hæc familia est sancta Catholica Ecclesia, quæ per orbem terræ copiosa fertilitate diffunditur, & redemptam se pretioso sui Domini sanguine gloriatur. Filius enim hominis, sicut ipse ait, non venit ministrari, sed ministrare, & dare animam suam redemptionem pro multis. Ipse est etiam pastor bonus, qui animam suam posuit pro ovibus suis. Grex ergo boni pastoris, ipsa est familia Redemptoris. *Te Deum.*

### TERTIA DIE.

*In tertio Nocturno.*  
*Lectio S. Evangelii secundum Mattheum.*  
*Lectio vii. Cap. 24.*

**I**n illo tempore: Dixit Jesus discipulis suis: Vigilate, quia nescitis, qua hora Dominus vester venturus sit. Et reliqua.

De Homilia sancti Fulgentii Episcopi.  
*Unde supra.*

**D**ispensator verò, quis sit, què oportet esse fidelem pariter & prudentem; Paulus nobis ostendit Apostolus, qui de se suisque sociis loquens ait: Sic nos existimet homo, ut ministros Christi, & dispensatores mysteriorum Dei. Ne quis autem vestrum solos Apostolos dispensatores factos existimet, neglectoque militiæ spiritualis officio, servus piger, infideliter, imprudentérque dormitet, ipse beatus Apostolus

Episco-

Episcopos quoque dispensatores esse ostendens, ait: Oportet enim Episcopum sine crimine esse, sicut Dei dispensatorem.

**R.** Amavit. 204. **Lectio viii.**

**S**ervi autem patrisfamilias sumus, dispensatores Domini sumus, mensuram tritici, quam vobis erogemus, accepimus. Quæ verò sit ista mensura tritici, si quæramus, ipsam quoque nobis beatus Paulus Apostolus ostendit, dicens: Unicuique sicut Deus divisit mensuram fidei. Quam ergo mensuram tritici Christus nuncupat, ipsam mensuram fidei Paulus appellat: ut agnoscamus, non aliud esse spiritale triticum, quàm Christianæ fidei venerabile Sacramentum.

**R.** Sint lumbi. 204. **Lectio ix.**

**H**ujus tritici mensuram vobis in nomine Domini damus quoties illuminati dono gratiæ spiritalis, secundum regulam veræ fidei disputamus: & eandem tritici mensuram per Dominicos dispensatores accipitis, cum quotidie per Dei famulos verbum veritatis auditis. De ipsa ergo tritici mensura loquamur; ex ipsa, sicut Deus divisit, universi pascamur; inde alimenta bonæ vitæ sumamus, ut ad æternæ vitæ præmia pervenire possimus: in illum credentes, in illum sperantes, illum præ omnibus & in omnibus diligentes, qui seipsum nobis & alimentum præstat, ne deficiamus in via: & præmium servat, ut

gaudeamus in patria. **Te Deum.**

## QUARTA DIE.

In tertio Nocturno.  
**Lectio S. Evangelii secundum Matthæum.**

**Lectio vii. Cap. 24.**

**I**n illo tempore: Dixit Jesus discipulis suis: Vigilate, quia nescitis, qua hora Dominus vester venturus sit. Et reliqua.

Homilia sancti Joannis Chrysostomi.

Ex Homilia 78. in Matth. ante prædicationem.

**P**ropterea hæc dicit Dominus discipulis, ut vigilent, ut jugiter parati sint, quia qua non existimant hora, venturus est. Sollicitos igitur facit & curiosos, ne umquam virtutem negligant. Tale quid autem est, quod dicitur: Si præscirent homines, quando morituri sint, diligentiam suam circa illam horam ostenderent. Ne igitur in illo solummodo tempore, sed continuè diligentes sint, nec generalem, nec singularem horam prædicit, ut semper expectando, semper vigilent: hac enim ratione terminum vitæ uniuscujusq; occuluit.

**R.** Amavit. 204. **Lectio viii.**

**D**einde liquidò adeò ut numquam liquidius, Dominum se ipsum appellavit. Hæc autem etiam ad erubescentiam desidiæ mihi dicta videntur: majorem enim diligentiam pecuniarum conservandarum habent furem expectantes, quàm vos salutis animæ. Vigilant enim tunc, ne aliquid sibi surripiatur: vos verò, quamvis certò sciatis venturum Dominum, non perseveratis



tis tamen, neque ita vigilatis, ut possitis non impræparati ex hac vita discedere. Quapropter cum perniciæ dormientium dies ille venturus est.

*R.* Sint lumbi. 204. *Lectio ix.*

**N**am quemadmodum non læderetur ille furto, si furem sciret venturum; sic & vos, quoniam scitis Dominum venturum, paratiores esse debetis. Cæterum quoniam iudicii mentionem fecit, ad Doctores etiam vertit orationem, de pœna & meritis differens. Et primò bonis collatis, ad peccatores exitum facit, commodissimè orationē concludens. Quis ergo, inquit, fidelis servus & prudens, quem constituit Dominus super familiā suam, ut det illis cibum in tempore? *Te Deū.*

### QUINTA DIE.

*In tercio Nocturno.*

*Lectio S. Evangelii secundum Matthæum.*

*Lectio vii. Cap. 24.*

**I**n illo tempore: Dixit Jesus discipulis suis: Vigilate, quia nescitis, qua hora Dominus vester venturus sit. Et reliqua.

*De Homilia S. Joannis Chrysostomi.*

*Unde supra.*

**D**ic, quæso, num & hoc ignorantis est? nam, si quoniā nec Filium scire dictum est, ignorare ipsum affirmas: quid modò dices, cum dubitando dicere videatur, Quis igitur fidelis servus? An & hoc ipsum ignorare confinges? nequaquam: nullus enim nisi mente captus id diceret. At qui causam de illo dicere possumus, de hoc verò nullam. Quid porro

quando interrogando dicit, Petre diligis me; neque illud sciebat? aut quando quærit: Ubi posuistis eum?

*R.* Amavit. 204. *Lectio viii.*

**E**go verò etiam Patrem ita loquentem invenio. Ipse enim est qui dicit: Adam ubi es? &, Clamor Sodomorum multiplicatus est in me, descendens igitur videbo, si secundum clamorem venientem opera fiant: si autem non ita, ut cognoscam. Et alibi: Si fortè audierint, si fortè intellexerint. Et in Evangelio: Verébuntur fortasse Filium meum. Quæ omnia verba, quamvis ignorantem significant, non ignorans tamen, sed ut eum decet, dispensans ita dicebat.

*R.* Sint lumbi. 204. *Lectio ix.*

**D**E Adam ergo illo modo quæfivit, ut ad apologiam, hoc est, ad dicendam causam peccati eum induceret. De Sodomis autem ita locutus est, ut nos erudiret, nihil antea esse determinandum, quàm ad rem ipsam certius perveniremus. Per Prophetam autem ambiguè loqui videtur, ne prædictio inobedientiam necessariò facere videretur. In Evangelio verò ostendere voluit, quia revereri Filium debuissent. *Te Deum laudamus.*

### SEXTA DIE.

*In tercio Nocturno.*

*Lectio S. Evangelii secundum Matthæum.*

*Lectio vii. Cap. 24.*

**I**n illo tempore: Dixit Jesus discipulis suis: Vigilate, quia nescitis,

scitis, quâ horâ Dominus vester venturus sit. Et reliqua.

De Homilia S. Joannis Chrysostomi.

Unde supra.

**H**Oc autem in loco, ne rursus curiosius perscrutentur, & adhuc, ut, quod rarius est, pluris ostendat. Expende autem qualem hæc verba ignorantiam significare possunt, siquidem à se constitutum super familiam suam ignoraret. Præterea beatificat quidem eum, (Beatus enim, inquit, servus ille;) quis verò sit, silentio tradidit: quis enim est, aut quomodo constituet Dominus super familiam suam, quem inveniet sic facientem? Hæc non de pecuniis solummodo, verum etiam de verbis, de virtute, de omni dispensatione singulo homini concessa, dicta sunt.

R. Amavit. 204. Lectio viii.

**H**æc parabola vel ad gerentes, gubernantesque rempublicam accommodari potest. Docet enim unumquemque ad communem utilitatem omnia conferre, quæ sua sunt, sive sapientiam, sive principatum, sive quidquid aliud, non ad detrimentum conservorum, nec ad perditionem suam. Quapropter utrumque ab eo flagitat, prudentiam scilicet, atque fidem. Delicta enim ab amentia originem habent.

R. Sint lumbi. 204. Lectio ix.

**F**idelem igitur appellat, quoniam nihil ex rebus domini sibi attribuit, nec incassum quidquam expendit; prudentem au-

tem, quia dispensare noverit: opportunè siquidem utràque re nobis opus est, ne scilicet, quæ domini sunt, ad proprios usus rapiamus; & ut opportunè omnia dispensemus. Te Deum.

### SEPTIMA DIE.

In tertio Nocturno.

Lectio S. Evangelii secundum Matthæum.

Lectio vii. Cap. 14.

**I**N illo tempore: Dixit Jesus discipulis suis: Vigilate, quia nescitis, qua hora Dominus vester venturus sit. Et reliqua.

De Homilia S. Joannis Chrysostomi.

Unde supra.

**N**am si alterum horum absit, Nejus absentiam alterum omnino claudicat. Si enim fidelis ita sit, ut non furetur; disperdat autem non necessariò consumens impendio, non parvum id crimen est. Si verò è contrario rectè dispenset, sibi verò accumulet, ingens rursus hæc culpa. Audiamus etiam, qui pecuniosi sumus.

R. Amavit. 204. Lectio viii.

**N**on enim doctoribus hæc solum, sed divitibus etiam dicit, cum utrisque Dominus divitias suas crediderit, maximas quidem doctoribus, sed locupletibus non parvas. Si ergo docentes majores divitias seminant, atque dispergant, vos autem nullam in minoribus liberalitatem ostendatis (cur liberalitatem, & non gratitudinem dixi? non enim vestra, sed aliena tribuitis;) quænam vobis futura est excusatio?

R. Sint lumbi. P. Lectio ix.

Sed



**S**ed interim, antequam de punitione dicatur, approbati præmia servi qualia sint, audiamus. Amen dico vobis, in omnibus suis constituet eum. Quid hoc honore majus? quæ oratio hanc dignitatem, hanc beatitudinem assequi poterit, cum cœlorum conditor, cui omnia servant, hominem in omnibus suis constituturus est? Præterea & prudentem eum appellavit, quia novit magna pro parvis perdenda non esse; quia moderatè vitam hic peragens, cœlos consecutus est. **Te Deum laudamus.**

### IN DIE OCTAVA.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 24.*

**I**n illo tempore: Dixit Jesus discipulis suis: Vigilate, quia nescitis, qua hora Dominus vester venturus sit. Et reliqua.

*Homilia sancti Ambrosii Episcopi.*

*De Fide, lib. 5. cap. 8.*

**Q**uærimus, qua ratione Dominus designare momenta noluerit. Si quæramus, non ignorantia inveniemus esse, sed sapientia. Nobis enim scire non proderat, ut dum certa futuri iudicii momenta nescimus, semper tamquam in excubiis constituti, & in quadam virtutis specula collocati, peccandi consuetudinem declinemus, ne nos inter vitia dies Dominiprehendat.

**R.** Amavit. 204. *Lectio viii.*

**N**on enim prodest scire, sed metuere quod futurum est:

scriptum est enim, Noli alta sapere, sed time. Nam si diem designasset expressè, uni ætati hominum, quæ proxima erat iudicio: videretur disciplinam præscripsisse vivendi superioris temporis; aut justus esset remissior, aut peccator securior. Namquæ adulter, nisi quotidianam poenam metuat, non potest adulterandi cupiditatem desinere.

**R.** Sint lumbi. 204. *Lectio ix.*

**P**lerumque enim, quibus incertum est impunitas, timor tedium est. Ideo ergo dixi, quod scire non proderat; imò proderat ignorare, ut ignorantes timeremus, ut observantes emendaremur, sicut ipse dixit: Estote parati, quia nescitis qua hora Filius hominis venturus est. Namquæ miles, nisi bellum in manibus esse cognoscat: prætereundum non novit in castris. **Te Deum.**

### INTRA OCTAVAM CONFESSORIS PONTIFICIS.

*Homilia in Evangel. Luc. cap. 11. Nemo lucernam accendit, &c.*

### IN DIE FESTO.

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 11.*

**I**n illo tempore: Dixit Jesus discipulis suis: Nemo lucernam accendit, & in abscondito ponit, neque sub modio: sed supra candelabrum, ut qui ingrediuntur, lumen videant, Et reliqua.

*Homilia sancti Ambrosii Episcopi.  
Lib. 7. Comment. in Luc. c. 11. post init.*

**Quia**

**Q**uia in superioribus Ecclesiam synagoga praeulit, hortatur nos, ut fidem potius nostram ad Ecclesiam transferamus. Lucerna enim fides est, juxta quod scriptum est: Lucerna pedibus meis verbum tuum, Domine. Verbum enim Dei fides nostra est: verbum Dei lux est. Lucerna est fides. Erat lux vera, quae illuminat omnem hominem venientem in hunc mundum. Lucerna autem lucere non potest, nisi aliunde lumen acceperit.

**R.** Amavit. 204. **Lectio viii.**

**H**aec est lucerna, quae accenditur, virtus scilicet nostrae mentis & sensus, ut drachma illa possit, quae perierat, reperiri. Nemo ergo fidem sub lege constituat. Lex enim intra mensuram est, ultra mensuram gratia: lex obumbrat, gratia clarificat. Et ideo nemo fidem suam intra mensuram legis includat, sed ad Ecclesiam conferat, in qua septiformis Spiritus relucet gratia, quam princeps ille Sacerdotum fulgore supernae divinitatis illuminat, ne eam legis umbra restringat. **R.** Sint lumbi. 204.

**Lectio ix.**

**D**enique lucerna illa, quam matutinis vespertinisque temporibus, ritu veteri, Judaeorum princeps sacerdotum solebat accendere, velut sub modio sita legis evanuit; & civitas illa Jerusalem, quae in terris est, quae occidit Prophetas, quasi in conval-

le fietus posita delitescit: illa autem Jerusalem, quae in caelo est, in qua militat fides nostra, in illo altissimo omnium locata monte, hoc est Christo, non potest tenebris & ruinis hujus mundi abscondi, sed fulgens candore solis aeterni, luce nos gratiae spiritualis illuminat. **Te Deum laudamus.**

## SECUNDA DIE.

*In tertio Nocturno.*

*Lectio sancti Evangelii secundum Lucam.*

*Lectio vii. Cap. ii.*

**I**n illo tempore: Dixit Jesus discipulis suis: Nemo lucernam accendit, & in abscondito ponit, neque sub modio: sed supra candelabrum, ut qui ingrediuntur, lumen videant. Et reliqua.

*Homilia sancti Gregorii Papae.*

*Lib. 28. Mor. cap. 6. circa finem.*

**Q**uid per oculum exprimitur, nisi opus suum praeveniens cordis intentio? quae prius quam se in actione exerceat, hoc jam, quod appetit, contemplatur. Et quid appellatione corporis designatur, nisi unaquaque actio, quae intentionem suam, quasi intuentem oculum sequitur. Lucerna itaque corporis est oculus, quia per bonae intentionis radium merita illustrantur actionis.

**R.** Amavit. 204. **Lectio viii.**

**E**t si oculus tuus simplex fuerit, totum corpus tuum lucidum erit: quia si recte intendimus per simplicitatem cogitationis, bonum opus efficitur, etiam si minus bonum esse videatur. Et si oculus tuus nequam fuerit,

**totum**



totum corpus tuum tenebrosum erit: quia, cum perversa intentione quid vel rectum agitur, etsi splendere coram hominibus cernitur, apud examen tamen interni Judicis obscuratur. Unde & rectè subjungitur: Vide ergo, ne lumen, quod in te est, tenebræ sint; si lumen, quod in te est, tenebræ sunt, ipsæ tenebræ quantæ erunt? **R.** Sint lumbi. 204.

*Lectio ix.*

**Q**uia si hoc, quod benè nos agere credimus, ex mala intentione fuscamus, quanta ipsa mala sunt, quæ mala esse, etiam cum agimus, non ignoramus? etsi ibi nil cernimus, ubi quasi discretionis lumen tenemus, quæ cæcitate in illa offendimus, quæ sine discretionem perpetramus. Vigilanti igitur cura per cuncta opera intentio nobis nostra pensanda est, ut nihil temporale in his, quæ agit, appetat, totam se in soliditate æternitatis figat, ne si extrafundamentum actionis nostræ fabrica ponitur, terra dehiscente solvatur. **Te Deum** laudamus.

### TERTIA DIE.

*In tertio Nocturno.*

*Lectio sancti Evangelii secundum Lucam.*

*Lectio vii. Cap. ii.*

**I**n illo tempore: Dixit Jesus discipulis suis: Nemo lucernam accendit, & in abscondito ponit, neque sub modio: sed supra candelabrum, ut qui ingrediuntur, lumen videant. Et reliqua.

*Homilia sancti Augustini Episcopi.*

*De Sermone Domini in monte, lib. 2.*

*cap. 6.*

**Q**uid putamus, ita esse dictum, Sub modio, ut occultatio tantum lucernæ accipienda sit, tamquam si diceret, Nemo accendit lucernam, & occultat illam? An aliquid etiam modius significat, ut hoc sit ponere lucernam sub modio, superiora facere corporis commoda, quàm prædicationem veritatis; ut ideò quisque veritatem non prædicet, dum timet ne aliquid in rebus corporalibus & temporalibus molestiæ patiatur.

**R.** Amavit. 204. *Lectio viii.*

**E**t benè modius dicitur, sive propter retributionem mensuræ; quia ea quisque recipit, quæ gessit in corpore; ut illic, inquit Apostolus, recipiat unusquisque quæ gessit in corpore. Si quoniā temporalia bona, quæ corpore peraguntur, certa dierum mensura & inchoantur & transeunt, quam fortasse significat modius; æterna verò & spiritalia nullo tali fine còercentur; non enim ad mensuram dat Deus spiritum. Sub modio ergo lucernam ponit quisque lucem bonæ doctrinæ commodis temporalibus obscurat & tegit.

**R.** Sint lumbi. 204. *Lectio ix.*

**S**uper candelabrum autem, qui corpus suum ministerio Dei subijcit, ut superior sit prædicatione veritatis, & inferior servitus corporis: per ipsam tamen corporis servitutem excellentior luceat doctrina, quæ per officia corporalia,

ralia, id est, per vocem, & linguam, & ceteros corporis motus in bonis operibus insinuat discentibus. Super candelabrum ergo ponit lucernam, cum dicit Apostolus: Non sic pugno tamquam aërem cædens, sed castigo corpus meum, ne fortè aliis prædicans, ipse reprobus inveniar. **Te Deū.**

QUARTA DIE.

In tertio Nocturno.

Lectio sancti Evangelii secundum Lucam.

Lectio vii. Cap. ii.

**I**n illo tempore: Dixit Jesus discipulis suis: Nemo lucernam accendit, & in abscondito ponit, neque sub modio: sed supra candelabrum, ut qui ingrediuntur, lumen videant. Et reliqua.

De Homilia sancti Augustini Episcopi.

De Sermon. Domini in monte, lib. 2. cap. 3.

**S**i oculus tuus simplex fuerit, totum corpus tuum lucidum erit. Qui locus sic intelligendus est, ut noverimus, omnia opera nostra tunc esse munda, & placere in conspectu Dei, si fiant simplici corde, id est, intentione superna, sine illo charitatis; quia & plenitudo legis charitas. Oculum ergo hic accipere debemus ipsam intentionem, qua facimus quidquid facimus; quæ si munda fuerit & recta, & illud aspiciens quod aspiciendum est, omnia opera nostra quæ secundum eam operamur, necesse est bona sint: quæ omnia opera, totum corpus appellavit. **R. Amavit. 204.**

Lectio viii.

**N**on ergo quid quisque faciat, sed quo animo faciat, considerandum est. **Octav. Rom.**

derandum est. Hoc est enim lumen in nobis: quia hoc nobis manifestum est, bono animo nos facere quod facimus. Omne enim quod manifestatur, lumen est: nam ipsa facta, quæ ad hominum societatem à nobis procedunt, incertum habent exitum, & ideo tenebras eas vocavit. Itaque si bono animo feci, quod mihi, cum facerem, notum erat, & ideo lumen vocatur; illuminatur etiam factum meum, qualemcumque exitum habuerit: si autem malo animo feci, etiam ipsum lumen tenebræ sunt. Lumen enim dicitur, quia novit quisque quo animo faciat: sed ipsum lumen tenebræ sunt, quia ad inferiora declinatur intentio.

**R. Sint lumbi, 204. Lectio ix.**

**S**i ergo lumen, quod in te est, tenebræ sunt, ipsæ tenebræ quantæ erunt? Hoc est, si ipsa cordis intentio, qua facis quod facis. quæ tibi nota est, sordidatur appetitu rerum temporalium, atque cæcatur; quanto magis ipsum factum, cujus incertus est exitus, sordidum & tenebrosum est? Quia etsi benè alicui proveniat quod tu non recta & munda intentione facis, quomodo tu feceris, tibi imputatur; non quomodo illi provenerit. **Te Deum.**

QUINTA DIE.

In tertio Nocturno.

Lectio sancti Evangelii secundum Lucam.

Lectio vii. Cap. ii.

**I**n illo tempore: Dixit Jesus discipulis suis: Nemo lucernam accen-



accendit, & in abscondito ponit, neque sub modio: sed supra candelabrum, ut qui ingrediuntur, lumen videant. Et reliqua.

Homilia sancti Bernardi Abbatis.  
Ex Tract. de Præc. & dispens. longe  
post medium.

**S**I oculus tuus fuerit simplex, totum corpus tuum lucidum erit. Ut interior oculus verè simplex sit, duo illi esse arbitror necessaria, charitatem in intentione, & in electione veritatem. Nā si bonum quidem diligit, sed verum non eligat, habet quidem zelum Dei, sed non secundum scientiam. Et nescio quemadmodum iudicio veritatis vera esse possit cum falsitate simplicitas. Volens denique ad veram discipulos instruere simplicitatem magistra Veritas, Estote, inquit, prudentes sicut serpentes, & simplices sicut columbæ. Præmisit prudentiam sine qua neminem satis esse posse simplicem sciret.  
R. Amavit. 204. *Lectio viii.*

**Q**uomodo denique verè simplex erit oculus cum ignorantia veritatis? aut verò vera potest dici simplicitas, quam simplex ignorat veritas? Scriptum est enim: Ignorans ignorabitur. Cæterum sicut oculus simplicem duo ista faciunt bona, amor boni, & cognitio veri: sic nequam oculus duo è regione mala constituit, cæcitas, qua fit ut veritatem non agnoscat; & perversitas, qua fit ut diligat iniquitatem. Secundum hoc duplex malum,

& illud item geminum bonum, quadrifariam dividamus oculum cordis, in bonum, & meliorem; in malum, & pejorem.

R. Sint lumbi. 204. *Lectio ix.*

**A**lius est itaque pius oculus, non quidem fallere promptus, sed tamen falli pronus, de quo Propheta, Ephraim, inquit, quasi columba seducta, non habens cor. Alius is, quem Dominus simplicem dicit, tam nec fallere facilis, quàm nec falli: de quo & Apostoli docentur, cum eis dicitur, Estote prudentes sicut serpentes, & simplices sicut columbæ. Et item alius est oculus simpliciter malus, fallens utique libenter, sed non facile falsus: qualem profectò habent illi, qui ore Dominico astruuntur prudentiores esse filiis lucis in generatione sua. Et alius, quem nequam esse definimus, quia sit dupliciter malus, cui quippe & malitia parit ignorantiam, & ignorantia malitiam operit, ita ut sæpè nesciens & malum quod vult non faciat, & bonum faciat quod non vult. *Te Deum laudamus.*

#### SEXTA DIE.

In tertio Nocturno.

*Lectio S. Evangelii secundum Lucam.*

*Lectio vii. Cap. ii*

**I**n illo tempore: Dixit Jesus discipulis suis: Nemo lucernam accendit, & in abscondito ponit, neque sub modio: sed supra candelabrum, ut qui ingrediuntur, lumen videant. Et reliqua.

Homilia venerabilis Bedæ Presbyteri.  
Ex Comment. in Luc. cap. 50.

**D**E se ipso Dominus hæc loquitur, ostendens, etsi supra dixerit, nullum generationi nequam nisi signum Jonæ dandum, nequaquam tamen lucis suæ claritatem fidelibus occultandam. Ipse quippe lucernam accendit, qui restam humanæ naturæ flamma suæ divinitatis implevit. Quā profectò lucernam nec credentibus abscondere, nec modio supponere, hoc est, sub mensura legis includere vel ultra unius Judææ Gentis terminos voluit cohibere: sed supra candelabrum, inquit, ut qui ingrediuntur, lumen videant.

*R. Amavit. 204. Lectio viii.*

**C**andelabrum Ecclesiam dicit, cui lucernam superposuit: quia nostris in frontibus fidem suæ incarnationis adfixit; ut, qui Ecclesiam fideliter ingredi voluerint, lumen veritatis palam queant intueri. Qua sententia Judæorum quoque Proceres condemnat, qui signa quærentes exterius, apertam lucis januam noluerint intrare credendo. Denique præcipit, ne opera tantummodò, sed & cogitationes, & ipsas etiam cordis intentiones mundare & castigare meminerint.

*R. Sint lumbi. 204. Lectio ix.*

**L**ucerna corporis tui est oculus tuus. Corpus quippe dicit opera quæ palam cunctis apparent, oculum verò ipsam mentis intentionem, qua operatur, & de cujus merito eadem opera, lu-

cis an tenebrarum sint opera discernuntur; sicut ipse consequenter exposuit, dicens: Si oculus tuus fuerit simplex, totum corpus tuum lucidum erit. Si, inquit, pura rectaque intentione, quæ potes, agere bona studueris, lucis profectò sunt opera quæ facis, etiamsi coram hominibus imperfectionis aliquid habere videantur: quoniam diligentibus Deum omnia cooperantur in bonum.

*Te Deum laudamus.*

### SEPTIMA DIE.

*In tertio Nocturno.*

*Lectio S. Evangelii secundum Lucam.*

*Lectio vii. Cap. ii.*

**I**n illo tempore: Dixit Jesus discipulis suis: Nemo lucernam accendit, & in abscondito ponit, neque sub modio: sed supra candelabrum, ut qui ingrediuntur, lumen videant. Et reliqua.

*De Homilia venerabilis Presbyteri.*

*Unde supra.*

**S**i autem nequam fuerit, etiam corpus tuum tenebrosum erit. Si autem perversa est intentio quæ præcedit, pravum est omne opus quod sequitur, quamvis rectum esse videatur. Vide ergo, ne lumen, quod in te est, tenebræ sint: hoc est, ne ipsa cordis intentio, quæ lumen est animæ, vitiorum caligine fuscetur, sedula discretionem perpende.

*R. Amavit. 204. Lectio viii.*

**J**uxta quod alibi præcipitur: Omni custodia serva tuum cor, quoniam ex ipso vita procedit. Si ergo corpus tuum totum lu-

*T 2 cidum*



cidū fuerit, non habens aliquam partem tenebrarum, erit lucidū totum. Totum corpus nostrum omnia nostra opera dicit: quia & Apostolus membra nostra nuncupat quædam opera, quæ improbat, & mortificanda præcipit, dicens: Mortificate ergo membra vestra, quæ sunt super terram, fornicationem, immunditiam, libidinem, & cætera talia.

*R. Sint lumbi. 204. Lectio ix.*

**S**I igitur ipse bonum bona intentione patrueris, non habens in tua conscientia aliquam partem tenebræ cogitationis, etiamsi contigerit aliquem proximorum tua bona actione noceri, verbi gratia, aut de pecunia, quam à te indigens & petens acceperat, facere vel pati aliquid mali, aut de verbo exhortationis, quo errantem corrigere volebas, fortè perniciosius errare; tu tamen pro tuo simplici & lucido corde, & hic & in futuro lucis gratiā donaberis. *Te Deum.*

### IN DIE OCTAVA.

*In tertio Nocturno.*

*Lectio S. Evangelii secundum Lucam.*

*Lectio vii. Cap. ii.*

**I**n illo tempore: Dixit Jesus discipulis suis: Nemo lucernam accendit, & in abscondito ponit, neque sub modio: sed supra candelabrum, ut qui ingrediuntur, lumen videant, Et reliqua.

*Homilia sancti Joannis Chrysostomi.*

*In Matth. Homilia xi, circa medium.*

**L**ucerna corporis tui est oculus tuus. Quod oculus corpori, hoc intellectus est animæ.

Ut enim nequaquam optes auro ornari, veste serica conspici, si sit oculis tibi carendum, sed horum proculdubio sanitatem, desiderabiliorem rebus omnibus iudicares; quæ si tibi certè depereat, nihil te jam tota vita delectat: quantò magis pro oculis debes mentis efficere? Sicut enim postquam corporalium oculorum lumen extinctum est, omnia jam membra in miseria versantur ac tenebris, ita etiam mente cæcata, innumeris prorsus malis hominum vita cumulatur.

*R. Amavit. 204. Lectio viii.*

**Q**uemadmodum igitur in corpore hoc maximè providemus, ut oculos habeamus incolumes; sic etiam in anima intellectus conservemus salutem? Si verò cæcamus istum, quo aliis quoque debemus lumen inferre, unde jam ipsi poterimus aspicere? Sicut enim qui caput ipsum fontis obstruxit, totum simul exsiccat & fluvium: sic etiam qui oculum mentis tenebris obduxit, omnes quoque vitæ istius actus una confusione cæcavit. Propter quod ait: Si lumen, quod in te est, tenebræ sunt, ipsæ tenebræ quantæ erunt?

*R. Sint lumbi. 204. Lectio ix.*

**Q**uando enim lucerna extinguatur, quando gubernator mergitur, quando dux ipse capitur, quæ tandem obedientibus supererit spes salutis? Propterea nunc quidem omisit dicere eas, quæ

quæ divitiis tenduntur, insidias, lites videlicet ac pugnas: sed ponens his omnibus sæviora, & quæ absque dubio semper accidunt, à maligna concupiscentia liberat audientes. Etenim multò horribilius est, mentem huic ægritudini mancipare, quàm carceris squalore macerari. Dedit enim nobis intellectum Deus, ut ignorantiam fugemus è mentibus, ut rectum teneamus justumque iudicium. **Te Deum laudamus.**

**INFRA OCTAVAM  
CONFESSORIS**

Pontificis.

Homilia in Evangel. Marci, cap. 13. Vide-  
te, vigilate, &c.

**IN DIE FESTO.**

In tertio Nocturno.

Lectio sancti Evangelii secundum Marcum.

Lectio vii. Cap. 13.

**I**N illo tempore: Dixit Jesus discipulis suis: Videte, vigilate, & orate: nescitis enim quando tempus sit. Et reliqua.

Homilia sancti Petri Chrysologi.

Ex Sermone 24.

**S**emper & ad omnia vigiliæ esse salutare, nullus ignorat: quia revera plus vigilare, plus vivere est. Nam quid tam morti simile, quàm dormientis aspectus? quid tam vita plenum, quàm forma vigilantis? Indulgendum somno est, ut corpus reparet, non resolvat; & vires revocet, non enervet. Semper ergo ad omnia vigiliæ esse salutare, nullus ignorat. Quæ ars, quod opus, quod tempus, quæ potestas, quod officium, non vitæ lucra lucubrat-

one perquirat?

**R.** Amavit. 204.

**Lectio viii.**

**H**inc est, quòd Rex in procinctu pervigil, callidi hostis præcavet & evitat insidias. Tunc in castris miles supervenientes nocturnos impetus cauta pernoctatione propellit. Sic nauta vigilando diffusi itineris incertas vias intrat, & calles transit invios, & vestigio furtivo ad lucrosi portus votivam pervenit mansionem. Hinc pastor adjungit noctes diebus, & totum sibi tempus denegat dormiendi, ne quæ lupis, suffragante somno, grassandi in gregem præbeatur occasio.

**R.** Sint lumbi. 204. **Lectio ix.**

**S**ic viator solers per auras noctis æstus solis prævenit, ætümque diem prævidentiùs deputat mansioni. Hoc Propheta sciens, non die solo, sed & nocte tota clamabat ad Dominum: Domine Deus salutis meæ, in die clamavi, & nocte coram te. Quid plura? Ipse Dominus pernoctat in oratione Dei; ut antè nos oratione liberet, quàm redimat passionem. Et, si pro servis Dominus vigilat, meritò pro seipsis, servos vigilare sic jubet. **Te Deum.**

Infra Octavam legatur in Missa, & Offic. Evangelium. **Vigilate, quia &c.** cum suis Homiliis, de hoc eodem Communi, supra 209.

In die verò Octava, ut in die Festo.

**INFRA OCTAVAM  
DOCTORUM.**

**SECUNDA DIE.**

In secundo Nocturno.

Sermo sancti Joannis Chrysostomi.

In cap. 7. Matth. Homilia 13. post initium.

**T 3**

**Lectio**



## Lectio iv.

**D**Eus ita nos disposuit esse, ut nec studentes & laborantes circa scripturas, acquiramus salutem scientiæ sine gratia Dei, ut ne nobis imputemus quod sci- mus: nec tamen gratiam acqui- ramus, nisi studuerimus, & labo- raverimus circa Scripturas, ne donum Dei detur negligentibus. Sicut enim in bello non omnis qui pugnat, vincit; nemo tamen vincere potest, nisi pugnaverit: sic non omnes, qui student & le- gunt, acquirunt scientiam spiri- tualem; nemo tamen acquirere potest, nisi qui aut studiosus fue- rit ad legendum, aut assiduus ad audiendum.

## Lectio v.

**E**T infideles quidem, & non timentes Deum inveniunt scientiam legendo & studendo, sed non illam quæ ex Deo est, quæ per Spiritum sanctum datur: sed hanc, quæ est ex natura carnali, quæ per exercitationem carnis acquiritur, quam habuerunt eti- am gentilium studiosi. Multa e- nim differentia est inter scientias istas. Qui enim orationibus non instat, nec operibus bonis, sed per solum studium lectionum factus est sciens, quando aliis prædicat, ipse sibi non sentit quod prædi- cat.

## Lectio vi.

**S**ed quando alios docet, ab in- tus conscientia ejus ridet sibi de verbis suis: quia scientia, quæ ex solis lectionibus est, ex ore procedit; quæ autem de Spiritu

sancto est, de corde profertur: & ideò spiritualis scientia non solum dicitur, sed & sentitur. Non tan- tum in scripturis legitur, sed ex corde suggeritur: & ideò si alios terret, ipse amplius timet: si con- solatur, ipse melius gaudet: & omne quod loquitur, non tantum legit, sed experimento probavit. Ideò ergo petamus Deum, & ope- remur bona, ut non carnalem, sed spirituales scientiam mereamur.

## In tertio Nocturno.

Lectio S. Evangelii secundum Mattheum.

## Lectio vii. Cap. 5.

**I**N illo tempore: Dixit Jesus di- scipulis suis: Vos estis sal terræ. Quòd si sal evanuerit, in quo sa- lietur? Et reliqua.

Homilia sancti Hieronymi Presbyteri.

Lib. i. Comment. in Matth.

**S**al appellantur Apostoli & Do- ctiores: quia per illos univer- sum hominum conditur genus. Quòd si sal evanuerit, in quo sa- lietur? Si doctor erraverit, à quo alio doctore emendabitur? Ad nihilum valet ultrà, nisi ut mit- tatur foras, & conculcetur ab ho- minibus. Exemplum de agricul- tura sumptum est. Sal etenim fi- cut in ciborum condimentum, & ad siccandas carnes necessarium est, ita alium usum non habet. Certè legimus in scripturis, urbes quasdam ira victorum sale semi- natas, ut nullum in ipsis germen oriretur.

## Lectio viii.

**C**Aveant ergo Doctores & E- piscopi, & videant potentes potenter tormenta sustinere, ni- hilque

hilque esse remedii, sed majorum ruinam ad tartarum ducere. Vos estis lux mundi. Non potest civitas abscondi supra montem posita: neque accendunt lucernam, & ponunt eam sub modio, sed super candelabrum; ut luceat omnibus, qui in domo sunt. Docet fiduciam prædicandi, ne Apostoli abscondantur ob metum, & sint similes lucernæ sub modio, sed tota libertate se prodant: ut quod audierunt in cubiculis, prædicent in tectis.

**R.** In medio Ecclesiæ aperuit os ejus, \* Et implevit eū Dominus spiritu sapientiæ & intellectus. \* Jucunditatem & exultationem thesaurizavit super eum. Et implevit. Gloria Patri. Et.

**Lectio ix.**

**N**olite putare, quoniam veni solvere legem, aut Prophetas: non veni solvere, sed adimplere. Sive quod de se per alios prophetata compleverit, sive quod ea quæ antè propter infirmitatem audientium rudia & imperfecta fuerant, sua prædicatione compleverit, iram tollens, & vicem talionis excludens, & occultam in mente concupiscentiam damnans. Donec transeat cælum & terra. Promittuntur nobis cœli novi & terra nova, quæ facturus est Dominus Deus. Si ergo nova creanda sunt, consequenter vetera transitura. **Te Deum.**

**TERTIA DIE.**

*In secundo Nocturno.*

Ex lib. S. Augustini Episcopi de Civitate Dei.

Lib. 18. cap. 41.

**Lectio iv.**

**A**uctores nostri, in quibus non frustra sacrarum litterarum figitur, & terminatur canon, absit ut inter se aliqua ratione dissentiant: unde non immeritò, cum illa scriberent, eis Deum, vel per eos locutum, non pauci in scholis atque gymnasiis litigiosis disputationibus garruli, sed in agris atque in urbibus cum doctis atque indoctis tot tantique populi crediderunt. Ipsi sanè pauci esse debuerunt, ne multitudine vilesceret quod charum religione esse oporteret; nec tamen ita pauci, ut eorum non sit miranda consensio.

**Lectio v.**

**N**eque enim in multitudine philosophorum, qui labore etiam litterario monumenta suorum dogmatum reliquerunt, facile quis invenerit, inter quos cuncta, quæ sensere, convenient; quod ostendere hoc opere longum est. Ubi etsi aliqua vera dicebantur, eadem licentiâ dicebantur & falsa prorsus, ut non frustra talis civitas mysticum vocabulum Babylonis acceperit. Babylon quippe interpretatur Confusio, quod nos jam dixisse meminimus. Non interest diaboli regis ejus, quàm contrariis inter se rixentur erroribus, quos meritò multæ variæque impietatis pariter possidet. **Lectio vi.**

**A**t verò gens, populus, civitas, respublica, Israëlita, quibus credita sunt eloquia



Dei, nullo modo pseudoprophetas cum veris Prophetis pari licentia confuderunt, sed concordantes inter se, atque in nullo dissentientes, sacrarum litterarum veraces ab eis agnoscebantur & tenebantur auctores. Ipsi eis erant philosophi, hoc est amatores sapientiae, ipsi sapientes, ipsi Theologi, ipsi Prophetæ, ipsi Doctores probitatis atque pietatis. Quicumque secundum illos sapuit, & vixit, non secundum homines, sed secundum Deum, qui per eos locutus est, sapuit & vixit.

In tertio Nocturno.

Lectio S. Evangelii secundum Matthæum.

Lectio vii. Cap. 5.

**I**N illo tempore: Dixit Jesus discipulis suis: Vos estis sal terræ. Quod si sal evanuerit, in quo salietur? Et reliqua.

Homilia sancti Hilarii Episcopi.

Comment. in Matth. can. 4. post init.

**V**OS estis sal terræ: quod si sal infatuatum fuerit, ad nihilum valet id quod salietur. Sal, ut arbitror, terræ nullum est. Quomodo ergo Apostolos sal terræ nuncupavit? Sed proprietas est quærenda dictorum, quam & Apostolorum officium, & ipsius salis natura monstrabit. Sal est in se uno continens aquæ & ignis elementum, & hoc ex duobus est unum.

Lectio viii.

**H**ic igitur in omnem usum humani generis effectus incorruptionem corporibus, quibus fuerit aspersus, impertit, & ad omnem sensum conditi saporis ap-

tissimus est. Apostoli autem sunt rerum cœlestium prædicatores, & æternitatis velut satores, immortalitatem omnibus corporibus quibus eorum sermo aspersus fuerit, conferentes. Merito igitur sal terræ nuncupati sunt, per doctrinæ virtutem saliendo modo æternitati corpora reservantes.

**R.** In medio. 223. **Lectio ix.**

**S**ed natura salis semper eadem est, nec immutari umquam potest. Verum quia conversioni homo subjacet, & solus beatus, qui usque ad finem in omnibus Dei operibus permanserit: ideo eos sal terræ nuncupatos monet in traditæ sibi potestatis virtute persistere, ne infatuati nihil saliant, & ipsi, sensu accepti saporis amisso, vivificare corrupta non possint, & projecti de Ecclesiæ promptuariis, cum his quos salierint, pedibus incedentium proterantur. **Te Deum laudamus.**

#### QUARTA DIE.

In secundo Nocturno.

De Expositione S. Augustini Episcopi in Epistolam primam B. Joannis.

Tract. 3. cap. fin. **Lectio iv.**

**N**on habetis necessitatem, ut aliquis vos doceat, quia unctio ipsius docet vos de omnibus. Quid ergo nos facimus, fratres, quia docemus vos? Si unctio ejus docet vos de omnibus, quasi nos sine causa laboramus. Et ut quid tantum clamamus? Dimittamus vos unctioni illius, & doceat vos unctio ipsius. Sed modò mihi facio quæstionem, & illi ipsi Apo-

stolo

stolo facio: dignetur audire parvulum quarentem à se. Ipsi Joanni dico: Unctionem habebant, quibus loquebaris? Tu dixisti, quia unctio ipsius docet vos de omnibus: ut quid talem Epistolam fecisti? quid illos tu docebas? quid instruebas? quid ædificabas?

Lectio v.

**I**am hic videte magnum sacramentum, fratres. Sonus verborum nostrorum aures percutit, magister intus est. Nolite putare, quemquam hominem, aliquid discere ab homine. Admonere possumus per strepitum vocis nostræ: si non sit intus qui doceat, inanis fit strepitus noster. Magisteria forinsecus, adjutoria quædam sunt & admonitiones. Cathedralam in cælo habet qui corda docet. De Domino dico. Propterea ait & ipse in Evangelio: Nolite vobis dicere magistrum in terra: unus est magister vester Christus. Ipse vobis ergo intus loquatur, quando nemo hominum illic est: quia etsi est aliquis à latere tuo, nullus est in corde tuo. Christus sit in corde. **Lectio vi.**

**S**ic sunt ista verba, fratres, quæ forinsecus dicimus, quomodo est agricola ad arborem: forinsecus operatur, adhibet aquam, & diligentiam culturæ. Quælibet forinsecus adhibeat, numquid poma format? numquid nuditatem lignorum vestit umbra foliorum? numquid tale aliquid intrinsecus agit? Sed quis agit hoc?

Audite agricolam Apostolum, videte quid sumus, & audite magistrum interiorem: Ego plantavi, Apollo rigavit, sed Deus incrementum dedit. Hoc ergo vobis dicimus: sive plantemus, sive rigemus loquendo, non sumus aliquid, sed ille qui incrementum dat, Deus, idest, unctio illius, qui docet vos de omnibus.

In tertio Nocturno.

Quarta die infra Octavam S. Joannis Chrysostomi legatur Homilia S. Augustini. Ostendit Dominus, &c. ut in Breviar. de Comuni Doctorum infra Octavam verò aliorum Doctorum legantur sequentes Lectiones.

Lectio S. Evangelii secundum Mattheum.

Lectio vii. Cap. 5.

**I**n illo tempore: Dixit Jesus discipulis suis: Vos estis sal terræ. Quod si sal evanuerit, in quo salietur? Et reliqua.

Homilia sancti Joannis Chrysostomi.

Homil. ix. in Mattheum. Cap. 5.

**A**t tendite quid dixerit, Vos estis sal terræ: per quod ostendit, quam necessario ista præcipiat. Non enim de vestra, inquit, tantummodò vita, sed de universo orbe vobis ratio reddenda est. Non ad duas quippe urbes, aut decem, aut viginti, neque ad unam gentem vos mitto, sicut mittebam Prophetas: sed ad omnem terram prorsus ac mare, totumque mundum, & hunc variis criminibus oppressum.

Lectio viii.

**D**icens enim, Vos estis sal terræ: ostendit universam hominum infatuatam esse naturam, & peccatorum vi corruptam: & idcirco illas ab eis virtutes requirit,



quirit, quæ maximè ad multorum salutem procurandam necessariæ sunt atque utiles. Nam qui mansuetus est ac modestus, & misericors & iustus, non intra se tantummodò hæc rectè facta concludit, verùm in aliorum quoque utilitatem præclaros hos faciet effluere fontes. Igitur qui corde mundo est atque pacificus, & persecutionem pro veritate patitur, nihilominus in commune commodum vitam instituit.

*R. In medio. 223.*

*Lectio ix.*

**N**E igitur putetis, inquit, ad levia vos ducendos esse certamina, neque exiguarum rerum vobis ineundam esse rationem, Vos estis sal terræ. Quid igitur? Ipsinè putrefacta medicati sunt? Nequaquam: neque enim fieri potest, ut ea quæ jam corrupta sunt, salis perfricatione reparentur. Non ergo hoc fecerunt, sed antè renovata, sibi que tradita, atque ab illa jam putredine liberata, aspergebant sale, & in ea novitate conservabant, quam à Domino susceperant. Liberare quippe à putredine peccatorum, Christi virtutis est: ut autem ad illam iterum non revertantur, Apostolorum curæ est ac laboris. **T**e Deum laudamus.

### QUINTA DIE.

*In secundo Nocturno.*

*Tres Lektionen S. Gregorii Papæ, Qui post Orionas, &c. ut in Brev. de Communi Doct.*

*In tertio Nocturno.*

*Lectio S. Evangelii secundum Mattheum.*

*Lectio vii.*

*Cap. 9.*

**I**N illo tempore: Dixit Jesus di-

scipulis suis: Vos estis sal terræ. Quod si sal evanuerit, in quo salietur? Et reliqua.

*Homilia sancti Gregorii Papæ.*

*Ex Homil. 17. in Lucæ 10. ante medium.*

**C**onsiderandum nobis est, ut qui una eademque exhortationis voce non sufficit simulcunctos admonere, studeat singulos, in quantum valet, instruere, privatis locutionibus ædificare. Debemus namque pensare continuo, quod sanctis Apostolis dicitur, & per Apostolos nobis: Vos estis sal terræ. Si ergo sal sumus, condire mentes fidelium debemus. Vos igitur qui pastores estis, pensate quia Dei animalia pascitis: de quibus profectò animalibus Deo per Psalmistam dicitur: Animalia tua habitabunt in ea.

*Lectio viii.*

**E**T sæpè videmus, quod petra salis brutis animalibus antepositur, ut ex eadem salis petra lambere debeant, & meliorari. Quasi ergo inter bruta animalia petra salis, debet esse sacerdos in populis. Curare namque sacerdotem necesse est, quæ singulis dicat, unumquemque qualiter admoneat: ut quisquis sacerdoti jungitur, quasi ex salis tactu æternæ vitæ sapore conditur. Sal etenim terræ non sumus, si corda audientium non condimus: quod profectò condimentum ille veraciter proximo impendit, qui prædicationis verbum non subtrahit. Sed tunc verè aliis recta prædicamus, si dicta rebus & exemplis

emplis ostendimus.

**R.** In medio. 223. **Lectio ix.**

**N**ullum puto, fratres charissimi, ab aliis majus præjudicium, quàm à sacerdotibus tolerat Deus: quando eos, quos ad aliorum correctionem posuit, dare de se exempla pravitatis cernit: quando ipsi peccamus, qui compescere peccata debuimus: nulla animarum lucra quærimus, ad nostra quotidie studia vacamus, terrena concupiscimus, humanam gloriam intenta mente captamus. Et quia eo ipso quo cæteris prælati sumus, ad agenda quælibet majorem licentiam habemus, susceptæ benedictionis ministerium vertimus ad ambitionis argumentum: Dei causam relinquimus, ad terrena negotia vacamus: locum sanctitatis accipimus & terrenis actibus implicamur. **Te Deum laudamus.**

**SEXTA DIE.**

In secundo Nocturno.

Ex libro Moralium S. Gregorii Papæ.

Lib. 9. cap. 6.

**Lectio iv.**

**H**inc namque per Daniele dicitur: Pertransibunt pluri mi, & multiplex erit scientia. Hinc Joanni in priori parte revelationis Angelus dicit: Signa, quæ locuta sunt septem tonitrua. Cui tamen in ejusdem revelationis termino præcepit dicens: Ne signaveris verba prophetiæ libri hujus. Pars quippe revelationis anterior signari præcipitur, terminus prohibetur: quia quidquid in sanctæ Ecclesiæ initiis latuit,

finis quotidie ostendit. Nonnulli verò à Græca littera, quæ Ypsilon dicitur, Hyadas nuncupatas arbitrantur. Quod si ita est, significationi, quam diximus, contrarium non est. **Lectio v.**

**D**octores enim his stellis non inconveniēter expressi sunt, quæ à litteris nomen trahunt. Sed quamvis Hyades ab ejusdem litteræ visione non discrepent; certum tamen est, quia hyetos Imber dicitur, eò quòd exortæ pluvias apportant. Vir igitur sanctus redemptionis nostræ ordinē contemplatus admiretur, atque admirans exclamet, dicens: Qui extendit cœlos solus, & graditur super fluctus maris; qui facit Arcturum, & Orionas, & Hyadas.

**Lectio vi.**

**E**xtenfis etenim cœlis, Dominus formavit Arcturum: quia in honorem deductis Apostolis, in cœlesti conversatione fundavit Ecclesiam. Formato quoque Arcturo fecit Orionas; quia roborata fide universalis Ecclesiæ, contra procellas mundi edidit martyres. Editis quoque Orionibus protulit Hyadas; quia convalescentibus contra adversa martyribus, ad infundendam ariditatem humanorum cordium, doctrinam contulit magistrorum. Isti itaque sunt astrorum spiritualium ordines, qui dum summis virtutibus eminent, semper ex supernis lucent.

In tercio Nocturno.

**Lectio S. Evangelii secundum Matthæum.**

**Lectio**



**I**N illo tempore: Dixit Iesus discipulis suis: Vos estis sal terræ. Quòd si sal evanuerit, in quo salietur? Et reliqua.

Homilia sancti Augustini Episcopi.  
Ex lib. i. de Serm. Dom. in monte, cap. 6.

**N**Eque accendunt lucernam, & ponunt eam sub modio. Quid putamus, ita esse dictum, Sub modio, ut occultatio tantum lucernæ accipienda sit, tamquam si diceret: Nemo accendit lucernam, & occultat illam? An aliquid etiam modius significat, ut hoc sit ponere lucernam sub modio, superiora facere corporis commoda, quam prædicationem veritatis: ut ideò quisque veritatem non prædicet, dum timet ne aliquid in rebus corporalibus & temporalibus molestiæ patiat? Et benè modius dicitur, sive propter retributionem mensuræ, quam quisque recipiet quæ gessit in corpore, sive quoniam temporalia bona, quæ corpore peraguntur, certâ dierum mensurâ & inchoantur & transeunt, quam fortasse significat modius. *Lectio viii.*

**S**ub modio ergo lucernam ponit quisquis lucem bonæ doctrinæ commodis temporalibus obscurat & tegit. Super candelabrum autem, qui corpus suum ministerio Dei subjicit, ut superior sit prædicatio veritatis, & inferior servitus corporis. Per ipsam tamen corporis servitutem excellentior luceat doctrina, quæ per officia corporalia, id est, per

vocem, & linguam, & ceteros corporis motus in bonis operibus insinuat etiam discipulis.

*Ex. In medio. 223. Lectio ix.*

**S**uper candelabrum ergo ponit lucernam, cum dicit Apostolus: Non sic pugno tamquam aërem cædens, sed castigo corpus meum, & servituti subjicio, ne fortè aliis prædicans, ipse reprobus inveniar. Quod verò ait, Ut luceat omnibus qui in domo sunt: domum puto dictam habitationem hominum, id est, ipsum mundum, propter id quod superior ait, Vos estis lumen mundi; aut, si domum quisque vult accipere Ecclesiam, nec hoc est absurdum. **T**e Deum laudamus.

### SEPTIMA DIE.

*In secundo Nocturno.*  
Sermo sancti Augustini Episcopi.

Serm. 3. de Verb. Dom. in Matth. *Lectio ix.*

**C**um nobis pro officio competat dicere, vobis autem conveniat pro devotione audire, quid tam necessarium tamque pertinens poterit utrisque contingere, quam ut quod religiosè dicitur, & devotè auditur, obsequiis competentibus teneatur? Nam si religiosa non tacere lucrum est, tacere dispendium; quanto itaque potiora lucra potuerint provenire, cum operationis effectum monstratur quidquid magisteriis cœlestibus & discitur, & tenetur? Par etenim causa, & docentem & audientem constringit, ut utriusque professio factorum testificatione signetur.

*Lectio*

Lectio v.

**E**T quamvis diffimile sit doctoris discensisque officium, tamen utriusque debet sanctarum legum obsequium: ut jungantur factis, qui separantur officiis; copulentur opere, qui diversi sunt nomine; & quos vocabula ab invicem separant, eos observantia præceptorum fideliter ac devotè conjungat. Quare sic fit, ut utriusque diversus sit actus, sed observantiæ par sit necessarius in utrisque effectus, ut factorum in ambobus conspiret assensus, quibus diversus est in vocabulis sonus.

Lectio vi.

**I**N doctore enim molesta est causa, dicere nec facere; præcipere, nec observare: in discen- te verò, audire velle, quod nolit implere; aures auditui accom- modare, & ab opere voluntatem avertere. Cæterum qui facit quod docet, & qui quidquid imperat, complet, maximus in cœlestibus sententia Domini declaratur. At verò, qui quod dicit negligit, & qui quod audit contemnit, salutis reus existit, qui observanda contempsit, & pericula non vitavit. Amat enim mortem, qui vitæ præcepta non servat: & horret vitam, qui peccata morti debita desperata morte frequentat.

In tertio Nocturno.

Lectio S. Evangelii secundum Matthæum.

Lectio vii. Cap. 5.

**I**N illo tempore: Dixit Jesus discipulis suis: Vos estis sal terræ. Quod si sal evanuerit, in quo Octav. Rom.

salietur? Et reliqua.

Homilia sancti Joannis Chrysostomi.  
Ex Homilia 15. in Matth. circa med.

**S**I autem sal evanuerit, in quo salietur? ad nihilum valet ultra, nisi ut mittatur foras, & conculcetur ab hominibus. Alii enim, etiam si sæpè delinquant, possunt tamen ad veniam pervenire: si verò hoc magister ipse patiatur, omni satisfactione privabitur, & supplicia extrema persolvat. Ne enim audientes, Cum exprobra- verint vobis, & persecuti vos fu- erint, & dixerint omne malum adversum vos, in medium pro- dire formident, dicit: Quoniam nisi ad ista fueritis parati, frustra etiam proditis in publicum. Non enim vos oportet maledicta ho- minum timere, sed laudes: quas si audire cupiatis, tunc verè in- fatuandi estis, atque calcandi.

Lectio viii.

**S**I verò perseverabitis vosmet- ipsos undique castigantes, & deinde audieritis mala, gaudete: hoc enim est opus salis, laxa quæ- que urere atque restringere. Ita- que jam necessaria subsequitur maledictio, nihil vobis prorsus incommodans, imò etiam testi- monium vestræ perhibens firmi- tatis. Si verò illa timèntes, forti- tudinem vobis utilem deferatis, multò sæviora patiemini, & malè scilicet audientes, & contempti à cunctis atque despecti: hoc namq; est ab omnibus conculcari. De- inde ad aliud eos sublimius ducit exemplum: Vos estis lux mundi.

V

Ex. In



**RE.** In medio. 223. **Lectio ix.**

**I**terum mundi, non unius profectò gentis, nec viginti urbium, sed totius orbis lumen tunc perhibentur, & lumen intelligibile, ipsoque sole fulgentius, sicut etiam sal hoc loco intelligitur spiritale. Prius autem sal posuit deinde lumen: ut discat, quantum sit verborum urentium beneficium, quantumque commodum honestæ rectæque doctrinæ. Hæc siquidem stringit animos, nec quoquam diffluere permittit, facitque attentius ad lumen virtutis aspicere, ad quam, velut apprehensa manu pertrahit audientes. **Te Deum laudamus.**

### IN DIE OCTAVA.

In secundo Nocturno.

Sermo sancti Augustini Episcopi.

Ex Epistola 152. tom. 2.

Lectio iv.

**S**ollicitissime cavendum est in docendo superbiz vitiū, quod in discendo non ita est. Unde sancta Scriptura nos admonet dicens: Sit omnis homo velox ad audiendum, tardus autem ad loquendum; & ille in Psalmo ait: Auditui meo dabis gaudium, & lætitiā; continuoque subjecit, Exultabunt ossa humiliata: vidit enim in audiendo facillimè servari humilitatem, quæ difficilis est in docendo: quoniam necesse est, ut doctor habeat superiorem locum, ubi laboriosum est obtinere ne subrepat elatio.

In Psalm. 119.

Lectio v.

**E**cce enim, fratres mei, dico charitati vestræ: loquimur

nos modò ad vos, ut aliquid doceamus vos, quantò melius, si omnes sciremus, & nemo doceret alterum, ut non esset alius loquens, alius audiens; sed omnes audientes unum illum, cui dicitur: Auditui meo dabis gaudium & lætitiā. Unde & ille Joannes non tam gaudebat quia prædica-  
bat, & quia loquebatur; sed gaudebat quia audiebat; ait enim: Amicus autem sponsi stat, & audit eum, & gaudio gaudet propter vocem sponsi. Itaque ibi unusquisque probet se, non ut loquatur, sed ut de alio locutionis officium exigat. Gaudium autem taciturnitatis intus in voluntate habeat, vocem doctrinæ in necessitate.

De Baptismo contra Donatistas, cap. 50.

Lectio vi.

**E**T plerumque doctioribus minus aliquid revelatur, ut eorum patiens & humilis charitas, in qua fructus major est, comprobetur; vel quomodo teneant unitatem, cum in rebus obscurioribus diversa sentiunt; vel quomodo accipiant veritatem, cum contra id, quod sentiebant, declaratum esse cognoscunt. Quorum duorum manifestum tenemus unum in beato Cypriano: id est, quomodo tenuerit unitatem cum eis à quibus diversum sentiebat. Homines enim sumus: unde aliquid aliter sapere, quàm se res habet, humana tentatio est. Nimis autem amando sententiam suam, vel invidendo melioribus usque

ad sacrilegium pervenire, diabolica præsumptio est: in nullo autem aliter sapere quam res se habet, Angelica perfectio est.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 5.*

**I**N illo tempore: Dixit Jesus discipulis suis: Vos estis sal terræ. Quod si sal evanuerit, in quo salietur? Et reliqua.

*De Homilia sancti Joannis Chrysostomi.*

*Ex Homilia 15. in Matthæum.*

**L**uceat lux vestra: hoc est, plurima in vobis sit virtus, ac maximè ingens illius accendatur ignis, & ineffabile omnino lumen effulgeat. Quando autem tam magna virtus fuerit & clara, latere non poterit, etiam si mille illam contegere velit modis ille, qui possidet. Benè autem ait, Lumen: nihil est: quod sic hominem faciat insignem atque conspicuum, etiam si magno ambitu optet latere, ut splendor iste virtutis. Sicut enim ipso sole circumdatus, ita utique clarus effulget, nec in terram solummodo rutilatus propriæ virtutis emittit, sed supra ipsum etiam cælum proprio fulgore radiabit. *Lectio viii.*

**H**inc itaque illos uberius consolatur. Et si, inquit, maledicta in vos audientes doletis: habetis tamen plurimos, quos ad amorem atque admirationem Dei, vestro adducatis exemplo. Tunc enim multi erunt omnino mirantes, non utique vos tantum, sed per vos etiam Patrem vestrū. Nec dixit, Deum, sed Patrem;

conferendæ illis nobilitatis prærogativam hoc jam nomine largiendo. Considera, quantum istiusmodi sit commodum, quantum etiam discrimen. Si enim vitiis sordeamus, etiam si nobis nullus obtreget, erimus omnib⁹ inferiores. Si verò virtutibus splendere curemus, vel si totus mundus contra nos maledictis voluerit personare; erimus omnium beatissimi, atque ad nos trahemus omnes, qui venire elegerint ad salutem. Omni quidem tuba documenta sunt operum clariora, vitæque munda, ipsa est luce fulgentior. *R. In medio. 223.*

*Ex Homilia 16. in Matth. post initium.*

*Lectio ix.*

**N**on veni solvere legem, sed implere. Legem verò non uno tantum, sed altero & tertio implevit modo. Uno quidem, quia nihil ex legitimis ipse transgressus est: alio verò, quia per nos quoque id ipsum facit, quod Paulus significando dicebat: Quoniā finis legis Christus ad justitiam omni credenti. Quod enim illa per litteram non potuit, hoc perfidem ipse confecit. Si verò aliquis diligenter examinet, alium quoque tertium modum impletæ ab eo legis inveniet. Quem verò istum? Ipsa utique præcepta, quæ erat daturus: non enim interitus priorum, sed augmentum potius & complementum erant ea quæ dicebantur à Christo. Illius quippe sententiæ, qua dicitur, Non occides, non interemptio, sed adimpletio



pletio magis atque munitio est,  
dicere, Non irascaris; omniumq;  
similiter cæterorum. Te Deum.

INFRA OCTAVAM  
CONFESSORIS  
non Pontificis.

SECUNDA DIE.

In secundo Nocturno.

Tres Lect. S. Joannis Chrysostomi. Beati N. dies,  
&c. ut in breviori de Confessori Conf. non  
Pontif. Quod in nocte sint in die lecto, legantur  
hodie sequentes.

Sermo sancti Joannis Chrysostomi.

Sermo de Merito, quid sit imitari sanctos, aut  
non laudandi, tom. 3. Lectio IV.

**Q**ui Sanctorum merita religi-  
osa charitate miratur, quiq;  
ustorum glorias frequenti laude  
colloquitur, eorum mores san-  
ctos atq; justitiam imitetur: quo-  
niam quem delectat Sancti alicu-  
jus meritum, delectare debet par  
circa cultum Dei obsequium.  
Quare aut imitari debet, si lau-  
dat: aut laudare non debet, si i-  
mitari detrectat: ut qui alium lau-  
dat, laudabilem se reddat: & qui  
Sanctorum merita admiratur,  
mirabilis ipse vitæ sanctitate red-  
datur. Nam si propterea justos  
fidelesque diligimus, quod in ip-  
sis justitiam fidemquesuspiciamus;  
possumus nos quoque esse quod  
sunt, si faciamus ipsi quod faciunt.  
**R.** Honestum fecit illum Domi-  
nus, & custodivit eum ab inimi-  
cis, & a seductoribus tutavit il-  
lum: \* Et dedit illi claritatem  
æternam. \* Justum deduxit  
Dominus per vias rectas, & osten-  
dit illi regnum Dei. Et dedit.

Lectio V.

**N**equē enim difficile nobis est,  
quod ab ipsis geritur, imita-  
ri, cum sine præcedenti exemplo  
ab antiquis talia gesta conspici-  
mus: ut non ipsi aliorum æmuli  
redderentur, sed æmulandæ vir-  
tutis seipsos nobis præberent ex-  
emplum: ut dum nos ex ipsis, &  
ex nobis alii proficiunt, sic Chri-  
stus in suis semper servis in Ec-  
clesia sancta laudetur. Unde ab  
origine mundi innocens Abel oc-  
ciditur, Enoch Deo placens trans-  
fertur, justus Noe invenitur, A-  
braham fidelis probatur, Moyses  
mansuetus dignoscitur, Jesus ca-  
stus, David lenis, Elias acceptus,  
Daniel sanctus, tres pueri victo-  
res redduntur.

**R.** Amavit eum Dominus, & or-  
navit eum: stolam gloriæ induit  
eum, \* Et portas paradisi coro-  
navit eum. \* Induit eum Do-  
minus lorica fidei, & ornavit  
eum. Et ad portas. Lectio VI.

**A**postoli discipuli Christi, cre-  
dentium magistri habentur:  
e quibus eruditi Confessores for-  
tissimi pugnant, Martyres perfe-  
cti triumphant, & Christiani sem-  
per exercitus diabolum Deo ar-  
mati debellant. In istis semper  
pares virtutes, dissimiles pugnae,  
gloriosæ victoriæ. Unde tu Chri-  
stiane delicatus es miles, si putas  
te posse sine pugna vincere, sine  
certamine triumphare. Exere  
vires, fortiter dimica, atrociter  
in prælio ista concerta. Conside-  
ra pactum, conditionem attende,  
mili-

militiam nosce: pactum quod spondidisti, conditionem qua accessisti: militiam cui nomen dedisti.

**R.** Iste homo perfecit omnia, quæ locutus est ei Deus, & dixit ad eum: Ingredere in requiem meam: \* Quia te vidi iustum coram me ex omnibus Gentibus. \* Iste est qui contempsit vitam mundi, & pervenit ad cœlestia regna. Quia. Gloria Patri. Quia.

### TERTIA DIE.

In secundo Nocturno.

De Sermone S. Joannis Chrysostomi,  
De S. Philogonio, ante med. Lectio iv.

**A**D hanc beatam requiem transiit beatus **N.** quanam igitur oratio par sit viri laudibus, quem Deus tam felici sorte dignatus est? Non est ulla. Sed age, dic mihi, num idcirco silebimus? & cujus rei gratia convenimus? An dicemus nos haud posse magnitudinem gestorum oratione consequi? Atqui ob hoc ipsum necesse est dicere, quandoquidem hæc est præcipua laudum illius pars, quod factis verba æquiparari non possint. Nam quorum benefacta naturam etiam superant mortalem, perspicuum est, quod horum laudes excedunt linguam humanam. Haud tamen ob id aspernabitur officium nostrum, quod pro viribus præstamus, sed suum imitabitur Dominum: siquidem & ille viduæ duos tantum obolos dejicienti in gazophylacium, non tantum duorum obolorum mercedem, sed multo amplius reddidit.

**R.** Honestum. 232. Lectio v.

**P**Roinde quamvis nostræ facultates exiguæ sint, minimique pretii, attamen, quæ possumus, offerimus. Ea licet non respondeant magnitudini meritorum animæ præclari justique **N.** tamen hoc ipsum celsitudinis illius maximum fuerit argumentum, quod nec pusilla repellat, sed idem faciat, quod solent divites. Siquidem illi, cum acceperint à tenuibus exigua, quibus non egent, sua vicissim apponunt, remunerantes eos, qui, quod poterant, obtulerint. Itidem & hic, cum acceperit à nobis laudem verbis peractam, qua nequaquam eget, redonabit nobis per ipsa facta benedictionem, qua semper uti possumus. **R.** Amavit. 232.

Lectio vi.

**U**Nde igitur laudationem illius auspiciabimur? An à magistratu, quem spiritus illi tradidit gratia? Nam mundani Magistratus nequaquam possunt Christianorum demonstrare virtutes, quin potius frequenter habent accusationem malitiæ. Quam ob causam? quoniā & sollicitudines amicorum, & circumcursationes, & adulationes, aliaque permulta his fœdiora tales Magistratus solent conciliare. Cæterum ubi Deus suo suffragio designarit aliquem, incorruptum suffragium, alienum ab omni suspitione iudicium, indubitata fuerit delecti comprobatio, propter ejus, qui de-



git, auctoritatem. *R.* Iste homo perfecit. *ut supra.* 233.

#### QUARTA DIE.

*In secundo Nocturno.*

*De Sermone S. Joannis Chrysostomi.*

*Unde supra, paulò post. Lectio iv.*

**Q**uantum autem sit pietatis argumentum, quòd Deus illum tanto magistratu dignum iudicârit, audi. Christus excitatus à morte, quid dicit Petro? Postquam enim illum interrogâisset, Petre amas me? isque respondisset, Tu Domine scis quòd amo te; dicit illi: Si diligis me, pascue oves meas. Hoc autem dicebat, non solum ut nobis certissimè declararet, quantoperè ipsum diligeret Petrus: verum etiam, ut palàm faceret, quantam haberet benevolentiam erga suas oves. Itaque si quis voluerit illi commendatus esse, curam habeat ovium illius, publicam quærat utilitatem, fratrum suorum saluti prospiciat. *R.* Honestum. 232.

*Lectio v.*

**N**ullum enim officium hoc Deo charius est, & ob id aliquibi dicit: Simon, Simon, expectavit te Satanas, ut cribraret te tamquam triticum, sed ego rogavi pro te, ne deficiat fides tua. Quid igitur hujus sollicitudinis curæque præmium mihi rependis? eandem curam, quam nobis impendit, reposcit. Nam & tu, inquit, aliquando conversus confirma fratres tuos. Neque prorsus alia res est, quæ perinde declaret doceatque quis sit fidelis & amans

Christi, quàm si fratrum curam agat, proque illorum salute gerat sollicitudinem.

*R.* Amavit. 232. *Lectio vi.*

**H**æc omnes audiant & monachi, qui montium occupârunt cacumina, quique modis omnibus seipsos mundo crucifixerunt, quo pro viribus Ecclesiarum præfectos adjuvent, horumque curas leniant precibus, concordia, charitate; scientes, quòd nisi modis omnibus opitulentur iis, qui tot periculis objiciuntur, per gratiam Dei, totque negotiorum curas sustinent, quibuscumque possunt rationibus, auxilientur, quamquam procul habitantes, & victus sors ipsis periisset, & tota in scopulum imegisset sapientia. *R.* Iste homo. 233.

#### QUINTA DIE.

*In secundo Nocturno.*

*Tres Lect. S. Gregorii. Deridetur justis simplicitas, &c. ut in brev. in hoc eodem Comuni. Quòd si in die festo lecta sint, earum loco ponantur Lect. S. Joannis Chrysost. Qui Sanctorum merita, &c. 232.*

#### SEXTA DIE.

*In secundo Nocturno.*

*Ex libro Moralium sancti Gregorii Papæ.*

*Lib. 10. c. 16. in cap. 12. Job. Lectio ix.*

**B**enè justis simplicitas, & lampas esse dicitur, & contempta lampas, quia interiùs lucet; & contempta, quia exteriùs non lucet. Intus ardet flamma charitatis, foris nulla gloria resplendet decoris. Lucet ergo, & despicitur qui flagrans virtutibus, abjectus æstimatur. Sed usquequò lampas ista contemnitur? usquequò despiciabilis habetur? numquid non fulgorem

gorem suum nullatenus exerit, & numquam quanta claritate candeat, ostendit? Ostendit planè; nam protinus additur: Parata ad tempus statutum. Statutum quippe contemptæ lampadis tempus, est extremi iudicii prædestinatus dies, quo iustus quisque, qui nunc despicitur, quanta potestate fulgeat demonstratur.

**R.** Honestum. 232. **Lectio v.**

**T**unc enim cum Deo iudices veniunt, qui nunc pro Deo injustè judicantur. Tunc eorum lux tantò latius emicat, quantò eos nunc manus persequentium durius angustat. Tunc reproborum oculis patefcet, quòd cœlesti potestate subnixa sunt, qui terrena omnia spontè reliquerunt. Unde electis Veritas dicit: Vos, qui securi estis me, in regeneratione, cum sederit Filius hominis in sede maiestatis suæ, sedebitis & vos super duodecim sedes, iudicantes duodecim tribus Israël. Neque enim plusquam duodecim iudices illa interni confessus curia non habebit, sed nimirum duodenario numero quantitas universitatis exprimitur: quia quisquis stimulo divini amoris excitatus, hîc possessa reliquerit, illic proculdubio culmen iudiciariæ potestatis obtinebit.

**R.** Amavit. 232. **Lectio vi.**

**H**inc est enim, quòd de sanctæ Ecclesiæ sponso per Salomonem dicitur: Nobilis in portis vir ejus, quando sederit cum senato-

ribus terræ. Hinc Isaias ait: Dominus ad iudicium veniet cum senioribus populi sui. Hinc eisdem seniores Veritas non jam famulos, sed amicos denuntiat, dicens: Non jam dicam vos servos, sed amicos meos. Quos Psalmista intuens, ait: Mihi autem nimis honorati sunt amici tui Deus. Quorum dum celsitudinè cordis aspiceret, mundi gloriam qua calce calcarent, protinus addidit: Nimis confortatus est principatus eorum. Ac ne paucos esse crederemus, quos proficere usque ad summam tantæ perfectionis agnoscimus; illicò adjunxit: Dinumerabo eos, & super arenam multiplicabuntur. Quot itaque nunc pro amore veritatis sese libenter humiliant, tot tunc in iudicio lampades coruscant.

**R.** Iste homo. 233.

## SEPTIMA DIE.

*In secundo Nocturno.*

Sermo sancti Bernardi Abbatis.

Serm. 1. de S. Victore.

Lectio iv.

**S**ancti N. vita, & gloria specialis, non tã ad gloriam, quàm ad virtutem provocat omnes, qui recto sunt corde. Non recti planè, sed perversi est animi, antè quærere gloriam, quàm exercere virtutem; & velle coronari, qui legitimè non certaverit. Vanum est vobis, inquit, antè lucem surgere. Ita est: frustra ad celsitudinem nititur gloriæ, qui prius non claruit virtute. Frustrà fatuæ virgines sponso obviàm surgunt, quarum lampades extinguuntur: &



ideò fatuæ, quia vacuis gloriantur lampadibus, virtutis oleum non habentes.

*R. Honestum. 232. Lectio v.*

**V**irtus gradus ad gloriam: virtus, mater gloriæ est. Fallax gloria, & vana est pulchritudo, quam illa non parturivit. Sola est, cui gloria jure debetur, & securè impenditur. Sancto *N.* nec virtus, nec gloria deest: sed quemadmodum ambæ res, & quo ordine in homine processerunt, id operæ pretium intueri. Habemus enim, dilectissimi, in vita *N.* & quod dignè miremur, & quod salubriter imitemur. Tutius sanè æmulanda solidiora, quàm sublimiora, & quæ magis virtutem redoleant, gloriam minùs. Studeamus proinde moribus conformari, cui in mirabilibus similari, etsi volumus, non valemus. *R. Amavit. 232.*

*Lectio vi.*

**Æ**mulemur in viro sobrium victum, devotum affectum; æmulemur mansuetudinem spiritus, castimoniam corporis, oris custodiam, animi puritatem, ponere frænum iræ, modum linguæ, dormire parcius, orare frequentius, cōmonere nosmetipsos psalmis, hymnis, & canticis spiritualibus, diebus jungere noctes, & divinis laudibus occupare; æmulemur charismata meliora. Æmulemur, inquam, quòd exitit liberalis in pauperes, patiens ad peccantes, benignus ad omnes. Hoc

enim melius. In his forma est; cui imprimamur: in miraculis gloria, à qua reprimamur. Illa lætificent, ista ædificent: moveant illa, ista promoveant.

*R. Iste homo. 233.*

## IN DIE OCTAVA.

*In secundo Nocturno.*

*De Sermone S. Bernardi Abbatis.*

*Serm. 2. de S. Victore.*

*Lectio iv.*

**G**audete in Domino, dilectissimi, qui inter continua suæ pietatis beneficia indulgit hominem mundo, cujus multi salventur exemplo. Iterum dico gaudete, quòd factus de medio appropriavit Deo, ut multò plures ejus intercessione salventur. In terris visus est, ut esset exemplo: in cœlum levatus est, ut sit patrocinio. Hic informat ad vitam, illic invitat ad gloriam. Factus est mediator ad regnum, qui fuit incitator ad opus. Bonus mediator, qui sibi jam postulans nihil, totum in nos transferre desiderat, & supplicantis affectum, & supplicationis fructum. Quid enim quærat sibi, qui nullius eget?

*R. Honestum. 232. Lectio v.*

**H**æc dies gloriôsæ migrationis ejus, dies lætitiæ cordis ejus: exultemus, & lætemur in ea. Introivit in potentias Domini, gaudeamus: quia nunc potentior est ad salvandum. Hodie *N.* posito corpore, tantò alacrior, quantò expeditior penetravit in sancta, similis factus in gloria Sanctorum. Hodie despecto mundo, & mundi principe triumphato,

supra

supra mundum victor ascendit, accipiens de manu Domini coronam victoriæ. Ascendit autem cum immensa supellectili meritorum, clarus triumphis, miraculis gloriosus. Sedet veteranus miles, debita jam suavitate & securitate quietus: securus quidem sibi, sed nostri sollicitus. O venerandam etiam ipsis Angelis sanctitatem, quam pari studio, etsi dispari voluntate, & mali fugitant, & frequentant boni. Nec facile dixerim, quid virum astruat sanctiorem, horum favor, aut pavor illorum. **R.** Amavit. 232.

Lectio vi.

**O**Miles emerite, qui Christianæ militiæ duris laboribus Angelicæ felicitatis requiæ commutasti: respice ad imbelles & imbecilles commilitones tuos, qui inter hostiles gladios, & spiritales nequitias tuis laudibus occupamur. Quàm pium, quàm dulce, quàm suavè, ô N. in hoc loco afflictionis, & in hoc corpore mortis te canerè, te colere, te precari! Nomen tuum, & memoriale tuum; favus distillans in labiis captivorum, mel & lac sub lingua eorum, qui tui memoria delectantur. Eja ergo fortis athleta, dulcis patrone, advocate fidelis, exurge in adiutorium nobis; ut & nos de nostra ereptione gaudamus, & tu de plena victoria glories. **R.** Iste homo. 233.

INFRA OCTAVAM  
CONFESSORIS

non Pontificis.

Homilia in Evangel. Luc. cap. 12. Sint lumbi vestri præcincti, &c.

In die festo habetur Homilia S. Gregorii. Sancti Evangelii, fratres, &c. ut in Breviario de Communi Confessoris non Pontificis.

SECUNDA DIE.

In tertio Nocturno.

Lectio sancti Evangelii secundum Lucam.

Lectio vii. Cap. 12.

**I**N illo tempore: Dixit Jesus discipulis suis: Sint lumbi vestri præcincti, & lucernæ ardentes in manibus vestris. Et reliqua.

De Homilia sancti Gregorii Papæ.

Homilia 12. in Evangelio.

**S**ed veniens Dominus, quid vigilantibus servis exhibeat, audiamus. Amen dico vobis, quod præcinget se, & faciet illos discumbere, & transiens ministrabit illis. Præcinget se, id est, ad retributionem præparat. Et faciet illos discumbere; id est in æterna requie refoveri: discumbere quippe nostrum, in regno quiescere est. Unde rursus Dominus dicit: Venient & recumbent cum Abraham, Isaac, & Jacob. Transiens autem Dominus ministrat, quia lucis suæ illustratione nos satiat: transire verò dictum est, cum de iudicio ad regnum redit.

**R.** Iste est, qui ante Deum magnas virtutes operatus est, & de omni corde suo laudavit Dominum: \*Ipse intercedat pro peccatis omnium populorum. **V.** Ecce homo sine querela, verus Dei cultor, abstinens se ab omni opere malo, & permanens in innocentia sua. Ipse.

Lectio viii.

Sed



**S**ed quid si servi in prima vigilia negligentes existunt? prima quippe vigilia, primævæ ætatis custodia est. Sed neque sic desperandum est, & à bono opere cessandum: nam longanimitatis suæ patientiam insinuans Dominus subdit: Et si venerit in secunda vigilia, & si in tertia vigilia venerit, & ita invenerit, beati sunt servi illi. Prima quippe vigilia, primævum tempus est, id est, pueritia: secunda, adolescentia vel juvenus, quæ auctoritate sacri eloquii unum sunt, dicente Salomone, Lætare juvenis in adolescentia tua: tertia autem, senectus accipitur.

✠. Sint lumbi vestri præcincti, & lucernæ ardentes in manibus vestris: ✠ Et vos similes hominibus expectantibus dominum suum, quando revertatur à nuptiis, ✠. Vigilate ergo quia nescitis, quā hora Dominus vester venturus sit. Et vos. Gloria Patri. Et vos.

## Lectio ix.

**Q**ui ergo vigilare in prima vigilia noluit, custodiat vel secundam: ut qui converti à pravitatibus suis in pueritia neglexit, ad vias vitæ saltem in tempore juventutis evigilet: & qui in secunda vigilare noluit, tertiæ vigiliæ remedia non amittat; ut qui in juventute ad vias vitæ non vigilat, saltem in senectute respiciat. Non est jam, quid homo excusationis inveniat. Deus despicitur, & expectat: contemni se

videt, & revocat: injuriam de contemptu suo suscipit, & tamen quandoque revertentibus etiam præmia promittit. **T**e Deum.

## TERTIA DIE.

In tertio Nocturno.

Lectio S. Evangelii secundum Lucam.

Lectio vii. Cap. 12.

**I**n illo tempore: Dixit Jesus discipulis suis: Sint lumbi vestri præcincti, & lucernæ ardentes in manibus vestris. Et reliqua.

Homilia sancti Augustini Episcopi.

Serm. 39. de Verbis Domini.

**A**udistis modò Evangelium, quid monuerit nos, cautos nos faciens, & volens esse expectitos & paratos ad expectandum novissima, ut post novissima, quæ sunt in hoc sæculo metuenda, succedat requies, quæ non habet finem. Beati, qui participes facti fuerint. Erunt autem tunc securi, qui modò non sunt securi; & iterum tunc timebunt, qui modò timere nolunt. Ad hanc expectationē, & propter hanc spem Christiani facti sumus.

✠. Iste est. 237. Lectio viii.

**N**onne spes nostra non est de hoc sæculo? Non amemus sæculum. Ab amore sæculi hujus vocati sumus, ut aliud sæculum speremus, & diligamus. In hoc abstinere nos debemus ab omnibus illicitis concupiscentiis, hoc est, lumbos accinctos habere debemus, & fervere, & lucere in operibus bonis, hoc est, lucernas ardentes in manibus habere. Dixit enim ipse Dominus discipulis suis

suis alio loco Evangelii: Nemo accendit lucernam, & ponit eam sub modio, sed super candelabrū, ut luceat omnibus, qui in domo sunt. **R.** Sint lumbi. *suprà.*

*Lectio ix.*

**E**T ut ostenderet unde dicebat, subiecit, & ait: Sic luceat lux vestra coram hominibus, ut videant bona facta vestra, & glorificent Patrem vestrum, qui in coelis est. Lumbos nostros accinctos esse voluit, & lucernas ardentes. Quid est, Lumbos accinctos? Declina à malo. Quid est lucere? quid est lucernas ardentes habere? Hoc est, Et fac bonum. Quid est quod adjunxit, & ait: Et vos similes hominibus expectantibus Dominum suum, quando revertatur à nuptiis, nisi quod in illo Psalmo sequitur: Inquire pacem, & persequere eam? Te Deum laudamus.

#### QUARTA DIE.

*In tertio Nocturno.*

*Lectio S. Evangelii secundum Lucam.*

*Lectio vii. Cap. 12.*

**I**N illo tempore: Dixit Jesus discipulis suis: Sint lumbi vestri præcincti, & lucernæ ardentes in manibus vestris. Et reliqua.

*De Homilia S. Augustini Episcopi.*

*Unde supra.*

**H**Æc tria, hoc est, abstinencia à malo, & operatio boni, & spes præmii æterni commemorata sunt in Actibus Apostolorum, ubi scriptum est: Quia docebat eos Paulus de continentia, de justitia, & spe vitæ æternæ. Ad continentiam pertinet, Sint lumbi

vestri præcincti. Ad justitiam pertinet, Et lucernæ ardentes. Ad expectationem Domini pertinet, Quæ est spes vitæ æternæ. Ergo declina à malo, hæc est continentia, hi sunt lumbi accincti. Et fac bonum, hæc est justitia, hæc sunt lucernæ ardentes: Quære pacem, & sequere eam: hæc est expectatio futuri sæculi.

**R.** Ille est. 237. *Lectio viii.*

**H**Abentes autem ista præcepta & promissa, quid quærimus in terra dies bonos, ubi eos invenire non possumus? Scio enim, quia eos quæritis, quando aut ægrotatis, aut in tribulationibus estis, quæ abundant in hoc sæculo; quoniam quando ætas vergit ad finem, & senex plenus est querelis & nullis gaudiis; inter omnes tribulationes, quibus conteritur genus humanum, non quærunt homines nisi dies bonos, & vitam volunt longam, quam hic habere non possunt.

**R.** Sint lumbi. 238. *Lectio ix.*

**Q**uid ergo est vita hominis, etiam illa quæ longa dicitur? Audite, non à me, sed mecum simul. Ait enim nobis quidam: Venite filii, audite me, timorem Domini docebo vos. En, quam rem vult docere: & cui rei utilis est timor Domini? Sequitur: Quis est homo, qui vult vitam, & diligit dies videre bonos? Respondemus omnes, Nos volumus. Quid sequitur, audiamus: Cohibe linguam tuam à malo, & labia tua



ne loquantur dolum. Modò dic, Ego. Eja respondeat mihi aliquis: Ego. Et cum hoc feceris, securus expecta vitam & dies bonos: quære pacem, & sequere eam; & tunc bona fronte dices Domino: Feci quod iussisti, redde quod promissisti. **Te Deum laudamus.**

### QUINTA DIE.

*In tertio Nocturno.*

*Lectio S. Evangelii secundum Lucam.*

*Lectio vii. Cap. 12.*

**I**N illo tempore: Dixit Jesus discipulis suis: Sint lumbi vestri præcincti, & lucernæ ardentes in manibus vestris. Et reliqua.

*Homilia sancti Petri Chrysologi.*

*Ex Sermone 24. post initium.*

**N**ovus ordo vigiliarum, novus habitus imperatur, Sint lumbi vestri præcincti. Nil de vestitu, nil de calceamentis, nil de ipsius occursum apparatu servi vigiles admonentur, sed tota in præcingendis lumbis mandatur cura, tota in constringendis lumbis statuitur vis præcepti, addito lucernarum solatio tantum, sine quo nec noctis aperitur obscuritas, nec venientis diei clarescit aspectus.

**R.** Ille est. 237. *Lectio viii.*

**C**ingulum quidem est propriè indicium servitutis, quod & discursus expeditos reddat, & faciat obsequentes. Sed dixisse suffecerat, Estote præcincti; cur lumbos potissimum nominat? cur tanta jubentis reverentia lumborum facit magnoperè mentionē? Quæris, quare? quia in lumbis est tota corporis causa; ex lumbis

tota carnis negotia suscitantur; in lumbis tota est humani lapsus, humanæ fragilitatis occasio. Inde venit quod virtutis ignaros reddat, efficit segniores.

**R.** Sint lumbi. 238. *Lectio ix.*

**H**inc est ergo, quod principaliter Dominus lumbos nostros astringi jubet balteo castitatis, & totum carnis nostræ pendulum fluidum, resolutum constringi mandat continua zona virtutis; ut carne succincta, ad Domini occursum liber, velox expeditus nostræ mentis reddatur incessus. Hæc tamen audiens homo scire debes, quia te non retardat ab occursum Dei caro: quia ipsius occursum, officii ipsius est inseparabilis comes, si tu ejus componas sarcinas, si releves onera ejus, si pendula & sinuosa involucria ejus tu providus viator astringas. **Te Deum laudamus.**

### SEXTA DIE.

*In tertio Nocturno.*

*Lectio S. Evangelii secundum Lucam.*

*Lectio vii. Cap. 12.*

**I**N illo tempore: Dixit Jesus discipulis suis: Sint lumbi vestri præcincti, & lucernæ ardentes in manibus vestris. Et reliqua.

*De Homilia S. Petri Chrysologi. Unde supra.*

**C**onstringenda est ergo caro continentiae cingulo, ne effusa vitii: ac roto peccatorum gravata pondere, supernis & celestibus insistere non possit incessibus. Benè Dominus adjecit, Et lucernæ ardentes in manibus vestris: quia semper ad innocentiae testi-

testimonium lucernæ nocturno portantur in tempore: & sicut vitis amicæ semper sunt tenebræ, ita lucernæ semper inimicæ criminibus: sociæ semper boni operis sunt lucernæ.

*R.* Iste est. 237. *Lectio viii.*

**S**ed in manibus Sanctorum ipsa bona opera sunt lucernæ, dicente Domino: Sic luceat lux vestra coram hominibus, ut videant vestra bona opera. Et verè portant lucernas suas, verè fomentis operum, verè misericordiæ unguento inflammant lampades suas, qui cum loco, proposito, studio, latitant, opere, virtute, meritis coruscant, ac splendent toto orbe terrarum. Et quia expectationis suæ Dominus satis tristes, satis anxios noverat mores, ne quis superaretur tædio, ne quis lassesceret tarditate, ne quis longæ expectationis fatigatione succumberet, perseverantibus beatitudinem cœlestem, cœleste promittit obsequium.

*R.* Sint lumbi. 238. *Lectio ix.*

**E**t ne ipsius beatitudinis qualitas haberetur incerta, mox adjecit: Amen dico vobis, quia præcinget se, & faciet illos discumbere, & transiens ministrabit eis. Præcinget se Deus, & faciet servos discumbere, & ministrabit eis. En mutatio inaudita rerum, en terribilis correptio dominationis, en pavenda conversio servitutis, quia parumper servus astitit in Domini sui expectatione.

Octav. Rom.

ne succinctus, & sustinendi fidem brevi fatigatione portavit; cui ut talionem redderet, dissimulat se in ipsa divinitate divinitas. **T**e Deum laudamus.

## SEPTIMA DIE.

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 14.*

**I**n illo tempore: Dixit Jesus discipulis suis: Sint lumbi vestri præcincti, & lucernæ ardentes in manibus vestris. Et reliqua.

*De Homilia S. Petri Chrysologi. Unde super.*

**D**iscumbenti homini Deus adstat, & adstat in cœlestibus: epulanti servo servit Dominus, & servit accinctus: pueris suis, ministris suis ministeriū facit Christus, & facit in Patris jam gloria constitutus. Homo calumniaris: est adhuc quod detulerit Patri, qui tibi in terra lavando pedes extremum repræsentavit obsequium, & repromittit in cœlestibus novissimam servitutem. Ille tibi in cœlestibus parat convivium, se ministro; & tu illi in terra non desinis continuas ingerere & generare blasphemias.

*R.* Iste est. 237. *Lectio viii.*

**F**aciet & ille transitus suos, quia transiens ministrabit illis: de dominatione ad fidelium suorum pia transiet & migrabit obsequia; ad te de misericordi Patre severissimum transibit in iudicem. Confitentibus, expectantibus ministrabit epulas; ministrabit & tibi, sed dignam de tua negatione sententiam. Si in secunda &

X

tertia



tertia vigilia venerit. Vigiliis mundus plures, tres tantum vigiliis novit expectatio Trinitatis. Quare tamen à secunda cœpit, & tacuit primam? Quia prima jam vigilia in ortu Dominicæ nativitatis exceſſerat.

**R.** Sint lumbi. 238. **Lectio ix.**

**P**robant hoc pastores, qui dum supra gregem suum vigilant, gregis ipsum pastorem in præsepio invenire, videre, tenere merentur, & auctorem. Sed quæ sit secunda & tertia vigilia requiramus. Sicut utique prima vigilia est sui ortus in carne, ita secunda est vigilia, qua nostra redit & resuscitatur in carne. Denique ut ad resurgentem veniat, annuus excitatur & evigilat mundus. Tertia vigilia est illa, qua expectatio toto novissimo venientis finitur adventu: ut sicut ille resurrexit nobis, ita nos illi jam perpetuam resurgamus ad vitam. **Te Deum.**

### IN DIE OCTAVA.

In tercio Nocturno.

Lectio sancti Evangelii secundum Lucam.

Lectio vii. Cap. 12.

**I**n illo tempore: Dixit Jesus discipulis suis: Sint lumbi vestri præcincti, & lucernæ ardentes in manibus vestris. Et reliqua.

Homilia sancti Fulgentii Episcopi.

Ex Sermone de Confessoribus.

**S**i istum Domini sermonem secundum litteram velimus accipere, nihil in eo commodi spiritalis possumus invenire. Quid enim proficit ad animæ salutem, si aliquis corporaliter aut lumbos

præcingat, aut lucernam accendat? In lumbis itaque concupiscentia carnalis ostenditur, in lucernis verò fides & charitas Christiana monstratur. Jubens igitur Dominus lumbos nostros præcingi, concupiscentias carnis sine dubio præcipit refrænari. Imperans autem ut lucernas ardentes habeamus, hoc utique jubet, ut & lumine veræ fidei splendeamus, & sanctæ charitatis operibus ferveamus.

**R.** Iste est. 237. **Lectio viii.**

**I**sta, quæ de Evangelio proponimus, cum Prophetis sermonibus conferamus. Utrumque enim Testamentum Deus instituit, unus Dominus dedit: etsi sunt utriusque Testamenti diversa pro temporibus sacramenta, concordat tamen in utroque salutis humanæ sententia, qua præcipitur ut non peccemus, & jubetur ut bonis operibus insistamus. Per Isaiam Dominus omnes his admonet verbis: Auferte malum cogitationum vestrarum ab oculis meis, quiescite perversè agere, discite benefacere, Quid est enim, Sint lumbi vestri præcincti, nisi, quiescite agere perversè? quid est, Sint lucernæ ardentes, nisi, discite benefacere?

**R.** Sint lumbi. 238. **Lectio ix.**

**P**ræcinguntur enim fidelium lumbi, dum concupiscentia mala comprimuntur, dum iniqua cogitatio cohibetur, dum libidini resistit animus, dum lasciviæ denegatur affectus, dum calcatur luxu-

luxuria, dum avaritia contemnitur & rapina, dum proximi læsio devitatur, dum superbia vincitur, dum invidia superatur. Ardent verò lucernæ fidelium, dum rectæ fidei regulam servant, dum in sinu matris Ecclesiæ longanimiter perseverant, dum terrena contemnunt, & cœlestia concupiscunt, dum solliciti pacem custodiunt, dum se invicem purè diligunt, dum mutuo se honore præveniunt, dum mansuetudine cordis & humilitate proficiunt, dum misericordiæ opera libenter atque hilariter faciunt, dumque in operibus bonis, non hominibus, sed Deo placere contendunt.

Te Deum laudamus.

**INFRA OCTAVAM  
CONFESSORIS**  
*non Pontificis.*

*Homilia in Evangel. Luc. cap. 12. Nolite timere pusillus grex, &c.*

*In die Festo habetur Homilia venerabilis Bedæ. Pusillum gregem, &c. in Breviario, in hoc eodem Communi.*

**SECUNDA DIE.**

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 12.*

**I**n illo tempore: Dixit Jesus discipulis suis: Nolite timere pusillus grex, quia complacuit Patri vestro dare vobis regnum. Et reliqua.

*Homilia sancti Fulgentii Episcopi.*

*Ex Sermone de Confessoribus.*

**S**i non omnes possunt implere quod Dominus ait: Vendite, quæ possidetis; illud tamen quod adjacit, dicens: Date eleemosynam, omnibus est possibile, si ad-

sit bona voluntas; omnibus facile, si non adsit dira cupiditas; omnibus salubre, si ferveat charitas, cunctis debet esse commune, ut omnibus donetur æterna felicitas. Qui ergo tantam virtutem accepit à Domino, ut omnia quæ in mundo sunt, cœlestis regni amore contemnat: quæ habet, vendat, & egenis expendat: qui verò tantæ virtutis nondum est, de his quæ habet, in quantum habet, eleemosynam faciat.

*R. Iste est. 237. Lectio viii.*

**P**erfectus possideat primum virtutis locum, imperfectus saltem perveniat ad secundum. Efficiatur ille gloriose dignus, sit iste laudabiliter largus. Sit ille sanctæ paupertatis ardentissimus amator, sit iste sanctorum pauperum piissimus consolator. Habeat iste apud Deum patronos pauperes, quos ille se gaudet virtutis habere consortes. Sit ille talis, qui cum Domino judicaturus sedeat: sit iste talis, qui ad dexteram judicandus assistat. Sit ille talis, qui æterna tabernacula perpetuo jure possideat: sit iste talis, quem ille recipiat.

*R. Sint lumbi. 238. Lectio ix.*

**T**hesaurum nostrum, fratres, in cœlis ponamus, ut etiam cor nostrum in cœlis habere possimus. Necessè est enim, ut quò præcesserit dilectionis thesaurus, illuc etiam cogitationis sequatur affectus. Ideò Veritas ait: Ubi enim thesaurus vester est, ibi &



cor vestrum erit. Ut ergo in cœlis thesaurizemus, cœlestia diligamus. Vis nosse ubi thesaurizas? attende quid amas. Vis nosse quid amas? attende quid cogitas. Ita fiet, ut thesaurum tuum ex tuo amore cognoscas, & amorem tuum iudicio tuæ cogitationis intelligas. **Te** Deum laudamus.

### TERTIA DIE.

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 12.*

**I**N illo tempore: Dixit Jesus discipulis suis: Nolite timere pusillus grex, quia complacuit Patri vestro dare vobis regnum. Et reliqua.

*Homilia S. Petri Chrysologi. Ex Serm. 22.*

**P**ræmia statuuntur iis semper, quibus certamina dura proponuntur: ac pro magnitudine certaminis, præmii proponitur magnitudo. Hinc est, quod discipulis suis Christus regnum ponit in præmio, ut in certamine non cedant periculis, non timori. Pericula despicit, qui tendit ad regnum: victoriæ cupidus nescit timere. Nolite timere, inquit, pusillus grex: quia complacuit Patri vestro dare vobis regnum. Grex pusillus mundo, magnus Deo: pusillus, quia gloriosos vocat eos, quos instituit ad ovium innocentiam, & mansuetudinem Christianam. **R.** Ille est. 237.

*Lectio viii.*

**A**djecit quid faciendum sit regnaturis: Vendite quæ possideretis. Non potest dominari omnibus, nisi is, qui propriis non

teneretur. Dejectæ mentis est, qui familiaris rei meminit, cum vocatur ad regnum; jacens animus plebejus numulum thesauris regalibus anteponebat. Pauper sensus parvis incubans, perdit magna: & inhians temporalibus, deserit sempiterna. Homo, tali monitu Christus dicere voluit, non nudare: manere tibi tua voluit, non perire: perpetuari, non vacuari sacculos imperavit: iussit te transferre, non perdere.

**R.** Sint lumbi. 238. *Lectio ix.*

**P**lus consilio patris agit, quam jure dominantis. Inter insidias latronum & tinearum morsus quare tua recondas, objurgat: pervigiles noctes, dies anxios, sollicita tempora ne tibi ipse facias, commoneris. Auri custos, servator argenti, securitatem non habet, nescit quietem; & cui deest securitas, quies perit; poena dives est ille, non censu. Thesaurum non deficientem in cœlo: hoc est dicere, Ubi ego sum, ibi ponite: date mihi, ego servo. Homo, da Patri, crede Deo: quia & hæredi Pater, & Deus homini creditum non negabit: tenere tua non potest, quia sua dedit. **Te** Deum.

### QUARTA DIE.

*In tertio Nocturno.*

*Lectio S. Evangelii secundum Lucam.*

*Lectio vii. Cap. 12.*

**I**N illo tempore: Dixit Jesus discipulis suis: Nolite timere pusillus grex, quia complacuit Patri vestro dare vobis regnum. Et reliqua.

De

De Homilia sancti Petri Chrysologi.

*In sermone 13.*

**A**Udistis hodie, quemadmodum Dominus pastoralis iubilo clangorem tubæ cœlestis adiunxit, ut diu inclinatæ ovium mentes ad divina tollerent, cœlestæ protinus promoveret ad regnū. Acquisivit humilitas, superbia quod amisit: & grex pusillus ac mitis, totas & varias edomuit propria mansuetudine feritates; pusillus grex vicit ac fregit tot genera bestiarum, quot diversitates subdidit iugo Christi nationum.

*R. Iste est. 237. LECTIO viii.*

**G**rex pusillus ac mitis diu contentus occidi, diu devorari passus est, donec gentilis sævitia sanguine satiata, vel carnibus, Evangelici pabuli suavitatem, & divini fontis fluentia degustans, totum contagium sæculi evitaret, & pastum: atque in hominem rediret ex bestia, qui ex homine fuerat dilapsus in bestiam. Hoc sensitisse antè Prophetas, hoc Apostolos implevisse, hoc pertulisse Martyres constat, attestante illo qui dicit: Propter te mortificamur tota die, æstimati sumus ut oves occisionis. Ut verò iste grex novi ordinis aggredieretur prælium, ubi vivit ille, qui fuit occisus: imitatus est suum Regem, illum secutus est Agnum, qui sicut ovis ad occisionem ductus est.

*R. Sint lumbi. 238. LECTIO ix.*

**T**ibi ergo Rex, tibi sacerdos, tibi pastor, tibi sacrificium, tibi ovis, tibi agnus, tibi totum

factus est, qui fecerat totum. Et qui sibi numquam, tibi toties immutatur, propter te varias monstratur in formas, qui manet unica suæ majestatis in forma. Et quid plura? dat se tibi Deus, homo, ut ferre potes; quia, ut est, tu non potes sustinere. *Te Deum.*

### QUINTA DIE.

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 10.*

**I**N illo tempore: Dixit Jesus discipulis suis: Nolite timere pusillus grex, quia complacuit Patri vestro dare vobis regnum. Et reliqua.

De Homilia S. Petri Chrysologi. *Unde supra.*

**S**ed audiamus jam quid pusillo gregi talis promiserit pastor. Nolite timere, inquit, pusillus grex, quia complacuit Patri vestro dare vobis regnum. O bonitas effusa! ô inaudita pietas! ô ineffabilis affectio! In societatem census pastor oves assumit, atque ad consortium dominationis servos Dominus adsciscit: ad principatum regni Rex gregem populi totius admittit. Sic sic dat, cui deficere census, cui regnum minui, vacuari potestas non potest largiendo. *R. Iste est. 237.*

*LECTIO viii.*

**E**Cce qui dat, dare loquitur Patrem. Numquid largitatem suam denegat, sic dicendo? Absit; non potestatem minuit, sed pandit affectum, sic dicendo: non distantiam facit, sed Patris suamque voluntatem monstrat, firmat u-

*X 3 nitatem;*



nitatem. Quod autem dixit, Complacuit; & non dixit, Placuit; munus edocet Trinitatis: quia quod erga nos Filio placuit, hoc complacuit Trinitati.

*R. Sint lumbi. 239. Lectio ix.*

**P**ost tantam ergo Dominus largitatem, post suam gratiam tibi copiosius collatam, abjecta & vilia peculia servitutis jubet abjicere regnaturum. Vendite quæ possidetis, & date eleemosynam. Plebejum cultum regia non admittit potestas, augustus honor non nisi diademate confertur & purpura. Abjicere ergo debet habitum servitutis, qui se regem credit divinitus consecratum. Est consuetudinis, est animi felicitis, ut adscitus ad regnum, quod fuit proprium, quod privatum, mox parentibus, mox propinquis, civibus indigentibus, liberaliter prorogare, ne sit mendicus animo, qui censu functus, & honore. Te Deum laudamus.

## SEXTA DIE.

*In retio Nocturno.*

*Lectio sancti Evangelii secundum Lucam.*

*Lectio vii. Cap. 12.*

**I**n illo tempore: Dixit Jesus discipulis suis: Nolite timere pusillus grex, quia complacuit Patri vestro dare vobis regnum. Et reliqua.

*De Homilia S. Petri Chrysologi. Unde supra.*

**T**ali ergo providentia Dominus, consilio tali, vilia & caduca jubet ut vendamus, ut largiamur, ut donemus, qui in cœlesti regno omnia, quæ in cœlo &

quæ in terra sunt, volumus possidere. Sed si vis servare tuorum pretia prædiorum, & sacculorum fortè condita te delectant; facti bi sacculos quales ille præcepit, qui jam cupiditatis tuæ custos est & provisor. Denique ut vidit quòd duriter dixit, Vendite quæ possidetis; mox adjecit: Facite vobis sacculos, qui non veterascunt, thesaurum non deficientem in cœlis.

*R. Iste est. 237.*

*Lectio viii.*

**I**terum contristatus est: quia quod habes, in cœlis cogeris collocare. Rogo, crede Deo tuo, qui servo credis: magis Deo, quàm homini commenda. Sed si times ne quid inde præsumat, ne quid dispergat pietas largitoris, signa fidei annulo sacculos tuos, ut tali custode dormias tu securus: quia ubi ille est, ibi locus nullus est furi. Non poterit tibi tuam pecuniam denegare, qui tibi omnia sua contulit, qui te regni sui & honore ditavit & gloria.

*R. Sint lumbi. 238.*

*In Sermone 25. circa finem. Lectio ix.*

**N**Ovo modo, imò cœlesti modo, qui hunc audit, vendendo comparat, recondit erogando; dum amittit, acquirit. Quàm cupit pecuniam perdurare, perpetuare sacculos divitiarum, condita permanere, qui dicit: Facite vobis sacculos, qui non veterascunt? Ecce docet avaritiam, qui cœperat suadere contemptum. Et qui thesaurizantes temporaliter arguebat, ad totum cupiditatis fomi-

fomitum jubet sacculos sine fine perquiri. Christe, quò te pertrahit amor tuorum! Ut avarum lucrifacias, facis eum, quod desiderat, non quod oportet audire: sacculos imperas, ut avarus, dum consueta percurrit ad lucra, aut virtutem capiat, aut à virtute capiatur. **Te Deum laudamus.**

**SEPTIMA DIE.**

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 12.*

**I**N illo tempore: Dixit Jesus discipulis suis: Nolite timere pusillus grex, quia complacuit Patri vestro dare vobis regnum. Et reliqua.

*De Homilia sancti Petri Chrysologi.*

*Post supradicta.*

**V**erè Pater, ò Christe, qui cum tuis quibuscumque parvulis sic agis. Námque & nos interdum nostris parvulis petentibus noxia, ingerimus salutaria sub specie noxiorum, fallentes insipientiam, non decipientes affectum. Dixisti, Facite vobis sacculos, qui non veterascunt. Sacculus cur paratur? quid ibi claustra, ubi ipsa custos est innocentia? ibi quid signaculum, bifraudis suspicio non habetur? si & in cælo sacculis opus est, cura non amittitur, sed mutatur. **R. Iste est. 237. Lectio viii.**

**D**omine, tu vidisti, quia in thesauris tota fides, tota spes in sacculis sit avaris; & ideò imputribiles in cælo sacculos vis parari, ut qui te non sequitur ad cælum, sequatur saltem sacculos

suos. Avare, fac tibi sacculos, & fac jubente Deo, quia votis tuis annuit divina majestas. Sed fac tibi sacculos erogando: quia quid, quid pauper acceperit, Pater cælestis suscipit. Et ubi recondit? in cælo. Et ne fortè perdidisse te doleas vel usuram, centuplum in cælesti fœnore recipies, quidquid in cælum pauperè transmiseris perferente. **R. Sint lumbi. 238.**

*Lectio ix.*

**U**Sura mundi centum ad unum, Deus unum accipit ad centum, & tamen homines cum Deo nolunt habere contractum. Sunt forsitan de cautione solliciti. Quare? nonne homo homini exiguae chartulæ obligatione constringitur? Deus tot & tantis voluminibus cavet, & debitor non tenetur? Sed dicis: Esto quòd debeat; quo exigente restituet? Se ipsos, quia non potest ille mentiri: idem ipse est & executor & debitor. Non erit in reddendo durus: qui profusus est in largiendo. Crede homo Deo, quod tibi Deus dedit: majora reddere vult, cum vult debere largitor. **Te Deum.**

**IN DIE OCTAVA.**

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 12.*

**I**N illo tempore: Dixit Jesus discipulis suis: Nolite timere pusillus grex, quia complacuit Patri vestro dare vobis regnum. Et reliqua.

*De Homilia sancti Petri Chrysologi.*

*Ex Sermon. 25. initio.*

**X 4**

**Hodie**



**H**odie Dominus Evangelici gregis pusilla & tenera primordia quàm blanda exhortatione sit consolatus, audistis. Aufferit spes anxias, dubios tollit eventus, omnemque propellit & excludit timorem, quando in exordio ipso regnum nascentibus pollicetur. Quis de victu, quis de vestitu, quis de plebejo censu, & vernalis cespitis vilitate suspirat; de regno certus, de dominatione securus? Satis sibi invidet, qui elevatus ad summa, ipse se ad humilia dejicit, ad egena deponit.

*Le. iste est. 237.*

*Le. iste est. 237.*

**S**ed scire convenit, Pater iste quis est, vel qualis est, vel quod regnum suis filiis repromittit. Quis sit ille Pater, quotidie te confitente cognoscis, cum clamas: Pater noster, qui es in coelis. Qualis autem sit, ipsa operum magnitudine pervidisti. Ex nihilo fecit coelum, terram solidavit ex liquido, montes statuit ad stateram, maria intra legitimos terminos sola præcepti auctoritate conclusit. Verum si regni, quod promittit pusillis, desideras nosse qualitatem, ipse aperit, sic dicendo: Sinite parvulos venire ad me; talium est enim regnū coelorum. Esse in coelo mirum est: in coelo vivere est majestatis.

*Le. Sint lumbi. 278.*

*Le. Sint lumbi. 278.*

**Q**uid ergo cum terra illi, qui possidet coelum? quid illi cum humanis, qui adeptus est jam divina? Nisi fortè placent gemitus,

eliguntur labores, amantur pericula, pessima mors delectat, & illata mala bonis sunt gratiora colatis. Sed videamus quod dat Pater tantus consilium regnaturis: Vendite quæ possidetis, & date eleemosynam. Si victuros vos, si regnuros, si vos jam divites esse creditis in supernis, ubi futuri, quò migraturi, ubi regnaturi estis: vos illa, quæ vestra sunt, jam præcedant: opes miseras misericordiâ computate: quæ humana sunt, in divina convertite.

**T**e Deum laudamus.

## IN FRAT OCTAVAM CONFESSORIS

*non Pontificis.*

*Homilia in Evangel. Luc. cap. 19. Homo quidam nobilis, &c.*

### IN DIE FESTO.

*In die festo.*

*Le. sancti Evangelii secundum Lucam.*

*Le. sancti Evangelii secundum Lucam.*

**I**n illo tempore: Dixit Jesus discipulis suis parabolam hanc: Homo quidam nobilis abiit in regionem longinquam accipere sibi regnū, & reverti. Et reliqua.

*Homilia sancti Ambrosii Episcopi.*

*Lib. 3. in Luc. cap. 19.*

**B**onus ordo, ut vocaturus Gentēs, & Judæos jussurus interfici, qui noluerunt regnare supra se Christum, hanc præmitteret comparisonem, ne diceretur: Nil dederat populo Judæorum, unde poterat melior fieri; ut quid ab eo, qui nihil recepit, exigitur? Non mediocris ista est muna, quàm suprà mulier Evangelica, quia non invenit, lucernam

nam

nam accendit, lumine quærit ad-  
moto, gratulatur inventam.

Rz. Iste est. 237. *Lectio viii.*

**D**Enique ex una decem mnas  
alius fecit, alius quinque.  
Fortasse iste moralia habet, quia  
quinque sunt corporis sensus; ille  
duplicia, id est, mystica legis, &  
moralia probitatis. Unde & Mat-  
thæus quinque talenta, & duo  
talenta posuit: in quinque talen-  
tis, ut sint moralia; in duobus  
utrumque, mysticum atque mo-  
rale. Ita quod numero inferius,  
re uberius. Rz. Sint lumbi. 238.

*Lectio ix.*

**E**T hic possumus decem mnas,  
decem verba intelligere, id  
est, legis doctrinam; quinque au-  
tem mnas, magisteria disciplinæ.  
Sed legisperitum in omnibus vo-  
lo esse perfectum: non enim in  
sermone, sed in virtute est regnū  
Dei. Benè autem, quia de Judæis  
dicit, duo soli multiplicatam pec-  
uniam deserunt; non utique æ-  
ris, sed dispensationis usuris: alia  
est enim pecuniæ scænebris, alia  
doctrinæ cœlestis usura.

Te Deum laudamus.

## SECUNDA DIE.

In tertio Nocturno.

Lectio sancti Evangelii secundum Lucam.

*Lectio vii. Cap. 19.*

**I**N illo tempore: Dixit Jesus di-  
scipulis suis parabolam hanc:  
Homo quidam nobilis abiit in re-  
gionem longinquam accipere si-  
bi regnum, & reverti. Et reliqua.

De Homilia sancti Ambrosii Episcopi.

Vade suprà.

**D**Enique, cum Dominus dicit,  
Quare non dedisti pecuniam  
meam ad mensam? non nostræ,  
sed suæ pecuniæ quærit usuram.  
Unus in terra se abscondisse di-  
cit, quod rationem, quæ ad ima-  
ginem & similitudinem Dei data  
est nobis, studio voluptatis obrui-  
t, & tamquam in fovea carnis  
abscondit. De aliis silerur, qui  
quasi prodigi debitores, quæ ac-  
ceperant, prodiderunt. In duo-  
bus illis pauci sunt, qui per duas  
vices ad cultores vineæ destinati  
sunt, in reliquis omnes Judæi.

Rz. Iste est. 237. *Lectio viii.*

**Q**Uam comparisonem Mat-  
thæus etiam nobis voluit ap-  
ptare, quod similiter ut dives,  
qui pecuniam suam non impertit  
pauperibus; ita etiam, qui doctri-  
næ suæ gratiam non dividit im-  
peritis, docere cum possit, haud  
mediotris reus est culpæ. De quo,  
quoniam in libris de fide scriptis  
diximus, transcurrere melius fuit.

Rz. Sint lumbi. 238. *Lectio ix.*

**C**ivitates autem decem esse quæ  
possunt, nisi forte animæ, qui-  
bus jure præponitur, qui pecuni-  
am Domini, & illa eloquia casta,  
probata sicut argentum, menti-  
bus hominum sceneraverit? Nam  
sicut Jerusalem dicitur ædificata  
sicut civitas, ita sunt animæ pa-  
cificæ: & sicut Angeli præsent, ita  
& ii qui vitam meruerunt Ange-  
lorum. Te Deum laudamus.

## TERTIA DIE.

In tertio Nocturno.

*Lectio*



*Lectio sancti Evangelii secundum Lucam.**Lectio vii. Cap. 19.*

**I**n illo tempore: Dixit Jesus discipulis suis parabolam hanc: Homo quidam nobilis abiit in regionem longinquam accipere sibi regnum, & reverti. Et reliqua.

*Homilia venerabilis Bedæ Presbyteri.**Ex Comment. in Luc. lib. 5. cap. 28.*

**H**omo nobilis ille est, cui cæcus supra clamabat: Fili David, miserere mei. Longinqua regio, Ecclesia est ex Gentibus, de qua eidem homini nobili, qui loquitur, Ego autem constitutus sum Rex ab eo, dicitur à Patre: Postula à me, & dabo tibi Gentes hæreditatem tuam, & possessionem tuam terminos terræ. Quæ videlicet hæreditas ac possessio bifaria ratione regio longinqua vocatur: vel quia à finibus terræ clamat ad Dominum; vel quia longè est à peccatoribus salus. Et cum Deus ubique sit præsens, longè tamen ab eorum sensu, qui idola colunt, Deus verus abest.

*It. Iste est. 237. Lectio viii.*

**V**ocatis autem decem servis suis. Denarius numerus ad legem pertinet propter Decalogum. Vocat itaque paterfamilias decem servos, quia eligit discipulos per litteram legis imbutos. Dat illis decem mnas: quia legis dicta spiritaliter intelligenda revelat. Post passionem quippe resurrectionemque suam aperuit illis sensum, ut intelligerent scripturas. Mina namq; quam Græci mnam vocant, centum drach-

mis appenditur: & omnis scripturæ sermo, qui vitæ cœlestis perfectionem suggerit; quasi numeri centenarii pondere fulgescit.

*R. Sint lumbi. 238. Lectio ix.*

**N**egotiamini, dum venio. Verba, inquit, legis ac Prophetarum mystica interpretatione discussa populis offerte, atque ab eis fidei confessionem, morumque probitatem recipite, juxta quod Psalmista suis auditoribus præcipit, dicens: Sumite psalmum, & date tympanum. Hoc est, laudem prædicationis in cordis intentione percipite, & devotionem operis in carnis castigatione redhibete. Tympanum quippe est pellis in ligno extenta. Pellis verò in ligno extenta, caro est nostra ad exemplum Dominicæ Crucis afflicta. *Te Deum laudamus.*

#### QUARTA DIE.

*In tertio Nocturno.**Lectio sancti Evangelii secundum Lucam.**Lectio vii. Cap. 19.*

**I**n illo tempore: Dixit Jesus discipulis suis parabolam hanc: Homo quidam nobilis abiit in regionem longinquam accipere sibi regnum, & reverti. Et reliqua.

*De Homilia venerabilis Bedæ Presbyteri.**Unde supra.*

**C**ives autem ejus oderant illum. Cives impios Judæos dicit, de quibus alibi protestatur: Nunc autem & viderunt, & oderunt & me & Patrem meum. Qui non solum præsentem usque ad mortem crucis oderant, sed etiam post resurrectionem ejus miserrunt

runt persecutionem Apostolis, & prædicationem regni cœlestis spreverunt. Et factum est ut rediret accepto regno. Significat tempus, quando in manifestissima & eminētissima claritate venturus est, qui eis humilis apparuit, cū diceret, Regnum meum non est de hoc mundo.

*Rz.* Iste est. 237. *Lectio viii.*

**E**T iussit vocari servos, ut sciret quantum quisque negotiatus esset. Ut sciret, inquit, non quod eum quid lateat, cui verissimè dictum est, Domine, tu omnia scis: sed Sciret dicit, ut scire omnes faceret. Tunc enim omnium opera, & cogitationes palam omnibus ostenduntur, quomodo in Deuteronomio; Tentat, inquit, vós Dominus Deus vester, ut sciat si diligitis eum, hoc est, scire faciat. Nemo sanè arbitretur, eos solummodò, quibus gratia prædicandi data est, non autem & eos quibus prædicatum est, ad iudicium tunc esse vocandos: ipsi sunt enim pecunia, quam boni servi acquisière mercando.

*Rz.* Sint lumbi. 238. *Lectio ix.*

**V**enit autem primus. Primus servus, ordo Doctorum est in circumcisionem missorum, qui unam minam negotiatoris accipit, quia unum Dominum, unam fidem, unum baptisma, unum Deum prædicare iussus est. Sed hæc eadem mina decem minas acquisivit, quia populum sub lege constitutum sibi docendo

sociavit. Et ait illi: Euge serve bone. In modico servus est fidelis, qui non adulterat verbum Dei; sed sicut ex Deo coram Deo in Christo loquitur. **Te Deum.**

## QUINTA DIE.

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 19.*

**I**N illo tempore: Dixit Jesus discipulis suis parabolam hanc: Homo quidam nobilis abiit in regionem longinquam accipere sibi regnum, & reverti. Et reliqua.

*De Homilia venerabilis Bedæ Presbyteri.*

*Unde supra, paulò post.*

**E**T alter venit, dicens: Servus iste cœtus est eorum, qui præputio evangelizare missi sunt; cui Dominus ad prædicandum eunti unam minam, hoc est, unam eandemq; fidem, quæ & circumcisioni credita est, præstiterat. Sed hæc quinque minas fecit, quia Gentes corporis sensibus antea mancipatas, ad fidei Evangelicæ gratiam convertit. Et huic ait: Et tu esto supra quinque civitates: hoc est, ex earum, quas imbueras, animarum fide & conversione, magnus sublimisque fulgore. De quibus mysticè dicit Isaias: In die illa erunt quinque civitates in terra Ægypti, loquentes lingua Chanaan.

*Rz.* Iste est. 237. *Lectio viii.*

**Q**uinq; enim civitates in terra Ægypti quinque sunt corporis sensus, quibus in hoc mundo utimur, videlicet, visus, auditus, gustus, olfactus, & tactus. Et

qui



qui viderit mulierem ad concupiscendum eam; qui avertit aures suas, ne audiat pauperem; qui inebriatur vino; qui coronare se gaudet rosis, antequam marcescant; cujus sanguine plenæ manus, & dextera est repleta muneribus, hujus quinque civitates loquuntur lingua Ægypti, id est, universi sensus faciunt opera tenebrarum.

*R.* Sint lumbi 238. *Lectio ix.*

**A**T qui obturat aures, ne audiat sanguinem, & claudit oculos suos, ne videat malum, qui gustat & videt quàm suavis est Dominus; qui castigat corpus suum, & servituti subjicit; qui potest dicere cum Apostolo, Christi bonus odor sumus Deo; hujus civitates loquuntur lingua mutata, quod interpretatur Chanaan. Et qui eas à tenebris docendo commutaverat, rectè quinque civitatibus præfici memoratur.

*Te Deum laudamus.*

## SEXTA DIE.

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 19.*

**I**N illo tempore: Dixit Jesus discipulis suis parabolam hanc: Homo quidam nobilis abiit in regionem longinquam accipere sibi regnum, & reverti. Et reliqua.

*De Homilia venerabilis Bedæ Presbyteri.*

*Unde supra, paulò post.*

**S**ervus, qui negotiari jussus, acceptam Domini pecuniam in sudario reposuit, ostendit eos, qui ad prædicandum idonei, præ-

dicationis officium, jubente Domino per Ecclesiam, vel saltem suscipere, vel susceptum dignè gerere detrectant. Pecuniam quippe in sudario ligare, est percepta dona sub otio lenti corporis abscondere. Sunt enim homines, hac sibi perversitate blandientes, ut dicant, Sufficit ut de se unusquisque rationem reddat.

*R.* Iste est. 237. *Lectio viii.*

**S**ervus nequam vocatur, quia & piger ac deses est ad exercendum negotium, & procax ac superbus ad accusandum Domini judicium. Quod putaverat se pro excusatione dixisse, in culpam propriam vertitur. Si, inquit, durum & crudelem esse me nove-  
ras, & aliena sectari, ibique merere ubi non severim, quare non tibi istiusmodi cogitatio incussit timorem, ut scires me mea diligentius quæsiturum, & dares pecuniam meam ad mensam.

*R.* Sint lumbi. 238. *Lectio ix.*

**P**ecunia ergo & argentum prædicatio Evangelii est, & sermo divinus, qui dari debuit ad mensam, hoc est, promptis paratisque fidelium cordibus intimari. Ad quam videlicet mensam, id est, mentem auditorum, non alia, quam Dominica est deferenda pecunia, ut omnis sermo docentis scripturæ sensum sequatur. Nam quòd hic Dominus, non quamlibet pecuniā, sed suam dicit nummulariis esse fœnerandam, exponit Apostolus dicens: Si quis loqui-

loquitur, quasi sermones Dei.

**T**e Deum laudamus.

**SEPTIMA DIE.**

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 19.*

**I**N illo tempore: Dixit Jesus discipulis suis parabolam hanc: Homo quidam nobilis abiit in regionem longinquam accipere sibi regnum, & reverti. Et reliqua.

*De Homilia venerabilis Bedæ Presbyteri.*

*Unde supra.*

**Q**ui verbi pecuniam à doctore percipit, emitque credendo, necesse est ut eam cum usuris solvat operando, ut quod auditu didicit, exequatur & actu. In usura quippe pecunia etiam non data recipitur. Vel certè de accepto verbi fœnore usuras solvit, qui ex eo quod audit, etiam alia studet intelligere, quæ necdum ex prædicatoris ore didicit. Rectè autem amittit collatam gratiam, quam prædicando aliis communicare neglexit, ut ei augeatur, qui inde laboravit.

*¶ Iste est. 237. Lectio viii.*

**Q**uòd verò ablata à nequam servo mina ei, qui decem minas habebat, dari iussa est; mysticè, ut reor, indicat, intrante plenitudine Gentium omnem Israël salvum futurum, & tunc abundantiam gratiæ spiritualis, quam modò nos tepenter exercemus, illius populi doctoribus esse conferendam. Dico autè vobis, quia omni habenti dabitur, & abundabit; ab eo autem qui non habet, & quod habet, auferetur ab

*Octav. Rom.*

eo. Hæc ad superiora sententia respicit, docens & illum posse amittere munus Dei, qui habens non habet, id est, non utitur; & in eo augeri, qui habens habet, hoc est, benè utitur. Quæ gratiarum mutatio, quoniam in hac vita geri solet, notandum, quòd illud Domini redeuntis examen etiam nunc ex parte celebratum, sed tunc est universaliter implendum. *¶. Sint lumbi. 238.*

*Lectio ix.*

**V**erum universali manifestato iudicio, quod dictu quoque terribile est, multi qui ad docendum videbantur idonei, ob negligentiam suæ noxam inter indoctos reputabuntur. At alii simpliciores fratres, & elementorum penitus ignari, ob conversationis tamen eximiae devotionem inter Apostolicos doctores præmia summa percipient. Qui enim recipit prophetam in nomine prophetæ, mercedem prophetæ accipiet.

**T**e Deum laudamus.

**IN DIE OCTAVA.**

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 19.*

**I**N illo tempore: Dixit Jesus discipulis suis parabolam hanc: Homo quidam nobilis abiit in regionem longinquam accipere sibi regnum, & reverti. Et reliqua.

*Homilia sancti Augustini Episcopi.*

*Lib. 1. Quest. Evang. quest. 46.*

**R**egio longinqua, Ecclesia Gentium usque ad fines terræ. Reverti se tamen dicit: abiit enim, ut plenitudo Gentium intraret

**Y**

**traret**



trarer: revertetur, ut omnis Israël salvus fiat. Per decem mnas Legem significat, propter decalogum. Decem autem servos, quibus sub illa positis gratia prædicata est. Sic enim intelligendum est eis datas mnas ad usum, cum intellexerint, eam ipsam legem, remoto, velamine, ad Evangelium pertinere. Cives ejus, qui post eum miserunt legationem, dicentes, se nolle ut regnet sibi, Judæi sunt, qui prædicationem Evangelii respuerunt.

*¶* Ille est. 238.

*Lectio VIII.*

**Q**Uòd autem servi reddentes rationem, ex eo quod acceperant, laudantur quia lucrati sunt; significat eos bonam reddere rationem, qui benè usi sunt eo, quod acceperunt ad augendas divitias Domini, per eos qui erudunt in eum. Quod qui facere nolunt, in illo significati sunt, qui mnas suam in sudario servavit. Mensam, cui danda erat pecunia, professionem ipsam religionis accipimus, quæ tamquam publicè proponitur ad usum necessarium salutis. *¶* Sint lumbi. 238.

*Lectio IX.*

**Q**Uòd autem unus eorum, qui bene usi sunt, decem acquisivit, & alter quinque, significat eos esse acquisitos in gregem Dei, à quibus ipsa lex per gratiam intellecta est. Ad hoc pertinent & decem & quinque civitates, quibus eos præponit. Multiplicatio enim intelligentiæ in ipsa varie-

tate ad unum redacta, quasi civitatem facit viventium rationum æternarum. Est enim civitas non quorumlibet animantium, sed rationalium multitudo, legis unius societate devincta. **Te Deum.**

## INFRA OCTAVAM ABBATUM.

*Homilia in Evangel. Matth. cap. 19. Ecce nos reliquimus omnia, &c.*

### IN DIE FESTO.

*In tertio Nocturno.*

*Lectio S. Evangelii secundum Mattheum.*

*Lectio VII. Cap. 19.*

**I**N illo tempore: Dixit Petrus ad Jesum: Ecce nos reliquimus omnia, & secuti sumus te: quid ergo erit nobis? Et reliqua.

*Homilia sancti Hieronymi Presbyteri.*

*Lib. 3. in Matth. cap. 19.*

**G**Randis fiducia! Petrus piscator erat, dives non fuerat, cibos manu & arte quærebat: & tamen loquitur confidenter, Relinquimus omnia. Et quia non sufficit tantum relinquere; jungit quod perfectum est: Et secuti sumus te. Fecimus quod jussisti: quid igitur nobis dabis præmiis? Jesus autem dixit illis: Amen dico vobis: quod vos qui secuti estis me, in regeneratione, cum sederit Filius hominis in sede majestatis suæ, sedebitis & vos super sedes duodecim, judicantes duodecim tribus Israël. Non dixit, Qui reliquistis omnia: hoc enim & Crates fecit philosophus, & multi alii divitias contempserunt: sed, Qui secuti estis me: quod propriè Apostolorum est,

*atque*

atque credentium.

*R.* Iste est. 237. *Lectio viii.*

**I**N regeneratione, cum sederit Filius hominis in sede maiestatis suae, (quando & mortui de corruptione resurgent incorrupti) sedebitis & vos in solis iudicantium, condemnantes duodecim tribus Israel: quia vobis credentibus, illi credere noluerunt. Et omnis qui reliquerit domum, vel fratres. aut sorores, aut patrem, aut matrem, aut uxorem, aut filios, aut agros propter nomen meum; centuplum accipiet, & vitam aeternam possidebit. Locus iste cum illa sententia congruit, in qua Salvator loquitur: Non veni pacem mittere, sed gladium. Veni enim separare hominem a patre suo, & matrem a filia, & nurum a socro: & inimici hominis, domestici ejus. Qui ergo propter fidem Christi, & praedicationem Evangelii, omnes affectus contempserint: atque divitias & saeculi voluptates: isti centuplum recipient, & vitam aeternam possidebunt.

*R.* Sint lumbi. 238. *Lectio ix.*

**E**X occasione hujus sententiae quidam introducunt mille annos post resurrectionem, dicentes, tunc nobis centuplum omnium rerum quas dimisimus, & vitam aeternam esse reddendam: non intelligentes, quod, si in caeteris digna sit repromissio, in uxoris apparet turpitudine: ut qui unam pro Domino dimiserit,

centum recipiat in futuro. Sensus ergo est: Qui carnalia pro Salvatore dimiserit, spiritualia recipiet: quae comparatione & merito sui ita erunt, quasi si parvo numero centenarius numerus compareretur. *Te Deum laudamus.*

## SECUNDA DIE.

*In tertio Nocturno.*

*Lectio 8. Evangelii secundum Mattheum.*  
*Lectio xii. Cap. 19.*

**I**N illo tempore: Dixit Petrus ad Jesum: Ecce nos reliquimus omnia, & secuti sumus te: quid ergo erit nobis? Et reliqua.

*Homilia venerabilis Bedae Presbyteri.*

*Homilia in evangelio S. Benedicti.*

**P**erfectus ille est, qui abiens vendit omnia quae habet, & dat pauperibus, ac veniens sequitur Christum: habebit enim thesaurum non deficientem in caelis. Unde bene interrogante Petro, dixit talibus Jesus: Amen dico vobis, quod vos qui secuti estis me, in regeneratione, cum sederit Filius hominis in sede maiestatis suae, sedebitis & vos super sedes duodecim, iudicantes duodecim tribus Israel. In hac quippe vita pro ejus nomine laborantes, in alia praemium sperare docuit, id est, in regeneratione; cum videlicet in vitam immortalem fuerimus resurgendo regenerati, qui in vitam caducam mortaliter eramus geniti.

*R.* Iste est. 237. *Lectio viii.*

**E**T justa prorsus retributio, ut qui hic pro Christo humanae gloriam celsitudinis neglexerunt,

Y 2 illic



illic à Christo iudices glorificati singulariter cum eo assideant, qui à sequendis ejus vestigiis nulla ratione poterant avelli. Nemo autem putet, duodecim tantum Apostolos, quia pro Juda pravaricante Matthias electus est, tunc esse iudicatuos, sicut nec duodecim solæ sunt tribus Israël iudicandæ: alioquin tribus Levi, quæ tertiadecima est, in iudicata recedat. **R.** Sint lumbi. 238.

## Lectio ix.

**E**T Paulus, qui tertiusdecimus est Apostolus, iudicandi forte privabitur, cum ipse dicat: Nescitis quoniam angelos iudicabimus, quanto magis sæcularia? Sciendum namque est, omnes qui ad exemplum Apostolorum sua reliquerunt omnia, & secuti sunt Christum, iudices cum eo venturos, sicut etiam omne mortalium genus esse iudicandum. Quia enim duodenario sæpè numero solet in Scripturis universitas designari, per duodecim sedes Apostolorum, omnium numerositas iudicantium; & per duodecim tribus Israël, universitas eorum, qui iudicandi sunt ostenditur.

**Te** Deum laudamus.

## TERTIA DIE.

In tertio Nocturno.

Lectio S. Evangelii secundum Matthæum

Lectio vii. Cap. 19.

**I**N illo tempore: Dixit Petrus ad Jesum: Ecce nos reliquimus omnia, & secuti sumus te: quid ergo erit nobis? Et reliqua.

De Homilia venerabilis Bedæ Presbyteri.

Unde supra.

**D**uo sunt ordines electorum in iudicio futuri: unus iudicantium cum Domino, de quibus hoc loco memorat, qui reliquerunt omnia, & secuti sunt illum: alius iudicandorum à Domino, qui non quidem omnia sua pariter reliquerunt, sed de his tamen quæ habebant, quotidianas dare eleemosynas Christi pauperibus curabant: unde & audituri sunt in iudicio: Venite benedicti Patris mei, possidete præparatum vobis regnū à constitutione mundi. Esurivi enim, & dedistis mihi manducare: sitivi, & dedistis mihi bibere. **R.** Iste est. 237.

## Lectio viii.

**S**ed & reprobos duos ibi futuros ordines Domino narrante comperimus: unum eorum, qui fidei Christianæ mysteriis initiati, opera fidei exercere contemnunt, quibus in iudicio testatur: Discedite à me maledicti in ignem æternum, qui præparatus est diabolo, & angelis ejus: esurivi enim, & non dedistis mihi manducare. Alterum eorum, qui fidem & mysteria Christi vel nunquam suscepere, vel susceptam per apostasiam deseruere, de quibus dicit: Qui autem non credit, jam iudicatus est: quia non credit in nomine unigeniti Filii Dei.

**R.** Sint lumbi. 238. **Lectio ix.**

**V**erum his cum timore & pavore debito paulisper commemoratis ad lætissima potius Domini & Salvatoris nostri promissa

missa convertamus auditum. Videamus quæ tantæ gratia pietatis: non æternæ tantummodò vitæ præmia suis sequacibus, sed & præsentis munera pollicetur eximia. Et omnis, inquit, qui reliquerit domum, vel fratres, aut sorores, aut patrem, aut matrem, aut uxorem, aut filios, aut agros, propter nomen meum, centuplum accipiet, & vitam æternam possidebit. Qui enim terrenis affectibus sive possessionibus pro Christi discipulatu renuntiaverit, quò plus in ejus amorem profecerit, eò plures inveniet, qui se interno suscipere affectu, & suis gaudeant sustentare substantiis.

Te Deum laudamus.

#### QUARTA DIE.

In tertio Nocturno.

Lectio S. Evangelii secundum Matthæum.

Lectio vii. Cap. 19.

**I**N illo tempore: Dixit Petrus ad Jesum: Ecce nos reliquimus omnia, & secuti sumus te: quid ergo erit nobis? Et reliqua.

Homilia sancti Joannis Chrysostomi.

Homil. 7. in c. 3. ad Rom. circa finem.

**S**I centuplum hic non recipimus, nos ipsi in causa sumus, qui mutuum non damus illi, qui tantum reddere potest. Dic enim, quæso, quid magni dedit Petrus? nonne rete scissum tantum, & calamum, & hamum? verum vicissim illi Deus universi orbis domos aperuit, terramque simul & mare patefecit, deditque ut omnes illum in sua vocarent, imò quæ sua erant, venderent, & ad illius pedes afferrent, ne in ma-

nus quidem tradentes pecuniam; neque enim id audebant, tantum illi honorem unà cum munificentia tribuebant.

Rz. Iste est. 237. **Lectio viii.**

**D**Ices, At ille Petrus erat. Quid tum, ô bone? Non ista Petro tantum promissa sunt: neque enim dixit, Tu verò ô Petre, centuplum accipies solus; sed, Quisquis reliquerit domos, aut fratres, centuplum accipiet. Personarum siquidè differentiam non cognoscit, sed rectè facta magis pensat. Gratiam enim habet Deus, & cum nobis debet, & cum solvit. Aspicit autem creditores suos libentius, quàm eos qui nihil mutuò dederunt: quibus verò plura debet, eos & plus diligit. Quamobrem si perpetuam cum illo amicitiam inire vis, vide ut multum tibi debeat. Rz. Sint lumbi. 238.

**Lectio ix.**

**N**Eque enim perinde delectatur suis debitoribus creditor, atque Christus creditoribus: fugit enim, quibus nihil debet; quibus verò debet, ad hos potissimum accurrit. Omnem igitur lapidem inoventes, curemus Christum debitorem habere: hoc enim præsens tempus, scenerandi tempus est. Nunc scilicet in indigentia Christus constitutus est: si jam illi nihil das mutuò, tuorum certè, cum hinc discesseris, nihilo opus habebit; hic enim sitit, hic esurit: cave igitur illum ne despicias. Te Deum laudamus.

Y 3 **QUIN-**



## QUINTA DIE.

In tertio Nocturno.

Lectio S. Evangelii secundum Matthæum.

Lectio vii. Cap. 19.

**I**N illo tempore: Dixit Petrus ad Jesum: Ecce nos reliquimus omnia, & secuti sumus te: quid ergo erit nobis? Et reliqua.

Homilia sancti Ambrosii Episcopi.

In Psalm. 118. Scm. 8. post initium.

**E**Cce nos omnia dereliquimus, & secuti sumus te. Hoc est, non quæsiuimus quæ sæculi sunt, non quæsiuimus partem de possessionibus, sed te elegimus portionem. Reliquisti ergo omnia, Petre, quæ habebas; unde habes, quod habere te dicis? Surgit claudus, & sono tui sermonis erigitur: sanitatem aliis donas, qui indigebas ipse tuæ salutis auxilio. Reliquisti ergo quæ habebas, & cœpisti quæ non habebas. Christus tibi portio, Christus tibi possessio est: illius nomen tibi munificum, illius nomen tibi est fructuosum, illius nomen tibi tributa dependit, & bona tributa, non pecuniæ, sed gratiæ.

R. Ille est. 237. Lectio viii.

**Q**uicumque reliquerit patrē, aut matrem, aut domum, aut fratres, aut sorores, centuplum accipiet in hoc sæculo, & vitam æternā possidebit. Multos quidē in hoc sæculo, qui sua pauperibus donaverunt, uberiore thesauro locupletatos fuisse cognovimus. Est pulcherrimus locus, ut etiam ad misericordiam provocentur. Sed non debent à Domino sæcularem huiusmodi exigere mer-

cedem, nec sperare quæ mundi sunt: sed magis, quia iis qui omnia reliquerint, Deus portio est. Ipse est utique merces perfecta virtutum, qui non centupli enumeratione, sed perfectæ plenitudinis æstimatione censetur. Ego, inquit, Deus tuus sum. Non dixit; Ero, sed, Jam sum, jam in habito, jam possideo.

R. Sint lumbi. 238. Lectio ix.

**H**abes homo inter multa proposita etiam huiusmodi portionem. Proposuit tibi Dominus in portione possessiones, in portione aurum, in portione argentum, in portione honores, in portione nobilitatem, proposuit etiam in portione seipsum. Habes igitur plurimas portiones, elige quam putas: non te numerus perturbet, sed excitet gratia; non te labor avertat, sed fructus invitet.

Te Deum laudamus.

## SEXTA DIE.

In tertio Nocturno.

Lectio S. Evangelii secundum Matthæum.

Lectio vii. Cap. 19.

**I**N illo tempore: Dixit Petrus ad Jesum: Ecce nos reliquimus omnia, & secuti sumus te: quid ergo erit nobis? Et reliqua.

Homilia sancti Hilarii Episcopi.

Cap. 19.

**A**postoli dictis Domini hæc respondent, reliquisse se omnia, & cum ipso esse. Quibus Dominus, cum sederit in maiestatis suæ sede, sessuros super sedes duodecim, ac totidem tribus Israël iudicatos, spopondit; omnibusque qui universa reliquerint propter no-

men

men ejus, fructum centupli præmii reservatum: multos autem ex novissimis primos futuros, & ex primis futuros novissimos. Multa sunt quæ non sinunt nos simplici intellectu dicta Evangelica suscipere. **R.** Iste est. 237.

**Lectio viii.**

**I**nterpositis nonnullis rebus, quæ ex natura humani sensus sibi contraria sunt, rationem quærere cœlestis intelligentiæ admonemur. Apostoli dicunt, & sequi se Christum, & se omnia reliquisse. Quomodo igitur fiunt tristes, & quomodo metuunt dicentes, salvū esse neminem posse? Namque & ab aliis fieri poterat, si quid fecissent ipsi. Deinde cum fecissent, quare metus, vel unde susceptus est? Additur etiam in responsione Domini, hæc apud homines impossibilia, possibilia apud Deum. Numquid apud hominem impossibilia erant, quæ & Apostoli fecisse se gloriantur, & fecisse eos Dominus agnoscit?

**R.** Sint lumbi. 238. **Lectio ix.**

**O**mnis itaq; hic sermo est spiritualis. Quid autem Dei virutū tam possibile est, quàm ut per fidem salvet? ut per eam regeneret? ut per crucem vincat? ut per Evangelia adoptet? ut resurrectionem ex morte vivificet? Quibus auditis Apostolis citò credunt, seseque omnia reliquisse profitentur. Sed hanc eorum obedientiam citò Dominus remuneratur, omnem difficultatem superioris

quæstionis absolvens, cum dicit: Vos, qui secuti estis me, in regeneratione judicabitis duodecim tribus Israel. Hæc enim illa regeneratio est, quam Apostoli sunt secuti, quam lex indulgere non potuit, quæ eos super duodecim thronos in judicandis duodecim tribubus Israël, in duodecim Patriarcharum gloria copulavit.

**Te Deum laudamus.**

**SEPTIMA DIE.**

*In tertio Nocturno.*

*Lectio sancti Evangelii secundum Matthæum.*

*Lectio vii. Cap. 19.*

**I**n illo tempore: Dixit Petrus ad Jesum: Ecce nos reliquimus omnia, & secuti sumus te: quid ergo erit nobis? Et reliqua.

*Homilia sancti Bernardi Abbatis.*

*Decl. de Evange. hujus verbis.*

**A**rbitor verba lectionis hujus ea esse, de quibus ad immortalē sponsum à finibus terræ clamat Ecclesia: Propter verba labiorum tuorum ego custodivi vias duras. Hæc nempe sunt verba, quæ contemptum mundi in universo mundo, & voluntariam persuasere hominibus paupertatem. Hæc sunt quæ monachis claustra replent, deserta anachoretis. Hæc, inquam, sunt verba, quæ Ægyptum spoliant, & optima quæque ejus vasa diripiunt. Hic sermo vivus & efficax, convertens animas felici æmulatione sanctitatis, & veritatis promissione fideli. **R.** Iste est. 237.

*Lectio viii.*

**N**am & mundus transit, & concupiscentia ejus, & relinque-



re hæc magis expedit, quam relinqui. Ecce, inquit, reliquimus omnia, & secuti sumus te: nimirum, quia exultavit ut gigas ad currendam viam, nec currentem sequi poterat oneratus. Sed nec inutilis commutatio, pro eo, qui super omnia est, omnia reliquisse: nam & simul cum eo donantur omnia; & ubi apprehenderis eum, erit unus ipse omnia in omnibus, qui pro ipso omnia reliquerunt. Omnia sanè dixerim, non tantum possessiones, sed etiam cupiditates, & eas maximè.

*R.* Sint lumbi. 238. *Lectio ix.*

**P**etrus cogitatum suum jactans in Domino, & omnem sollicitudinem suam in eum projiciens, certus quod illi foret cura de eo, reliquit omnia, secutus est Dominum, ne interrogans quidem de præmio, donec ex periculo divitum, quod Salvator prosequabatur,sumeret occasionem percunctandi, Quid ergo erit nobis? Ait illi Jesus: Amen dico vobis. Verbum confirmationis præmittitur; magnum noveris esse quod sequitur, In regeneratione sedebitis & vos. Consequimini, ait, quem sequimini: ut cum ipse sederit, & vos pariter sedeatis. O sessio! Quis mihi tribuat ut dignis exprimam verbis, quod de sessione hac cordis affectione concipio? Imò quis tribuat mihi sessionis hujus imperturbata frui requie, quam desidero, quam cupio, quam requiro? **T**e Deum laudamus.

## IN DIE OCTAVA.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 19.*

**I**n illo tempore: Dixit Petrus ad Jesum: Ecce nos reliquimus omnia, & secuti sumus te: quid ergo erit nobis? Et reliqua.

*Homilia sancti Bernardi Abbatis.*

*Unde supra.*

**E**cce enim dixit, nihil in me sedet, sed cuncta in motu sunt, omnia nutant, fluctuant universa. Postremò ubi concupiscit adhuc caro adversus spiritum, spiritus adversus carnem, quidnam hominis sedere videtur? Jam quidem sedet Filius hominis in sede majestatis: si quidem ascendens in coelum sedet à dextris Dei. Sed, Cum sederit, dictum est, hoc est, Cum apparuerit sedens, sicut Apostolus ait: Cum enim Christus apparuerit vita vestra, tunc & vos apparebitis cum illo in gloria. Quid gloriosius? judicent nunc, & præjudicent superbiam filii, cum rege suo sedeant, qui sibi latera Aquilonis elegit: transibimus, & ecce non erunt. *R.* Iste est. 237.

*Lectio viii.*

**I**n sedibus enim quies imperturbata est, in judicio dignitatis eminentia commendatur. Quis verò sæcularis honor excogitari potest, qui non prorsus in tantæ sublimitatis comparatione vilescat? non unius si quidem civitatis, aut populi, seu regionis unus, sed universitatis judices habent præsidere cum Christo. Nec solum homines, sed & ipsos angelos

gelos judicabunt, qui parentem ad modicum vaporem præsentis gloriæ dedignant & exsufflantes, improprium Christi universis præferunt titulis dignitatum.

*R.* Sint lumbi. 238. *Lectio ix.*

**I**llud ego vehementius arbitror admirandum, quod fideles magis in maximo, quam in modico videamini. Non enim difficile est eidare centuplum in præfenti, qui daturus est vitam æternam in futuro. Sed quomodo, inquit, possunt hæc fieri? qua ratione accipi centuplum, qui nihil sibi relinquit ex omnibus? Miranovitas, sed ejus, qui nova facit omnia. Jugum tollens, invenit requiem; relinquens omnia, centuplum habet. Noverat hoc & ille, qui loquebatur in Psalmo: Numquid adhæret tibi sedes iniquitatis, qui fingis laborem in præcepto? An non fictus in præcepto labor, onus leve, suave jugum, crux inuncta. *Te Deum.*

## INFRA OCTAVAM VIRGINUM.

### SECUNDA DIE.

In secundo Nocturno

Tres lectiones S. Ambrosii. Quoniam hodie natalis, &c. ut in Breviario de Communi Virg. Quod si lectæ sint in die Festo, legantur sequentes.

Sermo venerabilis Bedæ Presbyteri.

*Lectio iv.*

**Q**uam laxo sinu de prælio revertentes civitas cœlestis excipit de hoste prostrato trophæa ferentibus occurrit! Cum triumphantibus viris & fæminæ veni-

unt, quæ cum sæculo sexum quoque vicerunt, & geminata gloria militiæ, virgines cum pueris teneros annos virtutibus transeuntes: sed & cætera fidelium turba aulæ perpetuæ regiam intrabit, qui sinceritatem fidei inconcussis præceptorum cœlestium disciplinis unita pace observaverunt.

*R.* Propter veritatem, & mansuetudinem, & justitiam: \* Et deducet te mirabiliter dextera tua. \* Specie tua, & pulchritudine tua intende, prosperè procede, & regna. Et deducet.

*Lectio v.*

**E**rgo agite nunc fratres, aggrediamur iter vitæ, revertamur ad civitatem cœlestem, in qua scripti sumus, & cives decreti. Non sumus hospites, sed cives Sanctorum, & domestici Dei, etiam illius hæredes, cohæredes autem Christi. Hujus nobis urbis januas aperiet fortitudo: & fiducia latum præbebit ingressum. Consideremus ergo inclytam urbis illius felicitatem, in quantum considerare possibile est: ut enim verè est, comprehendere nullus sermo sufficiet.

*R.* Dilexisti justitiam, & odisti iniquitatem, \* Propterea unxit te Deus Deus tuus oleo lætitiæ.

\* Propter veritatem, & mansuetudinem, & justitiam. Propterea.

*Lectio vi.*

**D**icitur de ea in quodam loco sic, Quod aufugiet ibi dolor, & tristitia, & gemitus. Quid hac vita



vita beatius, ubi non est paupertatis metus, non ægritudinis imbecillitas? Nemo lædatur, irascetur nemo: nemo invidet, cupiditas nulla exardescit: nullum ibi desiderium honoris pulsatur, aut potestatis ambitio. Nullus ibi diaboli metus, insidiarum dæmonum nullarum, terror gehennarum procul: mors neque corporis, neque animæ erit, sed immortalitatis munere vita jucunda.

**R.** Afferentur Regi virgines post eam, proximæ ejus, **A.** Afferentur tibi in lætitia & exultatione. **V.** Specie tua, & pulchritudine tua intende, prosperè procede, & regna. Afferentur. Gloria Patri. Afferentur,

### TERTIA DIE.

In secundo Nocturno.

Sermo sancti Ambrosii Episcopi.  
Lib. 1. de Virginitate ante medium.

Lectio IV.

**E**GO licet laudationem non susceperim virginitatis, sed expressionem; ad rem tamen pertinere arbitror, ut quæ sit ei patria, quis auctor, appareat. Ac prius ubi sit patria, definiamus. Si enim ibi est patria, ubi genitale domicilium: in cælo profectò est patria castitatis: itaque hic advena, ibi incola est. Quid autem est castitas virginalis, nisi expers contagionis integritas? Atque ejus auctorem quem possumus existimare, nisi immaculatum Dei Filium, cujus caro non vidit corruptionem, divinitas non est expers contagionem?

**R.** Propter veritatem. 261.

Lectio V.

**V**idete igitur, quanta virginitatis merita sint. Christus ante virginem, Christus ex virgine; à Patre quidem natus ante sæcula, sed ex virgine natus ob sæcula. Illud naturæ suæ, hoc nostræ utilitatis est. Illud erat semper, hoc esse voluit. Spectate aliud virginitatis meritum, Christus virgo virginis sponsus, & si dici potest, Christus virginæ castitatis. Virginitas enim Christi, non virginitatis est Christus. Virgo est ergo quæ nupsit, virgo quæ nos suo utero portavit, virgo quæ genuit, virgo quæ proprio lacte nutrit. Sed jam à matre descendamus ad filias.

**R.** Dilexisti. 261.

Lectio VI.

**D**E virginibus, inquit Apostolus, præceptum Domini non habeo, consilium autem do. Si Doctor Gentium non habuit, habere quis potuit? Et præceptum quidem non habuit, sed habuit exemplum: non enim imperari potest virginitas, sed optari. Nam quæ supra nos sunt, in voto magis quam in magisterio sunt. Sed volo vos, inquit, sine sollicitudine esse: nam qui sine uxore est, sollicitus est quæ Domini sunt, quomodo placeat Deo. Et virgo cogitat quæ Domini sunt, ut sit sancta corpore & spiritu. Non ergo quidem dissuadeo matrimonium, sed virginitatis attexo beneficium. **R.** Afferentur. *ut sup.*

QUAR-

QUARTA DIE.

In secundo Nocturno.

Sermo sancti Maximi Episcopi.

In natali S. Agnetis,

Lectione iv.

**C**um in toto mundo virgineus flos Mariæ immarcescibiles coronas innectat, & sceptrigeram pudoris aulam immaculato conservet affectu, eoque integritas perseveravit ad palmam, ut in puellis trophæum sanctitatis arriperet, & per vestigia matris virginis ad coelestem thalamum perveniret. O quàm imitabile virginibus, virgo **N.** tu amoris tradidisti exemplum! ô quàm sanctum pectoribus dandū virginibus tribuisti responsum, contemnendo mundi divitias, execrando carnis concupiscentias, & solam Christi pulchritudinem adamando! Accedite ad puellam puellæ, & discite quales in pectore suo circa amorem Christi flammam accendit. Discite virgines Christi amorem in ea ferventem, & omnes mundi divitias velut stercora recusantem.

**R.** Propter. 261. **Lectione v.**

**I**deo enim Sanctorum per litteras traduntur exempla, ut unusquisque pro qualitate sexus, modum sui propositi teneat; & sicut per virginem virgines, ita per conjugem conjuges vincere sæculum pro Christi amore studeant; ac repugnatione animi, mundi dulcia recusantes, & ejus non recusantes austeram, ad delectationes perpetuas, & ad gaudia æterna pertingant. Hæc dicen-

tes, non vituperamus conjugum casta commercia, sed virginum perseverantiam adornamus. Non enim virginitas malis rebus superponenda est, sed est rebus optimis præferenda. Quæ enim mundis mundior, & sanctis est sanctior, non indiget malarum rerum vituperatione laudari.

**R.** Dilexisti. 261. **Lectione vi.**

**V**eni jam virgo ad thalamum quem quæsisisti, ut sponsam te virginitas immaculata comprobet Christi. Felix caterva virginum, quibus studium est tuæ sequi confessionis vestigia. Habebunt enim tecum coronam in cælo, quæ tecum superaverunt inimicum in mundo. Nam sicut tibi vestigia prosequenti participatio æternæ remunerationis apparuit; ita eis te imitantibus æterna credimus gaudia non neganda. Itaque ô splendida Christo Dei Filio, & omnibus Angelis atque Archangelis grata, ut nostri meminisse digneris, quibus possumus precibus exoramus: ut nobis ille tribuat indulgentiam, qui tibi tuorum omnium laborum tradidit palmam.

**R.** Afferentur. 262.

QUINTA DIE.

In secundo Nocturno.

Tres Lectiones S. Cypriani. Nunc nobis ad Virgines, &c. ut in Breviario de Communi Virginum. Quid si lectæ sunt in die Festo, sumantur Lect. Bedæ. Quam laxo sinu, ex secunda die, supra 261.

SEXTA DIE.

In secundo Nocturno.

Sermo sancti Augustini Episcopi.

De sancta Virginitate, cap. 2.

Lectione



**C**UM universa Ecclesia virgo sit, desponsata uni viro Christo, sicut dicit Apostolus, quanto digna sunt honore membra ejus, quæ hoc custodiunt, etiam in ipsa carne, quod tota custodit in fide, quæ imitatur matrem viri, & Domini sui? Nam Ecclesia quoque & virgo & mater est. Cujus enim integritati consulimus, si virgo non est? aut cujus prolem alloquimur, si mater non est? Maria corporaliter caput hujus corporis peperit: Ecclesia spiritualiter membra illius capitis parit. In utraque virginitas fecunditatem non impedit, in utraque fecunditas virginitatem non adimit.

*R.* Propter. 261. *Lectio v. Cap. 13.*

**V**irginalis autem integritas, & per piam continentiam ab omni concubitu immunitas, Angelica portio est, & in carne corruptibili incorruptionis perpetuæ meditatio. Cedat huic omnis fecunditas carnis, omnis pudicitia conjugalis. Illa non est in potestate, illa non est in æternitate. Fecunditatem carnalem non habet liberum arbitrium, pudicitiam conjugalem non habet cælum. Profectò habebunt magnum aliquid præter cæteros in illa communi immortalitate, qui habent aliquid jam non carnis in carne.

*R.* Dilexisti. 261.

*Lectio vi. Cap. 27.*

**S**equimini Agnum quocunque ierit, scripsit ille de vobis.

Quò ire putamus hunc Agnum? quò nemo eum sequi vel audeat, vel valeat, nisi vos virgines. Quò putamus eum ire? in quos saltus & prata? ubi, credo, sunt grandia gaudia; nec gaudia, qualia in ipso regno Dei cæteris non virginibus erunt, sed à cæterorum omnium gaudiorum sorte distincta. Gaudium virginum Christi, est de Christo, in Christo, cum Christo, post Christum, per Christum, propter Christum. Gaudia propria virginum Christi non sunt eadem non virginum, quamvis Christi; nam sunt aliis alia, sed nullis talia. Ite in hæc, sequimini Agnum, quia & Agni caro utique virgo. Sequimini virginitate cordis & carnis, quocunque ierit. Quid est eum sequi, nisi imitari? *R.* Afferentur. 262.

### SEPTIMA DIE.

*In secundo Nocturno.*

Sermo sancti Fulgentii Episcopi.

*Epist. 3. ad Probam. Cap. 4. Lectio 11.*

**T**Am magnum Deus voluit esse bonum virginitatis, ut illud non aliundè, sed ex vocabulo dignaretur nominare virtutis. Virginis itaque si quis velit diligenter considerare vocabulum, ex virtutis inveniet nomine derivatū. Virgo enim dicitur, quasi virago. Viraginem verò Scriptura sancta non ob aliud vocatam dicit, nisi quia de viro sumpta est. Dixitque Adam: Hoc nunc os ex ossibus meis, & caro de carne mea: hæc vocabitur virago, quoniam de viro sumpta est. Itaque cum

cum virginis nomen ex nomine viri descenderit, quis dubitet, quod vir à virtute vocatus sit?

*R.* Propter. 261. *Lectio v.*

**E**T quia sicut Paulus docet, illa omnia in figura facta sunt nostri, profecto in illa virgine, quæ ex viri fiebat costa, futura jam tunc præfigurabatur Ecclesia, quæ verè de viro sumpta, & de quo sumpta, illi conjuncta inde habet in veritate virtutem, unde habet verum viraginis nomen. Propter quod hanc viraginem, idest, Virginem, quæ de viro sumpta est, non solum virginis, sed etiam viri nomine Paulus non dubitat appellare. Ait enim fidelibus: Despondi enim vos uni viro virginem castam exhibere Christo; Christus est quippe vir, de quo hæc virgo sumpta est.

*R.* Dilexisti. 261. *Lectio vi.*

**T**Ypicè itaque à viro dicitur Virginis vocabulum, quia nomen à Christo dicitur Christianum. Christus enim Dei virtus est, & Dei sapientia, ex quo est Ecclesia, quæ virgo in fide & charitate persistens, & sapientiam possidet, & virtutem. Quæ cum in diversis membris suis habeat donationes, secundum gratiam quæ data est ei, differentes, majorem tamen gratiam donationis in illis membris accepit, in quibus ita spiritualiter virgo dicitur, ut etiam corporeæ virginittatis integritate potiatur. In his enim in quibus sic fidem custo-

Octav. Rom.

dit rectam, ut etiam carnem ab omni concubitu reservet intactam, quantò plenior habet virginitatem, tantò plenius & perfectius ejusdem virginittatis possidet nomen. *R.* Afferentur. 262.

IN DIE OCTAVA.

*In secundo Nocturno.*

*De Epist. S. Hieronymi Presb. ad Eustochium. De custod. Virginitatis circa med. Lectio vii.*

**D**E virginibus, inquit Apostolus, præceptum Domini non habeo: Cur? quia & ipse ut esset virgo, non fuit imperii, sed propriæ voluntatis. Neque enim audiendi sunt, qui eum uxorem habuisse confingunt; cum de continentia differens, & suadens perpetuam castitatem, intulerit: Volo autem omnes esse sicut me ipsum. Et infra: Dico autem innuptis & viduis: Bonum est illis, si sic permaneant sicut & ego. Quare ergo non habet Domini de virginitate præceptum? quia majoris est mercedis, quod non cogitur, & offertur: quia si fuisset virginitas imperata, nuptiæ videbantur ablatae; & durissimum erat contra naturam cogere, Angelorumque vitam ab hominibus extorquere.

*R.* Propter. 261. *Lectio vii.*

**A**Lia fuit in veteri lege felicitas. Ibi dicitur: Beatus, qui habet semen in Sion, & domesticos in Jerusalem: & Maledicta sterilis quæ non pariebat. Et: Filii tui sicut novellæ olivarum in circuitu mensæ tuæ. Vacuus erat orbis, & ut de typicis taceam,

Z

sola



sola erat benedictio liberorum. Propterea & Abraham jam senex Cethuræ copulatur, & Jacob mandragoris redimitur, & conclusam vulvam in Ecclesiæ figuram Rachel conqueritur. Paulatim verò increscente segere, messor immisus est. Virgo Elias, Eliseus virgo, virgines multi filii Prophetarum. Jeremiæ dicitur: Et tu ne accipias uxorem. Sanctificatus in utero, captivitate propinqua, uxorem prohibetur accipere. Aliis verbis idipsum Apostolus loquitur: Existimo hoc bonum esse propter instantem necessitatem. Quæ est ista necessitas, quæ aufert gaudia nuptiarum? Tempus brevium est, in proximo est Nabuchodonosor.

**R.** Dilexisti. 261. **Lectio vi.**

**I**nveniebatur ergo, ut diximus, in viris tantum hoc continentia bonum, & in doloribus jugiter Heva parturiebat. Postquam verò virgo concepit in utero, & peperit nobis puerum, cujus principatus in humeros ejus, Deum, fortem, patrem futuri sæculi; soluta maledictio est. Mors per Hevam, vita per Mariam. Ideoque & ditius virginitatis donum fluxit in fæminas, quia cœpit à fæmina. Statim ut Filius Dei ingressus est super terram, novam sibi familiam instituit, ut qui ab Angelis adorabatur in cœlo, haberet Angelos & in terris. Tunc Holofernis caput Judith continens amputavit: tunc Aman, qui

interpretatur iniquitas, suo combustus est igni: tunc primum auditum est: Quæ non est nupta, cogitat quæ sunt Domini, ut sit sancta corpore & spiritu.

**R.** Afferentur. 262.

## INFRA OCTAVAM VIRGINUM.

Homilia in Evangel. Matth. cap. 25. Simile erit regnum cœlorum decem virginibus &c. In die Testis habetur Homilia S. Gregorii. Sapere vos fratres, &c. in breviano hoc eodem Communium.

### SECUNDA DIE.

In tertio Nocturno.

Lectio sancti Evangelii secundum Matthæum.

Lectio vii. Cap. 25.

**I**n illo tempore: Dixit Jesus discipulis suis parabolam hanc: Simile erit regnum cœlorum decem virginibus, quæ accipientes lampades suas, exierunt obviam sponso & sponsæ. Et reliqua.

De Homilia sancti Gregorii Papæ.

Homilia 12. in Evangelia.

**N**otandum verò, quòd omnes lampades habent, sed omnes oleum non habent: quia plerumque bona in se opera cum electis & reprobi ostendunt; sed soli ad sponsum cum oleo veniant, qui de his quæ foris egerint, intus gloriam requirunt. Unde per Psalmistam quoque de sancta electorum Ecclesia dicitur: Omnis gloria ejus filiæ regis ab intus. Dormitaverunt omnes, & dormierunt. Dormire, mori est: ante somnum verò dormire, est ante mortem à salute languescere: quia per pondus ægritudinis pervenitur ad somnum mortis.

**R.** Hæc est. 273. **Lectio viii.**

Quid

**Q**uid est autem quod fatuæ à prudentibus oleum petunt, nisi quod in adventu Judicis, cum se intus vacuas invenerint, testimonium foris quærunt? Ac si à sua fiducia deceptæ proximis dicant: Quia nos quasi sine opere repelli conspiciatis, dicite de nostris operibus quod vidistis. Unde & prudentes per increpationem subdunt: Ite potius ad vendentes, & emite vobis. Venditores quippe olei, adulatores sunt. De quo profectò oleo Psalmista dicit: Oleum autem peccatoris non impinguet caput meum.

**R.** Media. 273. **Lectio ix.**

**Q**ui sapere in cordis palato possit, quid admirationis habeat, quod dicitur, Venit sponsus; quid dulcedinis, Intraverunt cum eo ad nuptias; Quid amaritudinis, Et clausa est janua. Pensate, fratres charissimi, ante conspectum tanti Judicis, quis in illo die terror erit, quando jam in pœna remedium non erit; quanta verò tunc erit electorum lætitia, qui de ejus merentur visione gaudere, de cujus conspectu vident & elementa omnia contremiscere? cum eo simul ad nuptias intrare, qui & in sponsi nuptiis gaudent, & tamen ipsi sunt sponsa: quia in illo æterni regni thalamo visionis nostræ Deus conjungitur.

**Te Deum laudamus.**

### TERTIA DIE.

In tertio No. 9.  
**Lectio S. Evangelii secundum Matthæum.**

**Lectio vii. Cap. 25.**

**I**n illo tempore: Dixit Jesus discipulis suis parabolam hanc: Simile erit regnum cœlorum decem virginibus, quæ accipientes lampades suas, exierunt obviam sponso & sponsæ. Et reliqua.

**Homilia sancti Hieronymi Presbyteri.**

**Lib. 4. in ill. cap. 25.**

**I**ncipit parabolam quidam simpliciter in virginibus interpretantur; quarum aliæ, juxta Apostolum, & corpore & mente sunt virgines; aliæ virginitatem tantum corporum reservantes, vel cætera opera non habent proposito suo similia; vel parentum custodia reservatæ, nihilominus mente nupserunt. Sed mihi videtur ex superioribus alius sensus esse, qui dicitur; & non ad virginalia corpora, sed ad omne hominum genus comparatio pertinere. **R.** Hæc est. 273.

**Petit. parca.**

**Lectio vii.**

**Q**ui idcirco omnes virgines appellantur, quia gloriantur in unius Dei notitia, & mens eorum idololatriæ turbine non constupratur. Oleum habent Virgines, quæ juxta fidem & operibus adornantur. Non habent oleum, quæ videntur simili quidem fide Dominum confiteri, sed virtutū opera negligunt. Possumus quinque virgines sapientes & stultas, quinque sensus interpretari, quorum alii festinant ad cœlestia, & superna desiderant; alii terrenis fœcibus inhiantes fomenta non habent veritatis, quibus sua corda illuminent. **R.** Media. 273.

**Z 2**

**Lectio**



**D**icamus aliquid, quod forſitan lectori utile ſit. Traditio Judæorum eſt, Chriſtum media nocte venturum in ſimilitudinem Ægyptii temporis, quando Paſcha celebratum eſt, & exterminator venit: unde reor & traditionem Apoſtolicam permaſſiſſe, ut in die Vigiliarum Paſchæ ante noctis dimidium, populum dimittere non liceat, expectantes adventum Chriſti: & poſtquam illud tempus tranſierit, ſecuritate præſumpta, feſtum cunctos agere diem. Tunc ſurrexerunt omnes virgines illæ. Quæ lampades ſuas queruntur extingui, oſtendunt eas ex parte lucere: & tamen non habent lumen indeficiens, nec opera perpetua. **T**e Deum laudamus.

#### QUARTA DIE.

In tertio Noſum.  
Lectio S. Evangelii ſecundam Mattheum.

**I**n illo tempore: Dixit Jeſus diſcipulis ſuis parabolam hanc: Simile erit regnum cœlorum decem virginibus, quæ accipientes lampades ſuas, exierunt obviam ſponſo & ſponſæ. Et reliqua.

Homilia ſancti Joannis Chryſoſtomi.

Homil. 79. in Mattheum poſt inſa.

**Q**uam ob cauſam in perſona virginum hanc parabolam proferat, nec qualemcumque perſonam ſine discrimine ſubjicit? Magna quædam de virginitate diſſeruerat, dicens: Sunt eunuchi, qui ſeipſos caſtraverunt propter regnum cœlorum: &, Qui poteſt

capere, capiat. Nec ignorabat, de virginitate magnam eſſe vulgò exiſtimationem, quippe cum ſit ea res naturâ ſublimis: quod inde patet, quia neque in veteri Teſtamento à priſcis illis ſanctiſque viris culta fuit, & in novo nulla legis neceſſitate jubetur: non enim id imperavit, ſed fidelium voluntati permiſit. Unde & Paulus ait: De virginibus autem præceptum Domini non habeo: & laudo quidem eum, qui hoc ſectatur inſtitutum, nolentem autem non cogo, neque eam rem præceptum facio.

ix. Hæc eſt. 273. Lectio viii.

**Q**uoniam igitur & magna res erat, ac de ea apud multos magna erat exiſtimatio; ne quis eâ perfectâ ſe totum perfeciſſe putaret, ac cætera negligeret, hanc parabolam poſuit, ut oſtenderet, virginitatem, quamvis cætera habeat, ſi miſericordiæ bonis caruerit cum fornicatoribus ejici. Ac meritò quidem inhumanum ac miſericordia carentem cum illis collocat. Fornicator enim corporum, iſtæ verò pecuniarum cupiditate vincuntur. Non eſt autem corporum & pecuniæ par cupiditas: ſed acrior multò atq; vehementior illa corporū eſt. Quantò igitur cum imbecilliore luſtantur, tantò minus venia dignæ ſunt, ſi vincantur. Idcirco etiam fatuas appellavit: quoniam majori certamine ſuperato, in faciliore totum perdiderunt.

Me-

Media. 273. **Lectio ix.**

**L**ampades autem hoc loco illud ipsum virginitatis donum appellat, & sanctimonie puritatem: oleum verò benignitatem, eleemosynam, impensum indigentibus auxilium. Tardante autem sponso, dormitaverunt omnes, & dormierunt. Non parvum temporis rursus spatium interjectum ostendit, ut discipulos regnum ipsius mox futurum expectantes, ab ea opinione deduceret: id enim illi sperabant: quapropter crebrò ab huiusmodi eos spe revocat. Ad hoc, illud quoque indicat, somnum quemdam esse mortem. Dormierunt, inquit; media autem nocte clamor factus est: vel, ut in eadem parabola persistat: vel rursus ostendit, in nocte futuram esse resurrectionem. Clamorem etiam Paulus commemorat, dicens: In iussu, in voce Archangeli, in novissima tuba descendet de cœlo. **Te Deum.**

**QUINTA DIE.**

In tertio Nocturno.

**Lectio S. Evangelii secundum Matthæum.**

**Lectio vii. Cap. 25.**

**I**n illo tempore: Dixit Jesus discipulis suis parabolam hanc: Simile erit regnum cœlorum decem virginibus, quæ accipientes lampades suas, exierunt obviam sponso & sponsæ. Et reliqua.

De Homilia S. Joannis Chrysostomi.

Unde super

**P**ost ingentes labores, post incredibiles sudores, & acerrimas pugnas, post trophæa, quæ

de naturæ rabie statuerunt, resurgunt cum dedecore, & lampadibus earum extinctis, terram aspicientes recedunt. Nihil sanè tenebrosius est, quàm virginitas oleo carens: unde sic vulgò multi immisericordes tenebrosos solent appellare. Quid igitur ex virginitate lucratae sunt, quæ nec sponsum quidem viderunt, nec saltem ad pulsandum usque pervenerunt, sed terribile illud verbum audivêre: Abite, nescio vos?

**Media. 273. Lectio viii.**

**Q**uod cum ipse dixerit, nihil aliud quàm gehenna, & intolerabilis cruciatus relinquitur: imò verò etiam, gehenna, istud verbum gravius est: hoc verbum operantibus etiam iniquitatem dixit: Vigilate, quia nescitis diem, neque horam: crebrò id repetit, ut ignorantiam exitus ab hac vita utilem esse ostendat. Ubi sunt ergo qui per totam vitam desidia torpescunt, & quando à nobis admonentur, respondere non dubitant, omnia se pauperibus moriendi tempore relicturos.

**Media. 273. Lectio ix.**

**A**udiant hæc verba, & emendent se: multi enim abeundi tempus expectantes, ita repente rapti sunt, ut nec injungere suis quidquam potuerint. Sed hæc quidem parabola ejus eleemosynæ gratia, quæ cum pecunia conficitur, dicta est. Cur autem hæc parabola sponsum adducit? Ut videas quantum vir-

**Z 3** ginibus



ginibus Christus afficitur iis, quæ sua pauperibus erogant: hæc enim & vera virginitas est. Nam & Paulus huic rei hanc descriptionem attribuit, dicens: Innupta sollicita est de iis, quæ Domini sunt, ut sit sancta corpore & spiritu. **Te Deum laudamus,**

### SEXTA DIE.

*In textis Nocturnis.*

Lectio S. Evangelii secundum Mattheum.

**I**n illo tempore: Dixit Jesus discipulis suis parabolam hanc: Simile erit regnum cælorum decem virginibus, quæ accipientes lampades suas, exierunt obviam sponso & sponsæ. Et reliqua.

Homilia sancti Augustini Episcopi.

*Super illud: de Virginitate: cap. 2.*

**I**ntelligamus, charissimi, ad omnes nos, id est, ad universam omnino Ecclesiam istam pertinere parabolam, non ad solos præpositos, nec ad solas plebes, sed prorsus ad omnes. Quinque istæ, & quinque virgines illæ, omnes omnino sunt animæ Christianorum: sed, ut dicamus vobis, quod Deo inspirante sentimus, non qualescumque animæ; sed tales animæ, quæ habent catholicam fidem, & habere videntur bona opera in Ecclesia Dei; tamen ex ipsis quinque sunt prudentes, & quinque fatuæ.

*Hæc est. 273.*

*Lectio VIII.*

**Q**uare ergo appellatæ sunt quinque, & quare virgines, prius videamus. Omnis anima in corpore, ideò quinario numero

censetur, quia quinque sensibus utitur. Qui ergo se abstinere ab illicito visu, ab illicito auditu, ab illicito odoratu, ab illicito gustatu, ab illicito tactu, propter ipsam integritatem, virginis nomen accipit. Sed si bonum est abstinere ab illicitis sentiendi motibus, & ideò unaquæque anima Christiana virginis nomen accipit; quare quinque admittuntur, quinque autem repelluntur?

*Media. 273.*

*Lectio IX.*

**E**t virgines sunt, & repelluntur. Parum est, quia virgines sunt, & lampades habent, virgines propter abstinentiam ab illicitis sensibus, lampades habent propter opera bona; de quibus operibus Dominus dicit: Luceant opera vestra coram hominibus. Item discipulis dicit: Sint lumbi vestri præcincti, & lucernæ ardentes in manibus vestris. In lumbis accinctis virginitas, in lucernis ardentibus opera bona. Si ergo ab illicitis abstinentia bona est, unde virginitas nomen accepit; & opera bona laudabilia sunt, quæ significantur lampadibus; quare quinque admittuntur, & quinque repelluntur.

**Te Deum laudamus.**

### SEPTIMA DIE.

*In textis Nocturnis.*

Lectio S. Evangelii secundum Mattheum.

*Lectio VII.*

**I**n illo tempore: Dixit Jesus discipulis suis parabolam hanc: Simile erit regnum cælorum decem virginibus, quæ accipientes lam-

lampades suas, exierunt obviam sponso & sponsæ. Et reliqua.

*De Homilia sancti Augustini Episcopi.*

*Intra, cap. 4.*

**A**lias dixit prudentes, alias stultas. Unde intuemur? unde discernimus? De oleo. Aliquid magnū significat oleum, & valde magnum, Putas non charitas est? Quærendo dicimus, non sententiam præcipitamus. Unde mihi videatur per oleum charitas significari, dicam vobis. Apostolus dicit: Adhuc supereminentiorem vobis viam demonstro. Si linguis hominum loquar & Angelorum, charitatem autem non habeam, factus sum ærumentum sonans, aut cymbalum tinniens. Ipsa est supereminens via, id est, charitas, quæ merito oleo significatur: omnibus enim humoribus oleum supereminet. **R.** Hæc est. 273.

*Cap. 5.*

*Lectio viii.*

**Q**uid ergo, fratres? Jam discipulamur de quinque; Virginibus prudentibus, & quinque; fatuis. Voluerunt obviam ire sponso. Quid est, ire obviam sponso? Corde ire, expectare ejus adventū. Sed ille tardabat. Dum tardat ille, dormierunt omnes. Quid est somnus iste? Ne fortè tardantesponso, quoniam abundat iniquitas, refrigerat charitas multorum? Siccine intellecturi sumus istum somnū? Non mihi placet: quia sunt ibi prudentes. Et utique quando dixit Dominus, Refrigeret charitas multorum, subiecit, & ait: Qui autem perseveraverit usque in

finem, hic salvus erit. Non ergo eis obrepfit frigus charitatis, non in eis refriguit charitas, sed fervet usque in finem.

**R.** Media. 273.

*Lectio ix.*

**E**t alius somnus, quem nemo evadit. Non recordamini Apostolum dicentem: De dormientibus autem nolo vos ignorare, fratres: id est, de his qui mortui sunt. Fatua sit virgo, prudens sit virgo, somnum mortis omnes patiuntur. Ad novissimā tubam surgent omnes. Prudentes autem illæ tulerunt oleum secum in vasibus suis: stultæ verò illæ non tulerunt oleum secum. Ibi oleum, magnum oleum. De dono Dei est hoc oleum. Tu ergo tecum porta, intrus porta. Ubi videt Deus, ibi porta testimonium conscientie tuæ: qui autem ambulat ad testimonium alienum, oleum non portat secum. **Te Deum.**

## IN DIE OCTAVA

*In nocte Nocturno.*

*Lectio S. Evangelii secundum Matthæum.*

*Lectio vii.*

*Cap. 13.*

**I**n illo tempore: Dixit Jesus discipulis suis parabolam hanc: Simile erit regnum cœlorum decem virginibus, quæ accipientes lampades suas, exierunt obviam sponso & sponsæ. Et reliqua.

*De Homilia sancti Augustini Episcopi.*

*Unde supra, cap. 2.*

**I**ntendat itaque charitas vestra, Sapientium lampades ardebant de oleo æterno, de conscientie securitate, de interiore gloria de intima charitate, Ardebant ta-



men & illarum fatuarum. Quare tunc ardebant? quia non deerant laudes hominum. Postea verò quàm surrexerunt, id est, In resurrectione à mortuis, coeperunt aptare lampades suas, id est, parare Deo operum suorum reddere rationem. Et quia tunc nemo est qui laudet, omnis homo causæ suæ vacat: non erant qui oleum venderent, coeperunt deficere lampades. **R.** Hæc est. 273.

Circ. frat. cap. 10. Lectio viii.

**C**lausum est ostium. Et quid illis dictum est, Non novi vos? Non illas novit, qui omnia novit? Quid ergo est, Non novi vos? Improbo vos, reprobo vos: in arte mea non vos agnosco: ars mea nescit vitia. Hoc est autem magnum & nescit vitia, & judicat vitia: nescit faciendo; judicat arguendo. Sic ergo non novi vos. Ierunt, intraverunt, quinque prudentes. Sint in vobis quinque prudentes, ad istam prudentiam quinary numeri pertinentes. Veniet enim hora, & quando nescimus, veniet. Sic clausit Evangelium: Vigilate, quia nescitis diem, neque horam.

**R.** Media. 273. **Lectio ix.**

**C**orde vigila, fide vigila, spe vigila, charitate vigila, operibus vigila: & quando corpore dormieris, veniet tempus ut surgas. Cum autem surrexeris, præpara lampades. Tunc non extinguantur, tunc in interiore conscientia oleo vegetentur: tunc

sponsus ille incorporeis nexibus amplectatur, tunc te introducat in domum, ubi numquam dormias, ubi numquam possit tua lampas extinguvi. Hodie verò laboramus, & lampades nostræ inter ventos sæculi hujus tentationesque fluctuant: sed ardeat in rubore flamma nostra, ut ventus tentationis augeat ignem potius, quàm extingvat. **Te Deum.**

Infra Octavam Virginum in tertio Nocturno, habentur etiam Homil. in Evangel. Mat. in. 13. Simile est regnum cælorum thesauro, &c. petita in Communi Octava Martyrum non Virginum, in ill. 284.

Sed secunda die infra Oct. si virgo, de qua fit O. huius, non fit Martyr: vel si illa, plures Martyres, omnis octava & non lectio ne ibi petitis, legantur duæ alia, quæ tunc sequuntur.

## INFRA OCTAVAM VIRGINUM.

Homilia in Evangel. Mat. cap. 10. Accesserunt ad Jesum Pharisei, &c. in ill. 285. habetur Hom. S. Joannis Chrysostomi. Dominus noster, quia &c. in Breviario, de Communi Virginum.

## SECUNDA DIE.

In tertio Nocturno.

Lectio S. Evangelii secundum Mattheum.

Lectio viii. Cap. 19.

**I**n illo tempore: Accesserunt ad Jesum Pharisei tentantes eum, & dicentes: Si licet homini dimittere uxorem suam, quicumque ex causa? Et reliqua.

De Homilia sancti Joannis Chrysostomi.

Hom. in Mat. 19. p. 10. 11.

**N**on omnes capiunt verbum istud, sed quibus datum est. Non dixit, Non omnes possunt, sed, Non omnes capiunt; id est Omnes quidē capere possunt, sed non tamen omnes capere volunt.

Palma

Palma proposita est. Qui concupiscit gloriam, non cogitat de labore. Nemo vinceret, si omnes periculum pugnae timerent. Ex eo quod quidam non possunt, & a proposito continentiae cadunt, non debemus circa virtutem castitatis fieri pigriores. Si enim quidam in pugna cadentes non exanimant ceteros; rem non applicant pugnae, sed homini: quanto magis nos cadentium negligentiae imputare debemus, non difficultati virginitatis?

**R.** Hæc est virgo sapiens, quam Dominus vigilantem invenit, quæ acceptis lampadibus sumpsit secum oleum: \* Et veniente Domino, introivit cum eo ad nuptias. \* Media nocte clamor factus est, Ecce sponsus venit, exite obviam ei. Et veniente. *Lectione viii.*

**Q**uod autem dicit, Quibus datum est; non hoc significat, quoniam quibusdam datur, quibusdam non datur; sed illud ostendit, quia nisi auxilium gratiae accipiamus, nihil ex nobis valeamus. Quoniam autem volentibus gratia non denegatur, in Evangelio Dominus dicit: Petite, & dabitur vobis, quærite, & invenietis; pulsate, & aperietur vobis. Debet autem voluntas præcedere, & sic sequitur gratia. Nam nec gratia sine voluntate aliquid operatur, nec voluntas sine gratia potest. Nam & terra non germinat, nisi pluvias susceperit, nec pluvia fructificat sine terra.

**R.** Media nocte clamor factus est: \* Ecce sponsus venit, exite obviam ei. \* Prudentes virgines aptate vestras lampades. Ecce sponsus. Gloria Patri. Ecce sponsus. *Lectione ix.*

**S**i ex quacumque causa contigerit homini uxorem non habere, an continentiae habebit mercedem? Non semper. Sicut enim peccatum sine voluntate opus non facit; ita justitia ex opere non consummatur, nisi voluntas adfuerit. Multi enim corpore quidem castitati student, adulterium autem voluntate committunt. Illa est gloriosa continentia, non quam transgredi non potest necessitas debilitatis corporis, sed quam complectitur voluntas sancti propositi. Ideo dicit: Sunt eunuchi qui sic nascuntur, sunt eunuchi qui ab hominibus fiunt: sed illos tenet necessitas; hunc autem tertium coronat voluntas. **T**e Deum laudamus.

### TERTIA DIE.

*In tertio Nocturno.*  
*Lectione S. Evangelii secundum Matthæum.*

*Lectione vii. Cap. 19.*

**I**n illo tempore: Accesserunt ad Jesum Pharisei tentantes eum, & dicentes: Si licet homini dimittere uxorem suam, quacumque ex causa? Et reliqua.

*Homilia sancti Hieronymi Presbyteri.*

*Lib. 7. in Matth. cap. 19.*

**P**harisæorum. Scribarumque factio interrogat Dominum, utrum liceat homini dimittere uxorem suam qualibet ex causa:

ut



ut quasi cornuto teneant eum syllogismo, & quodcumque responderit, captioni pateat. Si dixerit, dimittendas esse uxores qualibet ex causa, & ducendas alias; pudicitiae prædicator sibi videbitur docere contraria. Si autem responderit, non omnem ob causam debere dimitti, quasi sacrilegii reus tenebitur, & adversus doctrinam Moyfi, ac per Moysen Dei, facere judicabitur.

**R.** Hæc est. 273. *Leitio viii.*

**I**gitur Dominus sic responsum temperat, ut decipulam eorum transeat, Scripturam sanctam adducens in testimonium, & ad naturalem legem, primamque Dei sententiam secundæ opponens, quæ non voluntate Dei, sed peccantium necessitate concessa est. Non legistis, quia qui fecit hominem ab initio, masculum & feminam fecit eos? Dicendo autem masculum & feminam, ostendit secunda vitanda conjugia. Non enim ait, masculum & feminas, quod ex priorum repudio quærebatur; sed masculum & feminam, ut unius conjugis confortia neckerentur.

**R.** Media. 273. *Leitio ix.*

**Q**uod dicit istiusmodi est: Numquid potest Deus sibi esse contrarius, ut aliud antè iusserit, & sententiam suam novo frangat imperio? Non ita sentendum est: sed Moyses, cum videret propter desiderium secundarum conjugum (quæ vel diti-

ores vel juniores essent) primas uxores interfici, aut malam vitam ducere, maluit indulgere discordiam, quàm odia & homicidia perseverare. Simulque considera, quòd non dixit, Permisit vobis Deus, sed Moyses; ut juxta Apostolum, consilium sit hominis, non imperium Dei. **Te Deum** laudamus.

#### QUARTA DIE.

*in tertio Nocturno.*

*Leitio 5. Evangelii secundum Mattheum.*

*Leitio vii. Cap. 10.*

**I**n illo tempore: Accesserunt ad Jesum Pharisei tentantes eum, & dicentes: Si licet homini dimittere uxorem suam, quacumque ex causa? Et reliqua.

*De Homilia sancti Hieronymi Presbyteri.*

*Unde supra.*

**G**rave pondus uxorum est, si excepta fornicationis causa eas dimittere non licet. Quid enim, si temulenta fuerit, si iracunda, si malis moribus, si luxuriosa, si vaga, si gulosa, si jurgatrix, si maledica, tenenda erit hujusmodi? Volumus nolumus, sustinenda est. Cum enim essemus liberi, voluntariè nos subjecimus servituti. Videntes ergo Apostoli grave uxorum jugum, proferunt motum animi sui, & dicunt: Si ita est causa hominis cum uxore, non expedit nubere. Quibus ille dixit: Non omnes capiunt verbum istud. **R.** Hæc est. 273.

*Leitio viii.*

**N**emo putet sub hoc verbo vel fatum, vel fortunam introduci, quòd hi sunt virgines, quibus

bus  
qui  
sed  
qui  
labo  
tenti  
et, &  
genu  
carna  
Tert  
runt  
& qu  
pter  
prom  
ribus  
tur.

**P**  
qui  
libid  
homi  
sophi  
rum  
mina  
simu  
tur  
lus  
coele  
pter  
Qui  
nalsq  
utrin  
citæ  
horta  
lites  
tis.

*Leitio*

bus à Deo datum sit, aut quos quidam ad hoc casus adduxerit: sed his datum est, qui petierunt, qui voluerunt, qui, ut acciperent, laboraverunt. Omni enim petenti dabitur, & quærens inveniet, & pulsanti aperietur. Triplex genus est Eunuchorum, duorum carnalium, & tertii spiritualis. Tertii sunt, qui seipsos castraverunt propter regnum cœlorum, & qui cum possint esse viri, propter Christum eunuchi fiunt: istis promittitur præmium, superioribus autem nihil omnino debetur. *Rz. Media. 273.*

*Lectio ix.*

**P**ossumus & aliter dicere: Eunuchi sunt ex matris utero, qui frigidioris naturæ sunt, nec libidinis appetentes: & alii, qui ab hominibus fiunt, quos aut Philosophi faciunt, aut propter idolorum cultum emolliuntur in fæminas; vel persuasione hæretica simulant castitatem, ut mentiantur religionis veritatem; sed nullus eorum consequitur regnum cœlorum, nisi se castraverit propter Christum. Unde subinfert: Qui potest capere, capiat; ut unusquisque consideret vires suas, utrum possit virginalia & pudicitiae implere præcepta. Quasi hortantis vox Domini est, & milites suos ad præmium concitantis. *Te Deum laudamus.*

## QUINTA DIE.

*In tertio Nocturno.*

*Lectio S. Evangelii secundum Matthæum.*

*Lectio vii. Cap. 19.*

**I**n illo tempore: Accesserunt ad Jesum Pharisei tentantes eum, & dicentes: Si licet homini dimittere uxorem suam, quacumque ex causa? Et reliqua.

*Homilia sancti Ambrosii Episcopi.*

*Lib. 3. de Virginibus, paulò ante med.*

**D**iscutiamus, utrum Christus integritatem docuerit, an repudiandam putaverit. Et sunt, inquit, spadones, qui seipsos castraverunt propter regnum cœlorum. Est ergo præclara militia, quæ regno cœlorum militat. Itaque jam tunc Dominus docuit, esse debere intemerata studia castitatis. Unde & Apostoli eam cæteris præeminere cernentes, Si ita est causa, ajunt, viri cum uxore, non expedit nubere. Quo dicto, & graviora judicârunt onera vinculi conjugalis, & veræ integritatis gratiam prætulerunt.

*Rz. Hæc est. 273. Lectio viii.*

**S**ed Dominus, qui sciret prædicandam omnibus integritatem, imitandam paucis, Non omnes, inquit, capiunt verbû istud, sed quibus datum est: hoc est, Non est communis plurimis & vulgaris integritas, nec pro infirmitate permittitur, sed pro virtute conceditur. Denique cum dixisset, Et sunt spadones, qui seipsos castraverunt propter regnum cœlorû; ut ostenderet hoc non mediocris esse virtutis; Qui potest, inquit, capere, capiat. Et ideò post hoc verbum offeruntur ad benedicendum, qui corruptelæ exper-

tes



tes, integritatis munus immaculata ætate servarent.

Media nocte. 273. *LECTIO IX.*

**E**st ergo etiam cœlesti voce probata virginitas, Dominicisque expetenda præceptis. Quo loco magisterium divinæ vocis imitemur. Nam, cum in superioribus conjugium memoraverit non esse solvendum, nisi ex causa fornicationis, in posterioribus integritatis gratiam donumque contexuit: ut doceret, non damandas esse nuptias, sed probandas; nuptiis tamen ipsis integritatis studia præferenda. **T**e Deum laudamus.

### SEXTA DIE.

*In tertio Nocturno.*

*LECTIO S. Evangelii secundum Matthæum.*

*LECTIO VII. Cap. 19.*

**I**n illo tempore: Accesserunt ad Jesum Pharisei tentantes eum, & dicentes: Si licet homini dimittere uxorem suam quacunque ex causa? Et reliqua.

*Homilia sancti Augustini Episcopi.*

*De sancta Virginitate, cap. 23.*

**Q**ui potest capere, capiat. Quid veracius, quid lucidius dici potuit? Christus, dicit, Veritas dicit, virtus & sapientia Dei dicit, eos, qui pio proposito ab uxore ducenda se continuerint, castrare seipsos propter regnum cœlorum: econtra, humana vanitas impia temeritate contendit, eos, qui hoc faciunt, præsentem tantummodò necessitatem molestiarum conjugialium devitare, in regno cœlorum ampliùs quidquã cæteris non habere. **R.** Hæc est. 273.

*Cap. 14. LECTIO VII.*

**D**e quibus autem spadonibus loquitur Deus per Isaiam Prophetam, quibus se dicit daturum in domo sua, & in muro suo locum nominatum, meliorem multo quàm filiorum atque filiarum; nisi de iis, qui seipsos castrant propter regnum cœlorum? Ne quis nimium carnalis existimaret in his verbis aliquid temporale sperandum, continuo subiicit: Nomen æternum dabo eis, nec umquam deerit. Tamquam diceret: Quid tergiversaris impia cæcitas? quid serenitati veritatis nebulas tuæ perversitatis offundis? quid in tanta scripturarum luce tenebras, unde insidieris, inquiris? Quid temporalem tantummodò utilitatem promittis continentibus sanctis? Nomen æternum dabo eis.

Media nocte. 273. *LECTIO IX.*

**E**t si fortè hic ipsum æternum pro diuturno conaris accipere, addo, accumulo, inculco, Nec umquam deerit. Quid quæris ampliùs? Æternum hoc nomen, quidquid illud est, spadonibus Dei, quod utique gloriam quamdam propriam excellentemque significat, non erit commune cum multis, quamvis in eodem regno, & in eadem domo constitutis. Nam ideò fortassis & nomen dictum est, quòd eos, quibus datur, distinguit à cæteris. **T**e Deum laudamus.

### SEPTIMA DIE.

*In tertio Nocturno.*

*LECTIO*

Leſtio S. Evangelii ſecundum Matthæum.

Leſtio vii. Cap. 19.

**I**N illo tempore: Acceſſerunt ad Jeſum Phariſæi tentantes eum, & dicentes: Si licet homini dimittere uxorem ſuam, quacumque ex cauſa? Et reliqua.

De Homilia ſancti Auguſtini Epifcopi.

Unde ſuprà, cap. 27.

**P**ergite itaque ſancti Dei pueri ac puellæ, mares ac fæminæ, cœlibes ac nuptæ; pergite perſeveranter in finem. Laudate Dominum dulcius, quem cogitatis uberiùs; ſperate feliciùs, cui ſervitis inſtantiùs: amate ardentius, cui placetis attentius. Lumbis accinctis & lucernis ardentibus expectate Dominum, quando veniat à nuptiis. Vos afferetis ad nuptias Agni canticum novum, quod cantabitis citharis veſtris, quale nemo poterit dicere, niſi vos. Sic enim vos vidit in Apocalypſi quidam præ cæteris dilectus Agno, qui diſcumbere ſuper pectus ejus ſolitus erat, & biberat & eruſtabat mirabilia ſuper cœleſtia Dei verbum.

**H**æc eſt. 273.

Cap. 19. Leſtio viii.

**V**os Agnum ſequimini tenendo perſeveranter quod voviſtis, ardentè facite cum poteſtis, ne virginitatis bonum à vobis pereat, cum facere nihil poteſtis ut redeat. Videbit vos cætera multitudo fidelium, quæ Agnum ad hoc ſequi non poteſt, videbit, nec invidet: & collætando vobis, quod in ſe non habet, habebit

Octav. Rom.

in vobis. Præſumite itaque, ſidite, roboramini, permanete: qui vovetis & redditis Domino Deo veſtro vota perpetuæ continentia, non propter præſens ſæculum, ſed propter regnum cœlorum.

**R.** Media nocte. 273.

Cap. 30. Leſtio ix.

**V**os etiam, qui hoc nondum voviſtis, qui poteſtis capere, capite: perſeveranter currite, ut comprehendatis. Tollite hoſtias quiſque ſuas, & introite in atria Domini, non ex neceſſitate, ſed poteſtatem habentes veſtræ voluntatis. Cogitate quidquid illud eſt, in muro ejus locum nominatum meliorem multò quàm filiorum atque filiarum. Cogitate illic nomen æternum. Quis explicat quale nomen erit? Quidquid tamen erit, æternum erit. Hoc credendo, & ſperando, & amando, potuiſtis conjugia non devitare prohibita, ſed transvolare conceſſa. **T**e Deum.

## IN DIE OCTAVA.

In tertio Nocturno.

Leſtio S. Evangelii ſecundum Matthæum.

Leſtio vii. Cap. 19.

**I**N illo tempore: Acceſſerunt ad Jeſum Phariſæi tentantes eum, & dicentes: Si licet homini dimittere uxorem ſuam, quacumque ex cauſa? Et reliqua.

Homilia ſancti Joannis Chryſoſtomi,

Homilia 12. in Matth. cap. 19. circa med.

**J**udæi in finibus ſuis conſtitutum Dominum tentaverunt, & repulerunt, & in fornicationibus ſuis corporalibus fornicationem

Aa ſuam



suam confessi sunt spiritualement, dicentes: Si licet viro dimittere uxorem suam quacumque ex causa? Quia non potest animo esse castus, qui corpore est lascivus: hoc est, non potest Deo esse fidelis, qui uxori suae perfidus est: sicut nec ex diverso conscientiam servat, qui Deo fidem non servat; sed altera alterius fornicationis est accusatrix. Et illi quidem secundum carnem interrogabant, quæ pati merebantur secundum spiritum. **R.** Hæc est. 273.

*I 321a VIII.*

**C**hristus autem respondit eis, quod facere eos non decebat, dicens: Quicumque dimiserit uxorem suam, nisi ob causam fornicationis, & aliam duxerit, moechatur. Sicut enim uxorem quocumque modo contra voluntatem viri agentem, dignum est repellere: non autem est iustum, quantum ad gravitatem viri, nisi ob causam fornicationis: sic & Ecclesia quocumque modo contra voluntatem egerit Christi, digna est abjici: non autem abjicitur, propter longanimitatem Christi, nisi sola causa transgressionis. **R.** Media nocte. 273.

*Lectio ix.*

**S**icut enim si Christus prius dimisisset Ecclesiam Judæorum, non eis subministrans per Scripturas notitiam suæ divinitatis, ipse faciebat eam adulteram cum diis extraneis: quoniam natura rationabilis & subdita Deo crea-

ta, sine Deo non potest esse: sic Christo semper eis scientiam suæ divinitatis subministrante, quoniam Synagoga spernens transibat ad idola, inexcusabilis adultera reperta est. Propter quod repulit Christum, non repulit eam Christus, non quacumque ex causa, sed propter causam fornicationis ipsius: quia non solum diabolo se conjunxit, sed etiam interfecit eum, pro quo mori debuerat. Ab initio enim Deus genuit Christum: deinde creavit hominem quasi conjugem, & potentem suscipere verbum ipsius. Ideo clamat: Quod Deus conjunxit, homo non separet. **Te** Deum laudamus.

## INFRA OCTAVAM MARTYRIS

*non Virginis.*

### SECUNDA DIE.

*In Secundo Nocturno.*

*Sermo sancti Basilii Episcopi.*

*In Iuventutem Martirem. Lectio iv.*

**Q**uæ de beata martyre **N.** prædicatio se offert vobis depromenda, hujusce est causa congregationis. Hunc enim diem vobis indiximus celebriter agendum, quippe qui memoriā novat magni illius certaminis, quod in muliebri quidem corpore, generoso alioquin animo & plusquam virili desudatum, omni admiratione stuporeve percussit, cum illos, qui & ipsi præsentēs spectarunt decertantem, tum eos, qui auditu percepturi sunt

sunt in posterum, referentibus his, qui re ipsa tanti istius agonis periculum fecerunt.

**R.** Propter veritatem, & mansuetudinem, & iustitiam: \* Et deducet te mirabiliter dextera tua. \* Specie tua, & pulchritudine tua intende, prosperè procede, & regna. Et deducet.

Lectio v.

**B**eatissima igitur mulier **N.** (si tamen decori ratio permittit, eam vocari mulierem, quæ heroica animi fortitudine supergressa est infirmam naturæ muliebri conditionem) cujus unius magnanimitate & constantia maximoperè crediderim consternatum esse & perculsum communem humani generis adversarium, nimirum indignissimè ferentem à mulieribus sibi præripi palmam victoriæ; cum iste generosæ hujus mulieris virtute tantò conspicitur inferior, quàm, quo primum tempore sollicitabatur, ut à Christo deficeret, adnissus est elidere argumentis & convincere inconstantiam, quasi quæ per naturæ infirmitatem minus posset continenter pietatem erga Deum tueri, servare vè, hanc denique invenit, doctrice experientia, conditione naturæ fortio-rem.

**R.** Dilexisti iustitiam, & odisti iniquitatem: \* Propterea unxit te Deus, Deus tuus oleo lætitiæ. \* Propter veritatem, & mansuetudinem, & iustitiam. Propterea.

**H**æc porrò nullam ad rem earum, quæ interim dum vivitur, oblectare nos assolent, visa est festinè adeò excurrere, atque ad destinatam sibi mortem concita perrexit, facie, habitu, ipsis quæ depromebat verbis, alacritate insuper efflorescente, palàm indicans, quod in animo delitescbat, profusissimum gaudium. Ex eadem quippe massa, qua & viri & ipsæ constamus, dicebat: Ad imaginem Dei perinde ac isti, & nos conditæ sumus. Est sanè mulier ab opifice creata, peræquè ac vir, capax virtutis, Quid enim miri est? An non consanguineæ & ipsæ sumus viri per omnia? non enim ad constituendam mulierem sola est assumpta caro, sed & os ex ossibus: quo fit ut & ipsæ Domino nihil minùs ac viri redhibere debeamus firmitatem fidei, atque constantiam, nec non in adversis patientiam.

**R.** Fallax gratia, & vana est pulchritudo: \* Mulier timens Deum, ipsa laudabitur. \* Date ei de fructu manuum suarum, & laudent eam in portis opera ejus. Mulier. Gloria Patri. Mulier.

TERTIA DIE.

In Secundo Nocturno.

Sermo sancti Augustini Episcopi.

Serm. 94. de Temp.

Lectio ix.

**C**ertamine universorum martyrum fulciri, atque eorum victoria, quorum natalis victoris gloriæ celebratur, quo robusta fides fit ad agonem, & passio-



onis congressus, roborari debemus: certò scientes, quòd in omnibus Christus patitur, & quòd ad regnum cœlorum statim cum exultatione corporis transferuntur: & cum gentes horreant in ægritudine mortem, hi in ipsa morte consequantur perpetuam hæreditatem. Per passionem verò translationem magis credunt esse, quàm finem. Martyrium est igitur indulgentia criminum, virtutum caput, occasio iustitiæ, Dominicæ passionis imitatio.

Propter veritatem. 279.

*Lectio v.*

**I**nclytæ beatorum animæ, & gloriosa victoria martyrum, inter quos devotissimæ fæminæ simul sæculum sexumque vicerunt, præliantes cum diabolo, fortiores viris torquentibus extiterunt, quæ carnifici gratias agentes erant sævienti. Ab omnibus enim fidem expectat Deus omnipotens magis, quàm mortem: sed diabolus, qui confitentes odit, coronas præstat invitus. Facit martyres, quos occidit, & cum Dei servos vincere contendit, contemnitur ipse dum sævit.

Dilexisti. 279. *Lectio vi.*

**L**iberalitas ergo tua Deus hætenus nobis martyria proposuit, ut adversarius, quo Adam elusus est, à filiis Adæ constanter elidi monstraretur. Voluisti enim hominem non tantum de diaboli potestate eruere per fidem, sed inculcatorem ejus in-

terficere per virtutem; ut, qui gaudemus Christi sanguine mortui, facilius liberati, ducentes martyria, in Christo postea triumphemus coronati, per ipsum Dominum nostrum Jesum Christum, qui vivit & regnat in sæcula sæculorum. Amen.

Fallax. 279.

## QUARTA DIE.

*In festo S. Basilidis.*  
Sermo venerabilis Bedæ Presbyteri.

**U**am laxo sinu de prælio revertentes civitas cœlestis excipit, de hoste prostrato trophæa ferentibus occurrit! Cum triumphantibus viri & fæminæ veniunt, quæ cum sæculo sexum quoque vicerunt, & geminata gloria militiæ, virgines cum pueris teneros annos virtutibus transeuntes: sed & cætera fidelium turba aulae perpetuæ regiam intrabit, qui sinceritatem fidei inconcussis præceptorum cœlestium disciplinis unita pace observaverunt. *Propter. 279.*

*Lectio v.*

**E**Rgo agite nunc fratres, egrediamur iter vitæ, revertamur ad civitatem cœlestem, in qua scripti sumus, & cives decreti. Non sumus hospites, sed cives Sanctorum, & domestici Dei, etiam illius hæredes, cohæredes autem Christi. Hujus nobis urbis januas aperiet fortitudo: & fiducia latū præbebit ingressum. Consideremus ergo inclytam urbis illius felicitatem, in quantum con-

considerare possibile est: ut enim verè est, comprehenderenullus sermo sufficiet.

R. Dilexisti. 279. **Lectio vi.**

**D**icitur de ea in quodam loco sic, Quòd aufugiet ibi dolor, & tristitia, & gemitus. Quid hac vita beatius, ubi non est paupertatis metus, non ægritudinis imbecillitas? Nemo lædetur, irascetur nemo, nemo invidet, cupiditas nulla exardescit: nullum ibi desiderium honoris pulsat, aut potestatis ambitio. Nullus ibi diaboli metus, insidiæ dæmonum nullæ, terror gehennæ procul: mors neque corporis, neque animæ erit, sed immortalitatis munere vita jucunda.

R. Fallax. 279.

## QUINTA DIE.

In secundo Nocturno.

Sermo sancti Augustini Episcopi.

Serm. 105. de Divitiis. cap. 1. **Lectio v.**

**H**odiernus dies anniversaria replicatione nobis in memoriam revocat, & quodammodo repræsentat diem, quo sancta famula Dei **N.** corona martyrii decorata, perpetua felicitate floruit. Exhortationes ejus in divinis revelationibus, triumphosque passionis audivimus, mente spectavimus, religione honoravimus, charitate laudavimus. Debetur etiam à nobis tam devotæ celebritatis sermo solemniter: quem si meritis ejus imparem profero, impigrum tamen affectum gaudio tantæ festivitatis exhibeo. Quid enim gloriosius

hac fæminâ, quàm viri mirantur facilius, quàm imitantur?

R. Propter. 279. **Lectio v.**

**S**ed hoc illius potissimum laudis est, in quem credentes, & in cujus nomine fideli studio concurrentes secundum interiorum hominem, nec masculus, nec fæmina inveniuntur: ut etiam in his, quæ sunt fæminæ corpore, virtus mentis sexum carnis abscondat, & in membris pigeat cogitare, quod in factis non potuit apparere. Calcatus est ergo draco pede casto, & victore vestigio, cum erectæ demonstrarentur scalæ, per quas beata **N.** iret ad Deum. Ita caput serpentis antiqui, quod fuit præcipitum fæminæ cadenti, gradus factus est ascendentem.

R. Dilexisti. 279. **Lectio vi.**

**Q**uid hoc spectaculo suavius, quid hoc certamine fortius, quid hac victoria gloriosius? Tunc fremebant gentes, & populi meditabantur inania: sed, Qui habitat in cœlis, irridebat eos, & Dominus subsannabat eos. Nunc autem posteri illorum, quorum voces in carne martyris impiè sæviebant, merita martyris piis vocibus laudant. Neque enim tunc tanto concursu hominum ad eam occidendam cavea crudelitatis impleta est, quanto nunc ad eam honorandam Ecclesia pietatis impletur. Omni anno spectat cum religione charitas, quod uno die cum



sacrilegio commisit impietas.

**R.** Fallax. 279.

## SEXTA DIE.

*In secundo Nocturno.*

De Sermone S. Augustini Episcopi.

*Unde supra.*

*Lectione IV.*

**S**pectaverunt & illi, sed longè voluntate diffimili. Illi viderunt oculis carnis, quod cordis immanitati refunderent; nos aspiciamus oculis cordis, quod illis ereptum est, ne viderent. Illi mortuum lætati sunt corpus martyris; nos mentes mortuas dolemus illorum. Illi sine lumine fidei martyrem putaverunt extinctam; nos fidelissimo intuitu cernimus coronatam. Denique illorum insultatio, facta est nostra exultatio: & hæc quidem religiosa & sempiterna, illa verò tunc impia, nunc planè jam nulla. **R.** Propter. 279.

*Cap. 3.*

*Lectione V.*

**P**ræmia martyrum, charissimè, maxima credimus, & relictissimè credimus, sed si certamina diligenter intueamur, nequàmquam illatam magna esse mirabimur. Vicit in eis qui vixit in eis: ut qui non sibi, sed illi vixerunt, ne mortui morerentur. Ipse eis exhibebat spirituales delicias, ne sentirent corporales molestias: quantum non defectio- ni, sed exercitationi sufficeret. Nam ubi erat illa fæmina, quando se pugnare non sensit? quid videns ista non viderat, quo fru- ens ista non senserat? Quo amo-

re alienata, quo spectaculo avo- cata, quo poculo inebriata?

**R.** Dilexisti. 279.

*Cap. 4.*

*Lectione VI.*

**E**t adhuc hærebat nexibus carnis, adhuc moribunda membra gestabat, adhuc corruptibili corpore gravabatur. Quid cum resolutæ his vinculis animæ martyrum post labores periculosi certaminis, triumphis Angelicis exceptæ atque resectæ sunt, ubi non eis dicitur, Implete quod iussi; sed, Accipite quod promissi? Qua nunc jucunditate spiritaliter epulantur, quàm securi in Domino, & quàm sublimi honore gloriantur, quis terreno docere possit exemplo?

**R.** Fallax. 279.

## SEPTIMA DIE.

*In secundo Nocturno.*

De Sermone S. Augustini Episcopi.

*Unde supra.*

**L**ia est animarum sine ullis corporibus requies, alia cum corporibus cœlestibus claritas & felicitas Angelorum, quibus æquabitur resurgentium multitudo fidelium: in qua gloriosissimi martyres præcipua sui honoris luce fulgebunt, ipsaque corpora, in quibus indigna tormenta per- pessi sunt, eis digna in ornamen- ta vertentur. Unde solemnitates eorum, sicut facimus, devotissimè celebremus: sobria hilari- tate, casta congregatione, fideli cogitatione, fidenti prædicatione. Non parva pars imitationis est meliorum congaudere vir- tutibus.

tutibus. Illi magni, nos parvi: sed benedixit Dominus pusillos cum magnis. Præcesserunt, præminuerunt. Si eos sequi non valeamus actu, sequamur affectu: si non gloria, certè lætitia: si non meritis, votis: si non passione, compassione: si non excellentia, connexione. Non nobis parum videatur, quòd corporis membra sumus; cujus & illi, æquiparari non possumus.

*R. Propter. 279. Lectio v.*

**Q**uia, si unum membrum patitur, compatiuntur omnia membra: ita cum glorificatur unum membrum, congaudent omnia membra. Gloria capiti, unde consulitur & superioribus manibus & infimis pedibus. Sicut ille unus animam suam pro nobis posuit, ita & imitati sunt martyres, & animas suas pro fratribus posuerunt: atque ut ista populorum tamquam germinum copiosissima fertilitas surgeret, terram suo sanguine rigaverunt. Fructus laboris ergo illorum etiam nos sumus. Miramur eos, miserantur nos. Gratulamur eis, precantur pro nobis. Illi corpora sua tamquam vestimenta prostraverunt, cum pullus Dominum portans in Ierusalem duceretur: nos saltem velut ramos de arboribus cædentes, de sepulchris sanctis hymnos laudesq; decerpimus, quas in commune gaudium proferamus. *R. Dilexisti. 279.*

**P**rofectò virilis animus in fæminam majus aliquid fecit, quando sub tanto pondere fragilitas fæminea non defecit. Benè inhæserat uni viro, cui virgo casta unica exhibetur Ecclesia. Bene, inquam, inhæserat illi viro, à quo virtutem traxerat, qua resisteret diabolo: ut fæmina prosterneret inimicum, qui per fæminam prostraverat virum. Ille in ea apparuit invictus, qui pro ea factus est infirmus. Ille eam, ut meteret, fortitudine implevit, qui eam, ut seminare, semetipsum exinanivit. Ille eam ad hos honores laudesque perduxit, qui pro ea opprobria, & crimina audivit. Ille fecit fæminam viriliter & fideliter mori, qui pro ea dignatus est de fæmina misericorditer nasci.

*R. Fallax. 279.*

## IN DIE OCTAVA.

*In Secundo Nocturno.*

*De Sermone S. Augustini Episcopi.*

*Serm. 118. de Diversis, cap. 2.*

*Lectio iv.*

**D**e solemnibus sanctarum martyrum debitus sermo reddendus est charitati vestræ. Locuturos ergo nos de gloria martyrum adjuvent orationes martyrum. Nec enim per istas solemnitates commemorari debuit sanctitas vestra, primum ne arbitremur nos aliquid conferre martyribus, quia earum dies solemnissimos celebramus. Illæ



nostris festivitibus non egent, quia in cœlis cum Angelis gaudent. Ad hoc istæ festivitates in Ecclesia constitutæ sunt, ut congregatio membrorum Christi admoneatur imitari martyres Christi. Hæc est omnino hujus festivitatis utilitas, alia non est. Si enim nobis proponeretur imitandus Deus, responderet humana fragilitas, multum esse imitari eum, cui non potest comparari. *R.* Propter. 279.

**S**ic deniq; ipsius Domini Christi ad imitationem nobis proponatur exemplum: qui propterea, cum Deus esset, mortali carne vestitus est, ut hominibus mortalem carnem gerentibus insinuaret præceptum, & demonstraret exemplum: de quo etiam scriptum legimus: Christus pro nobis passus est, relinquens nobis exemplum; ut sequamur vestigia ejus. Tamen & adhuc respondet hic humana fragilitas: Quid simile ego, & Christus? Et si verbum caro factum est, ut habitaret in nobis; carnem assumpsit Verbum, non perdidit. Quod non erat accepit; non quod erat, amisit. Quid ergo simile ego, & Christus?

*R.* Dilexisti. 279. *Lectio vi.*

**A**d tollendas igitur omnes excusationes infidelis infirmitatis, nobis stratam construxerunt viam. Lapidibus enim talibus construenda erat. Ergo, qui

habitant in domo tua, possident Jerusalem cœlestem sine angustia, sine pressura, sine divinitate, & divisione limitum. Omnes habent eam, & singuli habent totam. Similes enim ei erimus, quoniam videbimus eum sicuti est. Jam similes illi, quando deficiemus, quò avertemur? Securi ergo sumus, fratres, non nos satiabit laus Dei. Si deficiēs ab amore, deficiēs à laude. Si autem amor sempiternus erit, quia insatiabilis illa pulchritudo erit; noli timere, ne non possis semper laudare, quem semper poteris amare. Ego beati, qui habitant in domo tua, in sæcula sæculorum laudabunt te.

*R.* Fallax. 279.

## INFRA OCTAVAM MARTYRUM

non virginum.

*Homilia ii. in Evangelio Matthei. cap. 13. Simile est regnum cœlorum thesauro, &c. In die Iero habetur Homilia S. Gregorii. Cœlorum regnum fratres, &c. in Brevario in Commemoratione Virginum.*

## SECUNDA DIE.

In tertio Nocturno.

*Lectio S. Evangelii secundum Mattheum.*

*Lectio vii. Cap. 13.*

**I**n illo tempore: Dixit Jesus discipulis suis parabolam hanc: Simile est regnum cœlorum thesauro abscondito in agro. Et reliqua.

*De Homilia sancti Gregorii Papæ.*

*Homilia ii. in Evangelia.*

**R**ursus cœleste regnum negotiatori homini simile dicitur, qui bonas margaritas quærit, sed unam pretiosam invenit, quam

quam videlicet inventam, omnia vendens emit: quia qui cœlestis vitæ dulcedinem, in quantum possibilitas admittit, perfectè cognoverit, ea quæ in terrenis amaverat, libenter cuncta derelinquit; in comparatione ejus vilesunt omnia, deserit habita, congregata dispergit: inardescit in cœlestibus animus, nihil in terrenis libet: deforme conspicitur, quicquid de terrenæ rei placebat specie, quia sola pretiosæ margaritæ claritas fulget in mente.

**R.** Os suum aperuit; sapientiæ, & lex clementiæ in lingua ejus: consideravit semitas domus suæ: \* Et panem otiosa non commedit. **V.** Gustavit; & vidit, quia bona est negotiatio ejus: non extingvetur in nocte lucerna ejus. **Et panem.**

*Sequentes dicit Lectio: de sancto infra Octavam Martini. Quod si non fuerit Martyr, vel si fuerit pius Martyr, sic omnis, reputatur a m. et post hoc peragitur, et hoc est officium Martini.*

**D**E cujus dilectione rectè per Salomonem dicitur: Fortis est, sicut mors, dilectio; quia videlicet sicut mors corpus interimit, sic ab amore rerum corporali-um æternæ vitæ charitas occidit. Nam quem perfectè absorberit, ad terrena foris desideria velut insensibilem reddit. Nec enim Sancta hæc, cujus hodie natalitia celebramus, mori pro Domino potuisset in corpore, si prius à terrenis desideriis mortua non fuisset in mente: erectus

namque in virtutis culmine animus tormenta despexit, præmia calcavit. Ante armatos reges & præfides invicta stetit, feriente robustior, judicante sublimior.

**R.** Regnum mundi, & omnem ornatum sæculi contempsit propter amorem Domini mei Jesu Christi: \* Quem vidi, quem amavi, in quem credidi, quem dilexi. **V.** Eructavit cor meum verbum bonum, dico ego opera mea regi. Quem vidi. Gloria Patri. Quem vidi. **Lectio ix.**

**Q**uid inter hæc nos dicimus, qui ire ad regna cœlestia puellas per ferrum videmus, quos ira superat, superbia inflat, ambitio perturbat, luxuria inquinat? Qui si adipisci regna cœlorum per bella persecutionum non possumus, hoc ipsum nobis turpe sit, quòd Deum nolumus saltem per pacem sequi. Ecce nulli nostrum hoc tempore dicit Deus, Pro me morere: sed illicita tantummodò in te desideria occide. Qui ergo in pace subigere carnis desideria nolumus, quando in bello pro Domino ipsam carnem daremus? **Te Deum laudamus.**

*Pro nec virgine nec matre & pro pluribus Martyribus. Lectio viii.*

**R**ursus simile esse regnum cœlorum sagenæ in mare missæ dicitur, ex omni genere piscium congreganti, quæ impleta ad litus educitur, & in vasis boni pisces eliguntur, mali autem projiciuntur foras. Sancta Ecclesia sagenæ



sagenæ comparatur, quia & piscatoribus est commissa, & per eam quisque ad æternum regnum à præsentis sæculi fluctibus trahitur, ne in æternæ mortis profundo mergatur. Quæ ex omni genere piscium congregat: quia ad peccatorum veniam sapientes & fatuos, liberos & servos, divites & pauperes, fortes & infirmos vocat.

*Regnum. 285.*

*Lectio ix.*

**Q**uæ sagenæ, scilicet Ecclesia, tunc universaliter repletur, cum in fine suo humani generis summa concluditur. Quam educunt, & secus littus sedent: quia sicut mare sæculum, ita sæculi finem significat littus maris. In quo boni pisces in vasis eliguntur, mali autem projiciuntur foras: quia & electi quique in tabernacula æterna recipiuntur, & interni regni luce perditæ, ad exteriores tenebras reprobi pertrahuntur. **Te** Deum laudamus.

### TERTIA DIE.

*In testis Nocturno.*

*Lectio sancti Evangelii secundum Mattheum.*

*Lectio vii.*

*Cap. ix.*

**I**n illo tempore: Dixit Jesus discipulis suis parabolam hanc: Simile est regnum cœlorum thesauro abscondito in agro. Et reliqua.

*De Homilia S. Gregorii Papæ. Unde supra.*

**E**cce quàm grata est nobis hodierna solemnitas, ita ut se non modicum addicat, si cui ex hoc conventu nostro deesse contingat. Quid ergo in die illa a-

cturus est, qui à conspectu iudicis rapitur, ab electorum societate separatur, qui tenebrescit à lumine, cruciatur æterna combustione? Sic erit in consummatione sæculi. Exhibunt Angeli, & separabunt malos de medio iustorum. Hoc jam, fratres charissimi, timendum est potius, quàm exponendum. Aperta enim voce tormenta peccantium dicta sunt, ne quis ad ignorantia suæ excusationem recurreret, si quid de æterno supplicio obscurè diceretur.

*Os suum. 285.*

*Lectio viii.*

**S**ed in eo quod veritas dicit, Omnis scribe doctus in regno cœlorum similis est patrifamilias; intelligi valet, quia non de iis qui fuerant, sed de iis, qui esse in Ecclesia poterant, loquebatur: qui tunc nova & vetera proferant, cum utriusque Testamenti prædicamenta vocibus & moribus loquuntur. Quod tamen intelligi & aliter potest. Vetustum quippe humani generis fuit, ad inferni claustra descendere, pro peccatis suis supplicia æterna tolerare: cui per Mediatoris adventum, novum aliquid accessit, ut si hic rectè studeat vivere, cœlorum regna valeat penetrare.

*Regnum. 285.*

*Lectio ix.*

**E**t vetus itaque est, ut pro culpa humanum genus in æterna pœna intereat; & novum, ut conversus in regno vivat. Quod ergo in conclusione locutionis

tionis suæ Dominus subdidit, hoc est utique quod præmisit. Prius enim de regni similitudine thesaurum inventum, ac bonam margaritam protulit: postmodum verò inferni pœnas de maiorū combustionem narravit. Audiatur de regno, quod amet, audiat de supplicio unusquisque quod timeat: ut torpentem animum, & terræ vehementer inhærentem, si amor ad regnum non trahit vel timor minet. **Te Deum.**

#### QUARTA DIE.

In tertio Nocturno.

Lectio S. Evangelii secundum Matthæum.

Lectio vii.

Cap. 13.

**I**N illo tempore: Dixit Jesus discipulis suis parabolam hanc: Simile est regnum cœlorum thesauro abscondito in agro. Et reliqua.

Homilia sancti Hieronymi Presbyteri.

Lib. 2. in Matth. cap. 13.

**T**hesaurus iste, in quo sunt omnes thesauri sapientiæ & scientiæ absconditi, aut Deus Verbum est, qui in carne Christi videtur absconditus; aut sanctæ Scripturæ, in quibus reposita est notitia Salvatoris: quem cum quis in eis invenerit, debet omnia istius mundi emolumenta contemnere, ut illum possit habere quem reperit. Quod autem sequitur, Quem cum invenerit homo, abscondit; idcirco dicitur, non quod hoc de invidia faciat, sed quod timore servantis, & nolentis perdere, abscondat in corde suo, quem pristinis

prætulit facultatibus.

**R.** Os suum. 285. **Lectio viii.**

**A**liis verbis idipsum, quod supra, dicitur. Bonæ margaritæ, quas quærit institor, Lex & Prophetæ sunt. Unum autem est pretiosissimum margaritum, scientia Salvatoris, & sacramentum passionis illius, & resurrectionis arcanum. Quod cum invenerit homo negotiator; similis Pauli Apostoli, omnia Legis Prophetarumque mysteria, & observationes pristinas, in quibus inculpate vixerat, quasi purgamenta contemnit & quisquilias, ut Christum lucrifaciat. Non quod inventio novæ margaritæ condemnatio sit veterum margaritarum; sed quod comparatione ejus omnis alia gemma vilior sit. **R.** Regnum mundi. 285.

**Lectio ix.**

**I**ntellexistis hæc omnia? Dicunt ei: Etiam. Ad Apostolos propriè sermo est: quos non vult audire tantum ut populum, sed intelligere ut magistros futuros. Instructi erant Apostoli, scribæ & notarii Salvatoris, qui verba illius & præcepta signabant in tabulis cordis carnalibus, regnorum cœlestium sacramentis, & pollebant opibus patrisfamilie, ejicientes de thesauro doctrinarum suarum nova & vetera: ut quidquid in Evangelio prædicabant, Legis & Prophetarum vocibus comprobarent. Unde & sponsa dicit in Cantico cantico-  
rum:



rum: Nova & vetera, fratrueis  
meus, servavi tibi. **Te Deum**  
laudamus.

### QUINTA DIE.

In tertio Nocturno.

Lectio S. Evangelii secundum Matthæum.

Lectio vii. Cap. 13.

**I**N illo tempore: Dixit Jesus discipulis suis parabolam hanc: Simile est regnum cœlorum thesauro abscondito in agro. Et reliq.

Homilia sancti Joannis Chrysostomi.

Ex Homilia 28. in Matth.  
circa medium.

**P**erpendis, quomodo in mundo abdita atque celata prædicatio est, & in prædicatione summa felicitas recondita? Nisi ergo cunctas res tuas venundabis, non emes: nisi curiosè quæres, non invenies. Duo hæc quippe nobis ad salutem necessaria sunt, sæcularium rerum contemptus, & jugis vigilantia. Quærebat enim bonas margaritas: & cum invenisset unam pretiosissimam, vendidit quæcumque habebat, ac emit. Una quippe veritas est, nec in multas scinditur partes, ac veluti qui margaritam habet, novit se divitem esse; sic et in prædicatione veritatis, qui ei adhærent, opulentos sese non ignorant.

**R.** Os suum. 285. **Lectio viii.**

**D**Einde, ne confidamus plurimum, quoniam Evangelium suscepimus, neque opinemur sufficere solum nobis fidem ad salutem: horroris plenam affert parabolam. Simile est, in-

quit, regnum cœlorum sagenæ missæ in mare, & cætera. Hanc autem parabolam non interrogatus, sed spontè, atque à se ipso ex parte interpretatur, & formidinem magis amplificat. Nam ne, cum advertis putrida foras ejecta esse, nullum aut parvum ejectionis periculum credas, interpretando subjunxit: Quia in fornacem immittent; & stridore dentium, doloris magnitudinem expressit. Animadvertis, quot perditionis viæ?

**R.** Regnum. 285. **Lectio ix.**

**V**ides, quòd alii vepribus, alii veneno, alii lapidibus, alii zizaniis conteruntur: alii in sagenâ pereunt? Non igitur injuria dictum est, latam esse viam illam quæ in perditionem adducit, ac multos esse qui per eam ingrediuntur. Hæc enim cum dixisset, & ad horrorem terminasset sermonem, atque immoratus amplificasset, adjecit: Intellexistis hæc omnia? Dicunt ei: Utique Domine. Deinde quoniam intellexerunt, laudat, dicens; Propterea omnis scribe doctus in regno cœlorum similis est homini patrifamilias, qui profert de thesauro suo nova & vetera. **Te Deum laudamus.**

### SEXTA DIE.

In tertio Nocturno.

Lectio S. Evangelii secundum Matthæum.

Lectio vii. Cap. 13.

**I**N illo tempore: Dixit Jesus discipulis suis parabolam hanc: Simile

Simile est regnum cœlorum thesauro abscondito in agro. Et reliqua. **R.** Regnum. 285.

LECTIO IX.

De Homilia S. Joannis Chrysostomi.

Unde supra.

**V**ides quomodo vetus Testamentum non ejicit, sed laudibus effert, & thesaurum appellat? Quare qui divinarum Scripturarum imperiti sunt, non erunt hi certè patresfamilias, qui cum nec à seipsis habent, quærere indignum putant, sed negligenter vivendo inedia deperunt. Non autem hi solùm, verùm etiam hæretici expertes sunt hujus beatificationis, quia non possunt emittere nova & vetera; nam cum vetera non teneant, nova credere non possunt: sicut econtrà, qui nova non habent, hi veteribus penitus carent. **R.** Os suum. 285.

LECTIO VIII.

**H**æc enim inter se magno juncta & connexa vinculo sunt. Audiamus igitur, audiamus quicumque Scripturarum lectionem negligimus, quantum damnum, quantam inopiam patiamur. Et opulenti quidem, qui cupiditate pecuniarum insaniunt, assiduè vestes suas, ne tineis corrodantur, excutiant: tu verò cum oblivio, omnibus tineis peior, ac major pestis, animam tuam devoret, non accedes ad libros, non excuties tineas, non ordinabis animam tuam, non aspicias continuè imaginem virtutis, nec

Octav. Rom.

**H**abet enim certè caput & membra omni muliere formosa multò ac venustiora ac pulchriora. Quod igitur caput virtutis est? humilitas certè: quapropter ab ipsa incipit Christus dicens: Beati pauperes spiritu. Hoc caput, etsi nec cæsariem nec crines habeat, sic tamen pulchrum est, ut Deum ad seipsum attrahat. Hæc, & alia quoque membra, magnam vim formositatis effundunt: nec si mille commisceas colores, talem speciem conficies. **T**e Deum.

### SEPTIMA DIE.

In tertio Nocturno.

LECTIO S. Evangelii secundum Matthæum.

LECTIO VII. Cap. 13.

**I**n illo tempore: Dixit Jesus discipulis suis parabolam hanc: Simile est regnum cœlorum thesauro abscondito in agro. Et reliqua.

Homilia sancti Augustini Episcopi.

Quasi ex Matth. quasi. 7

**Q**uæstio est, cur à numero plurali ad singularem transierit, ut, cum quærat homo bonas margaritas, unam inveniat pretiosam, quam venditis omnibus quæ habet, emat. Aut ergo negotiator iste bonos homines quærens, cum quibus utiliter vivat, invenit unum præ omnibus sine peccato, mediatorem Dei & hominum hominem Christum Jesum. Aut præcepta justitiæ

Bb

quæ-



quærens, quibus servatis cum hominibus rectè conversetur, invenit dilectionem proximi, in quo uno dicit Apostolus omnia contineri. *Re. Os suum. 285.*

*Lectio vii.*

**U**t bonus intellectus homo quærit, & invenit unum illum quo cuncti continentur: In principio erat Verbum. Est enim Verbum Domini lucidum candore veritatis, & solidum firmitate æternitatis, & undique sui simile pulchritudine divinitatis, qui Deus penetrata carnis testudine intelligendus est. Ille enim ad margaritam ipsam jam pervenerat, quæ in tegumentis mortalitatis quasi concharum obstaculo, inter profunda hujus sæculi, atque inter duritias saxeas Judæorum aliquando latuerat, qui ait: Et si noveramus Christum secundum carnem, sed nunc jam non novimus.

*Re. Regnum. 285. Lectio ix.*

**Q**uodlibet autem horum trium sit, vel si aliquid aliud occurrere potuerit, quod margaritæ unius & pretiosæ nomine benè significetur, pretium ejus est nos ipsi: qui ad eam possidendam non sumus liberi, nisi omnibus contemptis, quæ temporaliter possidentur. Venditis enim rebus nostris, nullum earum majus accipimus pretium, quam nos ipsos, quia talibus implicati, nostri non eramus. Ut rursus nos ipsos pro illa marga-

rita demus, non quia tanti valeamus, sed quia plus dare non possumus. *Te Deum laudamus.*

## IN DIE OCTAVA.

*In tertio Nocturno.*

*Lectio S. Evangelii secundum Mattheum.*

*Lectio vii. Cap. 13.*

**I**n illo tempore: Dixit Jesus discipulis suis parabolam hanc: Simile est regnum cœlorum thesauro abscondito in agro. Et reliqua.

*De Homilia sancti Augustini Episcopi.*

*Ubi supra, quest. 16.*

**D**eò omnis scriba doctus in regno cœlorum similis est homini patrifamilias, qui profert de thesauro suo nova & vetera. Utrùm ista conclusione exponere voluit, quem dixerit thesaurum in agro absconditum? Quoniam sanctæ Scripturæ intelliguntur, quæ nomine duorum Testamentorum novi & veteris concluduntur: quemadmodum apud alium Evangelistam, gladium bis acutum tali conclusione videtur exponere.

*Re. Os suum. 285. Lectio viii.*

**A**n quia in parabolis ista locutus est, & cum quæssisset ab eis, utrùm intellexissent, Responderunt, se intellexisse? Fortasse ista similitudine ultima patrifamilias proferentis de thesauro suo nova & vetera, ostendere voluit, eum doctum habendum esse in Ecclesia, qui etiam scripturas veteres parabolis explicatas intellexit, ab istis novis accipiens regulas: quia & ista,

*Domi-*

Dominus per parabolas enuntiavit, quamvis ipse Christus esset finis illorum; id est, ut in eo illa vetera complerentur.

*Rz. Regnum. 285. Lectio ix.*

**U**T si ipse, in quo illa complentur & manifestantur, per parabolas adhuc loquitur, donec ejus passio velum discindat, ut nihil sit occultum quod non reveletur: multo magis illa, quæ ad commendandam tantam ejus salutem, tam longè de illo scripta sunt, parabolis operata esse noverimus: quæ cum Judæi ad litteram acciperent, noluerunt esse docti in regno cælorum, neque transire ad Christum, ut auferretur velamen, quod supra cor eorum positum est. *Te Deum laudamus.*

**INFRA OCTAVAM  
NEC VIRGINIS**

*nec Martyris.*

**SECUNDA DIE.**

*In secundo Nocturno.*

*Sermo sancti Gregorii Nazianzeni.*

*In laud. Gorgoniæ, circa medium.*

*Lectio iv.*

**B**EATA *N.* pudicitia quidem laude adeo præstitit, adeoque non modo omnes ætatis suæ mulieres, sed etiam veteres, quæ eo virtutis genere floruisse dicuntur, antecelluit; ut, cum in duo hæc genera vita nostra omnis divisa sit, nimirum in matrimonium & cœlibatum (quorum alterum ut præstantius & divinius, ita majoris quoque laboris & periculi; alterum humilius quidem

& abjectius, cæterum minori periculo obnoxium) vitæ utriusque status incommodis, quidquid in utroque commodi erat, delegerit, in unumque cõegerit, alterius nempe sublimitatem, alterius securitatem: fueritque citra supercilium pudica, cœlibatus commoda matrimonio temperans, ac re ipsa ostendens, neutrum horum suapte natura tale esse, ut nos prorsus vel Deo vel mundo adstringat, vel ab his penitus nos separet.

*Rz. Propter. 279. Lectio v.*

**N**ON enim quia carni conjuncta erat, idcirco à spiritu disjuncta est: nec quia pro capite virum habebat, ideò primarium caput ignoravit: sed mundo naturæque hætenus obsecuta, ut carnis legi, vel ei potius qui hanc carni legem indixit, satisfaceret, totam se postea Deo consecravit. Enimverò divinus Salomon in Proverbiis, faminam domi manentem, virumque amantem laudat, quæ honestè in domo versatur, ac muliebria officia virili & strenuo animo exequitur, semperque ad fufum & colum manus obfirmat, cæteraque omnia præstat, quæ ille de honesta & industria matrona prædicavit. Ego verò si ab his rebus laudandæ *N.* argumenta peterem, similiter facerem, ac si ab umbra statuam laudarem, aut ab unguibus leonem, relictis majoribus & excellentioribus.



Dilexisti. 279.

Lectio vi.

**Q**uam umquam dignior fuit, quæ in publicum se inferret? quam tamen rariùs visa est, minùsque virorum oculis patuit? quam oculos æquè frænavit? quam risum adeò irrisit, adeò ut vel leviter subrisisse propemodum nimium ipsi videretur? quam auri- bus suis januas magis imposuit? quam rursus eas divino sermoni magis apertas habuit? imò quam mentem linguæ moderatricem magis præfecit ad pronuntiandas Dei justificationes? quam modum ordinemque labiis suis magis constituit? Unus illi rubor placebat, quem gignit pudor: unus candor, quem parit abstinentia.

Fallax. 279.

*Lectioes & Respons. tertii Nocturni sumuntur de Comuni Oct. Mart. non virginis. Horatius & Angelus. Simile est regnum celorum thesauro. 284.*

## TERTIA DIE.

In secundo Nocturno.

De Sermone sancti Gregorii Nazianzeni.

Vale super, paulò post.

Lectio iv.

**E**cquæ domum suam piis hominibus excipiendis magis propositam habuit, divinisque opibus magis adauxit? Et quod est præstantius, quam pari pudore, tamque sanctis & Deo gratis incessibus ad eos excipendos perrexit? quam insuper animum in afflictionibus minùs afflictum præstitit? quam rursus calamitosus & ægrotanti-

bus magis condoluit? quam liberaliorem manum egentibus porrexerit? Equidem in illa oranda his Jobi verbis uti non dubitem: Porta ipsius cuivis venienti patebat, nec extrà jacebat peregrinus; cæcorum oculus erat, pes claudorum, mater orphanorum. *R.* Propter. 279.

Lectio v.

**Q**uodque præclarissimum, non magis studebat optima videri, quàm revera esse: quin potius in abscondito apud eum qui abscondita intuetur, pietatem luculenter excolebat. Omnia mundi principi eripuit, omnia in tuta illa horrea transtulit, nihil terræ præter corpus reliquit: omnia cum alterius vitæ spe commutavit: has unas opes moriens reliquit, nempe, probitatis imitationem, atque ejusdem laudis studium. Ac de ipsa non minùs verè, quàm magnificè prædicari potest, quòd virtutes partim imitata est, partim ita gessit, ut earum ab ipsa exempla peterentur, quòdque eas partim invenit, partim superavit. Sic enim omnes virtutum numeros absolvit, ut ne mediocriter quidem unam quisquam alius: sic rursus in unoquoque genere excelluit, ut vel unum solum instar omnium abundè sufficeret.

*R.* Dilexisti. 279. Lectio vi.

**O**squalidum corpus, & indumentum virtute sola florens! o noctes insomnes, & Psalmerum

morum canrus; & stationem ex die in diem desinentem! o nocturnum clamorem nubes penetrantem; ad Deumq; pervadentem! o famineam naturam, quæ propter commune salutis certamen, naturam virilem superasti, atque ostendisti, maris & tæminæ nomine non animos, sed corpora sola distingvi! ô acerbe gustus, & Heva nostri generis & peccati mater, & tu serpens impostor, ac mors denique ipsa, continentia illius, cibique parcitate devicta! o Christi exinatio, & servi forma, & passiones, ipsius mortificatione decoratæ! Sed jam operæ pretium est, præmia quoque pietatis adjicere.

✠. Fallax. 279.

#### QUARTA DIE.

In secundo Nocturno.

Sermo sancti Augustini Episcopi.

Sermone 46. de Diversis, cap. 2.

Lectio iv.

**P**Ræstabit nobis, qui diem istum commendavit in Sanctis suis, ut infirmitas vocis nostræ sufficiat intentioni vestræ. Et hoc quod gestamus in manibus, Scriptura scilicet quam videtis, commendat nobis inquirendam & laudandam mulierem quamdam habentem magnum virum, eum qui invenit perditam, ornavit inventam. Attendite cujus membra estis, inspicite cujus filii estis. Mulierem fortem quis inveniet? Difficile est invenire eam; imò difficile est nescire eam. Nonne ipsa est ci-

vitas in monte, quæ abscondi non potest? quare ergo dictum est, Quis inveniet? cum dici debuerit, Quis non inveniet? Sed tu civitatem in monte positam vides; ut autem in monte poneretur, inventa est quæ perierat.

✠. Propter. 279. Lectio v.

**Q**Uando illustrata est, quis eam non videt? quando latebat, quis eam inveniret? Ipsa enim civitas est una illa ovis, quam perditam quæsit ille pastor, & inventam gaudens in humeris reportavit. Ipse pastor, mons est: ovis autem in humeris ejus: Civitas in monte. Facile est ut videas eam collocatam in monte: quando eam invenires, cum lateret in vepribus, in spinis utique delictorum suorum? ibi enim quæsisse magnum est, ibi invenisse mirabile est. Hæc ejus difficilis inventio commendatur, cum dicit: Mulierem fortem quis inveniet? quis enim, quia unus: non, quia nec unus.

✠. Dilexisti. 279.

Cap. 3.

Lectio vi.

**P**RETIOSIOR est autem lapidibus pretiosis, quæ ejusmodi est. Quid magnum quia pretiosior est mulier hæc lapidibus pretiosissimis? Pretiosi lapides ideò dicti sunt, quia charitate valent. Jam ille vilis est, pretium perdidit, qui non habet charitatem. Doctrinam suam jactet licet, linguam suam jactet licet; audiat æstimatorem verorum lapidum



pidum matronæ hujus audiat, inquam, quemdam artificem ornamenti hujus inspectorem. Si lingvis hominum loquar, inquit, & Angelorum, charitatem autem non habeam, factus sum ærumentum sonans, aut cymbalum tinniens. Jam non fulget, sed tinnit. Ergo discite lapides æstimare, negotiatores regni cœlorum: nullus lapis nobis placeat, præter hujus mulieris ornamētum. **R. Fallax. 279.**

### QUINTA DIE.

In secundo Nocturno.

De Sermone sancti Augustini Episcopi.

Unitio. 279.

Lesio iv.

**O**peratur viro suo bona, & non mala in omni tempore. In omni tempore operatur bonum, & non malum: nec sibi, sed viro: ut, quæ vivit, jam sibi non vivat, sed ei qui mortuus est pro omnibus, & resurrexit. Viro ergo operatur bonum, coram Deo operatur bonum: illi servit, illi devota est: illum diligit, illi placere semper studet & desiderat. Non se ornat, nec propter oculos suos, nec propter oculos alienos. Non est de sibi placentibus, non est de sua quærentibus; operatur enim viro suo. Qui autem sibi operantur, omnes sua quærunt, non quæ Jesu Christi. **R. Propter. 279.**

Lesio v.

Cap. 6.

**I**nveniens lanam & linum, facit utile manibus suis. Lanificam, & linificam matronam

istam sanctus sermo describit. Quæritur autem à nobis, quid sit lana, quid sit linum. Lanam carnale aliquid puto, linum spiritale: interiora sunt enim lineæ vestimenta, lanea exteriora. Quidquid carne operamur, in promptu est: quidquid spiritu, in secreto. Operari enim carne, & non operari spiritu, quamvis bonum videatur, utile non est: operari autem spiritu, & non operari carne, pigrorum est. Invenis hominem porrigentem manum, vel eleemosynam pauperi, nec tamen de Deo cogitantem, sed hominibus placere cupientem: lanea vestis videri potest; interiorē lineam non habet. Invenis alium dicentem: Sufficit mihi in conscientia Deum colere, quid mihi opus est visibiliter misceri Christianis? lineam vult habere sine tunica: non novit, neque commendat talia opera mulieris.

**R. Dilexisti. 279.**

Cap. 6.

Lesio vi.

**E**xurgit de noctibus, & dedit escas domui, & opera ancillis. Quid valent noctes? non eam premunt, non eam in tenebris jacere cogunt. Noctes tribulationes sunt. Sed cui hæc? Et de noctibus confurgit, & in tribulationibus proficit. Et dedit escas domui, in noctibus præbuit se imitandam: faciens docuit quod faciendum dixit: & tunc dedit escas. Quis comedat de nocte?

ete? prorsus & tunc dedit escas: quibus enim dedit, semper esuriunt. Beati enim qui esuriunt & sitiunt iustitiam, quia ipsi saturabuntur. A nocte spiritus meus vigilat ad te Deus. Hæc alimenta nocturna abundant in domo mulieris hujus.

**R.** Fallax. 279.

## SEXTA DIE.

In secundo Nocturno.

De Sermone sancti Augustini Episcopi.

Unde suprâ, cap. 7. **Lesio ix.**

**P**rospiciens agrum mercata est. Prospiciens, non in præsentia; sed in futuro, mercata est agrum istum. Prospiciens fide, spe: inde & de noctibus surgit. Si enim quod non videmus, speramus; per patientiam expectamus. In omnibus tribulationem patiens; prospicit enim agrum quem mercatur. Inde enim mulier fortis dicitur. Quid sunt noctes illæ præ agro illo? Quod enim ad præsens temporale est & leve tribulationis nostræ (cùm de noctibus surgimus) in incredibilem modum æternum gloriæ pondus operatur in nobis (cor habentibus ad agrum illum) non respicientibus quæ videntur, sed quæ non videntur. Qualis est ager ille? quæ pulchritudo ejus est? Inardescamus ad eum possidendum. Putamus, non ipse est, de quo dixit Deus, Et species agri mecum est?

**R.** Propter. 279.

**Lesio v.**

**U**nde mercata est? Ne fortè tu desperes, & suspires, & nihil agas. Ager iste segnem amatorem non amat. Ibi certè, cùm ad eum veneris, forsitan requiesces, nec opus erit ut labores. Non enim est talis ager ille, qualis iste, ubi Adam in sudore vultus sui comedit panem suum. Modò tamen, ut ad illius agri speciem pervenias, compara tibi unde compares agrum, ibi. Quid? collige pretium, hoc enim agit hæc mulier. Vide, si tacitum est, cui dictum est, Prospiciens agrum mercata est; tamquam diceret; Unde mercata est? De fructibus manuum suarum plantavit possessionem: illam enim possessionem dixit, quæ futura est. Hoc insinuat verbo quod ait, Prospiciens. **R.** Dilexisti. 279.

**Cap. 8.**

**Lesio vi.**

**S**uccincta fortiter lumbos suos firmavit brachia sua. Verè fortis, quàm devotè servit, quàm paratè! Ne fluitantes sinus carnalium concupiscentiarum impediant operantem, succingit lumbos, ut nihil superfluum calcet, dum in opere festinat. Ibi enim castitas mulieris hujus, zona præcepti contracta, & ad omne opus bonum semper parata. Unde hoc? Gustavit, quia bonum est operari. Ubi est palatum, quo gustatur hoc? Fugiant homines



laborem, quaſi amarum: timen-  
do guſtare, nesciunt quid ama-  
re. Bonum opus facit conscien-  
tia bona; & quid dulcius fra-  
tres, conscientia bona?

*R.* Fallax. 279.

## SEPTIMA DIE.

*In ſecundo Nocturno.*

*De Sermone ſancti Auguſtini Episcopi.*

*Unde ſupra, cap. 2.*

*Lectio iv.*

**B**rachia quoque ſua firmavit  
in fuſum. Potuit dicere, in  
colum: fuſum dixit, forte non  
frustra. Quamvis poſſit videri,  
nec abſurde intelligi de fuſo la-  
nificium ſignificatum; de lanifi-  
cio bonum opus, tamquam ca-  
ſtae mulieris, & matronae impi-  
grae & diligentis. Tamen ego,  
chariſſimi, in iſto fuſo, quod in-  
telligo, non tacebo. Omnis qui  
vivit in bonis operibus in ſan-  
cta Eccleſia, non neglector, ſed  
effector praeceptorum Dei, quid  
faciat cras, nescit; quid fecerit  
hodie, ſcit. De futuro opere ti-  
met, de praeterito gaudet. In  
orando tamen Domino non ha-  
bet firmam conscientiam de o-  
pere futuro, ſed de praeterito;  
ex eo quod fecit, non ex eo  
quod facturum eſt.

*R.* Propter. 279. *Lectio v.*

**J**am ergo, ſi hoc verum eſſe  
mecum videtis: attendite in  
lanificio duo instrumenta iſta,  
colum & fuſum. In colo lana in-  
voluta eſt, quae filo ducenda &  
nenda tranſeat in fuſum. Quod

in colo eſt involutum, eſt futu-  
rum: quod in fuſo collectum eſt,  
jam praeteritum eſt. Opus ergo  
tuum in fuſo eſt, non in colo:  
in colo enim eſt quod facturum  
es, in fuſo quod feciſti. Vide er-  
go, ſi aliquid habes in fuſo, ubi  
firmentur brachia tua. Ubi erit  
fortis conscientia tua, ibi secu-  
rus eris. Quidquid ergo opera-  
ris, totus animus ad fuſum ſit,  
ut totum coletur ad fuſum, ut  
habeat aliquid fuſum, quod te  
conſoletur, quod te confirmet,  
quod tibi det fiduciam depre-  
candi, & ſperandi promiſſa.

*R.* Dilexiſti. 279.

*Lectio vi.*

**E**T quid agam? forte dicis.  
Quid me jubes habere in fu-  
ſo? Audi quid ſequitur: Manus  
autem ſuas aperuit pauperi. Eja,  
non nos pudeat lanificium ſan-  
ctum docere. Vos videte, ſi quis  
habet plenum macellum, plenum  
horreum, plenam apothecam,  
omnia iſta in colo ſunt; tranſe-  
ant in fuſum. Manus ſuas ape-  
ruit pauperi, fructum autem  
porrexit inopi. Manus pauperi,  
fructus inopi. Eſt quidam pau-  
per, manus tuas quaerit: eſt qui-  
dam inops, fructum tuum quaerit.  
Qui vero non vult a te, niſi  
quod neceſſitati ſuae poſcit, pau-  
per eſt, manus tuas quaerens. Eſt  
autem alius inops, qui dicit: Quasi  
nihil habentes, & omnia poſſi-  
dentes: non quaſi neceſſitati ſuae  
vult ſatiſfieri de dato tuo: ſed  
tamquam

tamquam in arbore Dominica, quam plantavit & rigavit, fructum quærit. Ipsum audi: Non quia quæro datum, sed requiro fructum. *R.* Fallax. 279.

## IN DIE OCTAVA.

*In secundo Nocturno.*

*De Sermone sancti Augustini Episcopi.*

*Unde suprâ, cap. 12.*

*Lectio iv.*

**D**uplicia pallia fecit viro suo. Jam acclamatis: credo, quod agnoscitis, quæ sunt duplicia pallia. Laudes sunt, laudes fidei, laudes confessionis, laudes prædicationis. Quare duplicia? Christum laudas, Deum laudas, & hominem. Dupliciter lauda, simpliciter lauda. Dupliciter, quia homo est, & Deus: simpliciter, ut non sis fictus. Confitere Deum, confitere hominem: lauda Deum in homine, lauda hominem in Deo. Texuit pretiosissimum illud pallium laudis: In principio erat Verbum, & Verbum erat apud Deum, & Deus erat Verbum: hoc erat in principio apud Deum. Texuit & aliud pallium, propter conversationem inter homines quotidianam: Verbum caro factum est, & habitavit in nobis.

*R.* Propter. 279.

*Cap. 16. Lectio v.*

**H**ic ergo ista laboriosa, vigilans, sollicita, severe castigans domum suam, surgens de noctibus, intuens lucernam ne extinguatur, in tribulatione for-

tis, nondum receptis promissis pavens, brachia sua in fufum confirmans, non pigrum panem manducans. Ob labores istos quasi paupertatis & necessitatis sæcularis, quid erit, quia in diebus novissimis lætata est? Quid erit? Audite: propter quam spem ardeat lucerna nostra tota nocte, nunc audite: Surrexerunt filii ejus, & ditati sunt. Modò in paupertate vivimus, in paupertate vigilamus: & cum morimur, in paupertate dormimus: sed surgemus, & ditabimur. Quæ illæ divitiæ sunt Angelorum? unam vestem habent lucis: numquam teritur, numquam sordidatur. Si filius es mulieris hujus, attende quando tibi divitiæ promittantur. Surrexerunt filii ejus, & ditati sunt, parati resurrectionis divitias accipere. Noli has amare, ut merearis ad illas venire.

*R.* Dilexisti. 279.

*Cap. 17. & 18. Lectio vi.*

**E**T vir ejus laudavit eam. Multæ, inquit, filiæ fecerunt potentiam. Laudes sunt, quibus eam laudat vir ejus. Quæ filiæ, quibus hæc comparatur? Non comparatur. Tu autem super æstis. Attendite ergò vos, jam in fine lectionis sumus. Multæ filiæ fecerunt potentias, multæ locutæ sunt linguis, scierunt omnia sacramenta, fecerunt virtutes multas, dæmonia excluderunt, res suas pauperibus distribu-



buerunt, corpora sua ignibus tradiderunt: inflatae sunt, quia charitatem non habuerunt. Tu autem superasti & superposuisti omnes, non solum flore, sed & fructu grvida abundans. Date illi de fructibus manuum suarum. Quid date? Venite benedicti Patris mei. De quibus fructibus manuum ejus? Esuri vi enim, & dedistis mihi manducare. Et quod illi deinde negotium erit, finitis laboribus? & laudetur in portis vir ejus. Ipse erit portus laborum nostrorum, videre Deum, laudare Deum. **R.** Fallax. 279.

**INFRA OCTAVAM  
NEC VIRGINIS  
nec Martyris.**

*Homilia in Evangelium Luc. cap. 7. Ibat Jesus in civitatem, quae vocatur Naim, &c.*

**IN DIE FESTO.**

*In tertio Nocturno.*

*Lectio sancti Evangelii secundum Lucam.*

*Lectio vii. Cap. 7. b.*

**I**N illo tempore: Ibat Jesus in civitatem, quae vocatur Naim: & ibant cum eo discipuli ejus, & turba copiosa. Et reliqua.

*Homilia sancti Augustini Episcopi.  
Sermone 44. de Verbis Domini,  
circa initium.*

**D**E juvene illo resuscitato gavisa est mater vidua: de hominibus in spiritu quotidie suscitatis gaudet mater Ecclesia. Ille quidem mortuus erat corpore; illi autem mente. Illius mors visibilis visibiliter plan-

gebatur: illorum mors invisibilis nec querebatur, nec videbatur. Quæsit ille, qui noverat mortuos. Ille solus noverat mortuos, qui poterat facere vivos. Nisi enim ad mortuos suscitandos venisset, Apostolus non diceret: Surge qui dormis, & exurge à mortuis, & illuminabit te Christus.

**R.** Os suum. 285.

**Lectio viii.**

**T**Res autem mortuos invenimus à Domino resuscitados visibiliter, millia invisibiliter. Quot autem mortuos visibiliter suscitaverit quis novit? Non enim omnia, quae fecit scripta sunt. Joannes hoc dixit: Multa alia fecit Jesus: quae si scripta essent, arbitror, totum mundum non posse libros capere. Multi ergo sunt alii sine dubio suscitati, sed non tres frustra commemorati. Dominus enim noster Jesus Christus ea quae faciebat corporaliter, etiam spiritualiter volebat intelligi. Neque enim tantum miracula propter miracula faciebat: sed ut illa quae faciebat, mira essent videntibus, vera essent intelligentibus. **R.** Regnum. 285.

**Lectio ix.**

**Q**uemadmodum qui videt litteras in codice optime scripto, & non novit legere, laudat quidem antiquarii manum, admirans apicum pulchritudinem: sed quid sibi velint, quid

quid indicent illi apices, nescit; & est oculis laudator, mente non cognitor. Alius autem & laudat artificium, & capit intellectum: ille utique, qui non solum videre quod commune est omnibus, potest, sed etiam legere, quod qui non didicit, non potest. Ita qui viderunt Christi miracula, & non intellexerunt quid sibi vellent, & quid intelligentibus quodammodo innuerent, mirati sunt tantum quia facta sunt: alii verò & facta mirati, & intellecta assecuti. Tales nos in schola Christi esse debemus. Te Deum laudamus.

*Infra Octavam lege Evangelium in Missa & Officio. Simile est regnum coelorum thesauro. cum suis Homiliis, ut in Communi Octava Martyris non Virginis. 284.*

## IN DIE OCTAVA.

*In tertio Nocturno.*

*LECTIO sancti Evangelii secundum Lucam.*

*LECTIO VII. Cap. 7. b*

**I**N illo tempore: Ibat Jesus in civitatem, quæ vocatur Naim: & ibant cum eo discipuli ejus, & turba copiosa. Et reliqua.

*Homilia sancti Ambrosii Episcopi.*

*Lib. 5. Commencet. in Luc. cap. 7. post laudum.*

**E**T hic locus ad utramque redundat gratiam: & ut citò flecti divinam misericordiam matris viduæ lamentatione credamus, ejus præcipuè, quæ unici filii vel labore, vel morte frangatur; cui tamen viduæ gravitatis meritum exequiarum

turba conciliet: & ut hanc viduam populorum turba septam, plus videri esse quàm fæminam, quæ resurrectionem unici & adolescentis filii suis lacrymis meruerit impetrare: eò quòd sancta Ecclesia populum junio-rem à pompa funeris, atque à supremis sepulchri, suarum revocet ad vitam contemplatione lacrymarum: quæ flere prohibetur eum, cui resurrectio debebatur.

*R. Os suum. 285. 1*

*LECTIO VIII.*

**Q**ui quidem mortuus in loculo materialibus quatuor ad sepulchrum ferebatur elementis: sed spem resurgendi habebat, quia ferebatur in ligno. Quod etsi nobis antè non proderat, tamen posteaquam Jesus id tetigit, proficere cœpit ad vitam: ut esset indicio, salutem populo per crucis patibulum refundendam. Audito igitur Dei verbo, steterunt acerbi illi funeris portitores, qui corpus humanum lethali fluxu naturæ materialis urgebant. Quid enim aliud, nisi quasi in quodam feretro, hoc est, supremi funeris instrumento, jacemus exanimis; cum vel ignis immodicæ cupiditatis exæstuat, vel frigidus humor exundat, vel pigra quadam terreni corporis habitudine vigor hebetatur animorum, vel concreta noster spiritus la-  
be,



be, puræ lucis vacuus mentem  
alit? Hi sunt nostri funeris  
portitores.

Regnum mundi. 285.

*Oratio ix.*


**S**ed quamvis suprema mortis  
spem vitæ omnis aboleve-  
rint, & tumulo proxima corpo-  
ra jaceant defunctorum; verbo  
tamen Dei jam mortua resur-  
gunt cadavera: vox redit, red-  
ditur filius matri, revocatur à  
tumulo, eripitur à sepulchro.  
Quis iste est tumulus tuus, nisi  
mali mores? Tumulus tuus per-  
fidia est: sepulchrum tuum gut-

tur est. Sepulchrum enim pa-  
tens, est guttur eorum, unde  
verba mortua proferuntur. Ab  
hoc sepulchro te liberat Chri-  
stus: ab hoc tumulo surges, si  
audias verbum Dei. Et si gra-  
ve peccatum est, quod pœniten-  
tiæ lacrymis ipse lavare non  
possis: fleat pro te mater Eccle-  
sia, quæ pro singulis tamquam  
pro unicis filiis vidua mater in-  
tervenit. Compatitur enim quo-  
dam spiritali dolore naturæ,  
cùm suos liberos lethalibus vi-  
tiis ad mortem cernit urgeri.

**T**e Deum laudamus.


F I N I S.


















Biblioteka Jagiellońska



stdr0023526



